



B 7

4

313

BIBLIOTECA NAZIONALE  
CENTRALE - FIRENZE

Lucanus, M. hemisus.









JACTA EST ALEA.

*Innocentii Alexandri sculptor*



MARCI ANNAEI  
LUCANI  
PHARSALIA  
SIVE  
DE BELLO CIVILI  
LIBRI DECEM


CUM SUPPLEMENTO  
THOMÆ MAII ANGLI.



VENETIIS MDCCLXXXIII  
Apud Thomam Bettinelli

*Cum Facultate ac Privilegio*







# M. ANNÆI LUCANI

## V I T A

EX COMMENTARIO ANTIQUISSIMO.

**M**ARCUS ANNÆUS LUCANUS patrem habuit M. Annæum Melam ex provincia Bætica Hispaniæ interioris, Cordubensem Equitem Rom. illustrem inter suos; notum Romæ, & propter Senecam fratrem, clarum per omnes virtutes virum, & propter studium vitæ quietioris; quod sequens, quo magis a turba recedebat, minus latebat. Matrem habuit & regionis ejusdem & urbis Aciliam nomine, Acilii Lucani filiam, oratoris operæ apud proconsules frequentis, & apud clarissimos viros non nullius ingenii; adeo non improbandus, ut inscriptis aliquibus hodie quoque duret ejus memoria: cujus cognomen huic inditum adparet. Natus est III Non. Novemb. C. Cæsare Augusto Germanico II, L. Cæ-

ipsi exitium, domesticis luctum miserabilem adtulerunt. Inter amicos enim Cæsaris, quod tam conspicuus fieret profectus in poetica, frequenter offendebar. Quippe & certamine pentaterico aëto in Pompeji theatro laureis, recitante Nerone, fuerat coronatus, & ex tempore Orphea scriptum in experimentum ingenii ediderat; & tres libros quales videmus. Quare inimicum sibi fecit Imperatorem. Quo ambitiose imitante non hominum tantum, sed & artium sibi principatum vendicante, interdictum est & poetica, interdictum est etiam caussarum actionibus. Hoc factum Cæsaris juvenili æstimans animi calore, speransque ultionem, a conjuratis in cædem Neronis socius adsumtus est: sed parum fauste. Deceptus est enim a Pisone & Consularibus, aliisque prætura pèrfunctis illustribus viris. Dum vindictam expetit, in mortem irruit. Nam sua sponte coactus vitæ excedere, venas sibi præcidit; periitque prid. Cal. Majas Attico Vestino, & Nerva Sylano Coss. XXVII ætatis annum agens: non sine jactura utilitatis; quum patriæ, quæ tantam immature amisit indolem; tum studiorum quoque. Reliqui enim VII Belli civilis libri locum calu-

mniantibus, tamquam mendosi non darent. Qui tametsi sub vero crimine non egent patrocínio, de iisdem dici, quod in Ovidii libris præscribitur, potest: *Emendaturus, si licuisset, erat*. Exstant ejus & alii complures; ut, (\*) Iliacon. Saturnalia. Catascomon. Silvarum X. Tragœdia Medea imperfecta. Salticæ Fabulæ XIV. Et Hippamata prosa oratione in Octavium Sagittam: & pro eo, de incendio urbis. Epistolarum ex Campania. Non fastidiendi quidem omnes: tales tamen, ut belli civilis videatur accessio.

(\*) In indiculo hoc Operum Lucani pleraque sunt aut corrupta aut obscura. Jo. Alb. Fabricius ea clarius & verius his verbis enumerat: Deperdita Lucani sunt, Catacusmos Iliacus, Catalogus Heroidum, Hectoris lytra, Orpheus, Saturnalia, Silvarum Libri X, Medea Tragœdia imperfecta, Hypomnemata prosa oratione in Octavium Sagittam, & pro eo Declamationes, Epistolæ ex Campania, Satyricæ Fabulæ XIV &c. &c.





M. ANNÆI LUCANI

VITÆ

FRAGMENTUM

EX C. SUETONII TRANQUILLI

(UT VIDETUR)

LIBRO DE CLARIS POETIS.

**M.** ANNÆUS LUCANUS Cordubensis prima ingenii experimenta in Neronis laudibus dedit quinquennali certamine. Dein Civile bellum, quod cum Pompejo a Cæsare gestum est, recitavit. Qui tantæ levitatis & immoderatæ linguæ fuit, ut in Præfatione quadam ætatem & initia sua cum Virgilio comparans, ausus sit dicere: *Et quantum mihi restat ad Culicem?* Hic initio adolescentiæ, quum ob. infestum matrimonium patrem suum ruri agere longe cogno-



visset, revocatus Athenis a Nerone, cohortique amicorum additus, atque etiam quæstura honoratus. Non tamen permansit in gratia. Siquidem ægre ferens recitante se, subito, ac nulla nisi refrigerandi sui causa, indicto Senatu, Neronem recessisse; neque verbis adversus Principem, neque factis exorbitantibus posthæc temperavit. Adeo ut quondam in latrinis publicis, clariore strepitu ventris emissio, hemistichium Neronis, magna consessorum fuga pronunciarit: *Sub terris tonuisse putes*. Sed & famoso carmine quum ipsum, tum potentissimos amicorum, gravissime proscidit. Ad extremum pæne signifer Pisonianæ conjurationis exstitit, multus in gloria tyrannicidarum palam prædicanda; ac plenus minarum; usque eo intemperans, ut Cæsaris caput proximo cuique jactaret. Verum detecta conjuratione, nequaquam animi constantiam præstitit. Facile enim confessus, & ad humillimas devolutus preces; matrem quoque innoxiam inter socios nominavit, sperans impietatem sibi apud parricidam Principem profuturam. Impetrato autem mortis libero arbitrio, codicillos ad patrem corrigendos quibusdam versibus suis exaravit. Epulatusque largi-

# VITÆ FRAGMENTUM. 9

ter, brachia ad secandas venas medico præbuit.  
Poemata ejus prælegi memini: confici vero ac  
venalia proponi, non tantum operose ac dili-  
genter; sed inepte quoque.





# ARGUMENTUM

LIBRORUM

M. ANNÆI LUCANI

SINGULIS VERSIBUS PER SINGULOS  
LIBROS DISPOSITIS. (\*)

*Cæsaris a Gallia reditum canit ad sua Primus.  
Magnum cum patribus profugum docet inde Secundus.  
Tertius excitas notat in sua funera gentes.  
Quartus habet partis mutilas utriusque cohortes.  
Quintus componit cum Cæsare militis iras.  
Sextus Thessaliæ ballis adcommodat oras.  
Septimus exsequitur planctu miserabile bellum.  
Separat Octavus Pompeji morte duellum.  
Nonus arenivagum commendat laude Catonem.  
Cæsar in Pharia Decimus canit urbe vigorem.*



(\*) Hoc Argumentum, & quæ singulis libris præfixa sunt, ex MS. Guelferbyitano, qui olim Rottendorffii, postea Gudianus fuerat, desumpta sunt: quum aliæ editiones Joann. Sulpicii Summaria exhibere soleant.



M. ANNÆI LUCANI  
PHARSALIA.  
LIBER PRIMUS.

---

ARGUMENTUM.

*Cæsaris in primo, Gallis ubicumque subactis,  
Italiam redivit describitur, utque coactis  
Invidia patribus aquilas deponere jussus  
Atque triumphali pompa torpescere cassus.  
Ille dolens tantæ mercede carere laboris,  
Insinuat sociis tantæ monumenta doloris.  
Quorum consilio missos per Gallica rura  
Dirigit, & revocat, quæ liquerat, agmina plura.  
Omnibus instructus Romam petit exagitatus:  
Quo rumore pavens populus fugit atque senatus,  
Monstra deinceps cæli, terra conspecta marique  
Semina bellorum spargenda minantur ubique.*

**B**ELLA per Emathios plus quam civilia campos,  
Jusque datum scelere canimus, populumque potentem

In sua victrici conversum viscera (1) dextra:  
 Cognatasque acies: & rupto fœdere regni,  
 Certatum totis concussi viribus orbis  
 In commune nefas: infestisque obvia signis  
 Signa, pares aquilas, & pila minantia pilis.

Quis furor, o cives? quæ tanta licentia ferri,  
 Gentibus invis Lætium præbere cruorem?  
 Quæmque superba foret Babylon spolianda tropæis  
 Ausoniis, umbraque erraret Crassus inulta,  
 Bella geri placuit nullos habitura triumphos?  
 Heu, quantum terræ potuit pelagique parari  
 Hoc, quem civiles hauserunt, sanguine, dextræ!  
 Unde venit Titan, & nox ubi sidera condit,  
 Quaque dies medius flagrantibus æstuat horis (2),  
 Et qua bruma rigens ac nescia vere remitti,  
 Adstringit Scythico glaciale frigore pontum (3):  
 Sub juga jam Seres, jam barbarus isset Araxes,  
 Et gens, si qua jacet nascenti conscia Nilo.  
 Tunc, si tantus amor belli tibi Roma nefandi,  
 Totum sub Latias leges quam miseris orbem,  
 In te verte manus: nondum tibi defuit hostis.  
 At nunc semirutis pendent quod mœnia tectis  
 Urbibus Italiæ, lapsisque ingentia muris  
 Saxa jacent, nulloque domus custode tenentur (4),

(1) funera MS. male.

(2) oris MS. & Lucret.

(3) schyticum glaciali frigore pontum vulgo.

(4) nullæque MS. unus. tenentur alius. tenetur multi.

Rarus & antiquis habitator in urbibus errat:  
Horrida quod dumis multos inarata per annos  
Hesperia est, desuntque manus poscentibus arvis;  
Non tu, Pyrrhe ferox, nec tantis cladibus auctor  
Pœnus erit: nulli penitus descendere ferro  
Contigit: alta sedent civilis vulnera dextræ.  
Quod si non aliam venturo fata Neroni,  
Invenere viam, magnoque æterna parantur  
Regna deis, cœlumque suo servire Tonanti  
Non nisi sævorum potuit post bella gigantum:  
Jam nihil, o superi, quærimur: scelera ipsa, nefasque  
Hæc mercede placent: diros Pharsalia campos  
Impleat: & Pœni saturentur sanguine manes:  
Ultima funesta concurrant prælia Munda.  
His, Cæsar, Perusina fames, Mutinæque labores  
Accedant fatis: & quas premit aspera, classes,  
Leucas: & ardenti servilia bella sub Ætna.  
Multum Roma tamen debet civilibus armis,  
Quod tibi res acta est. Te, quum, statione peracta,  
Astra petes serus, prælati regia cœli  
Excipiet, gaudente polo: seu sceptrâ tenere,  
Seu te flammigeros Phœbi conscendere currus,  
Telluremque nihil mutato sole timentem  
Igne vago lustrare juvet. Tibi numine ab omni  
Cedetur, juriq; tuo (1) natura relinquet,

(1) jurisque tui *vulgati cum Prisciano.*

Quis deus esse velis, ubi regnum ponere mundi.  
 Sed neque in Arctoo sedem tibi legeris orbe:  
 Nec polus aversi calidus qua vergitur Austri;  
 Unde tuam videas obliquo sidere Romam.  
 Ætheris immensi partem si presseris unam,  
 Sentiet axis onus. Librati pondera cœli  
 Orbe tene medio: pars ætheris illa sereno  
 Tota vacet, nullæque obstant a Cæsare nubes.  
 Tunc genus humanum positis sibi consulat armis,  
 Inque vicem gens omnis amet: pax missa per orbem  
 Ferrea belligeri compescat limina Jani.  
 Sed mihi jam numen: nec, te si pectore vates  
 Accipio, Cyrrhæa velim secreta moventem  
 Sollicitare deum, Bacchumque avertere Nysa.  
 Tu satis ad vires Romana in carmina dandas.

Fert animus (1) caussas tantarum expromere rerum,  
 Immensumque aperitur opus, quid in arma furem  
 Impulerit populum, quid pacem excusserit orbi.  
 Invida fatorum series, summisque negatum  
 Stare diu; nimioque graves sub pondere lapsus;  
 Nec se Roma ferens. Sic, quum, compage soluta,  
 Sæcula tot mundi suprema coegerit hora,  
 Antiquum repetent iterum chaos omnia; mixtis  
 Sidera sideribus concurrent: ignea pontum  
 Astra petent: tellus extendere litora nolet,

(1) est animus MS.

Excutietque fretum: fratri contraria Phœbe  
Ibit, &, obliquum bigas agitare per orbem  
Indignata, diem poscet sibi: totaque discors  
Machina divulsi turbabit fœdera mundi.

IN se magna ruunt: lætis hunc numina rebus  
Crescendi posuere modum. Nec gentibus ullis  
Commodat in populum, terræ pelagique potentem,  
Invidiam Fortuna suam. Tum caussa malorum  
Facta tribus dominis communis Roma, nec umquam  
In turbam missi feralia fœdera regni.

O male concordēs nimiaque cupidine cæci,  
Quid miscere juvat vires, orbemque tenere  
In medium? dum terra fretum, terramque levabit.  
Aer, & longi volvent Titana labores,  
Noxque diem cœlo totidem per signa sequetur;  
Nulla fides regnis sociis, omnisque potestas  
Impatiens consortis erit. Nec gentibus ullis  
Credite; nec longe fatorum exempla petantur;  
Fraterno primi maduerunt sanguine muri.  
Nec pretium tanti tellus pontusque furoris  
Tunc erat: exiguum dominos commisit asyllum.

Temporis angustī (1) mansit concordia discors,  
Paxque fuit non sponte ducum. Nam sola futuri  
Crassus erat belli mœdus mora. Qualiter undas  
Qui secat & geminum gracilis male separat (2) Isthmos,

(1) tempus ad Augusti *Acron Cruquii*.

(2) mare separat *MSS.* & *edd. omnes*.



Nec patitur conferre fretum: si terra recedat,  
 Jonium Ægæo franget mare: sic, ubi sæva  
 Arma ducum dirimens, miserando funere, Crassus  
 Assyrias Latio maculavit sanguine Carras,  
 Parthia Romanos solverunt damna furores.  
 Plus illa vobis acie, quam creditis, æquum,  
 Arsacidæ: bellum victis civile dedistis.  
 Dividitur ferro regnum: populique potentis,  
 Quæ mare, quæ terras, totum quæ continet orbem,  
 Non cepit fortuna duo. Nam pignora juncti  
 Sanguinis & diro ferales omine tedas  
 Abstulit ad manes, Parcarum, Julia, sæva  
 Intercepta manu. Quod si tibi fata dedissent  
 Majores in luce moras, tu sola furentes (1)  
 Inde virum poteras atque hinc retinere parentem,  
 Armatasque manus excusso jungere ferro,  
 Ut gêneros mediæ soceris junxere Sabinæ.  
 Morte tua discussa fides bellumque movere,  
 Permissum ducibus. Stimulos dedit æmula virtus.  
 Tu nova ne veteres obscurent acta triumphos,  
 Et victis cedat piratica laurea Gallis,  
 Mægne, times: te jam series, ususque laborum  
 Erigit, impatiensque loci fortuna secundî.  
 Nec quemquam jam fere potest Cæsarve priorem,  
 Pompejusve parem. Quis justius induit arma,

(1) furentem *vulgo*.

Scire nefas: magno se iudice quisque tuetur:  
 VICTRIX caussa Deis placuit (1), sed victa Catoni,  
 Nec coiere pares: alter vergentibus annis  
 In senium, longoque togæ tranquillior usu  
 Dedidicit jam pace ducem: famæque petitor  
 Multa dare in vulgus: totus popularibus auris  
 Impelli, plausuque sui gaudere theatri:  
 Nec reparare novas vires, multumque priori  
 Credere fortunæ. Stat magni nominis umbra.  
 Qualis frugifero quercus sublimis in agro  
 Exuvias populi veteres sacrataque gestans  
 Dona ducum: nec jam validis radicibus hærens,  
 Pondere fixa suo est: nudosque per æra ramos  
 Effundens, trunco, non frondibus, efficit umbras:  
 Et quamvis primo nutet casura sub Euro,  
 Tot circum silvæ firmo se robore tollant,  
 Sola tamen colitur. Sed non in Cæsare tantum  
 Nomen erat, nec fama ducis: sed nescia virtus  
 Stare loco: solusque pudor, non vincere bello.  
 Acer, & indomitus; quos pēs, quoque ira (2) vocasset,  
 Ferre manum, & numquam temerando parcere ferro:  
 Successus urguere suos, instare favori  
 Numinis: impellens quidquid sibi summa petenti  
 Obstaret, gaudensque viam fecisse ruina.  
 Qualiter expressum ventis per nubila fulmen

(1) Deo placuit *Jo. Salisberiensi*.

(2) spesque & ira *alius*.

Ætheris impulsi sonitu, mundique fragore  
 Emicuit, rupitque diem populosque paventes  
 Terruit, obliqua præstringens lumina flamma,  
 In sua templa furit: nullaque exire vetante  
 Materia, magnamque cadens, magnamque revertens  
 Dat stragem late, sparsosque recolligit ignes.

Hæ ducibus caussæ suberant: sed publica belli  
 Semina, quæ populos semper mersere potentes.  
 Namque ut opes mundo nimias fortuna subacta  
 Intulit, & rebus mores cessere secundis,  
 Prædaque & hostiles luxum suasere rapinæ:  
 Non auro, tectisque modus: mensasque priores  
 Aspernata fames: cultus gestare decoros  
 Vix nurius, rapuere mares: FÆCUNDA virorum  
 Paupertas fugitur, totoque arcessitur orbe;  
 Quo gens quæque perit. Tum longos jungere fines  
 Agrorum, & quondam duro sulcata Camilli  
 Vomere, & antiquos Curiorum passa ligones  
 Laxa (1) sub ignotis extendere rura colonis.  
 Non erat is populus, quem pax tranquilla juvaret,  
 Quem sua libertas immotis pasceret armis.  
 Inde iræ faciles, & quod suasisset egestas,  
 Vile nefas, magnumque decus ferroque petendum,  
 Plus patria potuisse sua: mensuraque juris  
 Vis erat: hinc leges & plebiscita coacta,

(1) Longa vulgg.

Et cum consulibus turbantes jura tribuni:  
 Hinc rapti pretio fascēs, sectorque favoris (1)  
 Ipse sui populus, fatalisque ambitus urbi,  
 Annua venali referens certamina Campo:  
 Hinc usura vorax, avidumque in tempora (2) fœnus,  
 Et concussa fides, & multis utile bellum.

Jam gelidas Cæsar cursu superaverat Alpes,  
 Ingentesque animo motus, bellumque futurum  
 Ceperat. Ut ventum est parvi Rubiconis ad undas,  
 Ingens visa duci patriæ trepidantis imago  
 Clara per obscuram vultu mœstissima noctem,  
 Turrigero canos effundens vertice crines,  
 Cæsarie lacera, nudisque adstare lacertis,  
 Et gemitu permixta loqui: „Quo tenditis ultra?  
 „Quo fertis mea signa viri? si jure venitis,  
 „Si cives: huc usque licet.“ Tum perculit horror  
 Membra ducis, riguere comæ, gressumque coerceas  
 Languor in extrema tenuit vestigia ripa.  
 Mox ait: „O magnæ qui mœnia prospicis urbis  
 „Tarpeja de rupe Tonans, Phrygiique penates  
 „Gentis Juleæ, & rapti secreta Quirini,  
 „Et residens celsa Latialis Juppiter Alba (3),  
 „Vestalesque foci, summique o numinis instar,  
 „Roma, fave cœptis: non te furialibus armis

(1) servusque favoris *Vir. doct.*

(2) in tempore *vulgo.*

(3) Juppiter aula *MSS. duo.*

„Persequor: en! adsum victor terraque marique  
 „Cæsar, ubique tuus, (liceat modo) nunc quoque miles.  
 „Ille erit, ille nocens, qui me tibi fecerit hostem.“  
 Inde moras solvit belli, tumidumque per amnem  
 Signa tulit (1) propere. Sicut squalentibus arvis  
 Æstiferæ Libyes viso Leo comminus hoste  
 Subsedit dubius, totam dum colligit iram;  
 Mox ubi se sævæ stimulavit verbere caudæ,  
 Ereditque jubas, vasto & grave murmur hiatu  
 Infremuit: tum torta levis si lancea Mauri  
 Hæreat, aut latum subeant venabula pectus,  
 Per ferrum, tanti securus vulneris, exit.

Fonte cadit modico, parvisque impellitur undis  
 Puniceus Rubicon, quum fervida canduit æstas;  
 Perque imas serpit valles, & Gallica certus  
 Limes ab Ausoniis disternat arva colonis.  
 Tunc vires præbebat hiems, atque auxerat undas  
 Tertia jam gravido pluvialis Cynthis cornu,  
 Et madidis Euri resolutæ flatibus Alpes.  
 Primus in obliquum sonipes opponitur amnem  
 Excepturus aquas. Molli tum cetera rumpit  
 Turba vado fracti faciles jam fluminis undas.  
 Cæsar ut adversam, superato gurgite, ripam  
 Adtigat, Hesperiae vetitis & constitit oris (2),  
 „Hic, ait, hic pacem, temerataque jura relinquo;

(1) Signa movet *vulgo*.

(2) constitit arvis *vulgo*.

„Te, Fortuna, sequor: procul hinc jam fœdera sunt,  
 „Credidimus fati. Utendum est iudice bello.“  
 Sic fatus, noctis tenebris rapit agmina ducor  
 Impiger. It torto Balearis verbere fundæ  
 Ocior, & missa Parthi post terga sagitta:  
 Vicinumque minax invadit Ariminum, & ignes  
 Solis lucifero fugiebant astra relicto.  
 Jamque dies primos belli visura tumultus  
 Exoritur: seu sponte deum, seu turbidus Auster  
 Impulerit, mœstam tenuerunt nubila lucem.  
 Constitit ut capto jussus deponere miles  
 Signa foro, stridor lituum, clangorque tubarum  
 Non pia concinuit cum rauco classica cornu.  
 Rupta quies populis stratisque excita juvenus  
 Deripuit sacris adfixa penatibus arma,  
 Quæ pax longa dabat: nuda jam crate fluentes  
 Invadunt clipeos, curvataque cuspide pila,  
 Et scabrös nigræ morsu rubiginis enses.  
 Ut notæ fulsere aquilæ, Romanaque signa,  
 Et celsus medio conspectus in agmine Cæsar,  
 Diriguere metu, gelidus pavor adligat artus,  
 Et tacito mutos volvunt sub pectore questus:  
 „O male vicinis hæc mœnia condita Gallis;  
 „O tristi damnata loco! pax alta per omnes,  
 „Et tranquilla quies populos: nos præda furentum,  
 „Primaque castra sumus. Melius, Fortuna, dedisses  
 „Orbe sub Eoo sedem, gelidaque sub Arcto,

„Errantesque domus, Latii quam claustra tueri.  
 „Nos primi Senonum motus, Cimbrumque ruentem  
 „Vidimus, & Martem Libyes, cursumque furoris  
 „Teutonici. Quoties Romam Fortuna lacessit,  
 „Hac iter est bellis. “ Gemitu sic quisque latenti,  
 Non ausus timuisse palam: vox nulla dolori  
 Credita: sed quantum, volucres quum bruma coercet,  
 Rura silent, mediusque tacet (1) sine murmure pontus,  
 Tanta quies. Noctis gelidas lux solverat umbras:  
 Ecce faces belli, dubiæque in prælia menti  
 Urgentes addunt stimulos, cunctasque pudoris  
 Rumpunt fata moras: justos Fortuna laborat  
 Esse ducis motus, & causas invenit armis.  
 Expulit ancipiti discordes urbe tribunos  
 Victo jure minax jactatis curia Gracchis.  
 Hos jam mota ducis, vicinaque signa petentes  
 Audax venali comitatur Curio lingua:  
 Vox quondam populi, libertatemque tueri  
 Ausus, & armatos plebi miscere potentes.  
 Utque ducem varias volventem pectore curas,  
 Conspexit: „Dum voce tuæ potuere juvari  
 „Cæsar, ait, partes, quamvis nolente senatu,  
 „Traximus imperium tunc, quum mihi Rostra tenere  
 „Jus erat, & dubios in te transferre Quirites.  
 „At postquam leges bello siluere coactæ,

(1) jacet vulgo.

„Pellimur e patriis laribus, patimurque volentes  
„Exsilium: tua nos faciet victoria cives.  
„Dum trepidant nullo firmatae robore partes,  
„Tolle moras: semper nocuit differre paratis:  
„Par labor atque metus pretio majore petuntur.  
„Bellantem geminis tenuit te Gallia lustris,  
„Pars quota terrarum? facili si prœlia pauca  
„Gesseris eventu, tibi Roma subegerit orbem.  
„Nunc neque te longi remeantem pompa triumphi  
„Excipit, aut sacras poscunt Capitolia lauros.  
„Livor edax tibi cuncta negat: gentesque subactas  
„Vix impune feres: socerum depellere regno  
„Decretum genero est. Partiri non potes orbem:  
„Solus habere potes.“ Sic postquam fatus, & ipsi  
In bellum prono tantum tamen addidit iræ,  
Accenditque ducem, quantum clamore juvatur  
Eleus sonipes, quamvis jam carcere clauso  
Immineat foribus, pronusque repagula laxet:  
Convocat armatos extemplo ad signa maniplos:  
Utque satis trepidum, turba coeunte, tumultum  
Composuit vultu, dextraque silentia jussit:  
„Bellorum, o socii, qui mille pericula Martis  
„Mecum, ait, experti, decimo jam vincitis anno,  
„Hoc cruor Arctoïis meruit diffusus in arvis,  
„Vulneraque, & mortes, hiemesque sub Alpibus actæ?  
„Non secus ingenti bellorum Roma tumultu  
„Concutitur, quam si Pœnus transcenderit Alpes



„Hannibal. Implentur validæ (1) tirone cohortes:  
 „In classem cadit omne nemus: terraque marique  
 „Jussus Cæsar agi. Quid? si mihi signa jacerent  
 „Marte sub adverso, ruerentque in terga feroces  
 „Gallorum populi? nunc, quum Fortuna secundis  
 „Mecum rebus agat, Superique ad summa vocantes,  
 „Tentamur. Veniat longa dux pace solutus  
 „Milite cum subito partesque in bella togatæ,  
 „Marcellusque loquax, & nomina vana Catones(2).  
 „Scilicet extremi Pompejum, emtique clientes  
 „Continuo per tot satiabunt tempora regno?  
 „Ille reget currus nondum patientibus annis?  
 „Ille semel raptos numquam dimittet honores?  
 „Quid jam rura querar totum suppressa per orbem,  
 „Ac jussam servire famem? quis castra timenti  
 „Nescit mixta foro? gladii quum triste micantes  
 „Judicium insolita trepidum cinxere corona,  
 „Atque auso medias irrumpere milite leges  
 „Pompejana reum clausurunt signa Milonem?  
 „Nunc quoque ne lassum teneat privata senectus,  
 „Bella nefanda parat suetus civilibus armis,  
 „Et docilis Sullam sceleris vicisse magistrum.  
 „Utque feræ tigres numquam posuere furorem,  
 „Quas nemore Hyrcano, matrum dum lustra sequuntur  
 „Altus cæsorū pavit cruor armentorum;

(1) valido *vulgo*.

(2) Catonem *MSS. multi*.

„Sic & Sullanum solito tibi lambere ferrum  
 „Durat, Magne, sitis. Nullus semel ore receptus  
 „Pollutas patitur sanguis mansuescere fauces.  
 „Quem tamen inveniet tam longa potentia finem?  
 „Quis scelerum modus est? ex hoc te jam, improbe, regno  
 „Ille tuus saltem doceat descendere (1) Sulla.  
 „Post Cilicasne vagos, & lassi Pontica regis  
 „Prælia, barbarico vix consummata veneno,  
 „Ultima Pompejo dabitur provincia Cæsar;  
 „Quod non, victrices aquilas deponere jussus,  
 „Paruerim? mihi si merces erepta laborum est,  
 „His saltem longi, non cum duce (2), præmia belli  
 „Reddantur: miles sub quolibet iste triumphet.  
 „Conferet exsanguis quo se post bella senectus?  
 „Emeritis quæ sedes erit? quæ rura dabuntur,  
 „Quæ noster veteranus aret, quæ mœnia fessis?  
 „An melius fient piratæ, Magne, coloni?  
 „Tollite jampridem victricia, tollite signa:  
 „Viribus utendum est, quas fecimus: ARMA tenenti  
 „Omnia dat, qui justa negat: neque numina deerunt.  
 „Nam nec præda meis, neque regnum quæritur armis:  
 „Detrahimus dominos urbi servire paratæ.“  
 Dixerat: at dubium non claro murmure vulgus  
 Secum incerta fremit: pietas, patriique penates  
 Quamquam cæde feras mentes, animosque tumentes

(1) discedere *vulgo*.(2) me duce *vulgo*.

Frangunt; sed diro ferri revocantur amore,  
 Ductorisque metu. Summi tum munera pili  
 Lælius, emeritique gerens insignia doni,  
 Servati civis referentem præmia quercum,  
 „Si licet, exclamat, Romani maxime rector  
 „Nominis, & jus est veras expromere voces;  
 „Quod tam lenta tuas tenuit patientia vires,  
 „Conquerimur. Deeratne tibi fiducia nostri?  
 „Dum movet hæc (1) calidus spirantia corpora sanguis,  
 „Et dum pila valent fortes torquere lacerti,  
 „Degenerem patiere togam, regnumque senatus?  
 „Usque adeo miserum est civili vincere bello?  
 „Duc age per Scythiæ populos, per inhospita Syrtis  
 „Litora, per squalidas Libyes (2) sitientis arenas.  
 „Hæc manus, ut victum post terga relinqueret orbem,  
 „Oceani tumidas remo compescuit undas:  
 „Fregit & Arctoo spumantem vortice Rhenum.  
 „Jussa sequi tam posse mihi, quam velle necesse est.  
 „Nec civis meus est, in quem tua classica, Cæsar,  
 „Audiero. Per signa decem felicia castris,  
 „Perque tuos juro quocumque ex hoste triumphos;  
 „Pectore si fratris gladium, juguloque parentis  
 „Condere me jubeas, plenæque in viscera partu  
 „Conjugis, invita peragam tamen omnia dextra;  
 „Si spoliare deos, ignemque inmittere templis,

(1) hic *alii*.

(2) calidas Lybiæ *vulgo*.

„Numina miscelit castrensis flamma monetæ;  
 „Castra super Tusci si ponere Thybridis undas,  
 „Hesperios audax veniam metator in agros.  
 „Tu quoscumque voles in planum effundere muros,  
 „His aries actus disperget saxa lacertis:  
 „Illa licet, penitus tolli quam jusseris urbem,  
 „Roma sit.“ His cunctæ simul adsensere cohortes,  
 Elatasque alte, quæcumque ad bella vocaret,  
 Promisere manus. It tantus ad æthera clamor,  
 Quantus, piniferæ Boreas quum Thracius Ossæ  
 Rupibus incubuit, curvato robore pressæ  
 Fit sonus, aut rursum redeuntis in aera silvæ.

Cæsar ut acceptum tam prono milite bellum,  
 Fataque ferre videt, ne quo languore moretur  
 Fortunam, sparsas per Gallica rura cohortes  
 Evocat, & Romam motis petit undique signis.  
 Deseruere cavo tentoria fixa Lemano,  
 Castraque, quæ Vogesi curvam super ardua rupem,  
 Pugnaces pictis cohibebant Lingonas armis.  
 Hi vada liquerunt Isaræ, qui gurgite ductus  
 Per tam multa suo, famæ majoris in amnem  
 Lapsus, ad æquoreas nomen non pertulit undas.  
 Solvuntur flavi longa statione Rutheni;  
 Mitis Atax Latias gaudet non ferre carinas,  
 Finis & Hesperia, promotio limite, Varus;  
 Quaque sub Herculeo sacratus numine (1) portus

(1) nomine *vulgo*.

Urguet rupe cava pelagus: non Corus in illum  
Jus habet, aut Zephyrus: solus sua litora turbat  
Circius, & tuta prohibet statione Monæci.  
Quaque patet litus dubium, quod terra, fretumque  
Vindicat alternis vicibus, quum funditur ingens  
Oceanus, vel quum refugis se fluctibus aufert.  
Ventus ab extremo pelagus sic axe volutet,  
Destituatque ferens; an sidere mota secundo  
Tethyos unda vagæ lunaribus æstuet horis;  
Flammiger an Titan, ut alentes hauriat undas,  
Erigat Oceanum, fluctusque ad sidera ducat,  
Quærite, quos agitat mundi labor: at mihi semper  
Tu, quæcumque moves tam crebros caussa meatus,  
Ut superi voluere, lates. Tunc rura Menetis  
Qui tenet, & ripas Aturi, qua litore curvo  
Molliter admissum claudit Tarbellius æquor,  
Signa movet, gaudetque amoto Santonus hoste:  
Et Biturix, longisque leves Suessones in armis:  
Optimus excusso Leucus Rhemusque lacerto,  
Optima gens flexis in gyrum Sequana frenis:  
Et docilis rector rostrati Belga covini:  
Avernique ausi Latios se fingere fratres,  
Sanguine ab Iliaco populi; nimiumque rebellis  
Nervius, & cæsi pollutus fœdere Cottæ:  
Et qui te laxis imitantur Sarmata braccis  
Vangiones: Batavique truces, quos ære recurvo  
Stridentes acuere tubæ: qua Cinga pererrat

Gurgite: qua Rhodanus raptum velocibus undis  
 In mare fert Ararim: qua montibus ardua summis  
 Gens habitat cana pendentes rupe Gebennas:  
 (Pisciones immunes subigunt sua rura; nec ultra  
 Instabiles Turonas circumsita castra coercent.  
 In nebulis Meduana tuis marcere perosus:  
 Andus, jam placida Ligeris recreatur ab unda,  
 Inclyta Cæsareis Genabos dissolvitur alis.) (\*)  
 Tu quoque lætatus converti prælia Trevir:  
 Et nunc tonse Ligur, quondam per colla decore  
 Crinibus effusis toti prælate Comatæ;  
 Et quibus inmitis placatur sanguine diro  
 Teutates, horrensque feris altaribus Hesus,  
 Et Taranis Scythiæ non mitior ara Dianæ.  
 Vos quoque, qui fortes animas, belloque peremptas  
 Laudibus in longum vates dimittitis ævum,  
 Plurima securi fudistis carmina Bardi.  
 Et vos barbaricos ritus, moremque sinistrum  
 Sacrorum Druidæ positis repetistis ab armis.  
 Solis nosse deos, & cœli numina vobis,  
 Aut solis nescire datum: nemora alta remotis  
 Incolitis lucis. Vobis auctoribus, umbræ  
 Non tacitas Erebi sedes, Ditisque profundi  
 Pallida regna petunt: regit idem spiritus artus

(\*) Hi quinque versus interpolati videntur. Desunt enim  
 in Codicibus, nec quid eorumdem exhibent Editio princeps  
 anni 1469, & Gryphii Lugdunensis anni 1542.

Orbe alio: longæ (canitis si cognita) vitæ  
 Mors mediâ est. Certe populi, quos despicit Arctos,  
 Felices errore suo, quos ille timorum  
 Maximus haud urguet, leti metus. Inde ruendi  
 In ferrum mens prona viris, animæque capaces  
 Mortis: & ignavum redituræ parcere vitæ.  
 Et vos cirrigeros (1) bellis arcere Caucos  
 Oppositi, petitis Romam, Rhenique feroces  
 Deseritis ripas, & apertum gentibus orbem.  
 Cæsar, ut immensæ collecto robore vires  
 Audendi majora fidem fecere, per omnem  
 Spargitur Italiam; vicinaque mœnia complet.  
 Vana quoque ad veros accessit fama timores,  
 Irrupitque animos populo, clademque futuram  
 Intulit, & velox properantis nuntia belli  
 Innumeras solvit falsa in præconia linguas.  
 Est, qui, tauriferis ubi se Mevania campis  
 Explicat, audaces ruere in certamina turmas  
 Adferat, & qua Nar Thyberino illabitur amni  
 Barbaricas sævi discurrere Cæsar's alas:  
 Ipsum omnes aquilas, collataque signa ferentem,  
 Agmine non uno, densisque incedere castris.  
 Nec, qualem meminere, vident: majorque, feroxque  
 Mentibus occurrit, victoque immanior hoste.  
 Hunc inter Rhenum populos Alpemque jacentes,

(1) belligeros, armigeros *alii MSS.*

Finibus Arctois, patriaque ab sede revulsos  
 Pone sequi, jussamque feris a gentibus urbem,  
 Romano spectante, rapi. Sic quisque pavendo  
 Dat vires famæ: nulloque auctore malorum  
 Quæ finxere, timent. Nec solum vulgus inani  
 Percussum terrore pavet: sed curia, & ipsi  
 Sedibus exsilire Patres, invisaque belli  
 Consulibus fugiens mandat decreta senatus.  
 Tum quæ tuta petant, & quæ metuenda relinquunt,  
 Incerti, quo quemque fugæ tulit impetus, urgent.  
 Præcipitem populum, serieque hærentia longa  
 Agmina prorumpunt. Credas, aut testa nefandas  
 Corripuisse faces, aut jam, quatiente ruina,  
 Nutantes pendere domos: sic turba per urbem  
 Præcipiti lymphata gradu, velut unica rebus  
 Spes foret afflictis, patrios excedere muros,  
 Inconsulta ruit. Qualis, quum turbidus Auster  
 Reppulit ab Libycis immensum Syrtibus æquor,  
 Fractaque veliferi sonuerunt pondera mali,  
 Desilit in fluctus, deserta puppe, magister,  
 Navitaque, & nondum sparsa compage carinæ,  
 Naufragium sibi quisque facit: sic, urbe relicta,  
 In bellum fugitur. Nullum jam languidus ævo  
 Evaluit revocare parens, conjuxve maritum  
 Fletibus, aut patrii, dubiæ dum vota salutis (1)

(1) salutis *vulgo*.



Conciperent, tenuere Lares: nec limine quisquam  
 Hæsit, & extremo tunc forsitan urbis amatæ  
 Plenus abit visu: ruit irrevocabile vulgus.  
 O faciles dare summa deos, eademque tueri  
 Difficiles! urbem populis, victisque frequentem  
 Gentibus, & generis, coeat si turba, capacem:  
 Humani, facilem, venturo Cæsare, prædam  
 Ignavæ liquere manus. Quum pressus ab hoste  
 Clauditur externis miles Romanus in oris,  
 Effugit exiguo nocturna pericula vallo:  
 Et subitus rapti munimine cespitis agger  
 Præbet securos intra tentoria somnos.  
 Tu tantum audito bellorum nomine Roma  
 Desereris; nox una tuis non credita muris.  
 Danda tamen venia est tantorum danda pavorum:  
 Pompejo fugiente, timent. Tum ne qua futuri  
 Spes saltem trepidas mentes levet, addita fati  
 Pejoris manifesta fides, superique minaces,  
 Prodigiis terras implerunt, æthera, pontum.  
 Ignota obscuræ viderunt sidera noctes,  
 Ardentemque polum flammis, cæloque volantes  
 Obliquas per inane faces, crinemque timendi  
 Sideris, & terris mutantem (1) regna cometen.  
 Fulgura fallaci micuerunt crebra sereno,  
 Et varias ignis tenso dedit aere formas:

Nunc

(1) nutantem MS.

Nunc jaculum longo, nunc sparso lumine lampas  
Emicuit cœlo. Tacitum sine nubibus ullis  
Fulmen, & Arctois rapiens e partibus ignes,  
Percussit Latiale caput; stellæque minores  
Per vacuum solitæ noctis decurrere tempus,  
In medium venere diem: cornuque coacto  
Jam Phœbe toto fratrem quum redderet orbe,  
Terrarum subita percussa expalluit umbra.  
Ipse caput medio Titan quum ferret Olympo,  
Condidit ardentes atra caligine currus,  
Involvitque orbem tenebris, gentesque coegit  
Desperare diem; qualem fugiente per ortus  
Sole Thyestæ noctem duxere Mycenæ.  
Ora ferox Siculæ laxavit Mulciber Ætnæ;  
Nec tulit in cœlum flammæ, sed vertice pronò  
Ignis in Hesperium cecidit latus. Atra(1) Charybdis  
Sanguineum fundo torsit mare. Flebile sævi  
Latraverunt canes. Vestali raptus ab ara  
Ignis, & ostendens confectas flamma Latinas  
Scinditur in partes, geminoque cacumine surgit,  
Thebanos imitata rogos. Tum cardine tellus  
Subsedit, veteremque, jugis nutantibus, Alpes  
Discussere nivem. Tethys majoribus undis  
Hesperium Calpen, summumque implevit Atlanta.  
Indigetes flevisse deos, urbisque laborem

(1) atra MS.

Testatos sudore Lares, delapsaque templis  
 ¶ Dona suis, dirasque diem fœdasse volucres  
 Accipimus; silvisque feras sub nocte relictis  
 Audaces media posuisse cubilia Roma.  
 Tum pecudum faciles humana ad murmura linguæ,  
 Monstrosique hominum partus numeroque modoque  
 Membrorum, matremque suos conterruit infans.  
 Diraque per populum Cumanæ carmina vatis  
 Vulgantur. Tum, quos scdis Bellona lacertis  
 Sæva movet, cecinere deos: crinemque rotantes  
 Sanguinei populis ulularunt tristia Galli.  
 Compositis plenæ gemuerunt ossibus urnæ.  
 Tum fragor armorum, magnæque per avia voces  
 Auditæ nemorum: & venientes comminus umbræ.  
 Quique colunt iunctos extremis mœnibus agros,  
 Diffugiunt: ingens urbem cingebat Erinns,  
 Excutiens pronam flagranti vertice pinum,  
 Stridentesque comas: Thebanam qualis Agaven  
 Impulit, aut sævi contorsit tela Lycurgi  
 Eumenis: aut jussu qualem Junonis iniquæ  
 Horruit Alcides, viso jam Dite, Megæran.  
 Insonuere tubæ, & quanto clamore cohortes  
 Miscentur (1), tantum nox atra, silentibus auris,  
 Edidit. Et medio visi consurgere campo  
 Tristia Sullani cecinere oracula manes:

(1) Miscuntur MSS. duo probati.

Tollentemque caput gelidas Anienis ad undas  
Agricolæ fracto Marium fugere sepulcro.  
Hæc propter placuit Tuscos de more vetusto  
Acciri vates. Quorum qui maximus ævo  
Aruns incoluit desertæ mœnia Lunæ,  
Fulminis edoctus motus, venasque calentes  
Fibrarum, & monitus errantis in aere pinnæ:  
Monstra jubet primum, nullo quæ semine discors  
Protulerat natura, rapi, sterilique nefandos  
Ex utero fetus infaustis urere flammis.  
Mox jubet & totam pavidis a civibus urbem  
Ambiri, & festo purgantes mœnia lustrò,  
Longa per extremos pomœria cingere fines  
Pontifices, sacri quibus est permissa potestas.  
Turba minor ritu sequitur succincta Gabino,  
Vestalemque chorum ducit vittata sacerdos,  
Trojanam soli cui fas vidisse Minervam.  
Tum qui fata deûm secretaque carmina servant,  
Et parvo lotam revocant Almone Cybeben:  
Et doctus volucres Augur servare sinistras:  
Septemvirque epulis festus, Titique sodales:  
Et Salius læto portans ancilia collo:  
Et tollens apicem generoso vertice Flamen.  
Dumque illi effusam longis anfractibus urbem  
Circumeunt, Aruns dispersos fulminis ignes  
Colligit, ac terra mœsto humum murmure condit,  
Datque locis numen sacris. Tunc admoveat aris

Electa cervice marem: Jam fundere Bacchum  
 Ceperat, obliquoque molas inducere cultro:  
 Impatiensque divo non grati victima sacri,  
 Cornua succincti premerent quum torva ministri,  
 Deposito victum præbebat poplite collum.  
 Nec cruor emicuit solitus: sed vulnere largo  
 Diffusum rutilo dirum pro sanguine virus.  
 Palluit adtonitus sacris feralibus Aruns,  
 Atque iram superum raptis quæsit in extis,  
 Terruit ipse color vatem: nam pallida tætris  
 Viscera tincta notis, gelidoque infecta cruore  
 Plurimus adperso variabat sanguine livor.  
 Cernit tabe jecur madidum: venasque minaces  
 Hostili de parte videt. Pulmonis anhel  
 Fibra latet, parvusque secat vitalia limes.  
 Cor jacet: & saniem per hiantes viscera rimas  
 Emittunt: promuntque suas omenta latebras.  
 Quodque (nefas) nullis impune adparuit extis,  
 Ecce, videt capiti fibrarum increescere molem  
 Alterius capitis: pars ægra & marcida pendet,  
 Pars micat & celeri venas movet improba pulsu.  
 His ubi concepit magnorum fata malorum,  
 Exclamat: „Vix fas, superi, quæcumque monetis  
 „Prodere me populis: neque enim tibi summe litavi  
 „Juppiter hoc sacrum; cæsiq; in pectora (1) tauri

(1) in viscera vulgo.

„Inferni venere dei. Non fanda timemus.  
 „Sed venient majora metu. DI visa secudent,  
 „Et fibris sit nulla fides; sed conditor artis  
 „Finxerit ista Tages.“ Flexa sic omina Tuscus  
 Involvens, multaque tegens ambage canebat.

At Figulus, cui cura deos, secretaque cœli  
 Nosse fuit, quem non stellarum Ægyptia Memphis  
 Æquaret visu, numerisque moventibus astra,  
 „Aut hic errat, ait, ulla sine lege per ævum  
 „Mundus, & incerto discurrunt sidera motu:  
 „Aut, si fata movent (1), urbi generique paratur  
 „Humano matura lues. Terræne dehiscent,  
 „Subsidentque urbes? an tollet fervidus aer  
 „Temperiem? segetes tellus infida negabit?  
 „Omnis an infusis miscebitur unda venenis?  
 „Quod cladis genus, o superi, qua peste paratis  
 „Sævitiam? extremi multorum tempus in unum  
 „Convenere dies. Summo si frigida cœlo  
 „Stella nocens nigros Saturni accenderet ignes,  
 „Deucalioneos fudisset Aquarius imbres,  
 „Totaque diffuso latuisset in æquore tellus.  
 „Si sævum radiis Nemeæum, Phœbe, Leonem  
 „Nunc premeres, toto fluerent incendia mundo,  
 „Succensusque tuis flagrasset cutribus æther.  
 „Hi cessant ignes. Tu qui flagrante minacem

(1) regunt *MS.*

„Scorpion incendis cauda, chelasque peruris,  
 „Quid tantum, Gradive, paras? nam mitis ab alto  
 „Juppiter occasu premitur, Venerisque salubre  
 „Sidus hebet, motuque celer Cyllenius hæret,  
 „Et cœlum Mars solus habet. Cur signa meatus  
 „Deseruere suos, mundoque obscura feruntur:  
 „Ensiferi fulget nimium latus Orionis?  
 „Inminet armorum rabies: ferrique potestas  
 „Confundet jus omne manu: scelerique nefando  
 „Nomen erit virtus: multosque exhibit in annos  
 „Hic furor. Et superos quid prodest poscere finem?  
 „Cum domino pax ista venit. Duc Roma malorum  
 „Continuam seriem: clademque in tempora multa  
 „Extrahe, civili tantum jam libera bello.“  
 Terruerant satis hæc pavidam præsentia plebem:  
 Sed majora premunt. Nam qualis vertice Pindi  
 Edonis Ogygio decurrit plena Lyæo:  
 Talis & adtonitam rapitur matrona per urbem,  
 Vocibus his prodens urgulentem pectora Phœbum:  
 „Quo feror, o Pæan? qua me super æthera raptam  
 „Constituis terra? video Pangæa nivosis  
 „Cana jugis, latosque Æmi sub rupe Philippos.  
 „Quis furor hic, o Phœbe, doce: quid tela (1), manusque  
 „Romanæ miscent acies, bellumque sine hoste est?  
 „Quo diversa feror? primos me ducis in ortus,

(1) quo tela *MSS. vett. melius.*

„Qua mare Lagæi mutatur gurgite Nili.  
„Hunc ego, fluminea deformis truncus arena  
„Qui jacet, agnosco: dubiam super æquora Syrtin  
„Arentemque feror Libyen, quo tristis Erinnyes  
„Transtulit Emathias acies. Nunc desuper Alpīs  
„Nubiferæ colles, atque aeriam Pyrenen  
„Abripimur. Patriæ sedes remeamus in urbis,  
„Impiaque in medio peraguntur bella senatu.  
„Consurgunt partes iterum, totumque per orbem  
„Rursus eo. Nova da mihi cernere litora ponti,  
„Telluremque novam: vidi jam, Phœbe, Philippos.“  
Hæc ait: & lasso jacuit defœcta (1) furore.

(1) *deserta MSS. plures.*







## LIBER SECUNDUS.

### ARGUMENTUM.

*Qui liber insequitur notat omnia plena timoris,  
Vota, preces, lacrimas veterisque relata doloris.  
Bruto ut & aliis obstantia dicta Catonis,  
Pompejique fugam, Syllæ, Thermi atque Libonis.  
Domitii litem poscentis mortis amara,  
Sed, licet invitum, servatum mortis ab hora.  
Pompejum socios acuentem in prælia dictis,  
Sed, clarente metu, signis cessasse relictis.  
Cæsaris ingenti maria interclusa labore,  
Structa sed injectis facibus saxisque labare.  
Brundisianorum defectu pæne retentus,  
Navibus relictis evadis, Magne, duabus.*

**J**Amque iræ patuere deum, manifesta que belli  
Signa dedit mundus: legesque, & fœdera rerum,  
Præscia monstrifero vertit natura tumultu,

Indixitque nefas. Cur hanc tibi rector Olympi  
 Sollicitis visum mortalibus addere curam,  
 Noscant venturas ut dira per omina clades?  
 Sive parens rerum quum primum informia regna,  
 Materiemque rudem flamma cedente recepit,  
 Fixit in æternum causas, quæ cuncta coerces,  
 Se quoque lege tenens, & sæcula jussa ferentem  
 Fatorum inmoto divisit limite mundum:  
 Sive nihil positum, sed Fors incerta vagatur,  
 Fertque refertque vices, & habet mortalia casus:  
 SIT subitum, quòdcumque paras: sit cæca futuri  
 Mens hominum fati: liceat sperare timenti.

Ergo ubi concipiunt, quantis sit cladibus orbi (1)  
 Constatura fides superum, ferale per urbem  
 Justitium: latuit plebejo tectus amictu  
 Omnis honos: nullos comitata est purpura fasces.  
 Tunc questus tenuere suos, magnusque per omnes  
 Errabat sine voce dolor. Sic funere primo  
 Adtonitæ tacuere domus, quum corpora nondum  
 Conclamata jacent, nec mater crine soluto  
 Exigit ad sævos famularum (2) brachia planctus:  
 Sed quum membra premit fugiente rigentia vita,  
 Vultusque exanimes, oculosque in morte natantes (3),  
 Nec dum est ille dolor, sed jam metus: incubat amens,

(1) urbi *vulgo*.

(2) famulorum *vulgo*.

(3) minaces *MS.* jacentes *vulgo*.

Miraturque malum. Cultus matrona priores  
 Deposuit: mœstæque tenent delubra catervæ.  
 Hæ lacrimis sparsere deos, hæ pectora duro  
 Adfixere (1) solo: lacerasque in limine sacro  
 Adtonitæ fudere comas: votisque vocari  
 Adsuetas crebris feriunt ululatibus aures.  
 Nec cunctæ summi templo jacuere Tonantis:  
 Divisere deos: & nullis defuit aris  
 Invidiam factura parens: quarum una madentes  
 Scissa genas, planctu liventes atra lacertos,  
 „Nunc, ait, o miseræ contundite pectora matres,  
 „Nunc laniate comas, neve hunc differte dolorem,  
 „Et summis servate malis: nunc flere potestas  
 „Dum pendet fortuna ducum: quum vicerit alter,  
 „Gaudendum est.“ His se stimulis dolor ipse lacessit.

Nec non bella viri, diversaque castra petentes  
 Effundunt justas in numina sæva querelas.  
 „O miseræ sortis, quod non in Punica nati  
 „Tempora, Cannarum fuimus, Trebiæque juvenus.  
 „Non pacem petimus, superi: date gentibus iras:  
 „Nunc urbes excite feras: conjuret in arma  
 „Mundus: Achæmeniis decurrant Medica Susis  
 „Agmina: Massageten Scythicus non adliget Ister:  
 „Fundat ab extremo flavos Aquilone Suevos  
 „Albis, & indomitum Rhēni caput: omnibus hostes  
 „Reddite nos populis: civile avertite bellum:

(1) Adfixere MSS.

„Hinc Dacus premat, inde Getes: occurrat Iberis  
„Alter, ad Eoas hic vertat signa pharetras.  
„Nulla vacet tibi, Roma, manus. Vel perdere nomen  
„Si placet Hesperium, superi, collatus in ignes  
„Plurimus ad terras per fulmina decidat æther.  
„Sæve parens, utrasque simul partesque ducesque,  
„Dum nondum meruere, feri. Tantone novorum  
„Proventu scelerum quærunt, uter imperet urbi?  
„Vix tanti fuerat civilia bella movere,  
„Ut neuter.“ Tales pietas peritura querelas  
Egerit: At miseros angit sua cura parentes,  
Oderuntque gravis vivacia fata senectæ,  
Servatosque iterum bellis civilibus annos.

Atque aliquis magno quærens exempla timori,  
„Non alios, inquit, motus tunc fata parabant,  
„Quum post Teutonicos victor, Libycosque triumphos  
„Exsul limosa Marius caput abdidit ulva.  
„Stagna uvidi texere soli, laxæque paludes  
„Depositum, Fortuna, tuum: mox vincula ferri  
„Exedere senem, longusque in carcere pædor.  
„Consul, & eversa felix moriturus in urbe  
„Pœnas ante dabat scelerum. Mors ipsa refugit  
„Sæpe virum, frustra que hosti concessa potestas  
„Sanguinis inuisi. Primo qui cædis in ictu  
„Deriguit, ferrumque manu torpente remisit;  
„Viderat immensum tenebroso carcere lumen  
„Terribilesque deas scelerum, Mariumque futurum,

„Audieratque pavens: *Fas hæc contingere non est*  
 „*Colla tibi*: debet multas hic legibus ævi,  
 „Ante suam, mortes: vanum depone furorem.  
 „Si libet ulcisci deletæ funera gentis,  
 „Hunc, Cimbri, servate senem. Non ille favore  
 „Numinis, ingenti superûm protectus ab ira,  
 „Vir ferus, & Romam cupienti perdere fato  
 „Sufficiens. Idem pelago delatus iniquo  
 „Hostilem in terram, vacuisque mapalibus actus,  
 „Nuda triumphati jacuit per regna Jugurthæ,  
 „Et Pœnos pressit cineres. Solatia fati  
 „Carthago, Mariusque tulit: pariterque jacentes  
 „Ignovere deis. Libycas ibi colligit iras.  
 „Ut primum fortuna redit: servilia solvit  
 „Agmina: conflato sævas ergastula ferro  
 „Exeruerè manus. Nulli gestanda dabantur  
 „Signa ducis, nisi qui scelerum jam fecerat usum,  
 „Adtuleratque in castra nefas. Pro fata! quis ille,  
 „Quis fuit ille dies, Marius quo mœnia victor  
 „Corripuit? quantoque gradu mors sæva cucurrit?  
 „Nobilitas cum plebe cadit: lateque vagatur  
 „Ensis, & a nullo revocatum pectore ferrum.  
 „Stat cruor in templis: multaque rubentia cæde  
 „Lubrica saxa madent. Nulli sua profuit ætas.  
 „Non senis extremum piguit vergentibus annis  
 „Præcepisse (1) diem: non primo in limine vitæ

(1) Præcipitasse *vulgo*.

„Infantis miseri nascentia rumpere fata.  
 „Crimine quo cædem parvi potuere mereri?  
 „Sed satis est jam, posse mori. Trahit ipse furoris  
 „Impetus: &, visum lenti, quæsisse nocentem.  
 „In numerum pars magna perit: rapuitque cruentus  
 „Victor ab ignota vultus cervicæ reseptos  
 „Dum vacua pudet ire manu. Spes una salutis,  
 „Oscula pollutæ fixisse trementia dextræ.  
 „Mille licet gladii mortis nova signa sequantur,  
 „Degener o populus, vix sæcula longa decorum  
 „Sic meruisse viris, nedum breve dedecus ævi,  
 „Et vitam, dum Sulla redit. Cui funera vulgi  
 „Flere vacet? vix te sparsum per viscera, Bæbi,  
 „Innumeras inter carpentis membra coronæ  
 „Discessisse (1) manus: aut te, præsaſe malorum  
 „Antoni, cujus laceris pendentia canis  
 „Ora ferens miles festæ rorantia mensæ  
 „Imposuit. Truncos laceravit Fimbria Crassos.  
 „Sæva Tribunicio maduerunt robora tabo.  
 „Te quoque, neglectu violatæ, Scævola, Vestæ,  
 „Ante ipsum penetrale deæ, semperque calentes  
 „Maſtavere focos: parvum sed fessa senectus  
 „Sanguinis effudit jugulo, flammisque pepercit.  
 „Septimus hæc sequitur, repetitis fascibus, annus;  
 „Ille fuit vitæ Mario modus, omnia passo,

(1) Discerpſisse MSS. & edd. vet.

„Quæ peior fortuna potest, atque omnibus uso,  
„Quæ melior: mensoque, homini quid fata paterent (1).  
„Jam, quot apud Sacri cecidere cadavera portum,  
„Aut Collina tulit stratas quot porta catervas?  
„Tunc quum pæne caput mundi, rerumque potestas  
„Mutavit translata locum, Romanaque Samnis  
„Ultra Caudinas spiravit vulnera Furcas,  
„Sulla quoque intensis accessit cladibus ultor.  
„Ille quod exiguum restabat sanguinis urbi  
„Hausit. Dumque nimis jam putria membra recidit,  
„Excessit medicina modum, nimiumque secuta est,  
„Qua morbi duxere, manus. Periere nocentes;  
„Sed quum jam soli possent superesse nocentes.  
„Tum data libertas odiis, resolutaque legum  
„Frenis ira ruit, non uni cuncta dabantur,  
„Sed fecit sibi quisque nefas. Semel omnia victor  
„Jusserat. Infandum domini per viscera ferrum  
„Exegit famulus: nati maduere paterno  
„Sanguine. Certatum est, cervix cui cæsa parentis  
„Cederet: in fratrum ceciderunt præmia fratres.  
„Busta repleta fuga, permixtaque viva sepultis  
„Corpora: nec populum latebræ cepere ferarum.  
„Hic laqueo fauces, elisaque guttura fregit:  
„Hic se præcipiti jaculatus pondere dura  
„Dissiluit percussus humo: mortesque cruento

(1) pararent *vulgo*.

„Victori rapuere suas: hic robora busti  
„Exstruit ipse sibi, nec dum omni sanguine fuso  
„Desilit in flammās, & dum licet, occupat ignes.  
„Colla ducum pilo trepidam gestata per urbem,  
„Et medio congesta foro: cognoscitur illic  
„Quidquid ubique jacet. Scelerum non Thracia tantum  
„Vidit Bistonii stabulis pendere tyranni,  
„Postibus Antæi Libye: nec Græcia mœrens  
„Tot laceros artus Pisæa flevit in aula.  
„Quum jam tabe fluunt, confusaque tempore multo  
„Amisere notas, miserorum dextra parentum  
„Colligit, & pavido subducit cognita furto.  
„Meque ipsum memini cæsi deformia fratris  
„Ora rogo cupidum, vetitisque imponere flammis,  
„Omnia Sullanæ lustrasse cadavera pacis:  
„Perque omnes truncos, qua cum cervice recisum  
„Conveniat, quæsisse caput. Quid sanguine manes  
„Placatos Catuli referam? quum victima tristes  
„Inferias Marius forsā nolentibus umbris  
„Pendit, inexplēto non fanda piacula busto:  
„Quum laceros artus, æquataque vulnera membris  
„Vidimus, & toto quamvis in corpore cæso  
„Nil animæ letale datum, moremque nefandæ  
„Dirum sævitæ, pereuntis parcere morti.  
„Avulsæ cecidere manus, exsectaque lingua  
„Palpitat, & muto vacuum ferit æra motu.  
„Hic aures, alius spiramina narīs adunçæ



„Amputat: ille cavis evolvit sedibus orbes,  
„Ultimaque effundit (1) spectatis lumina membris.  
„Vix erit ulla fides tam sævi criminis, unum  
„Tot pœnas cepisse caput. Sic mole ruinæ  
„Fracta sub ingenti miscentur pondere membra:  
„Nec magis informes veniunt ad litora trunci,  
„Qui medio periire freto. Quid perdere fructum  
„Juvit, &, ut vilem, Marii confundere vultum?  
„Ut scelus hoc Sullæ, cædesque ostensa placeret,  
„Agnosendus erat. Vidit Fortuna colonos  
„Prænestina suos cunctos simul ense recepto  
„Unius populum pereuntis tempore mortis.  
„Tunc flos Hesperia, Latii jam sola juvenus,  
„Concidit, & miseræ maculavit ovilia Romæ.  
„Tot semel infesto juvenes occumbere leto,  
„Sæpe fames, pelagique furor, subitæque ruinæ,  
„Aut terræ cœlique lues, aut bellica clades,  
„Numquam pœna fuit. Densi vix agmina vulgi  
„Inter & exsanguis, inmissa morte, catervas  
„Victores movere manus. Vix cæde peracta  
„Procumbunt, dubiaque labant cervice: sed illos  
„Magna premit strages: peraguntque cadavera partem  
„Cædis: viva graves elidunt corpora trunci.  
„Intrepidus tanti sedit securus ab alto  
„Spectator sceleris: miseri tot millia vulgi

(1) effodit *vulgo*.

„Non piguit jussisse mori. Congesta recepit.  
 „Omnia Tyrrhenus Sullana cadavera gurgis.  
 „In fluvium primi cecidere, in corpora summi.  
 „Præcipites hæserè rates, & strage cruenta  
 „Interruptus aquis (1) fluxit prior amnis in æquor,  
 „Ad molem stetit unda sequens: dum sanguinis alti  
 „Vis sibi fecit iter, campumque effusa per omnem,  
 „Præcipitique ruens Thyberina ad flumina rivo  
 „Hærentes adjuvit aquas: nec jam alveus amnem,  
 „Nec retinent ripæ, redditque cadavera campo.  
 „Tandem Tyrrhenas vix eluctatus in undas  
 „Sanguine cæruleum torrenti dividit æquor.  
 „His ne Salus rerum, Felix his Sulla vocari,  
 „His meruit tumulum medio sibi tollere campo?  
 „Hæc rursus patienda manent: hoc ordine belli  
 „Ibitur: hic stabit civilibus exitus armis.  
 „Quamquam agitant graviora metus, multumque (2) coitur  
 „Humani generis majore in prælia damno.  
 „Exsulibus Mariis bellorum maxima merces  
 „Roma recepta fuit: nec plus victoria Sullæ  
 „Præstitit, invisas penitus quam tollere partes.  
 „Hos alio fortuna vocas: olimque potentes  
 „Concurrunt. Neuter civilia bella moveret,  
 „Contentus, quo Sulla fuit. Sic mœsta senectus  
 Præteritique memor flebat, metuensque futuri.

(1) aquas *melius*.

(2) multumque MSS. & *edd. vet.* multoque *vulgo*.

At non magnanimi percussit pectora Bruti  
 Terror, & in tanta pavidi formidine motus  
 Pars populi lugentis erat: sed nocte (1) sopora,  
 Parrhasis obliquos Helice quum verteret axes,  
 Atria cognati pulsat non ampla Catonis.  
 Invenit insomni volventem publica cura  
 Fata virum casusque orbis, cunctisque timentem,  
 Securumque sui; farique his vocibus orsus:  
 „Omnibus expulsæ terris, olimque fugatæ  
 „Virtutis jam sola fides, quam turbine nullo  
 „Excutiet fortuna tibi; tu mente labantem  
 „Dirige me, dubium certo tu robore firma.  
 „Namque alii Magnum, vel Cæsaris arma sequantur:  
 „Dux Bruto Cato solus erit. Pacemne tueris,  
 „Inconculsa ferens dubio vestigia mundo?  
 „An placuit, ducibus scelerum, populique furentis  
 „Cladibus inmixtum, civile absolvere bellum?  
 „Quemque suæ rapiunt scelerata in prælia caussæ:  
 „Hos polluta domus, legesque in pace timendæ;  
 „Hos ferro fugienda fames, mundique ruinæ  
 „Permiscenda fides. Nullum furor egit in arma;  
 „Castra petunt magna victi mercede: tibi uni  
 „Per se bella placent? quid tot durasse per annos  
 „Profuit immunem corrupti moribus ævi?  
 „Hoc solum longæ pretium virtutis habebis:

(1) sub nocte *Scholiarum Juvenal.*

„Accipiunt alios, facient te bella nocentem.  
 „Ne tantum, o superi, liceat feralibus armis,  
 „Has etiam movisse manus: nec pila lacertis  
 „Missa tuis cæca telorum in nube ferantur:  
 „Nec tanta in casum (1) virtus eat. Ingeret omnis  
 „Se belli fortuna tibi. Quis nolet in isto  
 „Ense mori, quamvis alieno vulnere labens,  
 „Et scelus esse tuum? melius tranquilla sine armis  
 „Otia solus ages, sicut cœlestia semper  
 „Inconcussa suo volvuntur sidera lapsu.  
 „Fulminibus propior terræ succenditur aer,  
 „Imaque telluris ventos; tractusque coruscus  
 „Flammarum accipiunt: nubes excedit Olympus  
 „Lege deum. Minima rerum discordia turbat:  
 „Pacem magna tenent. Quam læte Cæsaris aures  
 „Accidet, & tantum venisse in prælia civem!  
 „Nam prælata suis numquam diversa dolebit  
 „Castra ducis Magni. Nimium placet ipse, Catoni  
 „Si bellum civile placet. Pars magna senatus,  
 „Et duce privato gesturus prælia consul  
 „Sollicitant, procuresque alii, quibus adde Catonem  
 „Sub iuga Pompeji; toto jam liber in orbe  
 „Solutus Cæsar erit. Quod si pro legibus arma  
 „Ferre juvat patriis, libertatemque tueri:  
 „Nunc neque Pompeji Brutum, nec Cæsaris hostem,

(1) in cassum vulgo.

„Post bellum victoris habes (1).“ Sic fatur. At illi  
Arcano sacras reddit Cato pectore voces:

„Summum, Brute, nefas civilia bella fatemur:  
„Sed quo fata trahunt, virtus secura sequetur.  
„Crimen erit superis & me fecisse nocentem.  
„Sidera quis, mundumque valet spectare cadentem  
„Expers ipse metus? quis, quum ruat arduus æther,  
„Terra labet, mixto coeuntis pondere mundi,  
„Compressas tenuisse manus? gentesne furorem  
„Hesperium ignotæ, Romanaque signa sequentur,  
„Deductique fretis alio sub sidere reges?  
„Otia solus agam? procul hunc arcete furorem,  
„O superi, motura Dahas ut clade Getasque,  
„Securo me, Roma cadat. Ceu morte parentem  
„Natorum orbatum, longum producere funus  
„Ad tumulos jubet ipse dolor: juvat ignibus atris  
„Inseruisse manus, constructoque aggere busti  
„Ipsum atras tenuisse faces: non ante revellar,  
„Exanimem quam te complectar Roma, tuumque  
„Nomen libertas, & inanem prosequar umbram.  
„Sic eat: inmites Romana piacula divi  
„Plena ferant: nullo fraudemus sanguine bellum.  
„O utinam, cœlique deis, erebique liberet  
„Hoc caput in cunctas damnatum exponere pœnas!  
„Devotum hostiles Decium pressere catervæ:

(1) habet *vulgo*.

„Me geminæ figant acies, me barbara telis  
„Rheni turba petat: cunctis ego pervius hastis  
„Excipiam medius totius vulnera belli.  
„Hic redimat sanguis populos: hac cæde luatur,  
„Quidquid Romani meruerunt pendere mores.  
„Ad juga cur faciles populi, cur sæva volentes  
„Regna pati pereunt? me solum invadite ferro,  
„Me frustra leges & inania jura tuentem:  
„Hic dabit, hic pacem jugulus, finemque laborum,  
„Gentibus Hesperiiis: post me regnare volenti  
„Non opus est bello. Quin publica signa, ducemque  
„Pompejum sequimur? nec, si fortuna favebit,  
„Hunc quoque totius sibi jus promittere mundi  
„Non bene compertum est: ideo me milite vincat,  
„Ne sibi se vicisse putet.“ Sic fatur: & acres  
Irarum movit stimulos: juvenisque calorem  
Excitat in nimios belli civilis amores.

Interea, Phœbo gelidas pellente tenebras,  
Pulsatæ sonuere fores: quas sancta relicto  
Hortensi mœrens irrumpit Marcia busto.  
Quondam virgo toris melioris juncta maritis  
Mox ubi connubii pretium, mercesque soluta est  
Tertia jam soboles, alios fecunda penates  
Impletura datur, geminas & sanguine matris  
Permixtura domus. Sed postquam condidit urna  
Supremos cineres, miserando concita vultu,  
Effusas laniata comas, contusaque pectus

Verberibus crebris, cineresque ingesta sepulcri,  
 Non aliter placitura viro, sic mœsta profatur:  
 „Dum sanguis inerat, dum vis materna, peregi  
 „Jussa, Cato, & geminos excepi fœta maritos,  
 „Visceribus lassis, partuque exhausta, revertor  
 „Jam nulli tradenda viro. Da fœdera prisci  
 „Illibata tori: da tantum nomen inane  
 „Connubii: liceat tumulo scripsisse, CATONIS  
 „MARCIA; ne dubium longo quæratur in ævo,  
 „Mutarim primas expulsa, an tradita tædas.  
 „Non me lætorum comitem, rebusque secundis  
 „Accipis: in curas venio, partemque laborum.  
 „Da mihi castra sequi: cur tuta in pace relinquer,  
 „Et sit civili propior Cornelia bello?“

Hæ flexere virum voces, & tempora quamquam  
 Sint aliena toris, jam fato in bella vocante:  
 Fœdera sola tamen, vanaque carentia pompa  
 Jura placent, sacrisque deos admittere testes.  
 Festa coronato non pendent limine sarta;  
 Infulaque in geminos discurrit candida postes,  
 Legitimæque faces, gradibusque adclivus eburnis  
 Stat torus, & picto vestis discriminat auro:  
 Turritaque premens frontem matrona corona,  
 Translata vetuit contingere limina planta.  
 Non timidum nuptæ leniter testura pudorem  
 Lutea demissos velarunt flammea vultus:  
 Balteus haud fluxos gemmis adstrinxit amictus,

Colla monile decens, humerisque hærentia primis  
 Suppara nudatos cingunt angusta lacertos.  
 Sic, ut erat, mæsti servat lugubria cultus:  
 Obsita funerea celatur purpura lana,  
 Quoque modo natos, hoc est amplexa maritum.  
 Non soliti lusere sales: nec more Sabino  
 Excepit tristis convicia festa maritus.  
 Pignora nulla domus, nulli coiere propinqui.  
 Junguntur taciti, contentique auspice Bruto.  
 Ille nec horrificam sancto dimovit ab ore  
 Cæsariem, duroque admisit gaudia vultu:  
 (Ut primum tolli feralia viderat arma,  
 Intonsos rigidam in frontem descendere canos  
 Passus erat, mæstamque genis increscere barbam.  
 Uni quippe vacat studiisque odiisque carenti,  
 Humanum lugere genus) nec fœdera prisci  
 Sunt tentata tori: justo quoque robur amoris  
 Restitit. Hi mōres, hæc duri inmotæ Catonis  
 Secta fuit, servare modum, finemque tenere,  
 Naturamque sequi, patriæque impendere vitam (1);  
 Nec sibi, sed toto genitum se credere mundo.  
 Huic epulæ, vicisse famem: magnique penates,  
 Submovisse hyemem tecto: pretiosaque vestis,  
 Hirtam membra super Romani more Quiritis  
 Induxisse togam: Venerisque huic maximus usus,

(1) curam MSS. *quidam male.*



Progenies; urbi pater est, urbique maritus:

Justitiæ custos, rigidi servator honesti:

In commune bonus: nullosque Catonis in actus,

Subrepsit, partemque tulit sibi nata voluptas.

Interea trepido discedens agmine Magnus,

Mœnia Dardanii tenuit Campana coloni.

Hæc placuit belli sedes, hinc summa moventi

Hostis in occursum sparsas extendere partes,

Umbrosis mediam qua collibus Appenninus

Erigit Italiam, nullo quo vertice tellus

Altius intumuit propiusve accessit Olympo.

Mons inter geminas medius se porrigit undas

Inferni superique maris: collesque coercent

Hinc Tyrrhena vado frangentes æquora Pisæ,

Illinc Delmatius obnoxia fluctibus Ancon.

Fontibus hic vastis inmensos concipit amnes,

Fluminaque in gemini spargit divortia ponti.

In lævum cecidere latus, veloxque Metaurus,

Crustumiumque rapax; & juncto Sapis Isauro,

Senaque, & Adriacas qui verberat Aufidus undas:

Quoque magis nullum tellus se solvit in amnem,

Eridanus, fractas devolvit in æquora silvas,

Hesperienque exhaurit aquis. Hunc fabula primum

Populea fluvium ripas umbrasse corona:

Quumque diem primum transverso limite ducens,

Succendit Phaeton flagrantibus æthera loris,

Gurgitibus raptis penitus tellure perusta,

Hunc habuisse pares Phœbeis ignibus undas.  
 Non minor hic Nilo, si non per plana jacentis  
 Ægypti Libyas Nilus stagnaret arenas.  
 Non minor hic Istro, nisi quod, dum permeat orbem  
 Ister, casuros in quælibet æquora fontes  
 Accipit; & Scythicas exit non solus in undas.  
 Dexterora petens montis declivia Thybrim  
 Unda facit; Rutubamque cavum. Delabitur inde  
 Vulturmusque celer, nocturnæque editor auræ  
 Sarnus, & umbrosæ Liris per regna Maricæ  
 Vestinis impulsus aquis, radensque Salerni  
 Culta Silæ, nullasque vado qui Macra moratus  
 Alnos, vicinæ percurrit in æquora Lunæ  
 Longior educto qua surgit in aera dorso,  
 Gallica rura videt, devexasque excipit Alpes.  
 Tunc Umbris Marsisque ferax, domitusque Sabello  
 Vomere, piniferis amplexus rupibus omnes  
 Indigenas Latii (1) populos, non deserit ante  
 Hesperiam, quam quum Scyllæis claudatur undis,  
 Extenditque suas in templa Lacinia rupes.  
 Longior Italia, donec confinia pontus obstat  
 Solveret incumbens, terrasque impelleret (2) æquor.  
 At postquam gemino tellus elisa profundo est,  
 Extremi colles Siculo cessere Peloro.

Cæsar in arma furens, nullas, nisi sanguine fuso,

(1) Late MSS. duo, & ed. vet.

(2) repelleret vulgo.

Gaudet habere vias, quod non terat hoste vacantes  
Hesperiae fines, vacuosque irrumpat in agros,  
Atque ipsum non perdat iter, consertaque bellis  
Bella gerat. Non tam portas intrare patentes  
Quam fregisse juvat: nec tam patiente colono  
Arva premi, quam si ferro populetur, & igni.  
Concessa pudet ire via, civemque videri.  
Tunc urbes Latii dubiae, varioque favore  
Ancipites, quamquam primo terrore ruentis  
Cessurae belli, denso tamen aggere firmant  
Mœnia, & abrupto circumdant undique vallo:  
Saxorumque orbes, & quæ super eminens hostem  
Tela petant, altis murorum turribus aptant.  
Pronior in Magnum populus, pugnatque minaci  
Cum terrore fides: ut quum mare possidet Auster  
Flatibus horridonis, hunc æquora tota sequuntur:  
Si rursus tellus, pulsu laxata tridentis  
Æolii, tumidis inmittit fluctibus Eurum,  
Quamvis ista novo, ventum tenere priorem  
Æquora, nubiferoque polus quum cesserit Euro,  
Vindicat unda Notum. Facilis sed vertere mentes  
Terror erat, dubiamque fidem fortuna ferebat.  
Gens Hetrusca fuga trepidi nudata Libonis,  
Jusque sui pulso jam perdidit Umbria Thermo.  
Nec gerit auspiciis civilia bella paternis  
Cæsaris audito conversus nomine Sulla.  
Varus, ut admotæ pulsarunt Auximon alæ,

Per diversa ruens neglecto mœnia tergo,  
 Qua silvæ, qua saxa, fugit. Depellitur arce  
 Lentulus Asclea. Victor cedentibus instat,  
 Devertitque acies: solusque ex agmine tanto  
 Dux fugit, & nullas ducentia signa cohortes.  
 Tu quoque nudatam commissæ deseris arcem  
 Scipio Nuceriæ: quamquam firmissima pubes  
 His sedeat castris, jampridem Cæsaris armis  
 Parthorum seducta metu: qua Gallica damna  
 Supplevit Magnus, dumque ipse ad bella vocaret,  
 Donavit socio Romani sanguinis usum.

At te Corfini validis circumdata muris  
 Tecta tenent, pugnax Domiti: tua classica servat  
 Oppositus quondam polluto tiro Miloni,  
 Ut procul immensam campis consurgere nubem,  
 Ardentesque acies percussis sole corusco  
 Conspexit telis, „Socii decurrite (1), dixit,  
 „Fluminis ad ripas, undisque inmergite pontem:  
 „Et tu montanis totus nunc fontibus exi,  
 „Atque omnes trahe gurges aquas, ut spumeus alnos,  
 „Discussa compage, feras. Hoc limite bellum  
 „Hæreat, hac hostis lentus terat otia ripa.  
 „Præcipitem cohibete ducem: victoria nobis  
 „Hic primum stans Cæsar erit.“ Nec plura locutus,  
 Devolvit rapidum nequidquam mœnibus agmen.

(1) concurrere MSS. duo.

Nam prior e campis ut conspicit, amne soluto,  
Rumpi Cæsar iter, calida prolatus ab ira,  
„Non satis est muros latebras quæsisse pavori?  
„Obstruitis campos, fluviisque arcere paratis,  
„Ignavi? non, si tumido me gurgite Ganges  
„Submoveat, stabit jam flumine Cæsar in ullo,  
„Post Rubiconis aquas. Equitum properate catervæ:  
„Ite simul pedites: ruiturum adscendite pontem.“  
Hæc ubi dicta, levis totas accepit habenas  
In campum sonipes: crebroque simillima nimbo  
Trans ripam validi torserunt tela lacerti.  
Ingreditur pulsa fluvium statione vacantem  
Cæsar, & ad tutas hostis compellitur arces.  
Et jam moturas ingentia pondera turres  
Erigit, & mediis subrepsit vinea muris.  
Ecce, nefas belli, reseratis agmina portis,  
Captivum traxere ducem, civisque superbi  
Constitit ante pedes. Vultu tamen alta minaci  
Nobilitas recta ferrum cervice poposcit.  
Scit Cæsar pœnamque peti, veniamque timeri.  
„Vive, licet nolis, & nostro munere, dixit,  
„Cerne diem. Victis jam spes bona partibus esto,  
„Exemplumque mei: vel, si libet, arma retenta;  
„Ec nihil hac venia, si viceris ipse, paciscor.“  
Fatur: & adstrictis laxari vincula palmis  
Imperat. Heu quanto melius vel cæde peracta  
Parcere Romano potuit fortuna pudori!

Pœnarum extremum civi, quod castra secutus  
Sit patriæ, Magnumque ducem, totumque senatum,  
Ignosci. Premit ille graves interritus iras,  
Et secum: „Romamne petes, pacisque recessus,  
„Degener? in medios belli non ire furores  
„Jamdudum moriture paras? rue certus, & omnis  
„Lucis rumpe moras, & Cæsaris effuge munus.“

Nescius interea capti ducis arma parabat  
Magnus, ut admixto firmaret robore partes.  
Jamque secuturo jussurus classica Phœbo,  
Tentandasque ratus moturi militis iras,  
Adloquitur tacitas veneranda voce cohortes:  
„O scelerum ultores, melioraque signa secuti:  
„O vere Romana manus: quibus arma senatus  
„Non privata dedit, votis deposcite pugnam.  
„Ardent Hesperii sævis populatibus agri:  
„Gallica per gelidas rabies effunditur Alpes:  
„Jam tetigit sanguis pollutos Cæsaris enses.  
„DI! melius, belli tulimus quod damna priores:  
„Cœperit inde nefas. Jam jam, me præside, Roma  
„Supplicium, pœnamque petat. Neque enim ista vocari  
„Prælia justa decet, patriæ sed vindicis iram.  
„Nec magis hoc bellum est, quam quo Catilina paravit  
„Arsuras in tecta faces, sociusque furoris  
„Lentulus, exsertique manus vesana Cethegi.  
„O rabies miseranda ducis! quum fata Camillis  
„Te, Cæsar, magnisque velint miscere Metellis,

„Ad Cinnae Mariosque venis. Sternere profecto,  
 „Ut Catulo jacuit Lepidus, nostrasque secures  
 „Passus, Sicanio tegitur qui Carbo sepulcro,  
 „Quique feros movit Sertorius exsul Iberos.  
 „Quamquam, si qua fides, his te quoque jungere Cæsar  
 „Invideo, nostrasque manus quod Roma furenti  
 „Opposuit. Parthorum utinam post prælia sospes,  
 „Et Scythicis Crassus victor remeasset ab arvis,  
 „Ut simili causa caderes, qua Spartacus hostis.  
 „Te quoque si superi titulis accedere nostris  
 „Jusserunt, valet, en! (1) torquendo dextera pilo:  
 „Fervidus hæc iterum circum præcordia sanguis  
 „Incaluit: disces non esse ad bella fugaces,  
 „Qui pacem potuere pati. Licet ille solutum,  
 „Defectumque vocet, ne vos mea terreat ætas.  
 „Dux sit in his castris senior, dum miles in illis.  
 „Quo potuit civem populus perducere liber,  
 „Adscendi, supraque nihil, nisi regna, reliqui.  
 „Non privata cupis (2), Romana quisquis in urbe  
 „Pompejum transire paras. Hinc consul uterque,  
 „Hinc acies statura ducum. Cæsarne senatus  
 „Victor erit? non tam cæco trahis omnia cursu,  
 „Teque nihil, Fortuna, pudet. Multisne rebellis  
 „Gallia jam lustris, ætasque impensa labori  
 „Dant animos? Rheni gelidis quod fugit ab undis,

(1) valet in *vulgo*.

(2) cupit Jo. *Salisbergensis*.

„Oceanumque vocans incerti stagna profundi;  
 „Territa quæsisit ostendit terga Britannis?  
 „An vanæ tumuere minæ, quod fama furoris  
 „Expulit armatam patriis e sedibus urbem?  
 „Heudemens, non te fugiunt, me cuncta (1) sequuntur:  
 „Qui quum signa tuli toto fulgentia ponto,  
 „Ante bis exactum quam Cynthia conderet orbem,  
 „Omne fretum metuens pelagi pirata reliquit,  
 „Angusta que domum terrarum in sede poposcit.  
 „Idem ego per Scythici profugum divortia Ponti  
 „Indomitum regem, Romanaque fata morantem,  
 „Ad mortem, Sulla felicior, ire coegi.  
 „Pars mundi mihi nulla vacat: sed tota tenetur  
 „Terra meis, quocumque jacet sub sole, tropæis.  
 „Hinc me victorem gelidas ad Phasidos undas  
 „Arctos habet: medius calida mihi cognitus axis  
 „Ægypto, atque umbras nusquam (2) flectente Syene.  
 „Occasus mea jura timet, Tethynque fugacem  
 „Qui ferit Hesperius post omnia flumina Bætis.  
 „Me dormitus cognovit Arabs, me Marte feroces  
 „Heniochi, notique erepto vellere Colchi.  
 „Cappadoces mea signa timent: & dedita sacris  
 „Incerti Judæa dei, mollisque Sophene.  
 „Armenios, Cilicasque feros, Taurosque subegi.  
 „Quod socero bellum, præter civile, reliqui?“

(1) castra MS.

(2) numquam Macrobius.



Verba ducis nullo partes clamore sequuntur,  
 Nec matura petunt promissæ classica pugnae.  
 Sensit & ipse metum Magnus; placuitque referri  
 Signa, nec in tanti discrimina mittere Martis  
 Jam victum fama non visi Cæsaris agmen.  
 Pulsus ut armentis primo certamine taurus  
 Silvarum secreta petit, vacuosque per agros  
 Exsul in adversis explorat cornua truncis:  
 Nec redit in pastus, nisi quum cervice recepta  
 Excussi placuere tori: mox reddita victor.  
 Quos libet in saltus comitantibus agmina tauris  
 Invito pastore trahit: sic viribus impar  
 Tradidit Hesperiam, profugusque per Appula rura  
 Brundisii tutas conscendit (1) Magnus in arces.  
 Urbs est Dictæis olim possessa colonis,  
 Quos Creta profugos vexere per æquora puppes  
 Cecropiæ, victum mentitis Thesea velis.  
 Qua latus angustum jam se cogentis in arcum  
 Hesperia, tenuem producit in æquora linguam,  
 Hadriacas flexis claudit qua cornibus undas.  
 Nec tamen hoc artis inmissum faucibus æquor  
 Portus erat, si non violentos insula Coros  
 Exciperet saxis, lassasque retunderet undas.  
 Hinc illinc montes scopulosæ rupis aperto  
 Opposuit natura mari, flatusque removit,

Ut

(1) concedit *vulgo*.

Ut tremulo starent contentæ fune carinæ.

Hinc late patet omne fretum, seu vela ferantur

In portus, Corcyra, tuos, seu læva petatur

Illyris Jonias vergens Epidamnos in undas.

Huc fuga nautarum, quum totas Hadria vires

Movit, & in nubes abiire Ceraunia, quumque

Spumoso Calaber perfunditur æquore Sason.

Ergo ubi nulla fides rebus post terga relictis,

Nec licet ad duros Martem convertere Iberos,

Quum mediæ jaceant immensis tractibus Alpes:

Tum sobole ex tanta natum, cui firmior ætas,

Adfatur: „Mundi jubeo tentare recessus.

„Euphraten, Nilonque move, quo nominis usque

„Nostri fama venit, quas est vulgata per urbes

„Post me Roma ducem: sparsos per rura colonos

„Redde mari Cilicas: Pharios hinc concute reges,

„Tigranemque meum. Nec Pharnacis arma relinquo,

„Admoneo, nec tu populos utraque vagantes

„Armenia, Pontique feras per litora gentes,

„Riphæasque manus, & quas tenet æquore denso

„Pigra palus Scythici patiens Mæotia plaustri.

„Sed quid plura moror? totos mea, nate, per ortus

„Bella seres, totoque urbes agitabis in orbe

„Perdomitas: omnes redeant in castra triumpho.

„Et vos, qui Latios signatis nomine fastus,

„Primus in Epiron Boreas agat: inde per arva

„Grajorum, Macetumque novas adquirite vires;

F

„Dum paci dat tempus hiems.“ Sic fatur, & omnes  
Jussa gerunt, solvuntque cavas a litore puppes.

At numquam patiens pacis, longæque quietis  
Armorum, ne quid fatis mutare liceret,  
Adsequitur, generique premit vestigia Cæsar.  
Sufficerent aliis primo tot mœnia cursi  
Rapta, tot obsessæ depulsis hostibus arces:  
Ipsa caput mundi bellorum maxima merces,  
Roma capi facilis: sed Cæsar in omnia præceps,  
Nil credens acli, quum quid superaret agendum,  
Instat atrox: & adhuc, quamvis possederat omnem  
Italiam, extremo sedeat quod litore Magnus,  
Communem tamen esse dolet: nec rursus aperto  
Vult hostes errare freto, sed molibus undas  
Obstruit, & latum dejectis rupibus æquor.  
Cedit in immensum cassus labor: omnia pontus  
Haurit saxa vorax, montesque inmiscet arenis.  
Ut maris Ægæi medias si celsus in undas  
Depellatur Eryx, nullæ tamen æquore rupes  
Emineant, vel convulso si vertice Gaurus  
Decidat in fundum penitus stagnantis Averni.  
Ergo ubi nulla vado tenuit sua pondera moles,  
Tunc placuit cæsis innectere vincula silvis,  
Roboraque immensis late religare catenis.  
Talis fama canit tumidum super æquora Persen  
Construxisse vias, multum quum pontibus ausus,  
Europamque Asiæ, Sestonque admovit Abydo,

Incessitque fretum rapidi super Hellesponti,  
 Non Eurum, Zephyrumque timens, quum vela, ratesque  
 In medium deferret Athon. Sic ora profundū  
 Artantur nemorum casu: tunc aggere multo  
 Surgit opus, longæque tremunt super æquore turres.

Pompejus tellure nova compressa profundū  
 Ora videns, curis animum mordacibus angit,  
 Ut reseret pelagus, spargatque per æquora bellum!  
 Sæpe Noto plenæ, tensisque rudentibus actæ  
 Ipsa maris per claustra rates fastigia molis  
 Discussere salo, spatiumque dedere carinis:  
 Tortaque per tenebras validis ballista lacertis,  
 Multifidas jaculata faces. Ut tempora tandem  
 Furtivæ placuere fugæ: ne litora clamor  
 Nauticus exagitet, neu buccina dividat horas,  
 Neu tuba præmonitos perducatur ad æquora nautas  
 Præcepit sociis. Jam cæperat ultima virgo  
 Phœbum laturas ortu præcedere Chelas,  
 Quum tacitas (1) solvere rates. Non ancora voces  
 Movit, dum spissis avellitur uncus arenis:  
 Dum juga curvantur mali, dumque ardua pinus  
 Erigitur, pavidæ classis siluere magistri:  
 Strictaque pendentē (2) deducunt carbasa nautæ,  
 Nec quatiunt validos, ne sibilet aura, rudentes.  
 Dux etiam votis hoc te, Fortuna, precatur,

(1) quum taciti *vulgo*.

(2) pudentes *vulgo*.

„Quam retinere vetas, liceat sibi perdere saltem  
„Italiam.“ Vix fata sinunt: nam murmure vasto  
Impulsum rostris sonuit mare, fluctuat unda,  
Totque carinarum permixtis æquora sulcis.

Ergo hostes portis, quas omnes solverat urbis  
Cum fato conversa fides, murisque recepti,  
Præcipiti cursu flexi per cornua portus  
Ora petunt, pelagusque dolent contingere classes,  
Heu pudor! exigua est fugiens victoria Magnus,  
Angustus puppès mittebat in æquora limes  
Artior Euboica, qua Chalcida verberat, unda.  
Hic hæserè rates geminæ, classique paratas  
Excepere manus: tractoque ad litora bello,  
Hic primum rubuit civili sanguine Nereus.  
Cetera classis abiit summis spoliata carinis:  
Ut Pagasæa rates peteret quum Phasidos undas,  
Cyaneas tellus emisit in æquora cautes,  
Rapta puppe minor subducta est montibus Argo,  
Vanaque percussit pontum Symplegas inanem,  
Et statura redit. Jam Phœbum urguere monebat  
Non idem Eoi color ætheris, albaque nondum  
Lux rubet, & flammæ propioribus eripit astris:  
Et jam Plias hebet, flexi jam plaustra Bootæ  
In faciem puri redeunt languentia cœli,  
Majoresque latent stellæ, calidumque refugit  
Lucifer ipse diem. Pelagus jam Magne tenebas,  
Non ea fata ferens, quæ, quum super æquora victor

Prædonem sequerere maris. Lassata triumphis  
Destituit (1) fortuna tuis. Cum conjuge pulsus,  
Et natis, totosque trahens in bella penates,  
Vadis adhuc ingens, populis comitantibus, exsul.  
Quæritur indignæ sedes longinqua ruinæ.  
Non, quia te superi patrio privare sepulcro  
Maluerint, Phariæ busto damnantur arenæ:  
Parcitur Hesperix; procul hoc ut in orbe remoto  
Abscondat Fortuna nefas, Romanaque tellus  
Immaculata sui servetur sanguine Magni.

(1) Descivit *vulgo*.





## LIBER TERTIUS.

### ARGUMENTUM.

*Tertius insinuat Pompeji insomnia dira,  
 Conjugis umbra sui quibus intimat omina dura.  
 Caesaris adventu, legum præcunte ruina,  
 Tempia Jovis Romæ tristi spoliata rapina.  
 Nomine Pompeji motas in prælia gentes  
 Quantas vix memorant bellorum extrema gementes.  
 Massiliæ cives ingentia mentibus ausos,  
 Præcipitis belli currentia sistere nisos.  
 Quos licet in primo juvit fortuna labore,  
 Decepit misere extremo revoluta tenore.  
 Denique tentantes navalibus ultima fati  
 Igne, mari, ferro pæne omnes mortificati.*

**P**ropulit (1) ut classem velis cedentibus Auster  
 Incumbens, mediumque rates movere profundum,

(1) protulit aliquot.

Omnis in Jonios spectabat navita fluctus:  
 Solus ab Hesperia non flexit lumina terra  
 Magnus, dum patrios portus, dum litora numquam  
 Ad visus reditura suos, tectumque cacumen  
 Nubibus, & dubios cernit vanescere montes.  
 Inde soporifero cesserunt languida somno  
 Membra ducis: diri quum plena horroris imago  
 Visa caput mœstum per hiantes Julia terras  
 Tollere, & accenso furialis stare sepulcro.  
 „Sedibus Elysiis, campoque expulsa piorum,  
 „Ad Stygias, inquit, tenebras manesque nocentes,  
 „Post bellum civile trahor. Vidi ipsa tenentes  
 „Eumenidas, quaterent vestris quas lampadas armis.  
 „Præparat innumeras puppes Acherontis adusti  
 „Portitor: in multas laxantur Tartara pœnas.  
 „Vix operi junctæ (1) dextra properante sorores  
 „Sufficiunt: lassant rumpentes stamina Parcas.  
 „Conjuge me lætos duxisti, Magne, triumphos:  
 „Fortuna est mutata toris: semperque potentes  
 „Detrahere in cladem fato damnata maritos  
 „En! nupsit tepido pellex Cornelia busto.  
 „Hæreat illa tuis per bella, per æquora signis,  
 „Dum non securos liceat mihi rumpere somnos,  
 „Et nullum vestro vacuum sit tempus amori,  
 „Sed teneant Cæsarque dies, & Julia noctes.

(1) cunctæ vulgo.



„Me non Lethææ, conjux, oblivia ripæ  
„Inmemorem fecere tui, regesque silentum  
„Permiserere sequi. Veniam, te bella gerente,  
„In medias acies. Numquam tibi, Magne, per umbras  
„Perque meos manes genero non esse licebit.  
„Abscidis frustra ferro tua pignora. Bellum  
„Te faciet civile meum.“ Sic fata, refugit  
Umbra per amplexus trepidi dilapsa mariti.

Ille, dei quamvis cladem, manesque minentur,  
Major in arma ruit, certa cum mente malorum.  
„Et, quid, ait, vani terremur imagine visus?  
„Aut nihil est sensus animis a morte relictum,  
„Aut mors ipsa nihil.“ Titan jam pronus in undas  
Ibat, & igniferi tantum demerserat orbis,  
Quantum deesse solet lunæ seu plena futura est,  
Sed jam plena fuit: tunc obtulit hospita tellus  
Puppibus accessum facilem: legere rudentes,  
Et posito remis petierunt litora malo.

Cæsar, ut emissas venti rapuere carinas,  
Absconditque fretum classes, & litore solus  
Dux stetit Hesperio, non illum gloria pulsi  
Lætificat Magni: queritur quod tuta per æquor  
Terga ferant hostes. Neque enim jam sufficit ulla  
Præcipiti fortuna viro: nec vincere tanti,  
Ut bellum differret, erat. Tunc pectore curas  
Expulit armorum, pacique intentus agebat,  
Quoque modo vanos populi conciret amores,

Gnarus & irarum caussas, & summa favoris  
 Annonæ momenta trahi. Namque adserit urbes .  
 Sola fames, emiturque metus, quum segne potentes  
 Vulgus alunt. Nescit plebes jejuna timere.  
 Curio Sicaniæ transcendere jussus in urbes,  
 Qua mare tellurem subitis aut obruit undis,  
 Aut scidit, & medias fecit sibi litora terras.  
 Vis illic ingens pelagi, semperque laborant  
 Æquora, ne rupti repetant confinia montes:  
 Bellaque Sardoas etiam sparguntur in oras:  
 Utraque frugiferis est insula nobilis arvis,  
 Nec plas Hesperiam longinquis messibus ullæ,  
 Nec Romana magis complerunt horrea terræ:  
 Ubere vix glebæ superat, cessantibus Austris,  
 Quum medium nubes Borea cogente sub axem  
 Effusis magnum Libye tulit imbris annum.

Hæc ubi sunt provisa duci, tunc agmina victor (1)  
 Non armata trahens, sed pacis habentia vultum,  
 Testa petit patriæ. Pro, si remeasset in urbem,  
 Gallorum tantum populis, Arctoque subacta,  
 Quam seriem rerum longa præmittere pompa,  
 Quas potuit belli facies! ut vincula Rheno,  
 Oceanoque daret: celso ut Gallia currus  
 Nobilis, & flavis sequeretur mixta Britannis.  
 Perdidit o qualem vincendo plura triumphum!

(1) duætor MSS. *quidam*.

Non illum lætis vadantem cœtibus urbes,  
Sed tacitæ videre metu: non constitit usquam  
Obvia turba duci. Gaudet tamen esse timori  
Tam magno populis, & non se mallet amari.

Jamque & præcipites superaverat Anxuris arces,  
Et qua Pomtinæ (1) via dividit uda paludes,  
Qua sublime nemus, Scythicæ qua regna Dianæ,  
Quaque iter est Latiis ad summam fascibus Albam:  
Et celsa de rupè procul jam prospicit urbem,  
Arctoi toto non visam tempore belli:

Miratusque suæ, sic fatur, mœnia Romæ:  
„Tene, deûm sedes, non ullo Marte coacti  
„Deseruere viri! pro qua pugnabitur urbe?  
„DI! melius, quod non Latias Eous in oras  
„Nunc furor incubuit, nec juncto Sarmata velox  
„Pannonio, Dacisque Getes admixtus: habenti  
„Tam pavidum tibi Roma ducem Fortuna pepercit,  
„Quod bellum civile fuit.“ Sic fatur, & urbem  
Adtonitam terrore subit. Namque ignibus atris  
Creditor, ut captæ, rapturus mœnia Romæ,  
Sparsurusque deos. Fuit hæc mensura timoris:  
Velle putant, quodcumque potest. Non omina festa,  
Non fictas læto voces simulare tumultu:  
Vix odisse vacat. Phœbea palatia complet  
Turba Patrum, nullo cogendi jure senatus,

(1) Pontinas *vulgg.*

E latebris educlæ suis: non consule sacræ  
 Fulserunt sedes: non proxima lege potestas  
 Prætor adest: vacuæque loco cessere curules.  
 Omnia Cæsar erat. Privatæ curia vocis  
 Testis adest. Sedere Patres censere parati,  
 Si regnum, si templa sibi, jugulumque senatus,  
 Exsiliumque petat. Melius, quod plura jubere  
 Erubuit, quam Roma pati. Tamen exit in iram,  
 Viribus an possint obsistere jura, per unum  
 Libertas experta virum. Pugnaxque Metellus  
 Ut videt ingenti Saturnia templa revelli  
 Mole, rapit gressus, & Cæsaris agmina rumpens,  
 Ante fores nondum reseatæ constitit ædis;  
 (Usque adeo ferrum solus, mortemque timere  
 Auri nescit amor. Pereunt discrimine nullo  
 Amissæ leges: & pars vilissima rerum  
 Certamen movistis opes) prohibensque rapina  
 Victorem, clara testatur voce Tribunus:  
 „Non nisi per nostrum vobis percussa patebunt  
 „Templa latus, nullasque feres nisi sanguine sacro (1)  
 „Sparsas, raptor, opes. Certe violata potestas  
 „Invenit ista deos: Crassumque in bella secutæ  
 „Læva tribunitiæ voverunt prælia diræ.  
 „Detege jam ferrum. Neque enim tibi turba verenda est  
 „Spectatrix scelerum: deserta stamus in urbe.

(1) sanguine nostro MSS. *quidam*.

„Non feret e nostro sceleratus præmia miles:  
 „Sunt quot prosternas populi, quæ mœnia dones.  
 „Pacis ad exhaustæ (1) spoliū non cogit egestas:  
 „Bellum Cæsar habes.“ His magnam victor in iram  
 Vocibus accensus: „Vanam spem mortis honestæ  
 „Concipis: haud, inquit, jugulo se polluet isto  
 „Nostra, Metelle, manus. Dignum te Cæsaris ira  
 „Nullus honos faciet. Te vindice tuta relicta est  
 „Libertas? non usque adeo permiscuit imis  
 „Longus summa dies, ut non, si voce Metelli  
 „Servantur leges, malint a Cæsare tolli.“

Dixerat: & nondum foribus cedente tribuno  
 Acror ira subit: sævos circumspicit enses,  
 Oblitus simulare togam. Tum Cotta Metellum  
 Compulit audaci nimium desistere cœpto.  
 „Libertas, inquit, populi, quem regna coercent,  
 „Libertate perit; cuius servaveris umbram,  
 „Si, quidquid jubeare, velis. Tot rebus iniquis  
 „Paruimus victi: venia est hæc sola pudoris,  
 „Degenerisque metus, nil jam potuisse negari.  
 „Ocius avertat diri mala semina belli.  
 „Damna movent populos, si quos sua jura tuentur,  
 „Non sibi, sed domino gravis est, quæ servit, egestas.“  
 Protinus abducto patuerunt templa Metello.  
 Tunc rupes Tarpeja sonat, magnoque revulsas

(1) exustæ MS.

**Testatur stridore fores: tunc conditus imo**  
 Eruitur templo multis non tactus ab annis  
 Romani census populi, quem Punica bella,  
 Quem dederat Perses, victi quem præda Philippi:  
 Quod tibi, Roma, fuga Pyrrhus trepidante reliquit,  
 Quo te Fabricius regi non vendidit auro (1),  
 Quidquid parcorum mores servastis avorum,  
 Quod dites Asiæ populi misere tributum,  
 Victorique dedit Minoia Creta Metello,  
 Quod Cato longinqua vexit super æquora Cypro.  
 Tunc Orientis opes, captorumque ultima (2) regum  
 Quæ Pompejanis prælata est gaza triumphis  
 Egeritur (3): tristi spoliantur templa rapina;  
 Pauperiorque fuit tunc primum Cæsare Roma.

Interea totum Magni fortuna per orbem  
 Secum casuras in prælia moverat urbes.  
 Proxima vicino vires dat Græcia bello.  
 Phocaicas Amphisa manus scopulosaque Cyrrha,  
 Parnasosque jugo misit desertus utroque.  
 Bæoti coiere duces, quos impiger ambit  
 Fatidica Cephisos aqua, Cadmeaque Dirce,  
 Pisææque manus, populisque per æquora mittens  
 Sicanijs Alpheos aquas. Tunc Mænala liquit  
 Arcas, & Herculeam miles Trachinibus Æten.

(1) aurum MS.

(2) victima MS.

(3) Eruitur, erigitur, eripitur MS.

Thesproti, Dryopesque ruunt, quercusque silentes  
Chaonio veteres liquerunt vertice Sellæ.  
Exhaustit totas, quamvis dilectus, Athenas,  
Exiguæ Phœbea tenent navalia puppes,  
Tresque petunt veram credi Salamina carinæ.  
Jam dilecta Jovi centenis venit in arma  
Creta vetus populis, Cnososque agitare pharetras  
Docta, nec Eois pejor Gortyna sagittis.  
Tunc qui Dardaniam tenet Oricon, & vagus altis  
Dispersus silvis Athamas, & nomine prisco  
Encheltæ versi testantes funera Cadmi,  
Colchis & Adriacas spumans Apsyrtis in undas.  
Penei qui rura colunt, quorumque labore  
Thessalus Æsoniam vomer proscindit Jolcon.  
Inde lacessitum primo mare, quum rudis Argo  
Miscuit ignotas temerato litore gentes,  
Primaque cum ventis, pelagique furentibus undis  
Composuit mortale genus, fatisque per illam  
Accessit mors una ratem. Tum linquitur Æmus  
Thracius, & populum Pholoe mentita biformem.  
Deseritur Strymon tepido committere Nilo  
Bistonias consuetus aves, & Barbara Cone  
Sarmaticas ubi perdit aquas, sparsamque profundo  
Multifidi Peucen unum caput adluit Istri:  
Mysiaque, & gelido tellus perfusa Caico  
Idalis, & nimium glebis exilis Arisbe.  
Quique colunt Pitanen, & quæ tua munera Pallas

Lugent damnatæ Phœbo victore Celenæ:

Qua celer & rectis (1) descendens Marsya ripis

Errantem Mæandron adit, mixtusque refertur:

Passaque ab auriferis tellus exire metallis

Pactolon: qua culta secatur non vilior Hermus.

Iliacæ quoque signa manus, perituraque castra

Omnibus petiere suis: nec fabula Trojæ

Continuit, Phrygiique ferens se Cæsar Juli.

Accedunt Syriæ populi, desertus Orontes,

Et felix, scit fama, Ninos: ventosa Damascos,

Gazaque, & arbusto palmarum dives Idume.

Et Tyros instabilis, pretiosaque murice Sidon.

Has ad bella rates non flexo limite ponti,

Certior hæud ullis duxit Cynosura carinis.

Phœnices primi, famæ si creditur, ausi

Mansuram rudibus vocem signare figuris.

Nondum flumineas Memphis contexere biblos

Noverat: & saxis tantum, volucresque feræque,

Sculptaque servabant magicas animalia linguas.

Deseritur Taurique nemus, Perseæque Tarsos,

Coryciumque patens exesis rupibus antrum,

Mallos, & extremæ resonant navalibus Ægæ.

Itque Cilix juxta jam non pirata carina.

Movit & Eoos bellorum fama recessus,

Qua colitur Ganges, toto qui solus in orbe

(1) erectis vulgo. ereptis vet. edd.



Ostia nascenti contraria solvere Phœbo  
 Audet, & adversum flûctus adtollit in Eurum:  
 Hic ubi Pellæus, post Tethyos æquora, ductor  
 Constitit, & magno vinci se fassus ab orbe est.  
 Qua feriens rabidum diviso gurgite pontum  
 Vastis Indus aquis mixtum non sentit Hydaspem.  
 Quique bibunt tenera dulces ab arundine succos,  
 Et qui tinguentes croceo medicamine crinem  
 Fluxa coloratis adstringunt carbasâ gemmis,  
 Quique suas struxere pyras, vivique calentes  
 Conscendère rogos. Pro, quanta est gloria genti,  
 Injecisse manum fatis, vitæque repletos,  
 Quod superest, donasse deis! Venère feroces  
 Cappadoces, duri populus non cultor (†) Amani,  
 Armeniusque tenens volentem saxa Niphaten:  
 Æthera tangentes silvas liquere Coatræ.  
 Ignotum vobis Arabes venistis in orbem,  
 Umbras mirati nemorum non ire sinistras.  
 Tunc furor extremos movit Romanus Oretas,  
 Carmanosque duces, quorum jam flexus in Austrum  
 Æther, non totam mergi tamen adspicit Arcton,  
 Lucet & exigua velox ibi nocte Bootes.  
 Æthiopumque solum, quod non premeretur ab ulla  
 Signiferi regione poli, nisi, poplite lapso,  
 Ultima curvati procederet ungula Tauri.

(†) nunc cultor *vulgo*.

Quaque caput rapido tollit cum Tigride magnus  
 Euphrates, quos non diversis fontibus edit  
 Persis, & incertum, tellus si misceat amnes,  
 Quod potius sit nomen aquis. Sed sparsus in agros  
 Fertilis Euphrates Phariæ vice fungitur (1) undæ:  
 At Tigrin subito tellus absorbet hiatu;  
 Occultosque tegit cursus, rursumque renatum  
 Fonte novo flumen pelagi non abnegat undas.  
 Inter Cæsareas acies, diversaque signa  
 Pugnares dubium Parthi tenere favorem,  
 Contenti fecisse duos. Unxere sagittas  
 Errantes Scythiæ populi, quos gurgite Baëtos  
 Includit gelido, vastisque Hyrcania silvis.  
 Hinc Lacedæmonii, moto gens aspera freno,  
 Heniochi, sævisque adfinis Sarmata Moschis.  
 Colchorum qua rura secatur ditissima Phasis:  
 Qua Cræso fatalis Halys, qua vertice lapsus  
 Riphæo Tanais divisi nomina mundi  
 Imposuit ripis, Asiæque, & terminus idem  
 Europæ, mediæ dirimens confinia terræ,  
 Nunc hunc, nunc illum, quæ flectitur, ampliat orbem.  
 Quaque fretu torrens Mæotidas egerit undas  
 Pontus, & Herculeis aufertur gloria metis,  
 Oceanumque negat solas admittere Gades.  
 Hinc Essedoniæ gentes, auroque ligatas

(1) funditur MSS. vetustiss.

Substringens, Arimaspe, comas: hinc fortis Arius,  
 Longaque Sarmatici solvens jejunia belli  
 Massagetes quo fugit equo; volucresque Geloni.

Non, cum Memnoniis deducens agmina regnis  
 Cyrus, & effusis numerato milite telis  
 Descendit Perses, fraternique ultor amoris  
 Æquora quum tantis percussit classibus, unum  
 Tot reges habuere ducem. Coiere nec unquam  
 Tam variz cultu gentes, tam dissona vulgi  
 Ora. Tot immensæ comites missura ruinæ  
 Excivit populos, ac dignas funere Magni  
 Exsequias Fortuna dedit. Non corniger Hammon  
 Mittere Marmaricas cessavit in arma catervas:  
 Quidquid ab occiduis Libye patet arida Mauris,  
 Usque Parætoniæ Eoa ad litora Syrtes.  
 Acciperet felix ne non semel omnia Cæsar,  
 Vincendum pariter Pharsalia præstitit orbem.

Ille ubi deseruit trepidantis mœnia Romæ,  
 Agmine nubiferam rapto superevolat Alpen:  
 Quumque alii famæ populi terrore paverent,  
 Phocais in dubiis ausa est servare juventus  
 Non Graja levitate fidem, signataque jura,  
 Et causas, non fata, sequi. Tamen ante furorẽ  
 Indomitum duramque viri desistere mentem  
 Pacifero sermone parant, hostemque propinquum  
 Orant Cecropiæ prælata fronde Minervæ.

„Semper in externis populo communia vestro

„Massiliam bellis testatur fata tulisse,  
 „Comprensa est Latiis quæcumque annalibus ætas.  
 „Et nunc, ignoto si quos petis orbe triumphos,  
 „Accipe devotas externa in prælia dextras.  
 „At si funestas acies, si dira paratis  
 „Prælia discordes, lacrimas civilibus armis  
 „Secretumque damus. Trahentur vulnera nulla  
 „Sacra manu. Si cœlicolis furor arma dedisset,  
 „Aut si terrigenæ tentarent astra gigantes,  
 „Non tamen auderet pietas humana vel armis,  
 „Vel votis prodesse Jovi; sortesque deorum  
 „Ignarum mortale genus, per fulmina tantum  
 „Sciret adhuc solum cœlo regnare Tonantem.  
 „Adde quod innumeræ concurrunt undique gentes,  
 „Nec sic horret iners scelerum contagia mundus,  
 „Ut gladiis egeant civilia bella coactis.  
 „Sit mens ista quidem cunctis, ut vestra recusent  
 „Fata, nec hæc alius comitetur (1) prælia miles.  
 „Cui non conspecto languebit dextra parente?  
 „Telaque diversi prohibebunt spargere fratres.  
 „Finis adest rerum, si non committitis illis  
 „Arma, quibus fas est. Nobis hæc summa precandi,  
 „Terribiles aquilas, infestaque signa relinquant  
 „Urbe procul, nostrisque velis te credere muris,  
 „Excludique sinas, admisso Cæsare, bellum.

(1) committat *vulgo*.

„Sit locus exceptus sceleri, Magnoque, tibi que  
 „Tutus, ut invictæ fatum si consulat urbi,  
 „Fœdera si placeant, sit, quo veniatis inermes.  
 „Vel, quum tanta vocent discrimina Martis Iberi,  
 „Quid rapidum deflectis iter? non pondera rerum,  
 „Non momenta sumus: numquam felicibus armis  
 „Usa manus, patriæ primis ab sedibus exsul,  
 „Et post translatas exustæ Phocidos arces,  
 „Mœnibus exiguis alieno in litore tuti,  
 „Illustrat quos sola fides. Si claudere muros  
 „Obsidione paras, & vi perfringere portas,  
 „Excepisse faces tectis, ac tela parati,  
 „Undarum raptos aversis fontibus haustus  
 „Quærere, & effossam sitientes lambere terram:  
 „Et desit si larga Ceres, tunc horrida cerni,  
 „Fœdaque contingi maculato carpere (1) morsu.  
 „Nec pavet hic populus pro libertate subire,  
 „Obsessum Pœno gessit quæ Marte Saguntum.  
 „Pectoribus rapti matrum, frustra que trahentes  
 „Ubera sicca fame medios mittentur in ignes;  
 „Uxor & a caro poscet sibi fata marito.  
 „Vulnera miscebunt fratres, bellumque coacti  
 „Hoc potius civile gerent.“ (2) Sic Graja juvenus  
 Finierat: quum turbato jam prodita vultu  
 Ira ducis, tandem testata & voce dolorem.

(1) tangere, corpore MSS. alii.

(2) gerant duo vet. edd.

„Vana movet Grajos nostri fiducia cursus.  
„Quamvis Hesperium mundi properemus ad axem,  
„Massiliam delere vacat. Gaudete cohortes:  
„Obvia præbentur fatorum munere bella.  
„Ventus ut amittit vires, nisi robore denso  
„Occurrunt silvæ, spatio diffusus inani:  
„Utque perit magnus nullis obstantibus ignis,  
„Sic hostes mihi deesse nocet: damnumque putamus  
„Armorum, nisi, qui vinci potuere, rebellant.  
„Sed si solus eam dimissis degener armis,  
„Tunc mihi tecta patent. Jam non excludere tantum,  
„Inclusisse volunt. At enim contagia belli  
„Dira fugant. Pœnas dabit pro pace petita:  
„Et nihil esse meo discetis tutius ævo,  
„Quam duce me bellum.“ Sic postquam fatus, ad urbem  
Haud trepidam convertit iter: tum mœnia clausa  
Conspicit; & densa juvenum vallata corona.  
Haud procul a muris tumulus surgentis in altum  
Telluris parvum diffuso vertice campum  
Explicat; hæc patiens longo munimine cingi  
Visa duci rupes, tutisque aptissima castris.  
Proxima pars urbis celsam consurgit in arcem  
Par tumulo, mediisque sedent convallibus arva.  
Tunc res inmenso placuit statura labore,  
Aggere diversos vasto committere colles.  
Sed prius ut totam, qua terra cingitur, urbem  
Clauderet, a summis perduxit ad æquora castris

Longum Cæsar opus, fontesque & pabula campi  
 Amplexus fossâ, densas tollentia pinnas  
 Cespitibus, crudâque extruxit brachia terra:

Jam satis hoc Grajæ memorandum contigit urbi,  
 Æternumque decus, quod non impulsa, neque ipso  
 Strata metu, tenuit flagrantis in omnia belli  
 Præcipitem cursum: raptisque a Cæsare cunctis,  
 Vincitur una mora. Quantum est, quod fata tenentur!  
 Quodque virum toti properans imponere mundo  
 Perdidit hos Fortuna dies! tunc omnia late  
 Procumbunt nemora, & spoliantur robore silvæ:  
 Ut, quum terra levis mediâ virgultaque molem  
 Suspendant, stridula laterum compage ligatam  
 Artet humum, pressus ne cedat turribus agger.  
 Lucus erat longo numquam violatus ab ævo,  
 Obscurum cingens connexis æra ramis,  
 Et gelidas alte submotis solibus umbras.  
 Hunc non ruricolæ Panes, nemorumque potentes  
 Silvani Nymphæque tenent, sed barbara ritu  
 Sacra deûm, structæ diris altaribus (1) aræ;  
 Omnis & humanis lustrata cruoribus arbor.  
 Si qua fidem meruit superos mirata vetustas,  
 Illis & volucres metuunt insistere ramis,  
 Et lustris recubare feræ: nec ventus in illas  
 Incubuit silvas, excussa que nubibus atris,

(1) sacris feralibus vulgo.

Fulmina: non ullis frondem præbentibus auris,  
 Arboribus suus horror inest. Tum plurima nigris  
 Fontibus unda cadit, simulacraque mœsta deorum  
 Arte carent, cæsisque extant informia truncis.  
 Ipse situs, putrique facit jam robore squalor  
 Adtonitos: non vulgatis sacrata figuris  
 Numina sic metuunt: tantum terroribus addit,  
 Quos timeant non nosse deos. Jam fama ferebat  
 Sæpe cavae motu terræ mugire cavernas,  
 Et procumbentes iterum consurgere taxos,  
 Et non ardentis fulgere incendia silvæ,  
 Roboraque amplexos circumfluxisse dracones.  
 Non illum cultu populi propiore frequentant,  
 Sed cessere deis. Medio quum Phœbus in axe est,  
 Aut cœlum nox atra tenet, pavet ipse sacerdos  
 Accessus, dominumque timet deprendere luci.

Hanc jubet inmisso silvam procumbere ferro:  
 Nam vicina operi, belloque intacta priore  
 Inter nudatos stabat densissima montes.  
 Sed fortes tremuere manus, motique verenda  
 Majestate loci, si robora sacra ferirent,  
 In sua credebant redituras membra securès.  
 Implicitas magno Cæsar torpore cohortes  
 Ut vidit primus raptam librare bipennem  
 Ausus, & aeriam ferro proscindere quercum;  
 Effatur merso violata in robora ferro:  
 „Jam ne quis vestrûm dubitet subvertere silvam,”



„Credite me fecisse nefas.“ Tunc paruit omnis  
Imperii non sublato secura pavore  
Turba, sed expensa superûmque & Cæsaris ira.  
Procumbunt orni, nodosa impellitur ilex,  
Silvaque Dodonis, & fluctibus aptior alnus,  
Et non plebejos luctus testata cupressus,  
Tum primum posuere comas, & fronde carentes  
Admisere diem: propulsaque robore denso  
Sustinuit se silva cadens. Gemuere videntes  
Gallorum populi: muris sed clausa juvenus  
Exsultat. Quis enim læsos impune putaret  
Esse deos? servat multos fortuna nocentes:  
Et tantum miseris irasci numina possunt.  
Utque satis cæsi nemoris, quæsitæ per agros  
Plaustra ferunt: curvoque soli cessantis aratro  
Agricolæ raptis annum flevære juvencis.

Dux tamen impatiens hæsure ad mœnia Martis  
Versus ad Hispanas acies, extremaque mundi,  
Jussit bella geri. Stellatis axibus agger  
Erigitur, geminasque æquantes mœnia turres  
Accipit: hæ nullo fixerunt robore terram,  
Sed per iter longum caussa repseræ latentæ.  
Quum tantum nutaret onus, telluris inanes  
Concussisse sinus quærentem erumpere ventum  
Credidit, ac muros mirata est stare juvenus.  
Illinc tela cadunt excelsas urbis in arces.  
Sed major Grajo Romana in corpora ferro

Vis inerat. Neque enim solis excussa lacertis  
 Lancea, sed tenso ballistæ turbine rapta,  
 Haud unum contenta latus transire, quiescit:  
 Sed pandens perque arma viam, perque ossa, relicta  
 Morte, fugit: superest telo post vulnera cursus.  
 At saxum quoties ingenti verberis actu (1)  
 Excutitur, qualis rupes, quam vertice montis  
 Abscidit (2) impulsu ventorum adjuta vetustas,  
 Frangit cuncta ruens: nec tantum corpora pressa  
 Exanimat: totos cum sanguine dissipat artus.  
 Ut tamen hostiles densa testudine muros  
 Tecta subit virtus, armisque innexa priores  
 Arma ferunt, galeamque extentus protegit umbo,  
 Quæ prius ex longo nocuerunt missa recessu,  
 Jam post terga cadunt: nec Grajis flectere jactum,  
 Aut facilis labor est longinqua ad tela parati  
 Tormenti mutare modum: sed pondere solo  
 Contenti, nudis evolvunt saxa lacertis.  
 Dum fuit armorum series, ut grandine tecta  
 Innocua percussa sonant, sic omnia tela  
 Respuit: at postquam virtus incensa (3) virorum  
 Perpetuam rupit defesso milite cratem,  
 Singula continuis cesserunt ictibus arma.  
 Tunc adoperta levi procedit vinea terra,

(1) ponderis idu *vulgo.*

(2) abstulit *MSS. pervert.*

(3) incerta *MSS. vest.*

Sub cuius pluteis, & testâ fronte latentes  
 Moliri nunc ima parant, & vertere ferro,  
 Mœnia: nunc aries suspensio fortior ictu  
 Incussus densi compagem solvere muri  
 Tentat, & impositis unum subducere saxis.  
 Sed super & flammis, & magnæ fragmine molis,  
 Et sudibus crebris, & adusti roboris ictu  
 Percussæ cedunt crates, frustra que labore  
 Exhausto fessus repetit tentoria miles.

Summa fuit Grajis starent ut mœnia voti.  
 Ultro acies inferre parant: armisque coruscas  
 Nocturnis texere faces: audaxque juvenus  
 Erupit: non hasta viris, non letifer arcus,  
 Telum flamma fuit, rapiensque incendia ventus  
 Per Romana tulit celeri munimina cursu.  
 Nec, quamvis viridi luctetur robore, lentas  
 Ignis agit vires: teda sed raptus ab omni  
 Consequitur nigri spatiosa volumina fumi:  
 Nec solum silvas: sed saxa ingentia solvit,  
 Et crudæ putri fluxerunt pulvere cautes.  
 Procubuit, majorque jacens adparuit agger.

Spes victis telluris abit, placuitque profundo  
 Fortunam tentare mari. Non robore picto  
 Ornatas decuit fulgens tutela carinas,  
 Sed rudis, & qualis procumbit montibus arbor,  
 Conseritur stabilis navalibus arca bellis.  
 Et jam turrigeram Bruti comitata carinam

Venerat in fluctus Rhodani cum gurgite classis,  
Stœchados arva tenens. Nec non & Graja juvenus,  
Omne suum fatis voluit committere robur:  
Grandævosque senes mixtis armavit ephēbis.  
Accepit non sola viros, quæ stabat in undis  
Classis; & emeritas repetunt navalibus alnos.  
Ut matutinos spargens super æquora Phœbus  
Fregit aquis radios, & liber nubibus æther,  
Et posito Borea, pacemque tenentibus Austris,  
Servatum bello jacuit mare, movit ab omni  
Quisque suam statione ratem, paribusque lacertis  
Cæsaris hinc puppes, hinc Grajo remige classis  
Tollitur: impulsæ tonsis tremuere carinæ,  
Crebraque sublimes convellunt verbera puppes.  
Cornua Romanæ classis, validæque triremes,  
Quasque quater surgens exstructi remigis ordo  
Commovet, & plures quæ mergunt æquore pinus,  
Multiplices cinxere rates. Hoc robur aperto  
Oppositum pelago. Lunata fronte recedunt,  
Ordine contentæ gemino crevisse liburnæ.  
Celsior at cunctis Bruti prætoria puppis  
Verberibus senis agitur molemque profundo  
Invehit, & summis longe petit æquora remis.

Ut tantum mediū fuerat maris, utraque classis  
Quod semel excussis posset transcurrere tonsis,  
Innumeræ vasto miscentur in æthere voces:  
Remorumque sonus premitur clamore: nec ullæ

Audiri potuere tubæ. Tunc cærule verrunt,  
 Atque in transtra cadunt, & remis pectora pulsant.  
 Ut primum rostris crepuerunt obvia rostra:  
 In puppim rediere (1) rates, emissaque tela  
 Aera texerunt, vacuumque cadentia pontum.  
 Et jam diductis extendunt cornua proris,  
 Diversæque rates laxata classe receptæ.  
 Ut, quoties æstu Zephyris, Eurisve repugnat,  
 Huc abeunt fluctus, illuc mare (2): sic ubi puppes  
 Sulcato varios duxerunt gurgite tractus,  
 Quod tulit illa ratis remis, hæc retulit (3) æquor.  
 Sed Grajis habiles, pugnamque lacescere pinus  
 Et tentare fugam, nec longo frangere gyro  
 Cursum, nec tarde flectenti cedere clavo.  
 At Romana ratis stabilem præbere carinam  
 Certior, & terræ similem bellantibus usum.  
 Tunc in signifera residenti puppe magistro  
 Brutus ait, „Paterisne acies errare profundo,  
 „Artibus & certas pelagi? jam consere bellum:  
 „Phocaicis medias rostris adpone (4) carinas.“  
 Paruit, obliquas & præbuit hostibus alnos.  
 Tunc quæcumque ratis tentavit robora Bruti,  
 Ictu victa suo, percussæ & capta cohæsit.  
 Ast alias manicæque ligant, teretesque catenæ,

(1) cecidere *MS.*(2) illo mare *MSS. optimi.*(3) reppulit *vulgo.*(4) oppone *vulg.*

Seque tenent remis: tecto stetit æquore bollum.

Jam non excussis torquentur tela latertis,  
Non longinqua cadunt jaculato vulnera ferro:  
Miscenturque manus. Navali plurima bello  
Ensis agit. Stat quisque suæ de robore puppis  
Pronus in adversos ictus: nullique peremti  
In ratibus cecidere suis. Cruor altus in undas  
Spumat, & obducti concreto sanguine fluctus.  
Et quas inmissi traxerunt vincula ferri,  
Has prohibent jungi conferta cadavera puppes.  
Semianimes alii vastum subiere profundum,  
Hauseruntque suo permixtum sanguine pontum.  
Hi luctantem animam lenta cum morte trahentes,  
Fractarum subita ratium periere ruina.  
Irrita tela suas peragunt in gurgite cædes:  
Et quodcumque cadit frustrato pondere ferrum,  
Exceptum mediis invenit vulnus in undis.  
Phocaicis Romana ratis vallata carinis,  
Robore diducto lævum dextrumque tuctur  
Æquo Marte latus: cujus dum pugnat ab alta  
Puppe Tagus, Grajumque audax aplustre retentat,  
Terga simul pariter missis & pectora telis  
Transigitur: medio concurrit pectore ferrum,  
Et stetit incertus flucret quo vulnere sanguis,  
Donec utrasque simul largus cruor expulit hastas,  
Divisitque animam, sparsitque in vulnera letum.  
Dirigit huc puppim miseri quoque dextra Telonis,

Qua nullam melius, pelago turbante, carinæ  
 Audiverè manum: nec lux est notior ulli  
 Crastina, seu Phœbum videat, seu cornua lunæ,  
 Semper venturis componere carbasa ventis.  
 Hic Latiae rostro compagem ruperat alni:  
 Pila sed in medium venero trementia pectus,  
 Avertitque ratem morientis dextra magistri.  
 Dum cupit in sociam Gyareos erepere puppim,  
 Excipit inmissum suspensa per ilia ferrum,  
 Adfixusque rati, telo retinente, pependit.

Stant gemini fratres, secundæ gloria matris,  
 Quos eadem variis genuerunt viscera fati.  
 Discrevit mors sæva viros: unumque relictum  
 Agnorum miseri, sublato errore, parentes,  
 Æternis caussam lacrimis: tenet ille dolorem  
 Semper, & amissum fratrem lugentibus obfert (1).  
 Quorum alter, mixtis obliquo pedine remis  
 Ausus Romanæ Graja de puppe carinæ  
 Injectare manum: sed eam gravis insuper ictus  
 Amputat: illa tamen nisu quo prenderat, hæsit,  
 Deriguitque (2) tenens strictis inmortua nervis.  
 Crevit in adversis virtus: plus nobilis iræ  
 Truncus habet: fortique instaurat prælia læva,  
 Rapturusque suam procumbit in æquora dextram.  
 Hæc quoque cum toto manus est abscissa lacerto.

(1) obfert MSS. *vetustiss.* adfert *reliqui*.

(2) deriguit ex MSS. diriguit *vulgo*.

Jam clipeo, telisque carens, non conditur ima  
 Puppe: sed expositus, fraternaquæ pectore nudo  
 Arma tegens, crebra confixus cuspide perstat:  
 Telaque multorum leto casura suorum  
 Emerita jam morte tenet. Tum vulnere multo  
 Effugientem animam lassos collegit in artus:  
 Membraque contendit toto, quicumque manebat,  
 Sanguine, & hostilem, defectis robore nervis,  
 Insiluit, solo nociturus pondere, puppim.  
 Strage virûm cumulatâ ratis, multoque cruore  
 Plena, per obliquum crebros latus accipit ictus.  
 At postquam ruptis pelagus compagibus hausit,  
 Ad summos repleta foros, desedit in undas,  
 Vicinum involvens contorto vertice pontum.  
 Æquora discedunt mersa diducta carina,  
 Inque locum puppis cecidit mare. Multaque ponto  
 Præbuit ille dies varii miracula fati.  
 Ferrea dum puppi rapidos manus inserit uncus,  
 Adfixit Lycidan: Mersus foret ille profundo,  
 Sed prohibent socii, suspensaquæ crura retentant.  
 Scinditur avulsus: nec, sicut vulnere, sanguis  
 Emicuit lentus: ruptis cadit undique venis.  
 Discursusque animæ diversa in membra meantibus  
 Interceptus aquis. Nullius vitæ perempti  
 Est tanta dimissi viâ: pars ultima trunci  
 Tradidit in letum vacuos vitalibus artus.  
 At tumidus quæ pulmo jacet, qua viscera fervent,



Hæserunt ibi fata diu: luctataque multum  
Hac cum parte viri vix omnia membra tulerunt.

Dum nimium pugnae unius turba carinae:  
Incumbit prono lateri, vacuumque relinquit,  
Qua caret hoste, ratem: congesto pondere puppis  
Versa, cava texit pelagus, nautasque carina:  
Brachia nec licuit vasto jactare profundo,  
Sed clauso periere mari. Tunc unica diri  
Conspecta est leti facies, quum forte natantem  
Diversæ rostris juvenem fixere carinae.  
Discessit medium tam vastos pectus ad ictus:  
Nec prohibere valent obtritis ossibus artus,  
Quo minus æra sonent; eliso ventre, per ora  
Ejectat saniem permixtus viscere sanguis.  
Postquam inhibent remis puppes, ac rostra recedunt,  
Dejectum in pelagus perfosso pectore corpus  
Vulneribus transmisit aquas. Pars maxima turbæ  
Naufraga, jactatis morti obluclata lacertis,  
Puppis ad auxilium sociæ concurret: at illis,  
Robora quum vetitis prensarent altius ulnis,  
Nutaretque ratis populo peritura: recepto,  
Impia turba super medios ferit ense lacertos:  
Brachia linquentes Graja pendentia puppi,  
A manibus cecidere suis: non amplius undæ  
Sustinuere graves in summo gurgite truncos.  
Jamque omni fuis nudato milite telis  
Invenit arma furor: remum contorsit in hostem:

Al-

Alter: at hi tortum validis aplustre lacertis,  
 Avulsasque rotant, excusso remige, sedes.  
 In pugnam fregere rates. Sidentia pessum  
 Corpora cæsa tenent, spoliantque cadavera ferro.  
 Multi inopes teli, jaculum letale revulsum  
 Vulneribus traxere suis, & viscera læva  
 Oppressere manu, validos dum præbeat ictus  
 Sanguis & hostilem quum torserit exeat hastam.  
 Nulla tamen plures hoc edidit æquore clades,  
 Quam pelago diversa lues. Nam pinguibus ignis  
 Adfixus tedis, & tecto sulfure vivax  
 Spargitur: at faciles præbere alimenta carinæ  
 Nunc pice, nunc liquida rapuere incendia cera.  
 Nec flammam superant undæ: sparsisque per æquor  
 Jam ratibus fragmenta ferus sibi vindicat ignis.  
 Hic recipit fluctus, extinguat ut æquore flammæ;  
 Hi, ne mergantur, tabulis ardentibus hærent.  
 Mille modos inter leti, mors una timori est,  
 Qua cœpere mori. Nec cessat naufraga virtus.  
 Tela legunt dejecta mari, ratibusque ministrant:  
 Incertasque manus ictu languente per undas  
 Exercent. Nunc, rara datur si copia ferri,  
 Utuntur pelago. Sævus complectitur hostem  
 Hostis, & implicitis gaudent subsidere membris,  
 Mergentesque mori. Pugna fuit unus in illa  
 Eximius Phocæus animam servare sub undis,  
 Scrutarique fretum si quid mersisset arenis,

Et nimis adfixos unci convellere morsus,  
 Adductum quoties non senserat ancora funem.  
 Hic ubi compressum penitus deduxerat hostem,  
 Victor & incolumis summas remeabat in undas,  
 Sed se per vacuos credit dum surgere fluctus,  
 Puppibus occurrit, tandemque sub æquore mansit.  
 Hi super hostiles jecerunt brachia remos,  
 Et ratium tenuere fugam. Non perdere letum  
 Maxima cura fuit, multus sua vulnera puppi  
 Adfixit moriens, & rostris abstulit ictus.

Stantem sublimi Tyrrhenum culmine proræ  
 Lygdamos excussa Balearis tortor habenæ  
 Glande petens calido (1) fregit cava tempora plumbo.  
 Sedibus expulsi, postquam cruor omnia rupit,  
 Vincula, procurrunt (2) oculi: stat lumine raptò  
 Adtonitus, mortisque illas putat esse tenebras.  
 At postquam membris sensit constare vigorem,  
 „Vos, ait, o socii, sicut tormenta soletis,  
 „Me quoque mittendis rectum componite telis.  
 „Egere quod superest animæ Tyrrhene per omnes  
 „Bellorum casus. Ingentem militis usum  
 „Hoc habet ex magna defunctum parte cadaver:  
 „Viventis feriere loco.“ Sic fatus in hostem  
 Cæca tela manu, sed non tamen irrita mittit.  
 Excipit hæc juvenis generosi sanguinis Argus,

(1) solido *vulgo*.

(2) procumbunt *vulgo*.

Qua jam non medius descendit in ilia venter;  
Adjuvitque suo procumbens pondere ferrum.

Stabat diversa victæ jam parte carinæ  
Infelix Argi genitor, (non ille juventæ  
Tempore Phocæicis ulli cessurus in armis:  
Victum ævo robur cecidit, fessusque senecta  
Exemplum, non miles erat) qui funere viso  
Sæpe cadens longæ senior per transtra carinæ  
Pervenit ad puppim spirantesque invenit artus  
Non lacrimæ cecidere genis, non pectora tundit,  
Distentis toto riguit sed corpore palmis.  
Nox subit, atque oculos vastæ obduxere tenebræ  
Et miserum cernens agnoscere desinit Argum.

Ille caput labens, & jam languentia colla  
Viso patre levat: vox fauces nulla solutas  
Prosequitur: tacito tantum petit oscula vultu.  
Inviratque patris claudenda ad lumina dextram.  
Ut torpore senex caruit, viresque cruentus  
Cæpit habere dolor: „Non perdam tempora, dixit,  
„A sævis permissa deis, jugulumque senilem  
„Confodiam. Veniam misero concede parenti,  
„Arge, quod amplexus, extrema quod oscula fugi.  
„Nondum destituit calidus tua vulnera sanguis,  
„Semianimusque jaces, & adhuc potes esse superstes.“  
Sic fatus, capulum quamvis per viscera mersi  
Polluerat gladii, tamen alta sub æquora tendit  
Præcipiti saltu. Letum præcedere nati

Festinantem animam morti non credidit uni.

Inclinant jam fata ducum: nec jam amplius anceps

Belli casus erat: Grajæ pars maxima classis

Mergitur: ast aliæ mutato remige puppes

Victores vexere suos: navalia paucæ

Præcipiti tenuere fuga. Quis in urbe parentum

Fletus erat! quanti matrum per litora planctus!

Conjux sæpe sui, confusis vultibus unda,

Credidit ora viri, Romanum amplexa cadaver:

Accensisque rogis miseri de corpore trunco (1)

Certavere patres. At Brutus in æquore victor,

Primus Cæsareis pelagi decus addidit armis,

(1) trunci MSS. *quidam*.





## LIBER QUARTUS.

### ARGUMENTUM.

*Quartus habet casus, quos vidit Iberica vallis,  
Quos gravidus variis annus tulit ille procellis,  
Inde novas cædes & monstros æquiparatas,  
Pompejanorum scelera inter basia latas.  
Quos Cæsar fossa spectantes flumina cinxit,  
Confectosque siti nudos discedere sivit.  
Hinc Opiterginæ ratis improba funera necit,  
Quæ sibi tota cohors per mutua vulnera fecit.  
Post Libycas clades, quas Curio pertulit acer,  
Quas sibi cum Varo Juba rex super intulit Afer,  
Quem digno planctu vivax censura Poeta  
Persequitur prisca recolens insignia vitæ.*

**A**T procul extremis terrarum Cæsar in oris  
Martem sævus agit non multa cæde nocentem (1),

(1) cæde rubentem MSS. 1789.

Maxima sed fati ducibus momenta daturum.  
 Jure pari rector castris Afranius illis,  
 Ac Petrejus erat: concordia duxit in æquas  
 Imperium commune vices, tutelaque valli  
 Pervigil alterno paret custodia signo.  
 His præter Latias acies erat impiger Astur,  
 Vettonesque leves, profugique a gente vetusta  
 Gallorum Celtæ miscentes nomen Iberis.

Colle tumet modico, lenique excrevit in altum  
 Pingue solum tumulo: super hunc fundata vetusta  
 Surgit Ilerda manu: placidis (1) prælabitur undis.  
 Hesperios inter Sicoris non ultimus amnes,  
 Saxeus ingenti quem pons amplectitur arcu,  
 Hybernas passurus aquas. At proxima rupes  
 Signa tenet Magni: nec Cæsar colle minore  
 Castra levat: medius dirimit tentoria gurgis.  
 Explicat hinc tellus campos effusa patentes,  
 Vix oculo prendente modum, camposque coerces,  
 Cinga rapax, vetitus fluctus, & litora cursu  
 Oceani pepulisse tuo: nam gurgite mixto,  
 Qui præstat terris, aufert tibi nomen Iberus.

Prima dies belli cessavit Marte cruento,  
 Spectandasque ducum vires, numerosaque (2) signa  
 Exposuit: piguit sceleris, pudor arma furentum  
 Continuit, patriæque, & ruptis legibus unum

(1) blandis MS.

(2) numeros atque MSS. vetust.

Donavere diem. Prono tum Cæsar Olympo  
In noctem subita circumdedit agmina fossa,  
Dum primæ præstant acies, hostemque fefellit,  
Et prope consertis obduxit castra manipulis.  
Luce nova collem subito conscendere cursu,  
Qui medius tutam castris dirimebat Ilerdam,  
Imperat, huc hostem pariter terrorque, pudorque  
Impulit: & raptò tumultum prior agmine cepit.  
His virtus, ferrumque locum promittit: at illis  
Ipse locus. Miles rupes oneratus in altas  
Nititur: adversoque acies in monte supina  
Hæret, & in tergum casura, umbone sequentis  
Erigitur. Nulli telum vibrare vacabat,  
Dum labat, aut fixo firmat vestigia pilo,  
Dum scopulos, stirpesque tenent, atque hoste relicto  
Cædunt ense viam. Vidit lapsura ruina  
Agmina dux, equitemque jubet succedere bello,  
Munitumque latus lævo præducere gyro.  
Sic pedes ex facili nulloque urgente receptus,  
Irritus & victor, subducto Marte, pendit.

Haecenus armorum discrimina. Cetera bello  
Fata dedit variis incertus motibus aer.  
Pigro bruma gelu, siccisque Aquilonibus horrens(1),  
Æthere constricto pluvias in nube tenebat.  
Urbant montana nives, camposque jacentes

(1) hærens vulgg.



Non duraturæ conspecto sole pruinae:  
Atque omnis propior mergenti sidera cœlo  
Aruerat tellus hiberno dura sereno.  
Sed postquam calidum vernus Titana recepit  
Sidera respiciens delapsæ portitor Helles,  
Atque iterum, æquatis ad justæ pondera Libræ  
Temporibus, vicere dies: tunc, sole relicto,  
Cynthia quo primum cornu dubitanda refulsit,  
Exclussit Borean, flammæque accepit in Euro.  
Ille suo nubes quascumque invenit ab axe,  
Torsit in occiduum Nabatæis flatibus orbem:  
Et quas sentit Arabs, & quas Gangetica tellus  
Exhalat (1) nebulas, quidquid concrescere primus  
Sol patitur, quidquid cœli fuscator Eoi  
Intulerat Corus, quidquid defenderat Indos,  
Incendere diem nubes oriente remotæ;  
Nec medio potuere graves incumbere mundo,  
Sed nimbos rapuere fuga. Vacat imbris Arctos,  
Et Notus; in solam Calpen fluit humidus aer.  
Hic ubi jam Zephyri fines, & summus Olympi  
Cardo tenet Tethyn: vetitæ transcurrere densos  
Involvere globos, congestumque aeris atrii  
Vix recipit spatium, quod separat æthere terras.  
Jamque polo pressæ largos densantur in imbres;  
Spissatæque ruunt: nec servant fulmina cursum,

(1) exaltat MS.

Quamvis crebra micent: moriuntur fulgura nimbis.  
 Hinc imperfecto complectitur aera gyro  
 Arcus, vix ulla variatus luce colorem,  
 Oceanumque bibit, raptosque ad nabilia fluctus  
 Pertulit & cœlo diffusum reddidit æquor.  
 Jamque Pyrenææ quas numquam solvere Titan  
 Evaluit, fluxere nives, fractoque madescunt  
 Saxa gelu: Tune, quæ solitis e fontibus exit,  
 Non habet unda vias: tam largas alveus omnis  
 A ripis accepit aquas. Jam naufraga campo  
 Cæsaris arma natant, impulsaque gurgite multo  
 Castra labant: alto restagnant flumina vallo.  
 Non pecorum raptus faciles, non pabula mersi  
 Ulla ferunt sulci: tectarum errore viarum  
 Fallitur occultis sparsus populator in agris,  
 Jamque comes semper magnorum prima malorum  
 Sæva fames aderat; nulloque obsessus ab hoste  
 Miles eget; toto censu non prodigus emit.  
 Exiguam Cererem: Pro lucri pallida tabes!  
 Non deest prolato jejunos venditor auro.  
 Jam tumuli collesque latent: jam flumina cuncta  
 Condidit una palus, vastaque voragine mersit:  
 Absorpsit penitus rupes, ac tecta ferarum  
 Detulit, atque ipsas hausit: subitisque frementes  
 Verticibus contorsit aquas, & reppulit æstus  
 Fortior Oceani. Nec Phœbum surgere sentit  
 Nox subtexta polo; rerum discrimina miscet

Deformis cœli facies, junctæque tenebræ.  
 Sic mundi pars ima jacet, qua zona nivalis  
 Perpetuæque premunt hiemes, non sidera cœlo  
 Ulla videt, sterili non quidquam a frigore gignit,  
 Sed glaciæ medios signorum temperat ignes.  
 Sic, o summe parens mundi, sic sorte secunda  
 Æquorei rector facias Neptune tridentis:  
 Et tu perpetuis impendas (1) aera nimbis;  
 Tu remeare vetes quoscumque in miseris æstus.  
 Non habeant amnes declivem ad litora cursum,  
 Sed pelagi referantur aquis: concussa que tellus  
 Laxet iter fluviis. Hos campos Rhenus inundet,  
 Hos Rhodanus: vastos obliquent flumina fontes.  
 Rhiphæas huc solve nives, huc stagna, lacusque,  
 Et pigras, ubicumque jacent, effunde (2) paludes:  
 Et miseras bellis civilibus eripe terras.

Sed parvo Fortuna viri contenta pavore,  
 Plena redit, solitoque magis favere secundi,  
 Et veniam meruere dei. Jam rarior aer,  
 Et par Phœbus aquis, densas in vellera nubes  
 Sparserat, & noctes ventura luce rubebant:  
 Servatoque loco rerum, discessit ab astris  
 Humor, & ima petit quidquid pendebat aquarum.  
 Tollere silva comas: stagnis emergere colles  
 Incipiunt, visoque die durescere calles.

(1) intentas *MSS. aliquot.*

(2) dissolve *MSS. quinque.*

Utque habuit ripas Sicoris, camposque reliquit;  
 Primum cana salix madefacto vimine parvam  
 Textitur in puppim, cæsoque inducta juvenco  
 Vectoris patiens tumidum superenatat amnem.  
 Sic Venetus stagnante Pado, fusoque Britannus  
 Navigat Oceano: sic quum tenet omnia Nilus,  
 Conseritur bibula Memphitis cymba papyro.  
 His ratibus transjecta manus festinat utrimque  
 Succisum curvare nemus; fluviique ferocis  
 Incrementa timens; non primis roborâ ripis  
 Imposuit: medios pontem distendit in agros.  
 Ac ne quid Sicoris repetitis audeat undis,  
 Spargitur in sulcos, & scisso gurgite rivus  
 Dat pœnas majoris aquæ. Postquam omnia fati  
 Cæsaris ire videt, celsam Petrejus Ilerdam  
 Deserit: & noti diffusus viribus orbis,  
 Indomitos quærit populos, & semper in arma  
 Mortis (1) amore ferôs, & tendit in ultima mundi.

Nudatos Cæsar colles, desertaque castra  
 Conspiciens, capere arma jubet: nec quærere pontem;  
 Nec vada, sed duris fluvium superare lacertis.  
 Paretur: rupitque ruens in prælia miles,  
 Quod fugiens timuisset, iter. Mox uda receptis  
 Membra foveat armis, gelidosque a gurgite cursu  
 Restituunt artus, donec decresceret umbra

(1) Martis vulgo.

In medium surgente die. Jamque agmina summa  
Carpit eques, dubiique fugæ, pugnaeque tenentur.

Adtollunt geminae campo juga saxea rupes  
Valle cavæ media: tellus hinc ardua celsos  
Continuat colles: tutæ quos inter opaco  
Anfractu latuere viæ: quibus hoste potito  
Faucibus, emitti terrarum in devia Martem,  
Inque feras gentes Cæsar videt. „Ite sine ullo  
„Ordine, ait, raptumque fuga convertite bellum,  
„Et faciem pugnae, vultusque inferte minaces;  
„Nec liceat pavidis ignava occumbere morte:  
„Excipiant recto fugientes pectore ferrum.“  
Dixit: & ad montes tendentem prævenit hostem.  
Illic exiguo paullum distantia vallo  
Castra locant. Postquam spatio languentia nullo  
Mutua conspicuos habuerunt lumina vultus,  
Ac fratres, natosque suos videre, patresque;  
Depreßum est civile nefas. Tenuere parumper  
Ora metu: tantum nutu, motoque salutant  
Ense suos. Mox ut stimulis majoribus ardens  
Rupit amor leges, audet transcurrere vallum  
Miles, in amplexus effusas tendere palmas.  
Hospitis ille ciet nomen; vocat ille propinquum:  
Admonet hunc studiis consors puerilibus ætas:  
Nec Romanus erat, qui non agnoverat hostem.  
Arma rigant lacrimis, singultibus oscula rumpunt:  
Et quamvis nullo maculatus sanguine miles;

Quæ potuit fecisse, timet. Quid pectora pulsas?  
 Quid vesane gemis? fletus quid fundis inanes,  
 Nec te sponte tua sceleri parere fateris?  
 Usque adeone times, quem tu facis ipse timendum?  
 Classica dent bello; sævos tu neglige cantus:  
 Signa ferant; cessat jam jam civilis Erinys  
 Concidet, & Cæsar generum privatus amabit.  
 Nunc ades, æterno complectens omnia nexu,  
 O rerum, mixtique salus, Concordia, mundi;  
 Et sacer orbis amor: magnum nunc sæcula nostra  
 Venturi discrimen habent. Periere latebræ  
 Tot scelerum: populo venia est erepta nocenti.  
 Agnovere suos. Pro numine fata sinistro  
 Exigua requie tantas augentia clades!  
 Pax erat, & milēs castris permixtus utrisque  
 Errabat: duro concordēs cespite mensas  
 Instituunt, & permixto libamina Baccho  
 Gramineis fluxerē focis: (1) junctoque cubili  
 Extrahit insomnes bellorum fabula noctes:  
 Quo primum steterint campo, qua lancea dextra  
 Exierit. Dum, quæ gesserunt fortia, jactant,  
 Et dum multa negant, quod solum fata petebant,  
 Est miseris revocata fides, atque omne futurum  
 Crevit amore nefas. Nam postquam foedera pacis  
 Cognita Petrejo, sequē, & sua tradita venum  
 (1) luxere foci vulgo.

Castra videt, famulas sceletata ad proelia dextras  
 Excitat, atque hostes turba stipatus inermes hic  
 Præcipitat castris, junctosque amplexibus ense  
 Separat, & multo disturbat sanguine pacem, ut  
 Addidit ira ferox moturas proelia voces:  
 „Inmemor o patriæ, signorum oblite tuorum,  
 „Non potes hoc causæ miles præstare senatus,  
 „Adsertor, victo redeas ut Casare; certe equi  
 „Ut vincere potes. Dum ferrum, incertaque fata,  
 „Quique fluat multo non deerit vulnere sanguis  
 „Ibitis ad dominum? damnataque signa feretis?  
 „Utque habeat famulos nullo discrimine Cæsar  
 „Exorandus erit? ducibus quoque vita petenda est.  
 „Numquam nostra salus pretium, mercêsque nefanda  
 „Proditionis erit? non hoc civilia bella,  
 „Ut vivamus, agunt. Trahimur sub nomine pacis.  
 „Non chalybem gentes penitus fugiente metallo  
 „Eruerent, nulli vallarent oppida muri,  
 „Non sonipes in bella ferox, non iret inæquor  
 „Turrigeras classis pelago spatsura carinas;  
 „Si bene libertas unquam pro pace darètur  
 „Hostes nempe meos sceleri jurata nefando  
 „Sacramenta tenent: at vobis vilior hoc est  
 „Vestra fides, quod pro causâ pugnantibus æqua  
 „Et veniam sperare licet, Pro dira pudoris  
 „Funera! (1) nunc toto fatorum ignarus in orbe

(1) fœdera MSS.

„oblitus es patriam tuam (1)

„Magne paras acies, mundique extrema tenentes  
 „Sollicitas reges, forsàn quum fœdere nostro.  
 „Jam tibi sit promissa salus.“ Sic fatur, & omnes  
 Concussit mentes, scelerumque reduxit amorem.  
 Sic ubi desuetæ silvis in carcere clauso  
 Mansuevere feræ, & vultus posuere minaces,  
 Atque hominem didicere pati: si torrida parvus  
 Venit in ora cruor, redeunt rabiesque furorque,  
 Admonitæque tument: gustato sanguine fauces:  
 Fervet, & a trepido vix abstinet ira magistro.  
 Itur in omne nefas: & quæ Fortuna, deorum  
 Invidia, cæca bellorum in nocte tulisset,  
 Fecit monstra fides: inter mensasque, torosque,  
 Quæ modo complexu foverunt pectora, cædunt.  
 Et quamvis ferrum primo strinxere gementes,  
 Ut dextræ justi gladius dissuasor adhæsit,  
 Dum feriunt, odere suos, animosque labantes  
 Confirmant ictu. Fervent jam castra tumultu,  
 (Et scelerum turba: rapiuntur colla parentum.)  
 Ac velut occultum pereat scelus, omnia monstra  
 In faciem posuere ducum: juvat esse nocentes.  
 Tu Cæsar, quamvis spoliatus milite multo  
 Agnoscis superos: neque enim tibi major in arvis  
 Emathiis fortuna fuit, nec Phocidæ undis  
 Massiliæ, Phario nec tantum est æquore gestum.  
 Hoc siquidem solo civilis crimine belli  
 Dux caussæ melioris eris. Polluta nefanda



Agmina cæde duces junctis committere castris  
 Non audent, altæque ad mœnia rursus Ilerdæ.  
 Intendère fugam. Campos eques obuius omnes  
 Abstulit, & siccis inclusit collibus hostem.  
 Tunc inopes undæ prærupta cingere fossa  
 Cæsar avet, nec castra pati contingere ripas,  
 Aut circum largos curvari brachia fontes.  
 Ut leti videre viam, conversus in iram  
 Præcipitem timor est. Miles non utile clausis  
 Auxilium maculavit equos: tandemque coactus  
 Spe posita damnare fugam, casurus in hostes  
 Fertur. Ut effuso Cæsar decurrere passu (1)  
 Vidit, & ad certam devotos tendere mortem:  
 „Tela tene jam miles, ait, ferrumque rucanti  
 „Subtrahe: non ullo constet mihi vulnere bellum:  
 „Vincitur haud gratis, jugulo qui provocat hostem.  
 „En! sibi vilis adest invisa luce juvenus,  
 „Jamdamno peritura meo. Non sentiet ictus,  
 „Incumbet gladiis, gaudebit sanguine fuso.  
 „Deserat hic fervor mentes, cadat impetus amens,  
 „Perdant velle mori. “ Sic deflagrare minaces  
 Incassum, vetito & passus languescere bello,  
 Substituit merso dum nox sua lumina Phœbo.  
 Inde ubi nulla data est miscendæ copia mortis,  
 Paullatim fugit ira ferox, mentesque tepescunt.

Sau-

(1) campo MS.

Saucia majores animos ut pectora gestant  
 Dum dolor est, iclusque recens, & mobile nervis  
 Conamen calidus præbet cruor, ossaque nondum  
 Adduxere cutem: si conscius ensis adacti  
 Stat victor, tenuitque manus. Tunc frigidus (1) artus  
 Adligat atque animum subducto robore torpor,  
 Postquam sicca rigens adstrinxit vulnera sanguis.

Jamque inopes undæ, primum tellure refossa,  
 Occultos latices, abstrusaque flumina quærunť  
 Nec solum rastris, durisque ligonibus arva,  
 Sed gladiis fodere suis: puteusque cavati  
 Montis ad irrigui premitur fastigia (2) campi.  
 Non se tam penitus, tam longe luce relicta  
 Merserit Asturii scrutator pallidus auri.  
 Non tamen aut tectis sonuerunt cursibus amnes,  
 Aut micuere novi, percusso pumice, fontes:  
 Antra nec exiguo stillant sudantia rore,  
 Aut impulsa levi turbatur glareæ vena.  
 Tunc exhausta super multo sudore juvenus  
 Extrahitur, duris silicum lassata medullis.  
 Quoque minus siccos possent tolerare vapores,  
 Quæsitæ fecistis aquæ. Nec languida fessi  
 Corpora sustentant epulis, mensasque perosi  
 Auxilium fecere famem. Si mollius arvom  
 Prodidit humorem, pingues manus utraque glebas

(1) dum frigidus MSS. quidam. (2) vestigia MSS. tres.

Exprimit ora super. Nigro: si turbida limo  
 Colluvies inmotâ jacet, cadit omnis in haustus  
 Certatim obscœnos miles: mbriensque recepit,  
 Quas nollêt victurus, aquas: rituque ferarum  
 Distentas (1) siccant pecudes, & lacte negato,  
 Sordidus exhausto sorbetur ab ubère sanguis:  
 Tunc herbas, frondesque terunt, & rore madentes  
 Destringunt ramos: & si quos palmitè crudo,  
 Arboris aut tenera succos pressere medulla.

O fortunati, fugiens quos barbarus hostis  
 Fontibus inmixto stravit per rura veneno.  
 Hos licet in fluvios saniem, tabemque ferarum,  
 Pallida Dictæis, Cæsar, nascentia saxis  
 Infundas acônita palam, Romana juvenus  
 Non decepta bibet. Torrentur viscera flamma,  
 Oraque sicca rigent squamosis aspera linguis.  
 Jam marcent venæ, nulloque humore rigatus  
 Aeris alternos angustat pulmo meatus,  
 Recisoque nocent suspiria dura palato.  
 Pandunt ora tamen, (2) nocturnumque æra captant,  
 Exspectant imbres, quorum modo cuncta natabant  
 Impulsu, & siccis vultus in nubibus hærent.  
 Quoquè magis miseros undæ jejunia solvant,  
 Non super arentem Merben, Cancrique sub axe,  
 Qua nudi Garamantes arant, sedère: sed inter

(1) distensas MS. & ed. princeps.

(2) ora siti vulgo.

Stagnantem Sicorim, & rapidum deprensus Iberum  
Spectat vicinos sitiens exercitus amnes.

Jam domiti cessere duces: pacisque petendæ  
Auctor damnatis supplex Afranius armis,  
Semianimes in castra trahens hostilia turmas,  
Victoris stetit ante pedes. Servata precanti  
Majestas, non fracta malis, interque priorem  
Fortunam, casusque novos, gerit omnia victi,  
Sed ducis, & veniam securo pectore poscit.

„ Si me degeneri stravissent fata sub hoste,  
„ Non deerat fortis rapiendo dextera leto:  
„ At nunc caussa mihi est orandæ sola salutis,  
„ Dignum donanda, Cæsar, te credere vita.  
„ Non partis studiis agimur, nec sumsimus arma  
„ Consiliis inimica tuis. Nos denique bellum  
„ Invenit civile duces: caussæque priori,  
„ Dum potuit, servata fides. Nil fata moramur:  
„ Tradimus Hesperias gentes, aperimus Eoas,  
„ Securumque orbis patimur post terga relictæ.  
„ Nec cruor effusus campis tibi bella peregit,  
„ Nec ferrum, lassæque manus. Hoc hostibus unum,  
„ Quod vincas, ignosce tuis. Nec magna petuntur.  
„ Otia des fessis, vitam patiaris, inermem  
„ Degere, quam tribuis: campis prostrata jacere  
„ Agmina nostra putes: neque enim felicibus armis  
„ Misceri damnata decet, partemque triumphæ  
„ Captos ferre tui: turba hæc sua fata peregit.)

„Hoc petimus, victos ne tecum vincere cogas.“

Dixerat. At facilis Cæsar, vultuque serenus  
 Flebitur, atque usum belli, pœnasque remittit,  
 Ut primum justæ placuerunt fœdera pacis,  
 Non custoditos decurrit miles ad amnes;  
 Incumbunt ripis, permissaque flumina turbant.  
 Continuus multis subitarum tractus aquarum  
 Aera non passus vacuis discurrere venis,  
 Artavit, clausitque animam: nec fervida pestis  
 Cedit adhuc: sed morbus egens jam gurgite plenis  
 Visceribus sibi poscit aquas. Mox robora nervis,  
 Et vires rediere viris, O prodiga rerum  
 Luxuries, numquam parvo contenta paratu,  
 Et quæditorum pelago terraque ciborum  
 Ambitiosa fames, & lautæ gloria mensæ,  
 Discite, quam parvo liceat producere vitam,  
 Et quantum natura petat. Non erigit ægros  
 Nobilis ignoto diffusus consule Bacchus;  
 Non auro, murrhaque (1) bibunt; sed gurgite puro  
 Vita redit. Satis est populis fluviusque Ceresque,  
 Heu miseri, qui bella gerunt. Tunc arma relinquens  
 Victori miles spoliato pectore tutus,  
 Innocuusque suas curarum liber in urbes  
 Spargitur. O quantum donata pace potitos  
 Excussis unquam ferrum librasse lacertis

(1) gemmaque MS.

Pœnituit, tolerasse sitim, frustra quæ rogasse  
 Prospera bella deos. Nempe usis Marte secundo  
 Tot dubiæ restant acies, tot in orbe labores:  
 Ut numquam fortuna labet successibus anceps,  
 Vincendum toties: terras fundendus in omnes  
 Est cruor, & Cæsar per tot sua fata sequendus.  
 Felix, qui potuit mundi nutante ruina,  
 Quo jaceat jam scire loco. Non prælia fessos  
 Ulla vocant, certos non rumpunt classica somnos,  
 Jam conjux, natique rudes, & sordida tegæ,  
 Et non deductos recipit sua terra colonos.  
 Hoc quoque securis oneris fortuna remisit,  
 Sollicitus menti quod abest favor: ille salutis  
 Est auctor, dux ille fuit. Sic prælia soli  
 Felices nullo spectant civilia voto.  
 Non eadem belli totam fortuna per orbem  
 Constitit: in partes aliquid sed Cæsaris ausa est,  
 Qua maris Hadriaci longas ferit unda Salonas,  
 Et tepidum in molles Zephyros excurrit Iadar.  
 Illiæ bellaci confusus gente Curitum;<sup>(1)</sup>  
 Quos alit Hadriaco tellus circumflua ponto,  
 Clauditur extrema residens Antonius ora,  
 Cautus ab incursu belli, si sola recedat,  
 Expugnat quæ tuta, fames. Non pabula tellus  
 Pascendis submittit equis, non proserit ullam

(1) Curitum plures.

Flava Ceres segetem: spoliabat gramine campum  
 Miles, & adtonso miseris jam dentibus arvo  
 Castrorum siccæ de cespite vulserat herbas.  
 Ut primum adversæ socios in litore terræ  
 Et Basilum videre ducem: noxa furta per æquor  
 Exquisita fugæ. Neque enim de more carinas  
 Extendunt, puppesque levant, sed firma gerendis  
 Molibus insolito contexunt robora ductu.  
 Namque ratem vacuæ sustentant undique cupæ,  
 Quarum porrectis series constricta catenis  
 Ordinibus geminis obliquas excipit alnos.  
 Nec gerit expositum telis in fronte patenti  
 Remigium: sed, quod trabibus circumdedit æquor,  
 Hoc ferit, ac taciti præbet miracula cursus.  
 Quod nec vela ferat, nec apertas verberet undas.  
 Tunc freta servantur, dum se declinibus (1) undis  
 Æstus agat, refluxoque mari nudentur arenæ.  
 Jamque relabenti crescebant litora ponto;  
 Missa ratis pronò defertur lapsa profundo,  
 Et geminæ comites. Cunctas super ardua turris  
 Eminent, & tremulis tabulata minantia pinnis.  
 Noluit Illyricæ custos Octavius oræ  
 Confestim tentare ratem, celeresque carinas  
 Continuit, cursu crescat dum præda secundo:  
 Et temere ingressos repetendum invitat ad æquor.

(1) declivibus *vulgo*.

Pace maris. Sic dum pavidos formidinè cefvòs  
 Claudat odbratæ metuentes aëra pinnæ: (1)  
 Aut dum dispositis adtollat retia vâris:  
 Venator, teneſt ora levis clamosa Molossi,  
 Spartanos, Gretasquè ligat: nec creditur ullæ  
 Silva cani, nisi qui preſſo ſteſtigia roſtro  
 Colligit, & præda nescit latrare reperta,  
 Contentus tremulo monſtrasse cubilia loro.  
 Nec mora. Complentur moles, avideque petitis  
 Insula deſeritur ratibus: quo tempore primas  
 Impedit ad noctem jam lux extrema tenebras.  
 At Pompejanus fraudes innectere ponto  
 Antiqua parat arte Cilix, passusque vacare  
 Summa freti, medio ſuſpēdit vincula ponto,  
 Et laxas fluitare ſinit religatque catenas  
 Rupis ab Illyricæ scopulis. Nec prima, neque illa  
 Quæ ſequitur, tardata, ratis: ſed tertia moles  
 Hæſit, & ad cautes adducto fune ſecuta eſt.  
 Impendent cava ſaxa mari: ruituraque ſemper  
 Stat (mirum) moles: & ſilvis æquor inumbrat.  
 Huc fractas Aquilone rates, ſubmerſaque pontus  
 Corpora sæpe tulit, cæcisque abſcondit in antris,  
 Reſtituit, raptus teſtum mare: quumque cavernæ  
 Evomere fretum, contortis verticis Iuidæ  
 Tauromenitanam vincunt fervore Charybdim.  
 (1) pennæ vulgo.



Hic Opiterginis moles onerata colonis  
 Constitit: hanc omni puppes statione soluta  
 Circumeunt: alii rupes, ac litora complent.  
 Vultejus tacitas sensit sub gurgite fraudes,  
 Dux erat ille ratis, frustra qui vincula ferro  
 Rumpere conatus, poscit spe praelia nulla,  
 Incertus qua terga daret, qua pectora bello.  
 Hoc tamen in casu, quantum deprensa valebat,  
 Effecit virtus: inter tot milia captæ  
 Circumfusa rati, & plenam vix inde cohortem,  
 Pugna fuit, non longa quidem. Nam condidit umbra  
 Nox lucem dubiam, pacemque habuere tenebræ.

Tunc sic adtonitam, venturaque fata paventem  
 Rexit magnanima Vultejus voce cohortem:  
 „Libera non ultra parva quam nocte juventus,  
 „Consulte extremis angusto in tempore rebus.  
 „Vita brevis nulli superest, qui tempus in illa  
 „Quærendæ sibi mortis habet: nec gloria leti  
 „Inferiorque juvenes, admoto occurrere fato.  
 „Omnibus incerto venturæ tempore vitæ,  
 „Par animi laus est, & quos speraveris annos  
 „Perdere, & extremæ momentum abruptere lucis  
 „Arcessas dum fata manu. Non cogitur ullus  
 „Velle mori. Fuga nulla patet: stant undique nostris  
 „Intenti jugalis cives. Decernite letum,  
 „Et metus omnis abest: cupias quodcumque necesse est,  
 „Non tamen in cæca bellorum nubæ cadendum est,

„Ue, quum permixtis acies sua tela tenebris  
 „Involvunt, conferta jacent quum corpora campo,  
 „In mediam mors omnis abit, perit obruta virtus.  
 „Nos in conspicua sociis, hostique carina altiora  
 „Constituere dei. Præbebunt æquora testes,  
 „Præbebunt terræ, summis dabit insula saxis.  
 „Spectabunt geminæ diverso e litore partes.  
 „Nescio quod nostris magnum & memorabile fati.  
 „Exemplum, *Fortuna*, paras. Quæcumque petævum  
 „Exhibuit monumenta fides, servataque ferro.  
 „Militiæ pietas, transibit (1) nostra juvenus.  
 „Namque suis pro te gladiis incumbere, *Cæsar*,  
 „Esse parum scimus: sed non majora supersunt.  
 „Obsessis, tanti quæ pignora demus amoris.  
 „Abscidit nostræ multum *Fors* invida laudi,  
 „Quod non cum senibus capti natisque tenemur.  
 „Indomitos sciat esse viros, timeatque furentes,  
 „Et morti faciles animos, & gaudeat hostis.  
 „Non plures hæsisse rates. Tentare parabunt  
 „Fœderibus, turpique volent corrumpere vitæ.  
 „O utinam, quo plus habeat mors unica famæ,  
 „Promittant veniam, jubeant sperare salutem:  
 „Ne nos, quum calido fodiemus viscera ferro,  
 „Desperasse putent. Magna virtute merendum est,  
 „Cæsar ut, amissis, inter tot millia, paucis,  
 „

(1) transisset *MSS. vetustiss.*

„Hoc dathnum, clademque vocet. Dent fata recursum,  
 „Emittantque licet, vitare instantia nolim.  
 „Parjuroi vitam, comites, totusque futuræ  
 „Mortis agor stimulis: furor est. Agnoscere solis  
 „Permissum, quos jam tangit vicinia fati,  
 „Vidurosque deï delant, ut vivere durent,  
 „Felix esse mori. Sic cunctas extulit ardor  
 Nobilium mentes juvenum: quum sidera coeli,  
 Ante ducis voces, oculis humentibus omnes  
 Adspicerent, flexoque Ursæ temone paverent:  
 Idem, quum fortes animos præcepta subissent,  
 Optavere diem. Nec segnis vergere ponto  
 Tunc erat astra polus: nam sol Lædæa tenebat  
 Sidera, vicino quum lux altissima, Cancro est.  
 Nox tum Thessalicas urgebat parya sagittas.  
 Detegit orta dies stantes in rupibus Istros,  
 Pugnaesque mari Graja cum classe Liburnos,  
 Tentavere prius suspensio vincere bello  
 Fœderibus, fieret captis si dulcior ipsa  
 Mortis vita mora. Stabat devota juvenus,  
 Damnata jam luce ferox, securaque pugna  
 Promisso sibi fine manu: nullique tumultus  
 Excussere viris mentes ad summa paratas;  
 Innumerasque simul pauci terraque marique  
 Sustinere manus: tanta est fiducia morti.  
 Utque satis bello visum est fluxisse cruoris,  
 Versus ab hoste furor: primus dux ipse, carinæ

Vultejus jugulo poscens sibi fata ~~recepto~~,  
 „Equis, ait, juvenum, cujus sit dextra cruore  
 „Digna meo, certaue fide per vulnera nostra  
 „Testetur se velle mori?“ nec plura locuto  
 Viscera non unus jamdudum transigit ensis.  
 Collaudat cunctos: sed eum, cui vulnera prima  
 Debebat, grato moriens interficit ictu.  
 Concurrunt alii, totumque in partibus unis  
 Bellorum fecere nefas. Sic semine Cadmi  
 Emicuit Dircaea cohors, ceciditque suorum  
 Vulneribus, dirum Thebanis fratribus omen.  
 Phasidos & campis insomni dente creati  
 Terrigenæ, missa magicis e cantibus ira,  
 Cognato tantos complerunt sanguine sulcos:  
 Ipsaque, inexpertis primum quod fecerat herbis,  
 Expavit Medea nefas. Sic mutua passi  
 Fata cadunt juvenes: nimiumque (1) in morte virorum  
 Mors virtutis habet: pariter sternuntque, caduntque  
 Vulnere letali: nec quemquam dextra fefellit,  
 Quum feriat moriente manu. Nec vulnus adactis  
 Debetur gladiis: percussum est pectore ferrum,  
 Et jugulis pressere manum. Quum sorte cruenta  
 Fratribus incurrant fratres, natusque parenti;  
 Haud trepidante tamen toto cum pondere dextra  
 Exegere enses. Pietas ferientibus una,

(1) minimumque *vulgo*.

Non repetisse, fuit. Jam latis viscera lapsa  
 Semianimes traxere foris, multumque cruoris  
 Infudere mari. Despectam cernere lucem,  
 Victoresque suos vultu spectare superbo,  
 Et mortem sentire juvat. Jam strage cruenta  
 Conspicitur eumulata ratis: bustisque remittunt  
 Corpora victores, ducibus mirantibus, ulli  
 Esse ducem tanti. Nullam majore locuta est  
 Ore ratem totum discurtens fama per orbem.  
 Non tamen ignavæ post hæc exempla virorum  
 Percipient gentes, quam sit non ardua virtus  
 Servitium fugisse manu. Sed regna timentur  
 Ob ferrum; & sævis libertas utitur armis:  
 Ignoratque datos, ne quisquam serviat, enses.  
 Mors utinam pavidos vitæ subducere nolles,  
 Sed virtus te sola daret! Non segnior illo  
 Marte fuit, qui tunc Libycis exarsit in arvis (1).  
 Namque rates audax Lilybæo litore solvit  
 Curio! nec forti velis Aquilone recepto  
 Inter semirutas magnæ Carthaginis arces,  
 Et Clupeam, tenuit stationis litora notæ:  
 Primaque castra locat cano præcul æquore, qua se  
 Bagrada lentus agit siccæ sulcator arenæ.  
 Inde petit tumulos, exesasque undique rupes,  
 Antæi quæ regna vocat non vana vetustas.

(1) exarsit arenis MS.

Nominis antiqui cupientem noscere causas,  
Cognita per multos docuit rudis incola partes.  
„Nondum post genitos Tellus effeta gigantas,  
„Terribilem Libycis partum concepit in antris.  
„Nec tam justa fuit terrarum gloria Typhon,  
„Aut Tityos, Briareusque ferox: cœloque pepercit,  
„Quod non Phlegæis Antæum sustulit arvis.  
„Hoc quoque tam vastas cumulavit munere vires  
„Terra sui fœtus, quod, quum tetigere parentem,  
„Jam defecta vigent renovato robore membra.  
„Hæc illi spelunca domus: latuisse sub alta  
„Rupe ferunt, epulas raptos habuisse leones:  
„Ad somnos non terga feræ præbere cubile  
„Adsuerunt, non silva torum: viresque resumit  
„In nuda tellure jacens. Periere coloni  
„Arvorum Libyes: pereunt, quos adpulit æquor,  
„Auxilioque diu virtus non usa cadendi,  
„Terræ spernit opes: invictus robore cunctis,  
„Quamvis staret, erat. Tandem vulgata cruenti  
„Fama mali, terras monstris æquorque levantem,  
„Magnanimum Alciden Libycas excivit in oras.  
„Ille Cleonei projecit terga leonis,  
„Antæus Libyci. Persudit membra liquore  
„Hospes, Olympiæ servato more palæstræ.  
„Ille parum fidens pedibus contingere matrem,  
„Auxilium membris calidas infundit arenas.  
„Conseruere manus, & multo brachia nexu. (c)

- „Colla diu gravibus frustra tentata lacertis:  
 „Inmotumque caput fixa cum fronte tenetur.  
 „Miranturque habuisse parem. Nec viribus uti  
 „Alcides primo voluit certamine totis,  
 „Exhaustique virum: quod creber anhelitus illi  
 „Prodidit, & fesso gelidus de corpore sudor.  
 „Tunc cervix lassata quati: tunc pectore pectus  
 „Urgueri: tunc obliqua percussa labare  
 „Crura manu. Jam terga viri cedentia victor  
 „Adligat, & medium, compressis ilibus, artat:  
 „Inguinaque insertis pedibus distendit, & omnem  
 „Explicuit per membra virum. Rapit arida tellus  
 „Sudorem: calido complentur sanguine venæ.  
 „Intumueret tori, totosque induruit artus,  
 „Herculeosque novo laxavit corpore nodos.  
 „Constitit Alcides stupefactus robore tanto:  
 „Nec sic Inachiis, quamvis rudis esset, in undis  
 „Desectam (1) timuit reparatis anguibus hydram.  
 „Confixere pares; telluris viribus ille,  
 „Ille suis. Numquam sævæ sperare novercæ  
 „Plus licuit. Videt exhaustos sudoribus artus.  
 „Cervicemque viri, siccam quum ferret Olympum.  
 „Utque iterum fessis injecit brachia membris,  
 „Non exspectatis Antæus viribus hostis,  
 „Sponte cadit, majorque, accepto robore, surgit.

(1) Desectam *vn'go*.

„ Quisquis inest terris, in fessos spiritus artus  
 „ Egeritur; tellusque viro luctante laborat.  
 „ Ut tandem auxilium tactæ prodesse parentis  
 „ Alcides sensit: *Standum est tibi*, dixit, *& ultra*  
 „ *Non credere volo, sternique vetabere terra*.  
 „ *Hærebis pressis intra mea pectora membris*.  
 „ *Huc Antææ cades*. Sic fatus, sustulit altè  
 „ Nitentem in terras juvenem: Morientis in artus  
 „ Non potuit nati Tellus permittere vires.  
 „ Alcides medium tenuit: jam pectora pigro  
 „ Stricta gelu: terrisque diu non credidit hostem.  
 „ Hinc ævi veteris custos famosa vetustas,  
 „ Miratrixque sui signavit nomine terras.  
 „ Sed majora dedit cognomina collibus istis,  
 „ Pœnum qui Latii revocavit ab arcibus hostem,  
 „ Scipio. Nam sedes Libyca tellure potito  
 „ Hæc fuit. En, veteris cernis vestigia valli:  
 „ Romana hos tenuit primum victoria campos.

Curio lætatus, tamquam fortuna locorum,  
 Bella gerat, servetque ducum sibi fata priorum,  
 Felici non fausta loco tentoria ponens,  
 Indulsit (1) castris, & collibus abstulit omen,  
 Sollicitatque feros non æquis viribus hostes:  
 Omnis Romanis quæ cesserat Africa signis,  
 Tunc Vari sub jure fuit: qui robore quamquam

(1) inclusit. MSS.



Confusus Latio, regis tamen undique vires  
 Excivit Libyæ gentis, extremaque mundi  
 Signa suum comitata Jubam. Non fusior ulli  
 Terra fuit domino: qua sunt longissima regni,  
 Cardine ab occiduo vicinus Gadibus Atlas  
 Terminat: a medio, confinis Syrtibus Hammon.  
 At qua lata jacent, vasti plaga fervida mundi  
 Distinet Oceanum, zonæque exusta calentis  
 Sufficiunt spatio. Populi tot castra sequuntur:  
 Autololes, Numidæque vagi, semperque paratus  
 Incultus Gætulus equo: tum concolor Indo  
 Maurus, inops Nasamon, mixti Garamante perusto  
 Marmaridæ volucres, æquaturusque sagittas  
 Medorum, tremulum quum torsit missile, Mazax;  
 Et gens, quæ nudo residens Massylia dorso  
 Ora levi flectit frenorum nescia virga:  
 Et solitus vacuis errare mapalibus Afer  
 Venator, ferrique simul fiducia non est,  
 Vestibus iratos laxis operire leones.

Nec solum studiis civilibus arma parabat,  
 Privatæ sed bella dabat Juba concitus (1) iræ,  
 Hunc quoque, quo superos humanaque polluit anno,  
 Lege tribunicia solio depellere avorum  
 Curio tentarat, Libyamque auferre tyranno,  
 Dum regnum te Roma facit. Memor ille doloris

Hoc

(1) conscius MS.

Hoc bellum sceptri fructum putat esse retenti.  
Hac igitur tristis trepidat jam Curio fama,  
Et quod Cæsareis numquam devota juvenus  
Illa nimis castris, nec Rheni miles in undis  
Exploratus erat, Corfini captus in arce,  
Infidusque novis ducibus, dubiusque priori,  
Fas utrumque putat. Sed postquam languida segni  
Cernit cuncta metu, nocturna que munia valli  
Desolata fuga, trepida sic mente profatur:

„Audendo magnus tegitur timor: arma capessam  
„Ipse prior: campum miles descendat in æquum,  
„Dum meus est: variam semper dant otia mentem.  
„Eripe consilium pugna: quum dira voluntas  
„Ense subit presso, galeæ texere pudorem,  
„Quis conferre duces meminit? quis pendere causas?  
„Qua stetit, inde favet: veluti fatalis arenæ  
„Muneribus non ira vetus concurrere cogit  
„Productos: odere pares. “ Sic fatus, apertis  
Instruxit campis acies: quem blanda futuris  
Deceptura malis belli fortuna recepit.  
Nam pepulit Varum campo, nudataque foeda  
Terga fuga, donec vetuerunt castra, cecidit.  
Tristia sed postquam superati prœlia Vari  
Sunt audita Jubbæ: lætus, quod gloria belli  
Sit rebus servata suis, rapit agmina furtim,  
Obscuratque suam per jussa silentia famam;  
Hoc solum metuens incautus ab hoste timeri.

Ut victor, medios aciem dejecit in agros.  
 Tunc primum patuere doli, Numidæque fugaces (1)  
 Undique completis clausurunt montibus agmen.  
 Obstupuit dux ipse simul, perituraque turba:  
 Non timidi petiere fugam, non prælia fortes:  
 Quippe ubi non sonipes motus clangore tubarum  
 Saxa quatit pulsu, rigidos vexantia frenos  
 Ora terens, spargitque jubas, & subrigit aures,  
 Incertoque pedum pugnat non stare tumultu.  
 Fessa jacet cervix. Fumant sudoribus artus  
 Oraque projecta squalent arentia lingua:  
 Pectora rauca gemunt, quæ creber anhelitus urguet:  
 Et defecta gravis longe trahit ilia pulsus:  
 Siccaque sanguineis durescit spuma lupatis.  
 Jamque gradum neque verberibus, stimulisque coacti,  
 Nec, quamvis crebris jussi calcaribus, addunt.  
 Vulneribus coguntur equi. Nec profuit ulli  
 Cornipedis rupisse moras: neque enim impetus illis  
 Incursusque fuit: tantum profertur ad hostes,  
 Et spatium jaculis oblato vulnere donat.  
 At vagus Afer equos ut primum emisit in agmen:  
 Tunc campi tremuere sono: terraque soluta,  
 Quantus Bistonio torquetur turbine pulvis,  
 Aera nube sua texit, traxitque tenebras.  
 Ut vero in pedites fatum miserabile belli

(1) *feroces MS.*

Incubuit: nullo dubii discrimine Martis  
Ancipites steterunt casus, sed tempora pugnae  
Mors tenuit. Neque enim licuit procurrare contra,  
Et miscere manus. Sic undique septa Juventus  
Comminus obliquis, & rectis eminus hastis  
Obruitur: non vulneribus, nec sanguine, solum  
Telorum nimbo peritura, ac pondere ferri.  
Ergo acies tantæ parvum spissantur in orbem:  
Ac, si quis medium metuens correpsit in agmen,  
Vix impune suos inter convertitur enses.  
Densaturque globus, quantum pede prima relato  
Constrinxit gyros acies. Non arma movendi  
Jam locus est pressis: stipataque membra teruntur,  
Frangitur armatum colliso pectore pectus.  
Non tam læta tulit victor spectacula Maurus,  
Quam fortuna dabat: fluvios non ille cruoris (1),  
Membrorumque videt lapsum, & ferientia terram  
Corpora: compressum turba stetit omne cadaver.)

Excitet invisas diræ Carthaginiis umbras  
Inferiis fortuna novis: ferat ista cruentus  
Hannibal, & Pœni tam dira piacula manes.  
Romanam, superi, Libyca tellure ruinam  
Pompejo prodesse nefas, votisque senatus.  
Africa nos potius vincat sibi. Curio fusas  
Ut vidit campis acies, & cernere tantas

(1) non ire cruoris MS.

Permisit clades compressus sanguine pulvis,  
 Non tulit adflictis animam producere rebus,  
 Aut spectare fugam: ceciditque in strage suorum  
 Impiger ad letum, & fortis virtute coacta.

Quid nunc rostra tibi prosunt turbata, forumque,  
 Unde tribunicia plebejus signifer arce  
 Arma dabas populis, quid prodita jura senatus,  
 Et gener, atque socer bello concurrere jussi?  
 Ante jaces, quam dira duces Pharsalia confert,  
 Spectandumque tibi bellum civile negatum est.  
 Has urbi miseræ vestro de sanguine pœnas  
 Nempe datis (1): luitis jugulo sic arma potentes.  
 Felix Roma quidem, civesque habitura beatos,  
 Si libertatis superis tam cura placeret,  
 Quam vindicta placet. Libycas, en! nobile corpus  
 Pascit aves, nullo contactus (2) Curio busto.  
 At tibi nos (quando non proderit ista silere  
 A quibus omne ævi senium sua fama repellit,)   
 Digna damus, juvenis, meritæ præconia vitæ.  
 Haud alium tanta civem tulit indole Roma,  
 Aut cui plus leges deberent recta sequenti.  
 Perdita tunc urbi nocuerunt sæcula, postquam  
 Ambitus, & luxus, & opum metuenda facultas  
 Transverso mentem dubiam torrente tulerunt,  
 Momentumque fuit mutatus Curio rerum,

(1) ferre datis *vulgo*.

(2) contentus *MSS. multi*.

Gallorum captus spoliis, & Cæsaris auro.  
Jus licet in jugulos nostros sibi fecerit ense  
Sulla potens, Mariusque ferox, & Cinna cruentus,  
Cæsareæque domus series: cui tanta potestas  
Concessa est? emergere omnes, hic vendidit urbem.





## LIBER QUINTUS.

### ARGUMENTUM.

*Quintus in Epiro memorat decreta Senatus,  
 Pompejoque datum regimen summamque ducatus.  
 Hinc steriles curæ decepti sortibus Appi,  
 In latere Euboico sperantis anarchia regni.  
 Caesaris in reditu, postquam domuisset Hiberum,  
 Milite pertæso pæne obruta culmina rerum.  
 Hinc prope collatis Magni cum Casare castris,  
 Spem fore damnatis reparandi fœdera bellis.  
 Inde procellosi tentanda pericula ponti,  
 Jam desperantem revocatum ad litus eundi.  
 Magnum collatis in prælia Caesaris armis,  
 Conjugii pondus Lesbi celasse latebris.*

**S**IC alterna duces bellorum vulnera passôs  
 In Macetûm terras, miscens adversa secundis,  
 Servavit fortuna pares. Jam sparserat Æmo

Bruma nives, gelidoque cadens Atlantis Olympo:  
 Instabatque dies, qui dat nova nomina fastis,  
 Quique colit primus ducentem tempora Janum.  
 Dum tamen emeriti remanet pars ultima juris,  
 Consul uterque vagos belli per munia Patres  
 Elicit Epiron. Peregrina ac sordida sedes  
 Romanos cepit procures: secretaque rerum  
 Hospes in externis audivit curia testis.  
 Nam quis castra vocet strictas tot jure secures,  
 Tot fasces? docuit populos venerabilis ordo  
 Non Magni partes, sed Magnum in partibus esse.  
 Ut primum mœstum tenuere silentia cœtum,  
 Lentulus excelsa (1) sublimis sede profatur:  
 „Indole si dignum Latia, si sanguine prisco  
 „Robur inest animis, non qua tellure coacti,  
 „Quamque procul testis captæ sedeamus ab urbis  
 „Cernite: sed vestræ faciem cognoscite turbæ:  
 „Cunctaque jussuri primum hoc decernite Patres,  
 „Quod regnis, populisque liquet, nos esse senatum.  
 „Nam, vel Hyperboreæ plaustrum glaciale subursæ,  
 „Vel plaga qua torrens, claususque vaporibus axis  
 „Nec patitur noctes, nec iniquos crescere soles,  
 „Si fortuna ferat, rerum nos summa sequetur,  
 „Imperiumque comes. Tarpeja sede perusta  
 „Gallorum facibus, Vejosque habitante Camillo,

(1) e celsa MSS. quindéc.



„Illic Roma fuit. Non umquam perdidit ordo  
„Mutato sua jura solo. Mœrentia tecta  
„Cæsar habet, vacuasque domos, legesque silentes,  
„Clausaque justitio tristi fora. Curia solos  
„Illa vidit Patres, plena quos urbe fugavit.  
„Ordine de tanto quisquis non exulat, hîc est.  
„Ignaros scelerum, longaque in pace quietos  
„Bellorum primus sparsit furor: omnia rursus  
„Membra loco redeunt. Totis, en! viribus orbis  
„Hesperien pensant superi: jacet hostis in undis  
„Obrutus Illyricis: Libyes squalentibus arvis  
„Curio Cæsarei cecidit pars magna senatûs.  
„Tollite signa duces: fatorum impellite cursum:  
„Spem vestram præstate deis: fortunaque tantos  
„Det vobis animos, quantos fugientibus hostem  
„Causa dabat. Nostrum exhausto jus clauditur anno:  
„Vos, quorum finem non est sensura potestas,  
„Consulite in medium Patres, Magnumque jubete  
„Esse ducem. “ Læto nomen clamore senatus  
Excipit: & Magno fatum patriæque suumque  
Imposuit. Tunc in reges, populosque merentes  
Sparsus honos, pelagique potens Phœbeja donis  
Exornata Rhodos, gelidique inculta juvenus  
Taygeti: famæ veteris laudantur Athenæ:  
Massiliæque suæ donatur libera Phocis.  
Tunc Sadalen, fortemque Cotyn, fidumque per arma  
Dejotarum, & gelidæ dominum Rhascypolin oræ

Collaudant: Libyenque jubent auctore senatu  
 Sceptribero parere Jubæ. Pro tristia fata!  
 Et tibi non fidæ gentis digaiissime regno,  
 Fortunæ, Ptolemæe, pudor, crimenque deorum,  
 Cingere Pellæo pressos diademate crines  
 Permissum. Sævum in populos puer accipit ensem:  
 Atque utinam in populos! donata est regia Lagi;  
 Accessit Magni jugulus: regnumque sorori  
 Ereptum est, soceroque nefas. Jam turba soluto  
 Arma petit cœtu, quæ quum populique ducesque  
 Casibus incertis, & cæca sorte pararent,  
 Solus in ancipites metuit descendere Martis.  
 Appius eventus: finemque expromere rerum  
 Sollicitat superos, multosque obducta per annos  
 Delphica fatidici reserat penetralia Phœbi.  
 Hesperio tantum, quantum submotus Eoo  
 Cardine, Parnasos gemino petit æthera colle,  
 Mons Phœbo, Bromioque sacer: cui numine mixto  
 Delphica Thebanæ referunt trieterica Bacchæ.  
 Hoc solum fluctu terras mergente cacumen  
 Emicuit (1), pontoque fuit discrimen, & astris.  
 Tu quoque vix summam seductus ab æquore rupem  
 Extuleras, unoque jugo Parnase latebas.  
 Ultor ibi expulsæ, premeret quum viscera partus,  
 Matris, adhuc rudibus Pæan Pythona sagittis

(1) Eminuit *virgo*.

Explicuit, quum regna Themis, tripodasque teneret.  
Ut vidit Pæan vastos telluris hiatus  
Divinam spirare fidem, ventosque loquaces  
Exhalare solum, sacris se condidit antris,  
Incubuitque adyto, vates ibi factus, Apollo.

Quis latet hic superum? quod numen ab æthere pressum  
Dignatur cæcas inclusum habitare cavernas?  
Quis terram cœli patitur deus, omnia cursus  
Æterni secreta tenens; mundoque futuri  
Conscius, ac populis sese proferre paratus,  
Contactusque ferens hominis, magnusque potensque,  
Sive canit fatum, seu quod jubet ille canendo,  
Fit fatum? Forsan terris inserta regendis,  
Aere libratum vacuo quæ sustinet orbem,  
Totius pars magna Jovis, Cirrhæa per antra  
Exit, & ætherio trahitur connexa Tonanti.  
Hoc ubi virgineo conceptum est pectore numen,  
Humanam feriens animam sonat, oraque vates  
Solvit, ceu Siculus flammis urgulentibus Ætner  
Undat apex: Campana fremens ceu saxa vaporat  
Conditus Inarimæ æterna mole Typhæus.

Hoc tamen expositum cunctis, nullique negatum  
Numen, ab humani solum se labe furoris  
Vindicat. Haud illic tacito mala vota susurro  
Concipiunt. Nam fixa canens, mutandaque nulli  
Mortales optare vetat: justisque benignus  
Sæpe dedit sedem notas mutantibus urbes,

Ut Tyriis: dedit ille minas impellere belli,  
Ut Salaminicum meminit mare: sustulit iras  
Telluris sterilis, monstrato fine: resolvit  
Aera tabificum. Non ullo sæcula dono  
Nostra carent majore deūm, quam Delphica sedes (1)  
Quod siluit, postquam reges timuere futura,  
Ac superos vetuere loqui. Nec voce negata  
Cirrhææ mœrent vates, templique fruuntur  
Justitio. Nam si qua deus sub pectora venit,  
Numinis aut pœna est mors inmaturo recepti,  
Aut pretium: quippe stimulis fluctuque furoris  
Compages humana labat, pulsusque deorum  
Concutiunt fragiles animas. Sic tempore longo  
Non motos tripodas, vastæque silentia rupis  
Appius Hesperii scrutator ad ultima fati  
Sollicitat. Jussus sedes laxare verendas  
Antistes, pavidamque deis inmittere vatem,  
Castalios circum latices, nemorumque recessus  
Phemonoen errore vagam, curisque vacantem  
Corripuit, cogitque fores irrumpere templi.  
Limine terrifico metuens consistere Phœbas,  
Absterrere ducem noscendi ardore futura  
Cassa fraude parat. „Quid spes, ait, improba veri  
„Te Romane trahit? muto Parnasos hiatu  
„Conticuit, pressitque deum: seu spiritus istas

(1) fides MS.

„Destituit fauces, mundique in devia versum  
 „Duxit iter: seu barbarica quum lampade Python  
 „Arsit, in immensas cineres abiire cavernas,  
 „Et Phœbi tenuere viam: seu sponte deorum  
 „Cirrhæ silet, fatigue sat est arcana futuri  
 „Carmina longævæ vobis commissa Sibyllæ;  
 „Seu Pæan solitus templis arcere nocentes,  
 „Ora quibus solvat nostro non invenit ævo.“

Virginæi patuere doli, fecitque negatis  
 Numinibus, metus ipse fidem. Tum torta priores  
 Stringit vitta comas, crinesque in terga solutos  
 Candida Phœaica complectitur infula lauro.  
 Hærentem, dubiamque premens in templa sacerdos  
 Impulit. Illa pavens adyti penetrabile remoti  
 Fatidicum, prima templorum in parte resistit:  
 Atque deum simulans, sub pectore fida quieto  
 Verba refert, nullo confusæ murmure vocis  
 Instinctam sacro mentem testata furore,  
 Haud æque læsura ducem, cui falsa canebat,  
 Quam tripodas, Phœbique fidem. Non rupta trementi  
 Verba sono, nec vox antri complere capacis  
 Sufficiens spatium, nulloque horrore comarum  
 Excussæ laurus, inmotaque culmina (1) templi,  
 Secūrumque nemus, veritatem se credere Phœbo  
 Prodiderant. Sensit tripodas cessare, furensque

(1) limina *MSS. aliquot.*

Appius : „ Et nobis meritas dabis impia pœnas,  
 „ Et superis, quos fingis, ait, nisi mergeris antris,  
 „ Deque orbis trepidi tanto consulta tumultu  
 „ Desinis ipsa loqui.“ Tandem conterrita virgo  
 Confugit ad tripodas, vastisque abducta cavernis  
 Hæsit, & insueto concepit pectore numen,  
 Quod non exhaustæ per tot jam sæcula rupis  
 Spiritus ingessit vati: tandemque potitus  
 Pectore Cirrhæo, non umquam plenior artus  
 Phœbados irrupit Pæan: mentemque priorem  
 Expulit, atque hominem toto sibi cedere jussit  
 Pectore. Bacchatur demens aliena per antrum  
 Colla ferens, vittasque dei, Phœbeaque sarta  
 Erectis discussa comis, per inania templi  
 Ancipiti cervice rotat, spargitque vaganti  
 Obstantes tripodas, magnoque exæstuat igni,  
 Iratum te, Phœbe, fereas: nec verbere solo  
 Uteris, ac stimulis; flammæ in viscera mergis.  
 Accipit & frenos: nec tantum prodere vati,  
 Quantum scire, licet. Venit ætas omnis in unam  
 Congeriem: miserumque premunt tot sæcula pectus.  
 Tanta patet rerum series, atque omne futurum  
 Nititur in lucem: vocemque potentia fata  
 Luctantur: non prima dies, non ultima mundi,  
 Non modus Oceani, numerus non deerat arenæ.  
 Qualis in Euboico vates Cumana recessu,  
 Indignata suum multis servire furorem

Gentibus, ex tanta fatorum strage superba  
 Excerpsit Romana manu: sic plena laborat  
 Phemonoe Phœbo, dum te consultor operti  
 Castalia tellure dei vix invenit, Appi,  
 Inter fata diu quærens tam magna latentem.  
 Spumea tum primum rabies vesana per ora  
 Effluit, & gemitus, & anhelus clara meatu  
 Murmura: tunc mœstus vastis ululatus in antris,  
 Extremæque sonant, domita jam virgine, voces.  
 „Effugis, ingentes, tanti discriminis experts,  
 „Bellorum Romane minas: solusque quietem  
 „Euboici vasta lateris convalle tenebis.“  
 Cetera subpressit, faucesque obstruxit Apollo.

Custodes tripodes fatorum, arcanæque mundi,  
 Tuque potens veri Pæan, nullumque futuri  
 A superis celate diem, suprema ruentis  
 Imperii, cæsosque duces, & funera regum,  
 Et tot in Hesperio collapsas sanguine gentes  
 Cur aperire times? an nondum numina tantum  
 Decrevere nefas? & adhuc dubitantibus astris  
 Pompeji damnare caput, tot fata tenentur?  
 Vindicis an gladii facinus, pœnasque furoris,  
 Regnaque ad ultores iterum redeuntia Brutos,  
 Ut peragat fortuna, taces? tunc pectore vatis  
 Impactæ cessere fores, excussaque (1) templis

(1) expulsæque MSS. & add. vers. pleraque.

Prosiluit: perstat rabies, nec cuncta locutæ  
Quem non emisit, superest deus. Ille feroces  
Torquet adhuc oculos, totoque vagantia cœlo  
Lumina, nunc vultu pavido, nunc torva minaci:  
Stat numquam facies: rubor igneus inficit ora,  
Liventesque genas: nec, qui solet esse timenti,  
Terribilis sed pallor inest: nec fessa quiescunt  
Corda; sed ut tumidus Boreæ post flamina pontus  
Rauca gemit; sic muta levant suspiria vatem.  
Dumque a luce sacra, qua vidit fata, refertur  
Ad vulgare jubar, mediæ venere tenebræ.  
Inmisit Stygiam Pæan in viscera Lethen,  
Quæ raperet secreta deûm. Tum pectore verum  
Fugit & ad Phœbi tripodas rediere futura:  
Vixque refecta cadit. Nec te vicinia leti  
Territat ambiguis frustratum sortibus, Appi:  
Jure sed incerto mundi, subsidere regnum  
Chalcidos Euboicæ vana spe rapte parabas.  
Heu demens, nullum belli sentire fragorem,  
Tot mundi caruisse malis, præstare deorum  
Excepta quis morte potest! secreta tenebis  
Litoris Euboici memorando condite busto,  
Qua maris angustat fauces saxosa Carystos,  
Et tumidis infesta colit qua numina Rhamnus,  
Artatus rapido fervet qua gurgite pontus,  
Euripusque trahit, cursum mutantibus undis,  
Chalcidicas puppes ad iniquam classibus Aulin.

Inte-



Interea domitis Cæsar remeabat Iberis,  
 Victrices aquilas alium laturus in orbem:  
 Quum prope fatorum tantos per prospera cursus  
 Avertere dei. Nullo nam Marte subactus  
 Intra castrorum timuit tentoria ductor  
 Perdere successus scelerum: quum pæne fideles  
 Per tot bella manus satiatæ sanguine tandem  
 Destituere ducem: mæsto seu classica paullum  
 Intermissa sono, claususque, & frigidus ensis,  
 Expulerant belli furias: seu præmia miles  
 Dum majora petit, damnat caussamque, ducemque,  
 Et scelere imbutos etiam nunc venditat enses.  
 Haud magis expertus discrimine Cæsar in ullo est,  
 Quam non ex stabili, tremulo sed culmine cuncta  
 Despiceret, staretque super titubantia fultus:  
 Tot raptis truncus manibus, gladioque relictus  
 Pæne suo, qui tot gentes in bella trahebat,  
 Scit non esse ducis strictos, sed militis, enses.  
 Non pavidum jam murmur erat, nec pectore tecto (1)  
 Ira latens: nam quæ dubias constringere mentes  
 Causa solet, dum quisque pavet, quibus ipse timori est,  
 Seque putat solum regnorum injusta gravari,  
 Haud retinet. Quippe ipsa metus exsolverat audax  
 Turba suos. Quidquid multis peccatur, inultum est.  
 Effudere minas:,, Liceat discedere Cæsar

(1) pectore toto MSS. *trēs.*

- „A scelerum rabie. Quæris terraque marique  
„His ferrum jugulis, animasque effundere viles  
„Quolibet hoste paras: partem tibi Gallia nostri  
„Eripuit: partem duris Hispania bellis:  
„Pars jacet Hesperia: totoque exercitus orbe  
„Te vincente perit. Terris fuisse cruorem  
„Quid juvat Arctois, Rheno, Rhodanoque subactis?  
„Tot mihi pro bellis bellum civile dedisti.  
„Cepimus expulso patriæ quum lecta senatu,  
„Quos hominum, vel quos licuit spoliare deorum?  
„Imus in omne nefas, manibus, ferroque nocentes,  
„Paupertate pii. Finis quis quæritur armis?  
„Quid satis est, si Roma parum? jam respice canos,  
„Invalidasque manus, & inanes cerne lacertos.  
„Usus abit vitæ, bellis consumsimus ævum:  
„Ad mortem dimitte senes. En! improba vota:  
„Non dâro liceat morientia cespite membra  
„Ponere, non anima glebam fugiente ferire,  
„Atque oculos morti clausuram quærere dextram,  
„Conjugis illabi lacrimis, unique paratum  
„Scire rogam. Liceat morbis finire senectam.  
„Sit præter gladios aliquod sub Cæsare fatum.  
„Quid, velut ignaros ad quæ portenta paremur,  
„Spe trahis? usque adeo soli civilibus armis  
„Nescimus cujus sceleris sit maxima merces?  
„Nil actum est bellis, si nondum comperit istas  
„Omnia posse manus. Nec fas, nec vincula juris

„Hoc audere vetant. Rheni mihi Cæsar in undis  
 „Dux erat, hic socius. Facinus quos inquinat, æquat?  
 „Addè, quod ingrato meritum iudice virtus  
 „Nostra perit. Quidquid gerimus, fortuna vocatur.  
 „Nos fatum sciat esse suum. Licet omne deorum  
 „Obsequium speres, irato milite, Cæsar,  
 „Pax erit.“ Hæc fatus, totis discurrere castris  
 Cœperat, infestoquæ ducem deposcere vultu.

Sic eat, o superi, quando pietasque, fidesque  
 Destituunt, moresque malos sperare relictum est;  
 Finem civili faciat discordia bello.  
 Quem non ille ducem potuit terrere tumultus!  
 Fata sed in præcæps solitus dimittere Cæsar,  
 Fortunamque suam per summa pericula gaudens  
 Exercere, venit: nec, dum desæviat irâ,  
 Exspectat: medios properat tentare furores.  
 Non illis urbem, spoliandaque templa negasset,  
 Tarpejamque Jovis sedem, matresque senatus,  
 Passurasque infanda nurus. Vult omnia certe  
 A se sæva peti, vult præmia Martis amari:  
 Militis indomiti tantum mens sana timetur.  
 Non pudet, heu Cæsar, soli tibi bella placere  
 Jam manibus damnata tuis? hos ante pigebit  
 Sanguinis? his ferri grave jus erit? ipse per omne  
 Fasque nefasque rues? lassare, & discere sine armis  
 Posse pati: liceat scelerum sibi ponere finem.  
 Sæve quid insequeris? quid jam nolentibus instas?

Bellum te civile fugit. Stetit aggere fultus  
Cespitis, intrepidus vultum, meruitque timeri  
Non metuens: atque hæc ira distante profatur:  
„Qui modo in absentem vultu, dextraque furebas  
„Miles, habes nudum, promptumque ad vulnera pectus.  
„Hic fuge, si belli finis placet, ense relicto.  
„Detegit imbelles animas nil fortiter ausa  
„Seditio, tantumque fugam meditata juvenus,  
„Ac ducis inviâi rebus lassata secundis.  
„Vadite, meque meis ad bella relinquitte fatis:  
„Invenient hæc arma manus, vobisque repulsis  
„Tôt reddet Fortuna viros, quot tela vacabunt.  
„An ne fugam Magni tanta cum classe sequentur  
„Hesperiae gentes, nobis victoria turbam  
„Non dabit, impulsi tantum quæ præmia belli  
„Auferat, & vestri rapta mercede laboris,  
„Lauriferos nullo comitetur vulnere currus?  
„Vos defecta senes, exhaustaque sanguine turba  
„Cernetis nostros jam plebs Romana triumphos.  
„Cæsaris an cursus vestræ sentire putatis  
„Damnum posse fugæ? Veluti, si cuncta minentur  
„Flumina, quos miscent pelago, subducere fontes;  
„Non magis ablatiis umquam descenderet æquor,  
„Quam nunc crescit, aquis: an vos momenta putatis  
„Ulla dedisse mihi? numquam sic cura deorum  
„Se premet, ut vestræ morti, vestræque saluti  
„Fata vacent. Procerum motus hæc cuncta sequuntur.

„Humanum paucis vivit genus. Orbis Iberi  
 „Horror, & Arctoi, nostro sub numine miles,  
 „Pompejo certe fugeres duce. Fortis in armis  
 „Cæsareis Labienus erat: nunc transfuga vilis  
 „Cum duce prælato terras, atque æquora lustrat.  
 „Nec melior mihi vestra fides, si bella nec hoste,  
 „Nec duce me geritis, quisquis mea signa relinquens  
 „Non Pompejanis tradit sua partibus arma,  
 „Hic numquam vult esse meus. Sunt ista profecto  
 „Curæ castra deis, qui me committere tantis,  
 „Non nisi mutato voluerunt milite, bellis.  
 „Heu, quantum Fortuna humeris jam pondere fessis  
 „Amolitur onus! sperantes omnia dextras  
 „Exarmare datur, quibus hic non sufficit orbis.  
 „Jam certe mihi bella geram: discedite castris,  
 „Tradite nostra viris ignavi signa, Quirites.  
 „At paucos, quibus hæc rabies auctoribus arsit,  
 „Non Cæsar, sed pœna tenet. Procumbite terræ (1);  
 „Infidumque caput, feriendaque tendite colla.  
 „Et tu, quo solo stabunt jam robore castra,  
 „Tiro rudis, specta pœnas, & disce ferire,  
 „Disce mori.“ Tremuit sæva sub voce minantis  
 Vulgus iners: unumque caput, tam magna juvenus  
 Privatum factura timet: velut ensibus ipsis  
 Imperet, invito moturus milite ferrum.

(1) terra MSS. & edd. omni.

Ipse pavet, ne tela sibi dextræque negentur  
 Ad scelus hoc Cæsar: vincit patientia sævi  
 Spem ducis, & jugulos, non tantum præstitit enses.  
 Nil magis, aduertas sceleri quam perdere mentes,  
 Atque perire timet. Tam diro fœderis istu  
 Parta quies, pœnaque redivit placata juvenus.

Brundisium decimis jubet hanc adtingere castris,  
 Et cunctas revocare rates, quas avius Hydrus,  
 Antiquusque Taras, secretaque litora Leucæ,  
 Quas recipit Salapina palus, & subdita Sipus  
 Montibus: Ausoniam torquens qua frugifer oram,  
 Delmatio Boreæ, Calabroque obnoxius Austro  
 Appulus Hadriacas exit Garganus in undas.

Ipse petit trepidam tutus sine milite Romam  
 Jam doctam servire togæ: populoque precanti  
 Scilicet indulgens, summo dictator honori  
 Contigit, & lætos fecit se consule fastus.  
 Namque omnes voces, per quas jam tempore tanto  
 Mentimur dominis, hæc primum reperit ætas,  
 Qua sibi ne ferri jus ullum Cæsar abesset,  
 Ausonias gladiis voluit miscere secures.  
 Addidit & fasces aquilis, & nomen inane  
 Imperii rapiens, signavit tempora digna  
 Mœsta nota. Nam quo melius Pharsalius annus  
 Consule notus erit? fingit sollemnia campus,  
 Et non admixtæ dirimit suffragia plebis,  
 Decantatque tribus, & vana versat in urna.

Nec cœlum servasse licet: tonat augure surdo,  
 Et lætæ jurantur aves, bubone sinistro.  
 Inde perit primum quondam veneranda potestas  
 Juris inops: careat tantum ne nomine tempus,  
 Menstruus in fastus distinguit sæcula consul.  
 Nec non Iliacæ numen quod præsidet Albæ,  
 Haud meritum Latio sollemnia sacra subactis,  
 Vidit flammifera confectas nocte Latinas.

Inde rapit cursus, & quæ piger Appulus arva  
 Deseruit rastris, & inertis tradidit herbæ,  
 Ocior & cœli flammis, & tigride fœta  
 Transcurrit: curvique tenens Minoja tecta  
 Brundisii, clausas ventis brumalibus undas  
 Invenit, & pavidas hyberno sidere classes:  
 Turpe duci visum, rapiendi tempora belli  
 In segnes exisse moras, portuque teneri,  
 Quum pateat tutum vel non felicibus æquor.  
 Expertes animos pelagi sic robore complet:  
 „Fortius hiberni flatus, cœlumque fretumque  
 „Quum cepere, tenent, quam quos incumbere certos  
 „Perfida nubiferi vetat inconstantia veris.  
 „Nec maris anfractus, lustrandaque litora nobis,  
 „Sed recti fluctus, soloque Aquilone secandi.  
 „Hic utinam summi curvet carchesia mali,  
 „Incumbatque furens, & Graja ad mœnia perfleret,  
 „Ne Pompejani Phæacum e litore toto  
 „Languida jactatis comprehendant carbasa remis:

„Rumpite, quæ retinent felices vincula proras.

„Jamdudum nubes, & sævas perdimus undas.“

Sidera prima poli Phœbo labente sub undas

Exierant, & luna suas jam fecerat umbras:

Quum pariter solvère rates, tortosque (1) rudentes

Laxavere sinus: & flexo navita cornu

Obliquat lævo pede carbasa, summaque pandens

Suppara velorum perituras colligit auras.

Ut primum levior propellere lintea ventus

Incipit, exiguumque tument, mox reddita malo

In mediam cecidere ratem: terraque relicta

Non valet ipsa sequi puppes, quæ vexerat aura.

Æquora lenta jacent: alto torpore ligatæ

Pigrius inmotis hæserè paludibus undæ.

Sic stat iners Scythicas adstringens Bosporos undas

Quum, glacie retinente, fretum non impulit Ister,

Inmensumque gelu tegitur mare: comprimit unda,

Deprendit quascumque rates: nec pervia velis

Æquora frangit eques, fluctuque latente sonantem

Orbita migrantis scindit Mæotida Bessi.

Sæva quies pelagi, mæstoque ignava profundo

Stagna jacentis aquæ: veluti deserta rigente

Æquora natura cessant, pontusque vetustas

Oblitus servare vices, non com meat æstu,

Non horrore tremit, non solis imagine vibrat.

(1) tortosque *vulgo*.



Casibus innumeris fixæ patuere carinæ.

Illinc infestæ classes & inertia tonsis

Æquora moturæ; gravis hinc languore profundi

Obsessis ventura fames. Nova vota timori

Sunt inventa novo, fluctus nimiasque precari

Ventorum vires, dum se torpentibus unda

Excutiat stagnis, & sit mare. Nubila nusquam,

Undarumque minæ: cœlo languente fretoque,

Naufragii spes omnis abit. Sed nocte fugata

Læsum nube dies jubar extulit, imaque sensim

Concussit pelagi, movitque Ceraunia nautis.

Inde rapi cœpere rates, atque æquora classem

Curva sequi, quæ jam vento fluctuque secundo

Lapsa Palæstinas uncis confixit arenas.

Prima duces jūctis vidit consistere castris

Tellus, quam volucer Genusus, quam mollior Apsus

Circumeunt ripis. Apso gestare carinas

Causa palus, leni quam fallens egerit unda.

At Genusum nunc sole nives, nunc imbre solutæ

Præcipitant: neuter longo se gurgite lassat,

Sed minimum terræ, vicino litore, norunt.

Hoc fortuna loco tantæ duo nomina famæ

Composuit: miserique fuit spes irrita mundi,

Posse duces parva cāmpi statione diremtos

Admotum damnare nefas. Nam cernere vultus,

Et voces audire datur: multosque per annos

Dilectus tibi, Magne, socer, post pignora tanta

Sanguinis, infaustam sobolis mortemque nepotum,  
Te nisi Niliaca propius non vidit arena.

Cæsaris adtonitam miscenda ad prælia mentem  
Ferre moras scelerum partes jussere relictae.

Ductor erat cunctis audax Antonius armis,  
Jam tum civili meditatus Leucada bello.

Illum sæpe minis Cæsar, precibusque morantem  
Evocat: „O mundo tantorum caussa laborum (1),

„Quid superos, & fata tenes? sunt cetera cursu  
„Acta meo, summam rapti per prospera belli

„Te poscit Fortuna manum. Num rupta vadosis  
„Syrtibus incerto Libye nos dividit æstu?

„Numquid inexperto tua credimus arma profundo,  
„Inque novos traheris casus? ignave, venire

„Te Cæsar, non ire, jubet. Prior ipse per hostes  
„Percussi medias alieni juris arenas.

„Tu mea castra times? pereuntia tempora fati  
„Conqueror: in ventos impendo vota, fretumque

„Ne retine dubium cupientes ire per æquor:  
„Si bene nota mihi est, ad Cæsaris arma juvenus

„Naufragio venisse volet. Jam voce doloris  
„Utendum est: non ex æquo divisimus orbem.

„Epiron Cæsarque tenet, totusque senatus:  
„Ausoniam tu solus habes.“ His terque, quaterque

Vocibus excitum postquam cessare videbat,

(1) malorum *vulgo*.

Dum se deesse deis, ac non sibi numina, credit,  
 Sponte per incautas audet tentare tenebras,  
 Quod jussi timuere, fretum: temeraria prono  
 Expertus cessisse deo: fluctusque verendos  
 Classibus, exigua sperat superare carina.

Solverat armorum fessas nox languida curas;  
 Parta quies miseris, in quorum pectora somno  
 Dat vires fortuna minor: jam castra silebant.  
 Tertia jam vigilēs commoverat hora secundos,  
 Cæsar sollicito per vasta silentia gressu  
 Vix famulis audenda parat: cunctisque relictis,  
 Sola placet Fortuna comes, Tentoria postquam  
 Egressus, vigilum somno cedentia membra  
 Transsiluit, questus tacite quod fallere posset;  
 Litora curva legit, primisque invenit in undis  
 Rupibus exesis hærentem fune carinam.  
 Rectorem, dominumque ratis secunda tenebat  
 Haud procul inde domus, non ullo robore fulta,  
 Sed sterili junco, cannaque intexta (1) palustri,  
 Et latus inversa (2) nudum munita phaselo.  
 Hæc Cæsar bis terque manu quassantia tectum  
 Limina commovit: molli quum surgit Amyclas,  
 Quem dabat alga toro, Quisnam mea naufragus, inquit,  
 „Tecta petit? aut quem nostræ Fortuna coegit,  
 „Auxilium sperare casæ? Sic fatus, ab alto

(1) *intexta ed. vet. Lovan.*

(2) *inverso scripti septem.*

2222 2222 (1)

Aggere, jam tepidæ sublato fune (1) favillæ,  
 Scintillam tenuem commotos pavit in ignes:  
 Securus belli: prædam civilibus armis  
 Scit non esse casas. O vitæ tuta facultas  
 Pauperis, angustique laris! o munera nondum  
 Intellecta deûm! quibus hoc contingere templis,  
 Aut potuit muris, nullo trepidare tumultu  
 Cæsarea pulsante manu? Tum poste reclusa,  
 Dux ait: „ Exspecta votis majora modestis,  
 „ Spesque tuas laxa, juvenis: si jussa secutus  
 „ Me vehis Hesperiam, non ultra cuncta carinæ  
 „ Debebis, manibusve inopem duxisse senectam.  
 „ Ne cessâ præbere deo tua fata, volenti  
 „ Angustos opibus subitis implere Penates.“  
 Sic fatur: quamquam plebejo tectus amictu,  
 Indocilis privata loqui. Tum pauper Amyclas:  
 „ Multa quidem prohibent nocturno credere ponto,  
 „ Nam sol non rutilas deduxit in æquora nubes,  
 „ Concordesque tulit radios: Noton altera Phœbi,  
 „ Altera pars Borean diducta luce vocabat.  
 „ Orbe quoque exhaustus medio, languensque recessit,  
 „ Spectantes oculos infirmo lumine passus.  
 „ Lunaque non gracili surrexit lucida cornu,  
 „ Aut orbis medii puros exesa recessus:  
 „ Nec duxit recto tenuata cacumina cornu,

(1) fuste MSS. vetustior.

„Ventorumque notam rubuit: tum lurida pallens,  
 „Ora tulit, vultu sub nubem tristis itura.  
 „Sed mihi nec motus nemorum, nec litoris ictus,  
 „Nec placet incertus, qui provocat æquora, Delphin.  
 „Aut siccum quod mergus amat: quodque ausa volare  
 „Ardea sublimis pennæ confisa natanti:  
 „Quodque caput spargens undis, velut occupet imbrem,  
 „Instabili gressu metitur litora cornix.  
 „Sed si magnarum poscunt discrimina rerum,  
 „Haud dubitem præbere manus: vel litora tangam  
 „Jussa, vel hoc potius pelagus, flatusque negabunt.“  
 Hæc fatur, solvensque ratem dat carbasa ventis:  
 Ad quorum motus non solum lapsa per altum  
 Aera dispersos traxere cadentia sulcos  
 Sidera: sed summis etiam quæ fixa tenentur  
 Astra polis, sunt visa quati. Niger inficit horror  
 Terga maris: longo per multa volumina tractu  
 Æstuat unda minax, flatusque incerta futuri:  
 Turbida testantur conceptos æquora ventos.  
 Tunc rector trepidæ fatur ratis: „Adspice sævum  
 „Quanta paret pelagus: Zephyros intendat, an Euros,  
 „Incertum est: puppim dubius ferit undique pontus,  
 „Nubibus, & cœlo Notus est: si murmura ponti  
 „Consulimus, Cori verrent (1) mare. Gurgite tanto,  
 „Nec ratis Hesperias tanget, nec naufragus oras.

(1) verrunt, volvent, veniunt *alii*.

„Desperare viam, & vetitos convertere cursus  
 „Sola salus. Lícet vexata litora puppe  
 „Prendere, ne longe nimium sit proxima tellus.“

Fisus cuncta sibi cessura pericula Cæsar,  
 „Sperne minas, inquit, pelagi, ventoque furenti  
 „Trade sinus. Italiam si cœlo auctore recusas,  
 „Me pete. Sola tibi caussa est, ac justa timoris,  
 „Vectorem non nosse tuum, quem numina numquam  
 „Destituunt, de quo male tunc Fortuna meretur,  
 „Quum post vota venit. Médias perrumpe procellas  
 „Tutela secure mea. Cœli iste fretique,  
 „Non puppis nostræ labor est: hanc Cæsare pressam  
 „A fluctu défendēt onus. Nec longa furori  
 „Ventorum sævo dabitur mora: proderit undis  
 „Ista ratis. Ne flecte manus: fuge proxima velis  
 „Litora: tum Calabro portu te credē potitum,  
 „Quum jam non potērit puppi, nostræque saluti  
 „Altera terra dari. Quid tanta strage paretur  
 „Ignoras? quærit pelagi, cœlique tumultu  
 „Quod præstet Fortuna mihi.“ Non plura locuto  
 Avulsit laceros, percussa puppe, rudentes  
 Turbo rapax, fragilemque super vōlitantia malum  
 Vela tulit: sonuit victis compagibus alnus.  
 Inde ruunt toto concita pericula mundo.  
 Primus ab Oceano caput exeris Atlanteo,  
 Core, movens æstus: jam te tollente furebat  
 Pontus, & iā scopulos totas erexerat iras.

Occurrit gelidus Boreas, pelagusque retundit:  
Et dubium pendet, vento cui concídat (1), æquor.  
Sed Scythici vicit rabies Aquilonis, & undas  
Torsit, & abstrusas penitus vada fecit arenas.  
Nec perfert pontum Boreas ad saxa, suumque  
In fluctus Cori frangit mare: motaque possunt  
Æquora subductis etiam concurrere ventis.  
Non Euri cessasse minas: non imbribus atrum  
Æolii jacuisse Noton sub carcere saxi  
Crediderim: cunctos solita de parte ruentes  
Defendisse suas violento turbine terras,  
Sic pelagus mansisse loco. Nec parva procellis  
Æquora rapta ferunt: Ægeas transit in undas  
Tyrrhenum: sonat Jonio vagus Hadria ponto.  
A, quoties frustra pulsatos æquore montes  
Obruit illa dies! quam celsa cacumina pessum  
Tellus victa dedit! non illo litore surgunt  
Tam validi fluctus, alioque ex orbe voluti  
A magno venère mari, mundumque coercens  
Monstriferos agit unda sinus. Sic rector Olympi  
Cuspide fraterna lassatum in sæcula fulmen  
Adjuvit, regnoque accessit terra secundo,  
Quum mare convolvit gentes, quum litora Tethys  
Noluit ulla pati, cœlo contenta teneri.  
Nunc quoque tanta maris moles crevisset in astra,

(1) pareat *edd. Aldina & Junt.*

Ni superûm rector pressisset nubibus undas.  
Non cœli nox illa fuit: latet obsitus aer  
Infernæ squalore domus, nimbisque gravatus  
Deprimitur, fluctusque in nubibus accipit imbrem.  
Lux etiam metuenda perit, nec fulgura currunt  
Clara, sed obscurum nimbosus dissilit aer.  
Tunc superûm convexa tremunt, atque arduus axis  
Insonuit, motaque poli compage laborant.  
Extimuit natura chaos: rupisse videntur  
Concordes elementa moras, rursusque redire  
Nox manes mixtura deis. Spes una salutis,  
Quod tanta mundi nondum periere ruina.  
Quantum Leucadio placidus de vertice pontus  
Despicitur; tantum nautæ videre trementes  
Fluctibus e summis præceps mare: quumquetumentes  
Rursus hiant undæ, vix eminet æquore malus.  
Nubila tanguntur velis, & terra carina.  
Nam pelagus, qua parte sedet, non celat arenas:  
Exhaustum in cumulos, omnisque in fluctibus unda est.  
Artis opem vicere metus: nescitque magister  
Quam frangat, cui cedat aquæ. Discordia ponti  
Succurrit miseris, fluctusque evertere puppim  
Non valet in fluctus: victum latus unda repellens  
Erigit, atque omni surgit ratis ardua vento.  
Non humilem Sasona vadis, non litora curvæ  
Thessaliæ saxosa pavent, oræque malignos  
Ambraciæ portus: scopulosa Ceraunia nautæ

Sum-



Summa timent. Credit jam digna pericula Cæsar  
 Fatis esse suis. „Tantusne evertere, dixit,  
 „Me superis labor est: parva quem puppe sedentem  
 „Tam magno petiere mari? si gloria leti  
 „Est pelago donata mei, bellisque negamur;  
 „Intrepidus, quaecumque datis mihi numina, mortem  
 „Accipiam. Licet ingentes abruperit actus  
 „Festinata dies fatis; sat magna peregi.  
 „Arctos domui gentes: inimica subegi  
 „Arma metu: vidit Magnum mihi Roma secundum,  
 „Jussa plebe tuli fasces per bella negatos.  
 „Nulla meis aberit titulis Romana potestas,  
 „Nec sciet (1) hoc quisquam, nisi tu, quæ sola meorum  
 „Conscia votorum es, me, quamvis plenus honorum,  
 „Et dictator eam Stygias, & consul ad umbras,  
 „Privatum, Fortuna, mori. Mihi funere nullo  
 „Est opus, o superi: lacerum retinete cadaver  
 „Fluctibus in mediis: desint mihi busta, rogoque,  
 „Dum metuar semper, terraque exspectet ab omni.“  
 Hæc fatum decimus, dictu mirabile, fluctus  
 Invalida cum puppe levat: nec rursus ab alto  
 Aggere dejecit pelagi, sed pertulit unda,  
 Scruposisque angusta vacant ubi litora saxis,  
 Imposuit terræ. Pariter tot regna, tot urbes  
 Fortunamque suam, tacta tellure, recepit.

(1) nesciet MSS. plures.

Sed non tam remeans Cæsar jam luce propinquâ,  
 Quam tacita sua castra fuga, comitesque fefellit.  
 Circumfusa duci flevit, gemituque suorum,  
 Et non ingratis incessit turba querelis.  
 „Quo te dure tulit virtus temeraria Cæsar?  
 „Aut quæ nos viles animas in fata relinquens,  
 „Invitis (1) spargenda dabas tua membra procellis?  
 „Quum tot in hac anima populorum vita, salusque  
 „Pendeat, & tantus caput hoc sibi fecerit orbis,  
 „Sævitia est voluisse mori. Nullusne tuorum  
 „Emeruit comitum, fati non posse superstes  
 „Esse tuis? quum te raperet mare, corpora segnis  
 „Nostra sopor tenuit. Pudet, heu! tibi caussa petendæ  
 „Hæc fuit Hesperiae, visum est quod mittere quemquam  
 „Tam sævo crudele mari. Sors ultima rerum  
 „In dubios casus, & prona pericula mortis  
 „Præcipitare solet. Mundi jam summa tenentem  
 „Permisisse mari! tantum quid numina lassas?  
 „Sufficit ad belli summam favor iste, laborque  
 „Fortunæ, quod te nostris impexit arenis?  
 „Hinc usus placuere deûm, non rector ut orbis,  
 „Nec dominus rerum, sed felix naufragus esses?“  
 Talia jactantes, discussa nocte, serenus  
 Oppressit cum sole dies, fessumque tumentes  
 Composuit pelagus, ventis patientibus, undas.

(1) Invisis MSS. aliquot.

Nec non Hesperii lassatum fluctibus æquor  
Ut videre duces, purumque insurgere cœlo  
Fracturum pelagus Borean, solvere carinas,  
Quas ventus, ductæque pari moderamine dextræ  
Permixtas habuere diu: latumque per æquor,  
Ut terrestre, coit, consertis puppibus, agmen.  
Sed nox sæva modum venti, velique tenorem  
Eripuit nautis, excussitque ordine puppes.  
Strymona sic gelidum, bruma pellente, relinquunt  
Poturæ te, Nile, grues, primoque volatu  
Effingunt varias, casu monstrante, figuras.  
Mox ubi percussit tensas Notus altior alas:  
Confusos temere inmixtæ glomerantur in orbes,  
Et turbata perit dispersis littera pennis.  
Quum primum redeunte die violentior aer  
Puppibus incubuit, Phæbeo concitus ortu,  
Prætereunt frustra tentati litora Lissi,  
Nymphæumque tenent, nudas Aquilonibus undas  
Succedens Boreæ jam portum fecerat Auster.  
Undique collatis in robur Cæsaris armis,  
Summa videns duri Magnus discrimina Martis  
Jam castris instare suis: seponere tutum  
Conjugii decrevit onus, Lesboque remotam  
Te procul a sævi strepitu Cornelia belli  
Occulere. Heu quantum mentes dominatur in æquas  
Justa Venus! dubium, trepidumque in prælia, Magne,  
Te quoque fecit amor: quod nolles stare sub ictu

Fortunæ, quo mundus erat, Romanaque fata,  
Conjux sola fuit. Mentem jam verba parant  
Destituunt, blandæque juvat ventura trahentem  
Indulgere moræ, & tempus subducere fatis.  
Nocte sub extrema, pulso torpore quietis,  
Dum fovet amplexu gravidum Cornelia curis  
Pectus, & aversi petit oscula grata mariti:  
Humentes mirata genas, percussaque cæco  
Vulnere, non audet flentem deprendere Magnum.  
Ille gemens: „Non nunc, vita mihi dulcior, inquit,  
„Quum tædet vitæ, læto sed tempore, conjux,  
„Venit mœstæ dies, & quam minimumque, parumque,  
„Distulimus: jam totus adest in prælia Cæsar.  
„Cedendum est bellis: quorum tibi tuta latobra  
„Lesbos erit, desiste præces tentare: negavi.  
„Jam mihi: non longos a me patiére recessus.  
„Præcipites aderunt casus: properante ruina,  
„Summa cadunt. Satis est audisse pericula Magni.  
„Meque tuus decepit amor, civilia bella  
„Si spectare potes. Nam me jam, Marte parato,  
„Securos cepisse pudet cum conjuge somnos,  
„Eque tuo, miserum quatiunt quum classica mundum,  
„Surrexisset sinu. Vereor civilibus armis  
„Pompejum nullo tristem committere damno.  
„Tutior interea populis, & tutior omni.  
„Rege, late, positamque procul fortuna mariti  
„Non tota te mole premat. Si numina nostras

„Impulerint acies, maneat pars optima Magni;  
 „Sitque mihi, si fata premunt, victorque cruentus,  
 „Quo fugisse velim.“ Vix tantum infirma dolorem  
 Cepit, & adtonito cesserunt pectore sensus.

Tandem vix mœstas potuit proferre querelas:

„Nil mihi de fati thalami, superisque relictum est,  
 „Magne, queri: nostros non rumpit funus amores,  
 „Nec diri fax summa rogi: sed sorte frequenti,  
 „Ptebejaque nimis careo dimissa marito.  
 „Hostis ad adventum rumpamus fœdera tædæ:  
 „Placemus socerum. Sic est tibi cognita, Magne,  
 „Nostra fides? credisne aliquid mihi tutius esse?  
 „Quam tibi? non olim casu pendemus ab uno?  
 „Fulminibus me sæve jubes, tantæque ruinæ  
 „Absentem præstare caput? segura videtur  
 „Sors tibi, quum facias etiam nunc vota, perisse?  
 „Ut nolim servire malis, sed morte parata,  
 „Te sequar ad manes; feriat dum mœsta remotas  
 „Fama procul terras, vivam tibi nempe superstes.  
 „Adde, quod adsuescis fati, tantumque dolorem  
 „Crudelis me ferre doces. Ignosce fatenti:  
 „Posse pati, timeo. Quod si sunt vota, deisque  
 „Audior, eventus rerum (1) sciet ultima conjux.  
 „Sollicitam rupes, jam te victore, tenebunt,  
 „Et puppim, quæ fata feret tam læta, timebo.

(1) eventus vestros MS. belli *Acron.*

„Nec solvent audita metus mihi prospera belli,  
„Quum vacuis projecta locis a Cæsare possim  
„Vel fugiente capi. Notescent litora clari  
„Nominis exsilio, positaque ibi conjuge Magni,  
„Quis Mitylenæas poterit nescire latebras?  
„Hoc precor extremum, si nil tibi victa relinquunt  
„Tutius arma fuga, quum te commiseris undis,  
„Quolibet infaustam potius deflecte carinam:  
„Litoribus quærere meis.“ Sic fata, relictis  
Exsiluit stratis amens, tormenta que nulla  
Vult differre mora. Non mœsti pectora Magni  
Sustinet amplexu dulci, non colla tenere:  
Extremusque perit tam longi fructus amoris:  
Præcipitantque suos luctus (neuterque recedens  
Sustinuit dixisse, vale) vitamque per omnem  
Nulla fuit tam mœsta dies. Nam cetera damna  
Durata jam mente malis, firmaque tulerunt.  
Labitur infelix, manibusque excepta suorum  
Fertur ad æquoreas, ac se prosternit, arenas;  
Litora & ipsa tenet, tandemque illata carinæ est.  
Non sic infelix patriam, portusque reliquit  
Hesperios, sævi premerent quum Cæsaris arma.  
Fida comes Magni vadit duce sola relicto,  
Pompejumque fugit. Quæ nox sibi proxima venit,  
Insomnis. Viduo tum primum frigida lecto,  
Atque insueta quies uni, nudumque marito  
Non hærente latus. Somno quam sæpe gravata

Deceptis vacuum manibus complexa cubile est,  
Atque oblita fugæ quæsiuit nocte maritum!  
Nam, flamma quamvis tacitas (1) urgente medullas,  
Non juvat in toto corpus jactare cubili:  
Servatur pars illa tori. Caruisse timebat  
Pompejo: sed non superi tam læta parabant.  
Instabat, miseræ Magnum quæ redderet hora.

(1) *tectus MS.*





## LIBER SEXTUS.

### ARGUMENTUM.

*Sextus conjunctis hostes prope sistere castris  
 Edocet, & longis septos a Cæsare claustris.  
 Hinc lue, sive fame confectos narrat utrosque.  
 Prælia miscendi pertæsos immemoresque.  
 Hinc Pompejanos septis erumpere nisos,  
 Unius virtute viri in sua terga recisos.  
 Cæsar in angusto fortunam passus amaram,  
 Transit in Emathiam fatis ad bella paratam.  
 Illo Pompejus agitatus turbine mentis,  
 Castra sibi statuit magicæ prope mœnia gentis,  
 Quarum responsis inhians secordia Sexti  
 Infera monstra videns valuit nil prendere certi.*

**P**ostquam castra duces, pugnae jam mente propinqui,  
 Imposuere jugis, admotaque comminus arma,  
 Parque suum videre dei, capere omnia Cæsar  
 Mœnia Grajorum spernit, Martemque secundum  
 Jam nisi de genero fatis debere recusat.



Funestam mundo votis petit omnibus horam,  
 In casum quæ cuncta ferat. Placet alea fati  
 Alterutrum mensura caput. Ter collibus (1) omnes  
 Explicuit turmas, & signa minantia pugnam,  
 Testatus Latiae numquam se deesse ruinæ.  
 Ut videt ad nullos exciri posse tumultus  
 In pugnam generum, clauso sed fidere vallo,  
 Signa movet, testusque via dumosa per arva  
 Durrhachii præceps rapiendas tendit ad arces.  
 Hoc iter æquoreo præcepit limite Magnus,  
 Quemque vocat collem Taulantius incola Petram,  
 Insedit castris, Ephyreaque mœnia servat,  
 Defendens tutam vel solis turribus urbem.  
 Non opus hanc veterum, nec moles structa tuetur,  
 Humanusque labor, facilis, licet ardua tollat,  
 Cedere vel bellis, vel cuncta moventibus annis.  
 Sed munimen habet nullo quassabile ferro,  
 Naturam, sedemque loci. Nam clausa profundo  
 Undique, & illis scopulis revomentibus æquor,  
 Exiguo debet, quod non est insula, colli.  
 Terribiles ratibus sustentant mœnia cautes,  
 Ioniumque furens rabido quum tollitur Austro,  
 Tempora, domusque quatit, spumatque in culmina pontus.  
 Hic avidam belli rapuit spes improba mentem  
 Cæsaris, ut vastis diffusum collibus hostem

(1) tunc collibus MSS. quinque.

Cingeret ignarum, ducto procul aggere valli.  
Metatur terras oculis: nec cespite tantum  
Contentus fragili subitos adtollere muros,  
Ingentes cautes, avulsaque saxa metallis,  
Grajorumque domus, direptaque (1) mœnia transfert.  
Exstruitur, quod non aries impellere sævus,  
Quod non ulla queat violenti machina belli.  
Franguntur montes, planumque per ardua Cæsar:  
Ducit opus: pandit fossas, turritaque summis  
Disponit castella jugis, magnoque recessu  
Amplexus fines, saltus, nemorosaque tesqua,  
Et silvas, vastasque feras indagine claudit.  
Non desunt campi, non desunt pabula Magno,  
Castraque Cæsareo circumdatus aggere mutat.  
Flumina tot cursus illic exorta fatigant,  
Illic mersa suos: operumque ut summa revisat,  
Defessus Cæsar mediis intermanet agris.  
Nunc vetus Iliacos adtollat fabula muros,  
Adscribatque deis: fragili circumdata testa  
Mœnia mirentur refugi Babylonia Parthi.  
En! quantum Tigris, quantum celer ambit Orontes,  
Assyriis quantum populis telluris Eoæ  
Sufficit in regnum, subitum, bellique tumultu  
Raptum clausit opus. Tanti pericere labores.  
Tot potuere manus adjungere Seston Abydo,

(1) dereptaque, diruptaque *alii*.

Ingestoque solo Phryxeum elidere pontum,  
 Aut Pelopis latis Ephyren abrumpere regnis,  
 Et ratibus longæ flexus donare Maleæ,  
 Aut aliquem mundi, quamvis natura negasset,  
 In melius mutare locum. Coit area belli:  
 Hic alitur sanguis terras fluxurus in omnes,  
 Hic & Thessaliæ clades, Libyæque tenentur.  
 Æstuat angusta rabies civilis arena.  
 Prima quidem surgens operum structura fefellit  
 Pompejum: veluti mediæ qui tutus in arvis  
 Sicania rapidum nescit latrare Pelorum:  
 Aut vaga quum Tethys, Rutupinaque litora fervent,  
 Unda Caledonios fallit turbata Britannos.  
 Ut primum vasto septas videt aggerè terras:  
 Ipse quoque a tuta deducens agmina petra  
 Diversis spargit tumulis, ut Cæsaris arma  
 Laxet; & effuso claudentem milite tendat.  
 Ac tantum septi vallo sibi vindicat agri,  
 Parva Mycenæ quantum sacrata Dianæ  
 Distat ab excelsa nemoralis Aricia Roma:  
 Quoquè modo Romæ prælapsus mœnia Thybris  
 In mare descendit (1), si nusquam torqueat amnem.  
 Classica nulla sonant, injussaque tela vagantur:  
 Et fit sæpe nefas, jaculum tentante lacerto.  
 Major cura duces miscendis abstrahit armis.

(1) descendat MSS. tres potiores.

Pompejum exhaustæ præbenda ad gramina terræ,  
 Quæ currens adtrivit eques, gradibusque citatis.  
 Ungula frondentem decussit cornea campum.  
 Belliger adtonsis sonipes diffusus (1) in arvis,  
 Advectos quum plena ferant præsepia culmos,  
 Ore novas poscens moribundus labitur herbas,  
 Et tremulo medios abrumpit poplite gyros.  
 Corpora dum solvit tabes, & digerit artus,  
 Traxit iners cælum fluidæ contagia pestis  
 Obscuram in nubem. Tali spiramine Nesis  
 Erigit elisum (2) nebulosis aera saxis,  
 Antraque letiferi rabiem Typhonis anhelant.  
 Inde labant populi, cœloque paratior unda  
 Omne pati virus duravit viscera cœno.  
 Jam riget atra cutis, distentaque lumina rumpit:  
 Igneaque in vultus, & sacro fervida morbo  
 Pestis abit, fessumque caput se ferre recusat.  
 Jam magis atque magis præceps agit omnia fatum:  
 Nec medii dirimunt morbi vitamque, necemque,  
 Sed languor cum morte venit: turbaque cadentum (3)  
 Aucta lues, dum mixta jacent incondita vivis  
 Corpora. Nam miseros ultra tentoria cives  
 Spargere funus erat. Tamen hos minuére labores  
 A tergo pelagus, pulsusque Aquilonibus aer,

(1) deffesus *vulgo*.

(2) Emittit stygium *vulgo*.

(3) peremta *MSS. duo*.

Litoraue, & plenæ peregrina messe carinæ.

At liber terræ spatiosis collibus hostis  
Aere non pigro, nec inertibus angitur undis:  
Sed patitur sævam, veluti circumdatus arta  
Obsidione, famem. Nondum durantibus (1) altam  
In segetem culmis, cernit miserabile vulgus  
In pecudum cecidisse cibos, & carpere dumos,  
Et morsu spoliare nemus, letumque minantes  
Vellere ab ignotis dubias radicibus herbas.  
Quæ mollire queunt flamma, quæ frangere saxo,  
Quæque per abrasas utero demittere fauces,  
Plurimaque humanis ante hoc incognita mensis  
Diripiens miles, saturum tamen obsidet hostem.

Ut primum libuit ruptis evadere claustris  
Pompejo, cunctasque sibi permittere terras:  
Non obscura petit latebrosæ tempora noctis,  
Et raptum furto, soceri cessantibus armis,  
Dedignatur iter: laxis exire ruinis  
Quærit, & impulsu turres confringere valli,  
Perque omnes gladios, & qua via cæde paranda est.  
Opportuna tamen valli pars visa propinqui,  
Qua Minucii castella vacant, & confraga densis  
Arboribus dumeta tegunt. Huc pulvere nullo  
Proditus agmen agit, subitusque ad mœnia venit.  
Tot simul e campis Latia fulsere volucres:

(1) turgentibus MSS. aliquot.

Tot cecinere tubæ. Ne quid victoria ferro  
 Deberet, pavor adtonitos confecerat hostes.  
 Quod solum valuit virtus, jacuere peremti,  
 Debuerant quo stare loco: qui vulnera ferrent  
 Jam deerant, & nimbus agens tot tela peribat.  
 Tum piceos volvunt inmissæ lampades ignes:  
 Tum quassæ nutant turres, lapsumque minantur:  
 Roboris impacti crebros vomit agger ad ictus.  
 Jam Pompejanæ celsi super ardua valli  
 Exierant Aquilæ: jam mundi jura patebant.  
 Quem non mille simul turmis, nec Cæsare toto  
 Auferret Fortuna locum, victoribus unus.  
 Eripuit, vetuitque capi: seque arma tenente,  
 Ac nondum strato, Magnum vicisse negavit.  
 Scæva viro nomen: castrorum in plebe merebat  
 Ante feras Rhodani gentes: ibi sanguine multo  
 Promotus Latiam longo gerit ordine vitem.  
 Pronus ad omne nefas, & qui nesciret, in armis  
 Quam magnum virtus crimen civilibus esset.  
 Hic ubi quærentes socios jam Marte relicto  
 Tuta fugæ cernit: „Quo vos pavor, inquit, adegit  
 „Impius; & cunctis ignotus Cæsaris armis?  
 „(O famuli turpes, servum pecus, absque cruore)  
 „Terga datis morti? cumulo vos deesse virorum  
 „Non pudet & bustis, interque cadavera quæri?  
 „Non ira saltem juvenes, pietate remota,  
 „Stabitis? e cunctis, per quos erumperet hostis,

„Nos sumus electi. Non parvo sanguine Magno  
 „Ista dies ierit. Peterem felicior umbras  
 „Cæsaris in vultu. Testem hunc Fortuna negavit:  
 „Pompejo laudante, cadam. Confringite tela  
 „Pectoris incursu, jugulisque retundite ferrum.  
 „Jam longinqua petet pulvis, sonitusque ruinæ,  
 „Securasque fragor concussit Cæsaris aures.  
 „Vincimus o socii; veniet, qui vindicet arces,  
 „Dum morimur.“ Movit tantum vox illa furorem,  
 Quantum non primo succendunt classica cornu:  
 Mirantesque virum, atque avidi spectare, sequuntur  
 Scituri juvenes, numero deprensa, locoque  
 An plus quam mortem virtus daret. Ille ruenti  
 Aggere consistit, primumque cadavera plenis  
 Tarribus evolvit, subeuntesque obruit hostes  
 Corporibus: totæque viro dant tela (1) ruinæ:  
 Roboraque, & moles hosti seque ipse minatur.  
 Nunc sude, nunc duro contraria pectora conto  
 Detrudit muris, & valli summa tenentes  
 Amputat ense manus: caput obterit, ossaque saxo,  
 Ac male defensum fragili compage cerebrum  
 Dissipat: alterius flamma crinesque, genasque  
 Succendit, stridunt oculis ardentibus ignes.  
 Ut primum cumulo crescente cadavera murum  
 Admovére (2) solo: non segnior extulit illum

(1) dum tela *Lucretius*.

(2) æquavere *MSS. aliquot*.

Saltus, & in medias jecit super arma catervas,  
Quam per summa rapit celerem venabula pardum.  
Tunc densos inter cuneos compressus, & omni  
Vallatus bello vincit, quem respicit, hostem.  
Jamque hebes, & crasso non asper sanguine mucro  
(Percussum Scævæ frangit, non vulnerat, hostem.)  
Perdidit ensis opus, frangit sine vulnere membra.  
Illum tota premit moles, illum omnia tela:  
Nulla fuit non certa manus, non lancea felix,  
Parque novum Fortuna videt concurrere, bellum,  
Atque virum. Fortis crebris sonat ictibus umbo,  
Et galeæ fragmenta cavæ compressa perurunt  
Tempora: nec quidquam nudis vitalibus obstat  
Jam, præter stantes in summis ossibus hastas.

Quid nunc, vesani, jaculis, levibusque sagittis  
Perditis hæsueros numquam vitalibus ictus?  
Ihunc aut tortilibus vibrata phalarica nervis  
Obruat, aut vasti muralia pondera saxi:  
Hunc aries ferro, ballistaque limine portæ  
Promoveat. Stat non fragilis pro Cæsare murus,  
Pompejumque tenet. Jam pectora non tegit armis,  
Ac veritus credi clipeo, lævaque vacasse,  
Aut culpa vixisse sua, tot vulnera belli  
Solut obit, densamque ferens in pectore silvam,  
Jam gradibus fessis, in quem cadat, eligit hostem.  
(Par pelagi monstris. Libycæ sic bellua terræ.)  
Sic Libycus densis elephas oppressus ab armis

Omne



Omne repercussum squalenti missile tergo  
Frangit, & hærentes mota cute discutit hastas:  
Viscera tuta latent penitus, citraque (1) cruorem  
Confixæ stant tela feræ: tot facta sagittis,  
Tot jaculis, unam non explent vulnera mortem.  
Diſtæa procul ecce manu Gortynis arundo  
Tenditur in Scævam, quæ voto certior omni  
In caput, atque oculi lævum descendit in orbem.  
Ille moras ferri, nervorum & vincula rumpit,  
Adfixam vellens oculo pendente sagittam  
Intrepidus, telumque suo cum lumine calcat.  
Pannonis haud aliter post ictum sævior urſa,  
Quum jaculum parva Libys amentavit habena,  
Se rotat in vulnus: telumque irata receptum  
Impetit, & secum fugientem circumit hastam.  
Perdiderat vultum rabies: stetit imbre cruento  
Informis facies: lætus fragor æthera pulsat  
Victorum: majora viris e sanguine parvo  
Gaudia non faceret conspectum in Cæsare vulnus.  
Ille tegens alta suppressum mente furorem  
Mitis, & a vultu penitus virtute remota,  
„Parcite, ait, cives: procul hinc avertite bellum.  
„Collatura meæ nil jam sunt vulnera morti:  
„Non eget ingestis, sed vulsis pectore telis.  
„Tollite, & in Magni viventem ponite castris:

(1) extraque MSS. aliquot.

„Hoc vestro præstate duci: sit Scæva relicti  
 „Cæsaris exemplum potius, quam mortis honestæ.“  
 Credidit infelix simulatis vocibus Aulus,  
 Nec vidit recto gladium mucrone prementem (1):  
 Membraque captivi pariter laturus, & arma,  
 Fulmineum mediis excepit faucibus ensem.  
 Incaluit virtus: atque una cæde relictus  
 „Solvat, ait, pœnas, Scævam quicumque subactum  
 „Speravit: pacem gladio si quærit ab isto  
 „Magnus, adorato submittat Cæsare signa.  
 „An similem vestri, segnemque ad fata putatis?  
 „Pompeji vobis minor est, caussæque senatus,  
 „Quam mihi mortis amor.“ Simul hæc effatur, & altus  
 Cæsareas pulvis testatur adesse cohortes.  
 Dedecus hic belli Magno, crimenque remisit,  
 Ne solum totæ fugerent te, Scæva, catervæ:  
 Subducto qui Martè ruis: nam sanguine fuso  
 Vires pugna dabat. Labentem turba suorum  
 Excipit, atque humeris defectum imponere gaudet:  
 Ac veluti inclusum perfosso in pectore numen,  
 Et vivam magnæ speciem virtutis adorant:  
 Telaque confixis certant evellere membris,  
 Exornantque deos, ac nudum pectora (2) Martem,  
 Armis, Scæva, tuis. Felix hoc nomine famæ  
 Si tibi durus Iber, aut si tibi terga dedissent

(1) tenentem *vulgo*. trementem *MSS. plures*.

(2) pectore *vulgo*.

Cantaber exiguis, aut longis Teutonus armis.  
Non tu bellorum spoliis ornare Tonantis  
Templa potes, non tu lætis ululare triumphis.  
Infelix, quanta dominum virtute parasti!

Nec magis hac Magnus castrorum parte repulsus  
Intra claustra piger, dilato Marte, quievit,  
Quam mare lassatur, quum se tollentibus Euris  
Frangentem fluctus scopulum ferit, aut latus alti  
Montis adest, seramque sibi parat unda ruinam.  
Hinc vicina petens placido castella profundo  
Incursu gemini Martis rapit: armaque late  
Spargit, & effuso laxat tentoria campo:  
Mutandæque iuvat permissa licentia terræ.  
Sic pleno Padus ore tumens super aggere tutas  
Excurrit (1) ripas, & totos concutit agros:  
Succubuit si qua tellus, cumulumque furentem  
Undarum non passa, ruit: tunc flumine toto  
Transit, & ignotos aperit sibi gurgite campos.  
Illos terra fugit dominos: his rura colonis  
Accedunt, donante Pado. Vix prælia Cæsar  
Senserat, elatus specula quæ prodidit ignis.  
Invenit impulsos presso jam pulvere muros:  
Frigidaque ut veteris deprendit signa ruinæ;  
Accendit pax ipsa loci, movitque furorem  
Pompejana quies, &, victo Cæsare, somnus.

(1) extendit MSS. pervett.

Ire vel in clades properat, dum gaudia turbet.  
Torquato ruit inde minax: qui Cæsaris arma  
Segnius haud vidit, quam malo nauta tremente  
Omnia Circeæ subducit vela procellæ:  
Agminaque interius muro breviorē recepit,  
Deusius ut parva disponderet arma corona.  
Transierat primi Cæsar munimina valli,  
Quum super e totis inmisit collibus agmen,  
Effuditque acies obseptum Magnus in hostem.  
Non sic Ætnæis habitans in vallibus horret  
Enceladum, spirante Noto, quum tota cavernas  
Egerit, & torrens in campos defluit Ætna:  
Cæsaris ut miles glomerato pulvere victus  
Ante aciem, cæci trepidus sub nube timoris  
Hostibus occurrit fugiens, inque ipsa pavendo  
Fata ruit. Totus mitti civilibus armis  
Usque vel in pacem potuit cruor: ipse furentes  
Dux tenuit gladios. Felix ac libera, legum  
Roma fores, jurisque tui, vicisset in illo  
Si tibi Sulla loco. Dolet heu, semperque dolebit,  
Quod scelerum, Cæsar, prodest tibi summa tuorum  
Cum genere pugnasse pio. Pro, tristia fata!  
Non Uticæ Libye clades, Hispania Mundæ  
Flesset, & infando pollutus sanguine Nilus  
Nobilius Phario gestasset rege cadaver:  
Nec Juba Marmaricas nudus pressisset arenas,  
Pœnorumque umbras placasset sanguine fuso;

Scipio: nec sancto caruisset vita Catone.

Ultimus esse dies potuit tibi, Roma, malorum:

Exire (1) e mediis potuit Pharsalia fatis.

Deserit adverso possessam numine sedem  
Cæsar, & Emathias lacero petit agmine terras:  
Arma secuturum socii, quacumque fugasset,  
Tentavere suo comites devertere Magnum  
Hortatu: patrias sedes, atque hoste carentem  
Ausoniam peteret. „Numquam me Cæsar, inquit,  
„Exemplo reddam patriæ, numquamque videbit  
„Me nisi dimisso redeuntem milite Roma.  
„Hesperien potui, motu surgente, tenere,  
„Si vellem patriis aciem committere templis,  
„Ac medio pugnare foro. Dum bella relegem,  
„Extremum Scythici transcendam frigoris orbem, (2)  
„Ardentesque plagas. Victor tibi, Roma, quietem  
„Eripiam, qui, ne premerent te prælia, fugi?  
„A potius, bello ne quid patiaris in isto,  
„Te Cæsar putet esse suam.“ Sic fatus, in ortus  
Phœbeos convertit (3) iter, terræque secutus  
Devia; qua vastos aperit Candavia saltus,  
Contigit Emathiam, bello quam fata parabant,  
Thessaliam, qua parte diem brumalibus horis  
Adtollit Titan, rupes Ossæa coercet.

(1) exciri *MSS. quidam.*

(2) axem *Eutychee.*

(3) conduxit *MSS. quidam optimi.*

Quum per summa poli Phœbum trahit altior æstas,  
 Pelion opponit radiis nascentibus umbras.  
 At medios ignes cœli, rapidique Leonis  
 Solstitiale caput nemorosus submovet Othrys.  
 Excipit aversos Zephyros & Japyga Pindus,  
 Et maturato præcidit vespere lucem.  
 Nec metuens imi Borean habitator Olympi  
 Lucentem totis ignorat noctibus Arcton.  
 Hos inter montes media qui valle premuntur,  
 Perpetuis quondam latuere paludibus agri:  
 Flumina dum retinent campi, nec pervia Tempe  
 Dant aditus pelagi: stagnumque implentibus unum.  
 Crescere cursus erat. Postquam discessit Olympo  
 Herculeæ gravis Ossa manu, subitæque ruinam  
 Sensit aquæ Nereus: melius mansura sub undis,  
 Emathis æquorei regnum Pharsalos Achillis  
 Eminent, &, prima Rhœteja litora pinu  
 Quæ tetigit, Phylacæ, Pteleonque, & Dotion ira  
 Flebile Pieridum; Trachin, pretioque nefandæ  
 Lampados Herculeis fortis Melibæa pharetris:  
 Atque olim Larissa potens: ubi nobile quondam  
 Nunc super Argos arant: veteres ubi fabula Thebas  
 Monstrat Echionias: ubi quondam Pentheos exsul  
 Colla, caputque ferens (1) supremo tradidit igni,  
 Questa, quod hoc solum nato rapuisset Agave.

(1) parens MSS. septem.

Ergo abrupta palus multos discessit in amnes.  
Purus in occasus, parvi sed gurgitis, Æas  
Jonio fluit inde mari: nec fortior undis  
Labitur avectæ pater Isidis, & tuus, Æneu,  
Pene gener crassis oblimat Echinadas undis:  
Et Meleagream maculatus sanguine Nessi  
Evenos Calydonæ secatur. Ferit amne citato  
Maliacas Spercheos aquas: & flumine puro  
Irrigat Amphrysos famulantis pascua Phœbi.  
Quique nec humentes nebulas, nec rore madentem  
Aera, nec tenues ventos suspirat Anauros.  
Et quisquis pelago per se non cognitus amnis  
Peneo donavit aquas. It gurgite raptò  
Apidanos: numquamque celer, nisi mixtus, Enipeus,  
Accipit Asopos cursus, Phœnixque, Melasque.  
Solutus in alterius nomen quum venerit undæ,  
Defendit Titaresos aquas, lapsusque superne  
Gurgite Penei pro siccis utitur arvis.  
Hunc fama est Stygius manare paludibus amnem,  
Et capitis memorem, fluvii contagia vilis  
Nolle pati, superumque sibi servare timorem.  
Ut primum emissis patuerunt amnibus arva,  
Pinguis Bœbicio discessit vomere sulcus:  
Mox Lelegum dextra pressum descendit aratrum.  
Æolidæ, Dolopesque solum rupere coloni,  
Et Magnetes equis, Minyæ gens cognita remis,  
Illic semiferos Ixionidas Centauros

Fæta Pelethroniis nubes effudit in antris.  
 Aspera te Pholoes frangentem, Monyche, saxa,  
 Teque sub Ætæo torquentem vertice vulsas.  
 Rhæte ferox, quas vix Boreas everteret, ornos:  
 Hospes & Alcidae magni Phole: teque per amnem  
 Improbe Lernæas vector passure sagittas:  
 Teque senex Chiron, gelido qui sidere fulgens  
 Impetis Æmonio majorem Scorpion arcu.  
 Hac tellure feri micuerunt semina Martis.  
 Primus ab æquorea percussis cuspide saxis  
 Thessalicus sonipes bellis feralibus omen  
 Exsiluit; primus chalybem, frenosque momordit,  
 Spumavitque novis Lapithæ domitoris habenis.  
 Prima fretum scindens Pagasæo litore pinus  
 Terrenum ignotas hominem projecit in undas.  
 Primus Thessalicæ rector telluris Itonos  
 In formam calidæ percussit pondera massæ,  
 Fudit & argentum flammis, aurumque moneta  
 Fregit, & inmensis coxit fornacibus æra.  
 Illic, quod populos scelerata impegit in arma,  
 Divitias numerare datum est. Hinc maxima serpens  
 Descendit Python, Cyrrhæaque fluxit in arva:  
 Unde & Thessalicæ veniunt ad Pythia laurus.  
 Impius hinc prolem superis inmisit Alceus,  
 Inseruit celsis prope se quum Pelion astris,  
 Sideribusque vias incumbens (1) abstulit Ossa.

(1) *neutrens MSS. permulti.*



Hac ubi damnata fati tellure locarunt  
 Castra duces; cunctos belli præsaga futuri  
 Mens agitat, summique gravem discriminis horam  
 Adventare palam est, propius jam fata moveri  
 Degeneres trepidant animi, pejoraque versant.  
 Ad dubios pauci, præsunto robore, casus  
 Spemque metumque ferunt. Turbæ sed mixtus inertis  
 Sextus erat, Magno proles indigna parente,  
 Qui mox Scyllæis exsul grassatus in undis,  
 Polluit æquoreos Siculo pirata triumphos.  
 Qui stimulante metu fati prænoscere cursus,  
 Impatiensque moræ, venturisque omnibus æger;  
 Non tripodas Deli, non Pythia consulit antra,  
 Nec quæsisse libet, primis quid frugibus altrix  
 Ære Jovis Dodona sonet, quis noscere fibra  
 Fata queat, quis prodat aves, quis fulgura cœli  
 Servet, & Assyria scrutetur sidera cura,  
 Aut si quid tacitum, sed fas, erat. Ille supernis  
 Detestanda deis sævorum arcana magorum  
 Noverat (1), & tristes sacris feralibus aras,  
 Umbrarum, Ditisque fidem: miseroque liquebat,  
 Scire parum superos. Vanum, sævumque furorem  
 Adjuvat ipse locus, vicinaque mœnia castris  
 Hæmonidum, ficti quas nulla licentia monstri  
 Transierit; quarum, quidquid non creditur, ars est.

(1) moverat *unlgo*.

Thessala quin etiam tellus herbasque nocentes  
Rupibus ingenuit, sensuraque saxa canentes  
Arcanum ferele Magos. Ibi plurima surgunt  
Vim factura deis. Et terris hospita Colchis  
Legit in Hæmoniis, quas non advexerat herbas.  
Impia tot populis, tot surdas gentibus aures  
Cœlicolum diræ convertunt carmina gentis.  
Una per æthereos exit vox illa recessus,  
Verbaque ad invitum perfert cogentia numen,  
Quod non cura poli, cœlique volubilis umquam  
Advocat. Infandum tetigit quum sidera murmur,  
Tum Babylon Persea licet, secretaque Memphis  
Omne vetustorum solvat penetrale Magorum:  
Abducit superos alienis Thessalis aris.

Carmine Thessalidum dura in præcordia fluxit  
Non fatis addictus amor: flammisque severi  
Illicitis arsere senes. Nec noxia tantum  
Pocula proficiunt: aut quum turgentia succo  
Frontis amaturæ subducunt pignora fetæ.  
Mens hausti nulla sanie polluta veneni  
Excantata perit. Quos non concordia mixti  
Adligat ulla tori, blandæque potentia formæ,  
Traxerunt torti magica vertigine fili.  
Cessavere vices rerum: dilataque longa  
Hæsit nocte dies: legi non paruit æther.  
Torpuit & præceps audito carmine mundus:  
Axibus & rapidis impulsos Juppiter urgens

Miratur non ire polos. Nunc omnia complent  
Imbribus, & calido præducunt nubila Phœbo:  
Et tonat ignaro cœlum Jove. Vocibus Isdem  
Humentes late nebulas, nimbosque solutis  
Excussere comis. Ventis cessantibus, æquor  
Intumuit: rursus vetitum sentire procellas  
Conticuit, turbante Noto: puppimque ferentes  
In ventum tumere sinus. De rupe pependit  
Abscissa fixus torrens: amnisque cucurrit  
Non qua pronus erat. Nilum non extulit æstas:  
Mæander direxit aquas: Rhodanumque morantem  
Præcipitavit Arar: submisso vertice montes.  
Explicuere jugum. Nubes suspexit Olympus.  
Solibus & nullis Scythiæ, quum bruma rigeret,  
Dimadueri nives. Impulsam sidere Tethyn  
Repulit Hæmonium, defenso litore, carmen.  
Terra quoque inmoti concussit ponderis axes,  
Et medium vergens titubavit nisus in orbem.  
Tantæ molis onus percussus voce recessit,  
Prospæctumque dedit circumlabentis Olympi.  
Omne potens animal leti, genitumque nocere,  
Et pavet Hæmonias, & mortibus instruit artes.  
Has avidæ tigres, & nobilis ira leonum  
Ore foveant blando: gelidos his explicat orbes,  
Inque pratinoso coluber distenditur arvo.  
Viperei coeunt, abrupto corpore, nodi:  
Humanoque cadit serpens adflata veneno.

Quis labor hic superis, cantus herbasque sequendi,  
 Spernendique timor! cujus commercia pacti  
 Obstrictos habuere deos? parere necesse est,  
 An juvat? ignota tantum pietate merentur,  
 An tacitis potuerim? hoc juris in omnes  
 Est illis superos, an habent hæc carmina certum  
 Imperiosa deum, qui mundum cogere, quidquid  
 Cogitur ipse, potest? illic & sidera primum  
 Præcipiti deducta polo: Phœbeque serena  
 Non aliter, diris verborum obsessa venenis,  
 Palluit, & nigris, terrenisque ignibus arsit,  
 Quam si fraterna prohiberet imagine tellus,  
 Insereretque suas flammis cœlestibus umbras.  
 Et patitur tantos cantu deprensa (1) labores  
 Donec subpositas propior despumet in herbas.

Hos scelerum ritus, hæc diræ carmina gentis  
 Effera damnarat nimix pietatis Erichtho,  
 Inque novos ritus pollutam duxerat artem.  
 Illi namque nefas urbis submittere tecto  
 Aut laribus fœdæ caput: desertaque busta  
 Incolit, & tumulos expulsis obtinet umbris,  
 Grata deis erebi. Cœtus audire silentum,  
 Nosse domos Stygias, arcanaque Ditis operti  
 Non superi, non vita vetat. Tenet ora profanæ  
 Fœda situ macies, cœloque ignota sereno

(1) depressa vulg. & MSS. multi.

Terribilis Stygio facies pallore gravatur,  
Impexis onerata comis. Si nimbus, & atræ  
Sidera subducunt nubes, tunc Thessala nudis  
Egreditur bustis, nocturnaue flamina captat.  
Semina fœcundæ segetis calcata perussit,  
Et non letiferas spirando perdidit auras.  
Nec superos orat, nec cantu supplice numen  
Auxiliare vocat, nec fibras illa litantes  
Novit: funereas aris imponere flammæ  
Gaudet, & accenso rapuit quæ tura sepulcro.  
Omne nefas superi prima jam voce precantis  
Concedunt, carmenque timent audire secundum.  
Viventes animas, & adhuc sua membra regentes,  
Infodit busto: fatis debentibus annos  
Mors invita subit: perversa funera pompa  
Rettulit a tumulis: fugere cadavera lectum.  
Fumantes juvenum cineres, ardentiaque ossa  
E mediis rapit illa rogis, ipsamque, parentes  
Quam tenere, facem: nigroque undantia fumo  
Feralis fragmenta tori, vestesque fluentes  
Colligit in cineres, & olentes membra favillas.  
Ast ubi servantur saxis, quibus intimus humor  
Ducitur, & tracta durescunt tæbe medullæ  
Corpora; tunc omnes avide desævit in artus,  
Inmersitque manus oculis, gaudetque gelatos  
Effodisse orbes, & siccæ pallida rodit  
Excrementa manus: laqueum, nodosque nocentes

Ore suo rupit: pendentia corpora carpsit,  
 Abrasitque cruces: percussaque viscera nimbis  
 Vulsit, & incoctas admisso sole medullas.  
 Insertum manibus chalybem, nigramque per artus  
 Stillantis tibi saniem, virusque coactum  
 Sustulit, & nervo morsus retinente pendit.  
 Et quocumque jacet nuda tellure cadaver,  
 Ante feras, volucresque sedet: nec carperemembra  
 Vult ferro manibusque suis, morsusque luperum  
 Exspectat, siccis raptura e faucibus artus.  
 (Nec cessant a cæde manus, si sanguine vivo  
 Est opus, erumpat jugulo qui primus aperto.)  
 Nec refugit cædes, vivum si sacra cruorem,  
 Extaque funereæ poscunt trepidantia mensæ:  
 Vulnere sic ventris (1), non, qua natura vocabat,  
 Extrahitur partus, calidis ponendus in aris.  
 Et quoties sævis opus est, ac fortibus umbris,  
 Ipsa facit manes: hominum mors omnis in usu est.  
 Illa genæ florem primævo corpore vulsit,  
 Illa comam læva morienti abscidit ephebo.  
 Sæpe etiam caris cognato in funere dira  
 Thessalis incubuit membris: atque oscula figens,  
 Truncavitque caput, compressaque dentibus ora  
 Laxavit: siccoque hærentem gutture linguam  
 Præmordens, gelidis infudit murmura labris;

(1) si ventris MSS. & edd. vet.

Arcanumque nefas Stygias mandavit ad umbras.  
Hanc ut fama loci Pompejo prodidit: alta  
Nocte poli, Titan medium quo tempore ducit  
Sub nostra tellure diem: deserta per arva  
Carpit iter. Fidi scelerum, suetique ministri  
Effraetos circum tumulos, ac busta vagati  
Conspexere procul prærupta in caute sedentem,  
Qua juga devexus Pharsalia porrigit Æmus.  
Illa Magis, magicisque deis incognita verba  
Tentabat, carmenque novos fingebat in usus.  
Namque timens, ne Mars alium vagus iret in orbem,  
Emathis & tellus tam multa cæde careret;  
Pollutos cantu, dirisque venefica succis  
Conspersos, vetuit transmittere bella Philippos,  
Tot mortes habitura suas, usuraque mundi  
Sanguine: cæsorum truncare cadavera regum  
Sperat; & Hesperiae cineres avertere (1) gentis,  
Ossaque nobilium, tantosque adquirere manes.  
Hic ardor, solusque labor, quid corpore Magni  
Procedo rapiat, quos Cæsaris involet artus.  
Quam prior adfatur Pompeji ignava propago.  
„O decus Hæmonidum, populis quæ pandere fata,  
„Quæque suo ventura potes devertere cursu,  
„Te precor, ut certum liceat mihi noscere finem,  
„Quem belli fortuna parat. Non ultima turbæ

(1) averrere, avellere, advertere *taris*.

„Pars ego Romanæ, Magni clarissima proles,  
 „Vel dominus rerum, vel tanti funeris heres.  
 „Mens dubiis percussa labat, rursusque parata est  
 „Certos ferre metus. Hoc casibus eripe juris,  
 „Ne subiti, cæcique ruant: vel numina torque,  
 „Vel tu parce deis, & manibus exprime verum.  
 „Elysias resera sedes, ipsamque vocatam,  
 „Quos petat e nobis, Mortem mihi coge fateri.  
 „Non humilis labor est: dignum, quod quærere cures,  
 „Vel tibi, quo tanti præponderet alea fati.“

Impia vulgatæ lætatur nomine famæ  
 Thessalis, & contra: „Si fata minora moveres,  
 „Pronumerat, o juvenis, quos velles, inquit, in actus,  
 „Invitos præbere (1) deos. Conceditur arti,  
 „Unam quum radiis presserunt sidera mortem,  
 „Inseruisse moras (2): &, quamvis fecerit omnis  
 „Stella senem, medios herbis abrumpimus annos.  
 „At simul a prima descendit origine mundi  
 „Causarum series, atque omnia fata laborant  
 „Si quidquam mutare velis, unoque sub ictu  
 „Stat mortale genus: tunc, Thessala turba fatemur;  
 „Plus fortuna potest. Sed si prænoscere casus  
 „Contentus, facilesque aditus, multique patebunt  
 „Ad verum: tellus nobis, ætherque, chaosque,  
 „Æquoraque, & campi, Rhodopeaque saxa loquentur,  
 „Sed

{1} invictos parere MS.

{2} manus MS.



„Sed pronum, quum tanta novæ sit copia mortis,  
„Emathiis unum campis adtollere corpus,  
„Ut modo defuncti, tepidique cadaveris ora  
„Plena voce sonent: nec, membris sole perustis,  
„Auribus incertum feralis strideat umbra.“  
Dixerat: & noctis geminatis arte tenebris,  
Mæstum tecta caput squalenti nube, pererrat  
Corpora cæsorum, tumulis projecta negatis.  
Continuo fugère lupi, fugère revulsis  
Unguibus impastæ volucres, dum Thessala vatem  
Eligit, & gelidas leto scrutata medullas  
Pulmonis rigidi stantes sine vulnere fibras  
Invenit, & vocem defuncto in corpore quærit.  
Fata peremtorum pendent jam multa virorum,  
Quem superis revocasse velit. Si tollere totas  
Tentasset campis acies, & reddere bello,  
Cessissent leges erebi: monstroque potenti  
Extractus Stygio populus pugnasset Averno.  
Electum tandem trajecto gutture corpus  
Ducit, & inserto laqueis feralibus unco,  
Per scopulos miserum trahitur, per saxa cadaver  
Victurum: montisque cavi, quem tristis Erichtho  
Damnarat sacris, alta sub rûpe locatur.

Haud procul a Ditis cæcis depressa cavernis  
In præceps subsedet humus: quam pallida pronis  
Urguet silva comis, & nullo vertice cælum  
Suspiciens, Phœbo non pervia taxus opacat.

Marcentes intus tenebræ, squalensque sub antris  
 Longa nocte situs; numquam, nisi carmine factum,  
 Lumen habet. Non Tænareis sic faucibus aer  
 Sedit iners, mæstum mundi confine latentis,  
 Ac nostri: quo non metuant emittere manes  
 Tartarei reges. Nam quamvis Thessala vates  
 Vim faciat fatis, dubium est, quod traxerit illuc  
 Adspiciat Stygias, an quod descenderit, umbras.  
 Discolor, & vario furialis cultus amictu  
 Induitur, vultusque aperitur, crine remoto,  
 Et coma vipereis substringitur horrida sertis.  
 Ut pavidos juvenis comites, ipsumque trementem  
 Conspicit, exanimi defixum lumina vultu:  
 „Ponite, ait, trepida conceptos mente timores:  
 „Jam nova, jam vera reddetur vita figura.  
 „Ut quamvis pavidi possint audire loquentem.  
 „Si vero Stygiosque lacus, ripamque sonantem  
 „Ignibus ostendam, si me præsentem videri  
 „Eumenides possent villosaque colla colubris  
 „Cerberos excutiens, & vincti terga Gigantes;  
 „Quis timor ignavi metuentes cernere manes?“  
 Peçora tunc primum ferventi sanguine supplet  
 Vulneribus laxata novis: taboque medullas  
 Abluit: & virus large lunare ministrat.  
 Huc quidquid fetu genuit natura sinistro  
 Miscetur. Non spuma canum, quibus unda timori est,  
 Viscera non lyncis, non diræ nodus hyænx

Defuit, & cervi pasti serpente medullæ:  
Non puppim retinens, Euro tendente rudentes,  
In mediis echeneis aquis, oculique draconum,  
Quæque sonant feta tepefacta sub alite saxa:  
Non Arabum volucer serpens, innataque rubris  
Æquoribus custos pretiosæ vipera conchæ:  
Aut viventis adhuc Libyci membrana cerastæ,  
Aut cinis Eoa positi Phœnicis in ara.  
Quo postquam viles, nec habentes nomina pestes  
Contulit: infando saturatas carnine frondes,  
Et, quibus os dirum nascentibus inspuat herbis,  
Addidit, & quidquid mundo dedit ipsa veneni:  
Tunc vox Lethæos cunctis pollentior herbis  
Excantare deos, confundit murmura primum  
Dissona, & humanæ multum discordia linguæ.  
Latratus habet illa canum, gemitumque luporum:  
Quod trepidus bubo, quod strix nocturna queruntur,  
Quod stridunt ululantque feræ, quod sibilat anguis.  
Exprimit & planctus illisæ cautibus undæ;  
Sylvarumque sonum, fractæque tonitrua nubis.  
Tot rerum vox unâ fuit. Mox cetera cantu  
Explicat Hæmonio, penetratque in Tartara lingua.  
„Eumenides, Stygiumque nefas, Pœnæque nocentum:  
„Et Chaos innumeros avidum consumere mundos:  
„Et rector terræ, quem longa in sæcula torquet  
„Mors dilata deum: Styx, & quos nulla meretur  
„Thessalis Elysios: cælum, matremque perosa

„Persephone, nostræque Hecates pars ultima, per quam  
 „Manibus & mihi sunt tacitæ commercia linguæ:  
 „Janitor & sedis laxæ, qui viscera sævo  
 „Spargis nostra cani: repetitaque fila sorores  
 „Traçturæ: tuque o flagrantis portitor undæ  
 „Jam lassate senex ad me redeuntibus umbris:  
 „Exaudite preces, si vos satis ore nefando,  
 „Pollutoque voco, si numquam hæc carmina fibris  
 „Humanis jejuna cano, si pectora plena  
 „Sæpe dædi, & lavi calido profecta cerebro:  
 „Si quis, qui vestris caput, extaque lancibus infans  
 „Imposuit, victurus erat, parete precanti.  
 „Non in Tartareo latitantem poscimus antro,  
 „Adsuetamque diu tenebris, modo luce fugata  
 „Descendentem animam: primo pallentis hiatu  
 „Hæret adhuc Orci. Licet has exaudiat herbas  
 „Ad manes ventura semel. Ducis omina nato  
 „Pompejana canat nostri modo militis umbra,  
 „Si bene de vobis civilia bella merentur.“

Hæc ubi fata caput, spumantiaque ora levavit,  
 Adspicit adstantem projecti corporis umbram,  
 Exanimos artus, invisaque claustra timentem  
 Carceris antiqui. Pavet ire in pectus apertum,  
 Visceraque, & ruptas letali vulnere fibras.  
 A, miser! extremum cui mortis munus inique  
 Eripitur, non posse mori. Miratur Erichtho  
 Has fatis licuisse moras, irataque morti

Verberat inmotum vivo serpente cadaver:  
Perque cavas terræ, quas egit carmine, rimas  
Manibus illatrat, regnique silentia rumpit:  
„Tisiphone, vocisque meæ secura Megæra,  
„Non agitis sævis erebi per inane flagellis  
„Infelicem animam? jam vos ego nomine vero  
„Eliciam, Stygiasque canes in luce superna  
„Destituam: per busta sequar, per funera, cunctis  
„Expellam tumulis, abigam vos omnibus urnis.  
„Teque deis, ad quos alio procedere vultu  
„Ficta soles, Hecate, pallenti tabida forma,  
„Ostendam, faciemque Erebi mutare vetabo.  
„Eloquar inmenso terræ sub pondere quæ te  
„Contineant, Hennæa, dapes, quo fœdere mœstum  
„Regem noctis ames, quæ te contagia passam  
„Noluerit revocare parens. (1) Tibi, pessime mundi  
„Arbiter, inmittam ruptis Titana cavernis,  
„Et subita feriere die. Paretis? an ille  
„Compellendus erit, quo numquam terra vocato  
„Non concussa tremit, qui Gorgona cernit apertam,  
„Verberibusque suis trepidam castigat Erinnya,  
„Indespecta tenet vobis qui Tartara; cujus  
„Vos estis superi; Stygias qui pejerat undas? “  
Protinus adstrictus caluit cruor, atraque fovit  
Vulnera, & in venas extremaque membra cucurrit.

(1) *Ceres vulgo.*

Percussæ gelido trepidant sub pectore fibræ:  
Et nova desuætis subrepens vita medullis,  
Miscetur morti. Tunc omnis palpitât artus:  
Tenduntur nervi: nec se tellure cadaver  
Paullatim per membra levât, terraque repulsum est,  
Erectumque semel. Distento lumina rictu  
Nudantur. Nondum facies viventis in illo,  
Jam morientis erat. Remanent pallorque rigorque;  
Et stupet illatus mundo. Sed murmure nullo  
Ora adstricta sonant. Vox illi, linguaque tantum  
Responsura datur., Dic, inquit Thessala, magna,  
„Quod jubeo, mercede mihi: nam vera locutum  
„Inmunem toto mundi præstabimus ævo  
„Artibus Hæmoniis: tali tua membra sepulcro,  
„Talibus exuram Stygio cum carmine silvis,  
„Ut nullos cantata Magos exaudiat umbra.  
„Sit tanti vixisse iterum: nec verba, nec herbæ  
„Audebunt longæ somnum tibi rumpere Lethes,  
„A me morte data. Tripodas, vatesque deorum  
„Sors obscura decet, certus discedat, ab umbris  
„Quisquis vera petit, duræque oracula mortis  
„Fortis adit. Ne parce, precor. Da nomina rebus,  
„Da loca, da vocem qua mecum fata loquantur.“  
Addidit & carmen, quo, quidquid consulit, umbram  
Scire dedit. Mœstum, fletu manante, cadaver:  
„Tristia non equidem Parcarum stamina, dixit,  
„Adspexi, tacitæ revocatus ab aggere ripæ:

„Quod tamen e cunctis mihi noscere contigit umbris,  
„Effera Romanos agitat discordia manes,  
„Impiaque infernam rapuerunt arma quietem.  
„Elysias alii sedes, ac Tartara mæsta  
„Diversi liquere duces: quid fata pararent,  
„Hi fecere palam. Tristis felicibus umbris  
„Vultus erat. Decios vidi, natumque, patremque,  
„Lustrales bellis animas, flentemque Camillum,  
„Et Curios; Sullam de te, Fortuna, querentem.  
„Deplorat Libycis perituram Scipio terris  
„Infaustam sobolem. Major Carthaginis hostis,  
„Non servituri mæret Cato fata nepotis.  
„Solum te consul depulsis prime tyrannis  
„Brute pias inter gaudentem vidimus umbras.  
„Abruptis Catilina minax, spretisque catenis  
„Exsultat, Mariique truces, nudique Cethegi.  
„Vidi ego lætantes popularia nomina Drusus;  
„Legibus inmodicos, ausosque ingentia Gracchos.  
„Æternis chalybum nodis, & carcere Ditis  
„Constrictas plausere manus, camposque piorum  
„Poscit turba nocens. Regni possessor inertis  
„Pallentes aperit sedes, abruptaque saxa  
„Asperat, & durum vinclis adamanta, paratque,  
„Pœnam victori. Refer hæc solatia tecum,  
„O juvenis, placido manes patremque, domumque  
„Exspectare sinu, regnique in parte serena  
„Pompejis servare locum. Nec gloria parvæ

„Sollicitet vitæ: veniet, quæ misceat omnes  
 „Hora duces. Properate mori, magnoque superbi  
 „Quamvis e parvis animo discedite bustis,  
 „Et Romanorum manes calcate deorum.  
 „Quem tumulum Nili, quem Thybridis aduat (1) unda,  
 „Quæritur, & ducibus tantum de funere pugna est.  
 „Tu fatum ne quære tuum cognoscere: Parcæ,  
 „Me reticente, dabunt: tibi certior omnia vates  
 „Ipse canet Siculis genitor Pompejus in oris:  
 „Ille quoque incertus, quo te vocet, unde repellat,  
 „Quas jubeat vitare plagas, quæ sidera mundi.  
 „Europam miseri, Libyenque, Asiamque timete:  
 „Distribuet tumulos vestris Fortuna triumphis.  
 „O miseranda domus, toto nil orbe videbis  
 „Tutius Emathia.“ Sic postquam fata peregit;  
 Stat vultu mæstus tacito, mortemque reposcit.  
 Carminibus magicis opus est, herbisque, cadaver  
 Ut cadat, & nequeunt animam sibi reddere fata,  
 Consumto jam jure semel. Tum robore multo  
 Extruit illa rogam: venit defunctus ad ignes:  
 Accensa juvenem positum strue liquit Erichtho,  
 Tandem passa mori: Sextoque ad castra parentis  
 It comes: & cœlo lucis ducente colorem,  
 Dum ferrent tutos intra tentoria gressus,  
 Jussa tenere diem densas nox præstitit umbras.

(1) abluat *vulgo*.





## LIBER SEPTIMUS.

### ARGUMENTUM.

*Septimus exponit fallentia somnia Magnum,  
Romani theatri falso sibi dantia plausum.  
Inde gemit totas deposcere bella cohortes,  
In propriasque rapti fataliter agmina mortes.  
Ac dum permissis celerant in prælia frenis  
Visa super trepidos totis miracula habenis.  
Dispositas acies, ignaro Cesare, campis,  
Hunc quoque calcatis sua mox rapere agmina castris.  
Inde geri bellum miserabile luctificumque  
Unde premit Romam regnum, fuga, servitiumque.  
Aufugit hinc Magnus dum sanguine cuncta natare  
Cernit, & in populis Romam patribusque perire.*

**S**egnior Oceano, quam lex æterna vocabat,  
Luctificus Titan numquam magis æthera contra  
Egit equos, currumque (1), polo rapiente, retorsit:

(1) cursumque multi scripti.

Defectusque pati voluit, raptæque labores  
Lucis: & adtraxit nubes, non pabula flammis,  
Sed ne Thessalio purus luceret in orbe.

At nox felicitis Magno pars ultima vitæ  
Sollicitos vana decepit imagine somnos.  
Nam Pompejani visus sibi sede theatri  
Innumeram effigiem Romanæ cernere plebis,  
Adtollique suum lætis ad sidera nomen  
Vocibus, & plausu cuneos certare sonantes.  
Qualis erat populi facies, clamorque faventum,  
Olim quum juvenis, primique ætate triumphi  
Post domitas gentes, torrens quas ambit Iberus,  
Et quæcumque fuga (1) Sertorius impulit arma,  
Vespere pacato, pura venerabilis æque  
Quam currus ornante toga, plaudente senatu,  
Sedit adhuc Romanus eques. Seu fine bonorum  
Anxia venturis ad tempora læta refugit:  
Sive per ambages solitas contraria visis  
Vaticinata quies, magni tulit omina planctus:  
Seu vetito patrias ultra tibi cernere sedes,  
Sic Romam Fortuna dedit. Ne rumpite somnos,  
Castrorum vigiles, nullas tuba verberet aures.  
Crastina dira quies, & imagine mœsta diurna  
Undique funestas acies feret, undique bellum.  
Unde pares somnos populis, noctemque beatam?

(1) fugax vulgo.

O felix, si te vel sic tua Roma videret.  
Donassent utinam superi patriæque, tibi que  
Unum, Magne, diem, quo fati certus uterque  
Extremum tanti fructum raperetis amoris.  
Tu velut Ausonia vadis moriturus in urbe:  
Illa rati semper de te sibi conscia voti  
Hoc scelus haud umquam fatis debere putavit,  
Sic se dilecti tumulum quoque perdere Magni.  
Te mixto flesset luctu, juvenisque, senexque,  
Injussusque puer: lacerasset, crine soluto,  
Pectora femineum, ceu Bruti funere, vulgus.  
Nunc quoque, tela licet paveant victoris iniqui,  
Nuntiet ipse licet Cæsar tua funera, flebunt:  
Sed dum tura ferunt, dum laurea sarta Tonanti.  
O miseri, quorum gemitus edere dolorem,  
Qui te non pleno pariter planxere theatro!  
Vicerat astra jubar, cum mixto murmure turba  
Castrorum fremuit, fatisque trahentibus orbem,  
Signa petunt pugnæ. Miseri pars maxima vulgi  
Non totum visura diem tentoria circum  
Ipsa ducis queritur, magnoque accensa tumultu  
Mortis vicinæ properantes admovet horas.  
Dira subit rabies: sua quisque, ac publica fata  
Præcipitare cupit: segnis, pavidusque vocatur,  
Ac nimium patiens soceri Pompejus, & orbis  
Indulgens regno, qui tot simul undique gentes  
Juris habere sui vellet, pacemque timeret.

Nec non & reges, populique queruntur Eoi:  
 Bella trahi, patriaque prœcul tellure teneri.  
 Hoc placet, o superi, vobis quum vertere cuncta  
 Propositum, nostris erroribus addere crimen.  
 Gladibus irruimus, nocituraque poscimus arma:  
 Jam Pompejanis votum est Pharsalia castris.  
 Cunctorum voces Romani maximus auctor  
 Tullius eloquii, cujus sub jure togaque  
 Pacificas sævus tremuit Catilina secures,  
 Pertulit, iratus bellis, quum rostra forumque  
 Optaret, passus tam longa silentia miles.  
 Addidit (1) invalidæ robur facundia caussæ.

„Hoc pro tot meritis solum te, Magne, precatur,  
 „Uti se Fortuna velis: procuresque tuorum  
 „Castrorum, regesque tui cum supplice mundo  
 „Adfusi, vinci socerum patiare rogamus.  
 „Humani generis tam longo tempore bellum  
 „Cæsar erit? merito, Pompejum vincere lente,  
 „Gentibus indignum est a transcurrente subactis.  
 „Quo tibi fervor abit? aut quo fiducia fati?  
 „De superis, ingrate, times? caussamque senatûs  
 „Credere dîs dubitas? ipsæ tua signa revellent,  
 „Prosilientque acies. Pudeat vicisse coactum.  
 „Si duce te jusso, si nobis bella geruntur,  
 „Sit juris, quocumque velint (2) concurrere campo.

(1) ac dedit *scripti tres*.

(2) velim *MSS. & edd. plur.*

„Quid mundi gladios a sanguine Cæsaris arces?  
 „Vibrant tela manus: vix signa morantia quisquam  
 „Exspectat: propera, ne te tua classica linquant.  
 „Scire senatus avet, miles te, Magne sequatur,  
 „An comes.“ Ingemuit rector, sensitque deorum  
 Esse dolos, & fata<sup>(1)</sup> suæ contraria menti.  
 „Si placet hoc, inquit, cunctis, si milite Magno,  
 „Non duce tempus eget, nil ultra fata morabor.  
 „Involvat populos una Fortuna ruina,  
 „Sitque hominum magnæ lux ista novissima parti.  
 „Testor, Roma, tamen: Magnum, quo cuncta perirent,  
 „Accepisse diem. Potuit tibi vulnere nullo  
 „Stare labor belli: potui sine cæde subactum,  
 „Captivumque ducem Romanæ tradere paci.  
 „Quis furor, o cæci, scelerum? civilia bella  
 „Gesturi metuunt, ne non cum sanguine vincant?  
 „Abstulimus terras, exclusimus æquore toto,  
 „Ad præmaturas segetum jejuna rapinas  
 „Agmina compulimus, votumque effecimus hosti,  
 „Ut mallet sterni gladiis, mortemque suorum  
 „Permiscere meis. Belli pars magna peracta est  
 „His, quibus effectum est, pugnam ne tiro paveret:  
 „Si modo virtutis stimulis, iræque calore  
 „Signa petunt. Multos in summa pericula misit  
 „Venturi timor ipse mali. Fortissimus ille est,

(1) vota scripti tres.

„Qui promptus metuenda pati, si comminus instent,  
„Et differre potest. Placet hæc tam prospera rerum  
„Tradere Fortunæ? gladio permittere mundi  
„Discrimen? pugnare ducem, quam vincere, malunt.  
„Res mihi Romanas dederas, Fortuna, regendas:  
„Accipe majores, & cæco in Marte tuere.  
„Pompeji nec crimen erit, nec gloria bellum.  
„Vincis apud superos votis me, Cæsar, iniquis:  
„Pugnatur. Quantum sceleris, quantumque malorum  
„In populos lux ista feret! quot regna jacebunt!  
„Sanguine Romano quam turbidus ibit Enipeus!  
„Prima velim caput hoc funesti lancea belli,  
„Si sine momento rerum, partisque ruina  
„Casurum est, feriat: neque enim victoria Magno  
„Lætior. Aut populis invisum, hac clade peracta,  
„Aut hodie Pompejus erit miserabile nomen.  
„Omne malum victi, quod sors ferat ultima rerum,  
„Omne nefas victoris erit.“ Sic fatur, & arma  
Permittit populis, frenosque furentibus ira  
Laxat: & ut victus violento navita Coro  
Dat regimen ventis, ignavumque arte relicta  
Puppis onus trahitur. Trepido confusa tumultu  
Castra fremunt, animique truces sua pectora pulsant  
Ictibus incertis. Multorum pallor in ore  
Et mors ventura est, faciesque simillima fato.  
Advenisse diem, qui fatum rebus in ævum  
Conderet humanis, & quæri, Roma quid esset,

Illo Marte, palam est. Sua quisque pericula nescit,  
Adtonitus majore metu. Quis litora ponto  
Obruta, quis summis cernens in montibus æquor,  
Ætheraque in terras, dejecto sole, cadentem,  
Tot rerum finem, timeat sibi? non vacat ullos.  
Pro se ferre metus: urbi, Magnoque timetur.  
Nec gladiis habuere fidem, nisi cautibus asper  
Exarsit mucro. Tunc omnis lancea saxo  
Erigitur: tendunt nervis melioribus arcus:  
Cura fuit lectis pharetras implere sagittis.  
Auget eques stimulos, frenorumque artat (1) habenas.  
Si liceat superis hominum conferre labores,  
Non aliter, Phlegra rabidos tollente Gigantas,  
Martius incaluit Siculis incudibus ensis:  
Et rubuit flammis iterum Neptunia cuspis,  
Spiculaque extenso Pæan Pythone recoxit,  
Pallas Gorgoneos diffudit in ægida crines,  
Pallenæa Jovi mutavit fulmina Cyclops.  
Non tamen abstinuit venturos prodere casus  
Per varias Fortuna notas. Nam Thessala rura  
Quum peterent, totus venientibus obstitit æther:  
(Inque oculis hominum fregerunt fulmina nubes:)  
Adversasque faces, immensoque igne columnas,  
Et trabibus mixtis avidos siphonas aquarum  
Detulit, atque oculos, ingesto fulgure, clausit.

(1) aptat *vulgo*.

Excussit cristas galeis, capulosque solutis  
 Profudit gladiis, ereptaque pila liquavit,  
 Æthereoque nocens fumavit sulfure ferrum.  
 Nec non innumero cooperta examine signa,  
 Vixque revulsa solo, majori pondere pressum  
 Signiferi mersere caput, rorantia fletu,  
 Usque ad Thessaliam Romana, ac publica signa.  
 Admotus superis discussa fugit ab ara  
 Taurus, & Emathios præceps se jecit in agros;  
 Nullaque funestis inventa est victima sacris.

At tu, quos scelerum superos? quas rite vocasti  
 Eumenidas Cæsar? Stygii quæ numina regni,  
 Infernumque nefas mersos & nocte furores?  
 Impia tam sæve gesturus bella litasti.  
 Jam dubium, monstrisne deum, nimione pavore  
 Crediderint: multis concurrere visus Olympo  
 Pindus, & abruptis mergi convallibus Æmus,  
 Edere nocturnas belli Pharsalia voces,  
 Ire per Ossæam rapidus Boebeida sanguis:  
 Inque vicem vultus tenebris mirantur opertos,  
 Et pallere diem, galeisque incumbere noctem,  
 Defunctosque patres, & cunctas sanguinis umbras  
 Ante oculos volitare suos. Sed mentibus unum  
 Hoc solamen erat, voti quod turba nefandi  
 Consicia, quæ patrum jugulos, quæ pectora fratrum  
 Spirabat, gaudet monstris, mentisque tumultus  
 Atque omen scelerum subitos putat esse furores.

Quid



Quid mirum, populos, quos lux extrema manebat,  
 Lymphato trepidasse metu? præsaga malorum  
 Si data mens homini est, Tyriis qui Gadibus hospes  
 Adjacet, Armeniumque bibit Romanus Araxen:  
 Sub quocumque die, quocumque est sidere mundi,  
 Mœret, & ignorat caussas, animumque dolentem  
 Corripit, Emathiis, quid perdat, nescius arvis.  
 Euganeo, si vera fides memorantibus, Augur  
 Colle sedens, Aponos terris ubi fumifer exit,  
 Atque Antenorei dispergitur unda Timavi,  
 „Venit summa dies, geritur res maxima, dixit:  
 „Impia concurrunt Pompeji & Cæsaris arma.“  
 Seu tonitrus, ac tela Jovis præsaga notavit:  
 Æthera seu totum discordi obsistere cœlo,  
 Prospexitque polos: seu numen in æthere mœstum.  
 (Solis (1) in obscuro pugnam pallore notavit.)  
 Dissimilem certe cunctis, quos explicat, egit  
 Thessalicum natura diem: si cuncta perito  
 Augure mens hominum cœli nova signa notasset,  
 Spectari toto potuit Pharsalia mundo.  
 O summos hominum, quorum Fortuna per orbem  
 Signa dedit, quorum fatis cœlum omne vacabat!  
 Hæc & apud seras gentes, populosque nepotum,  
 Sive sua tantum venient in sæcula fama,  
 Sive aliquid magnis nostri quoque cura laboris

(1) solus MSS. aliquot.

Nominibus prodesse potest, quum bella legentur,  
Spesque metusque simul, perituraque vota movebunt:  
Adtonitique omnes veluti venientia fata,  
Non transmissa legent, & adhuc tibi, Magne, favebunt.

Miles ut adverso Phœbi radiatus ab icu  
Descendens totos perfudit lumine colles,  
Non temere inmissus campis: stetit ordine certo  
Infelix acies. Cornus tibi cura sinistri  
Lentule, cum prima, quæ tum fuit optima bello,  
Et quarta legione datur: tibi numine pugnax  
Adverso, Domitî, dextri frons tradita Martis.  
At mediî robur belli fortissima densant  
Agmina, quæ Cilicum terris deducta tenebat  
Scipio, miles in hoc, Libyo dux primus in orbe.  
At juxta fluvios, & stagna undantis Enipei,  
Cappadocum montana cohors, & largus habenæ  
Ponticus ibat eques, Sicci sed plurima campi  
Tetrarchæ, regesque tenent, magnique tyranni,  
Atque omnis Latio quæ servit purpura ferro.  
Illuc & Libyæ Numidas, & Creta Cydonas  
Misit: Ituræis cursus fuit inde sagittis:  
Inde truces Galli solitum prodistis in hostem.  
Illic pugnaces commovit Iberia cetras.  
Eripe victori gentes, & sanguine mundi  
Fuso, Magne, semel, totos consume triumphos.  
Illo forte die Cæsar, statione soluta,  
Ad segetum raptus moturus signa, repente

Conspicit in planos hostem descendere campos,  
Oblatumque videt votis sibi mille petitem  
Tempus, in extremos quo mitteret omnia casus.  
Æger quippe moræ, flagransque cupidine regni,  
Cœperat exiguo tractu civilia bella  
Ut lentum damnare nefas. Discrimina postquam  
Adventasse ducum, supremaque prælia vidit,  
Casuram & fati sensit nutare ruinam,  
Illa quoque in ferrum rabies promptissima paullum  
Languit, & casus audax spondere secundos  
Mens stetit in dubio, quam nec sua fata timere,  
Nec Magni sperare sinunt. Formidine mersa,  
Prosilit. Hortando melior fiducia vulgo.  
„O dormitor mundi, rerum fortuna mearum,  
„Miles, adest toties optatæ copia pugnæ.  
„Nil opus est votis: jam fatum arcessite ferro.  
„In manibus vestris, quantus sit Cæsar, habetis.  
„Hæc est illa dies, mihi quam Rubiconis ad undas  
„Promissam memini, cujus spe movimus arma,  
„In quam disculimus vetitos remeare triumphos.  
„Hæc eadem est, hodie quæ pignora, quæque penates  
„Reddat, & emerito faciat vos Marte colonos.  
„Hæc, fato quæ teste probet, quis justius arma  
„Sumserit: hæc acies victum factura nocentem est.  
„Si pro me patriam ferro flammisque petistis,  
„Nunc pugnate truces, gladiosque exsolvite culpa.  
„Nulla manus, belli mutato iudice, pura est.

„Non mihi res agitur, sed vos ut libera sitis  
 „Turba, precor, gentes ut jus habeatis in omnes.  
 „Ipse ego privatæ cupidus me reddere vitæ,  
 „Plebejaque toga modicum componere civem:  
 „Omnia dum vobis liceant, nil esse recuso.  
 „Invidia regnate mea. Nec sanguine multo  
 „Spem mundi petitis: Grajis dilecta (1) juvenus  
 „Gymnasiis aderit, studioque ignava palæstræ,  
 „Et vix arma ferens, ac mixtæ dissona turbæ  
 „Barbaries: non illa tubas, non agmine moto  
 „Glamorem latura suum. Civilia paucæ  
 „Bella manus facient: pugnæ pars magna levabit  
 „His orbem populis, Romanumque obteret hostem.  
 „Ite per ignavas gentes, famosaque regna,  
 „Et primo ferri motu prosternite mundum:  
 „Sitque palam, quas tot duxit Pompejus in urbem  
 „Curribus, unius gentes (2) non esse triumphi.  
 „Armeniosne movet, Romana potentia cujus  
 „Sit ducis? aut emtum minimo vult sanguine quisquam  
 „Barbarus, Hesperiiis Magnum præponere rebus?  
 „Romanos odere omnes, dominosque gravantur,  
 „Quos novere, magis. Sed me Fortuna meorum  
 „Commisit manibus, quorum me Gallia testem  
 „Tot fecit bellis. Cujus non militis ensem  
 „Agnoscam? cælumque tremens quum lancea transit,

(1) *delecta vulgo. deducta MS.*

(2) *gentis MSS. aliquot.*

„Dicere non fallar, quo sit librata lacerto.  
 „Quod si signa ducem numquam fallentia vestrum  
 „Conspicio, faciesque truces, oculosque minaces:  
 „Vicistis. Videor fluvios spectare cruoris,  
 „Calcatosque simul Reges, sparsumque senatus  
 „Corpus, & immensa populos in cæde natantes.  
 „Sed mea fata moror, qui vos in tela (1) furentes  
 „Vocibus his teneo. Veniam date bella trahenti:  
 „Spe trepido: haud umquam vidi tam magna daturus,  
 „Tam prope me superos: camporum limite parvo  
 „Absumus a votis. Ego sum, cui Marte peracto,  
 „Quæ populi, Regesque tenent, donare licebit.  
 „Quone poli motu, quo cæli sidere verso,  
 „Thessalicæ tantum, superi, permittitis oræ?  
 „Aut merces hodie bellorum, aut pœna paratur.  
 „Cæsareas spectate cruces, spectate catenas,  
 „Et caput hoc positum rostris, effusaque membra,  
 „Septorumque nefas, & clausi prælia campi.  
 „Cum duce Sullano gerimus civilia bella.  
 „Vestri cura movet. Nam me secura manebit  
 „Sors quæsita manu: fodientem viscera cernet  
 „Me mea, qui nondum victo respexerit hoste.  
 „DI, quorum curas abduxit ab æthere tellus,  
 „Romanusque labor, vincat, quicumque necesse  
 „Non putat in victos sævum destringere ferrum,

(1) bella MSS. *viginti*.

„Quique suos cives, quod signa adversa tulerunt,  
 „Non credit fecisse nefas. Pompejus in artō  
 „Agmina vestra loco, vetita virtute moveri,  
 „Quum tenuit, quanto satiavit sanguine ferrum!  
 „Vos tamen hoc oro juvenes, ne cedere quisquam  
 „Hosti terga velit: civis, qui fugerit, esto.  
 „Sed dum tela micant, non vos pietatis imago  
 „; Ulla, nec adversa conspecti fronte parentes  
 „Commoveant: vultus gladio turbate verendos.  
 „Sive quis infesto cognata in pectora ferro  
 „Ibit, seu nullum violabit vulnere pignus,  
 „Ignoti jugulum tamquam scelus imputet hostis.  
 „Sternite jam vallum, fossasque implete ruina,  
 „Exeat ut plenis acies non sparsa manipulis.  
 „Parcite ne castris: vallo tendetis in illo,  
 „Unde acies peritura venit.“ Vix cuncta locuto  
 Cæsare, quemque suum munus trahit, armaque raptim  
 Sumta Ceresque viris. Capiunt præsagia belli,  
 Calcatisque ruunt castris: stant ordine nullo,  
 Arte ducis nulla, permittuntque omnia fati.  
 Si totidem Magni soceros, totidemque petentes  
 Urbis regna suæ funesto in Marte locasses,  
 Non tam præcipiti ruerent in prælia cursu.

„Vidit ut hostiles in rectum exire catervas  
 Pompejus, nullasque moras prætereire bello,  
 Sed superis placuisse diem: stat corde gelato  
 Adtonitus: tantoque duci sic arma timere

Omen erat. Premit inde metus, totumque per agmen  
 Sublimi prævectus equo: „Quem flagitat, inquit,  
 „Vestra diem virtus, finis civilibus armis,  
 „Quem quæsisistis, adest. Totas effundite vires;  
 „Extremum ferri (1) superest opus, unaque gentes  
 „Hora trahit. Quisquis patriam, carosque penates,  
 „Qui subolem, ac thalamos, desertaque pignora quærit,  
 „Ense petat: medio posuit deus omnia campo.  
 „Causâ jubet melior superos sperare secundos:  
 „Ipsi tela regent per viscera Cæsaris, ipsi  
 „Romanas sancire (2) volent hoc sanguine leges.  
 „Si socero dare regna meo, mundumque pararent,  
 „Præcipitare meam fatis potuere senectam.  
 „Non iratorum populis urbiq; deorum est  
 „Pompejum servare ducem. Quæ vincere possunt  
 „Omnia contulimus. Subiere pericula clari  
 „Sponte viri, sacraque antiquus imagine miles.  
 „Si Curios his fata darent, reducesque Camillos  
 „Temporibus, Deciosque caput fatale voventes,  
 „Hinc starent: Primo gentes oriente coactæ,  
 „Innumeræque urbes, quantas in prælia numquam  
 „Excivere manus. Toto simul utimur orbe.  
 „Quidquid signiferi comprehensum (3) limite cœli  
 „Sub Noton, & Borean hominum sumus, arma movemus.

(1) belli MSS. *quinque*.

(2) sanare, sentire, sancire MSS.

(3) compressum MSS. *plures*.

„Nonne superfusus collectum cornibus hostem  
 „In medium dabimus? paucas victoria dextras  
 „Exigit: at plures tantum clamore catervæ  
 „Bella gerent. Cæsar nostris non sufficit armis.  
 „Credite pendentes e summis mœnibus urbis  
 „Crinibus effusis hortari in prælia matres.  
 „Credite grandævum, vetitumque ætate senatum  
 „Arma sequi, sacros pedibus prosternere canos:  
 „Atque ipsam domini metuentem occurrere Romam.  
 „Credite, qui nunc est populus, populumque futurum  
 „Permixtas adferre preces. Hæc libera nasci,  
 „Hæc vult turba mori. Si quis post pignora tanta  
 „Pompejo locus est, cum prole, & conjuge supplex,  
 „Imperii salva si majestate liceret,  
 „Volverer ante pedes. Magnus, nisi vincitis, exsul,  
 „Ludibrium soceri, vester pudor, ultima fata  
 „Deprecor, ac turpes extremi cardinis annos,  
 „Ne discam servire senex.“ Tam mœsta secuti  
 Verba ducis flagrant animi, Romanaque virtus  
 Erigitur, placuitque mori, ne vera timeret.  
 Ergo utrimque pari procurrunt agmina motu  
 Irarum: metus hos regni, spes excitat illos.  
 Hæ facient dextræ, quidquid non expleat ætas  
 Ulla, nec humanum reparet genus omnibus annis,  
 Ut vacet a ferro. Gentes Mars iste futuras  
 Obruet, & populos ævi venientis in orbem  
 Erepto natale feret. Tunc omne Latinum



Fabula nomen erit: Gabios, Vejosque, Coramque.  
 Pulvere vix tectæ poterunt monstrare ruinæ,  
 Albanosque lares, Laurentinosque penates  
 Rus vacuum, quod non habitat; nisi nocte coacta,  
 Invitus, questusque Numam jussisse, senator.  
 Non ætas hæc carpsit edax, monumentaque rerum  
 Putria destituit: crimen civile videmus,  
 Tot vacuas urbes. Generis quo turba redacta est  
 Humani: toto populi qui nascimur orbe  
 Nec muros implere viris, nec possumus agros.  
 Urbs nos una capit: victo fossore coluntur  
 Hesperia segetes: stat tectis putris avitis  
 In nullos ruitura domus: nulloque frequentem  
 Cive suo Romam, sed mundi facie repletam,  
 Gladis eo dedimus, ne tanto in corpore (1) bellum  
 Jam possit civile geri: Pharsalia tanti  
 Causa mali, cedant feralia nomina Cannæ,  
 Et damnata diu Romanis Allia fastis.  
 Tempora signavit leviorum Roma malorum:  
 Hunc voluit nescire diem. Pro tristia fata!  
 Aera pestiferum tractu, morbosque fluentes,  
 Insanamque famem, permissasque ignibus urbes,  
 Mœniaque in præceps laturos plena tremores  
 Hi possent explere viri, quos undique traxit.  
 In miseram Fortuna necem, dum munera longi

(1) in tempore *vulgo*.

Explicat eripiens ævi, populosque ducesque,  
Constituit campis: per quos tibi, Roma, ruenti  
Ostendat, quam magna cadas. Quo tardius orbem  
Possedit, citius per prospera fata cucurrit.  
Omne tibi bellum gentes dedit omnibus annis:  
Te geminum Titan procedere vidit in axem.  
Haud multum terræ spatium restabat Eoæ,  
Ut tibi nox, tibi tota dies, tibi curreret æther,  
Omniaque errantes stellæ Romana viderent.  
Sed retro tua fata tulit par omnibus annis  
Emathiæ funesta dies. Hac luce cruenta  
Effectum, ut Latios non horreat India fasces,  
Nec vetitos errare Dahas in mœnia ducat,  
Sarmatiumque premat succinctus consul aratrum:  
Quod semper sævas debet tibi Parthia pœnas,  
Quod fugiens civile nefas, redituraque numquam  
Libertas, ultra Tigrin, Rhenumque recessit,  
Ac, toties nobis jugulò quæsitæ, vagatur,  
Germanum, Scythiumque bonum, nec respicit ultra  
Ausoniam: vellein, populis incognita nostris,  
Vulturis ut primum lævo fundata volatu  
Romulus infami complevit mœnia luco,  
Usque ad Thessalicas servisses Roma ruinas.  
De Brutis, Fortuna, queror. Quid tempora legum  
Egimus, aut annos a consule nomen habentes?  
Felices Arabes, Medique, Eaque tellus,  
Quam sub perpetuis tenuerunt fata, Tyrannis.

Ex populis, qui regna ferunt, sors ultima nostra est,  
Quos servire pudet. Sunt nobis nulla profecto  
Numina: quum cæco rapiantur sæcula casu.  
Mentimur regnare Jovem. Spectabit ab alto  
Æthere Thessalicas, teneat quum fulmina, cædes?  
Scilicet ipse petet Pholoen, petet ignibus Ceten,  
Inmeritæque nemus Rhodopes, pinusque Mimantis:  
Cassius hoc potius feriet caput? astra Thyestæ  
Intulit, & subitis damnavit noctibus Argos:  
Tot similes fratrum gladios, patrumque gerenti  
Thessaliæ dabit ille diem? mortalia nulli  
Sunt curata deo. Cladis tamen hujus habemus  
Vindictam, quantam terris dare numina fas est.  
Bella pares superis facient civilia divos:  
Fulminibus manes, radiisque ornabit, & astris,  
Inque deum templis jurabit Roma per umbras.  
Ut rapido cursu fati suprema morantem  
Consumsere locum: parva tellure diremti,  
Quo sua pila cadant, aut quam sibi fata minentur  
Inde manum spectant: tempus, quo noscere possunt,  
Facturi quæ monstra forent. Videre parentes  
Frontibus adversis, fraternaue comminus arma,  
Nec libuit mutare locum: tamen omnia torpor  
Pectora constrinxit: gelidusque in viscera sanguis  
Percussa pietate coit: totæque cohortes  
Pila parata diu tensis tenuere lacertis.  
Di tibi non mortem, quæ cunctis pœna paratur,

Sed sensum post fata, tuæ dent, Crastine, morti,  
 Cujus torta manu commisit lancea bellum,  
 Primaque Thessaliam Romano sanguine tinxit,  
 O præceps rabies, quum Cæsar tela teneret,  
 Inventa est prior ulla manus! tunc stridulus aer  
 Elisus lituis, conceptaque classica cornu  
 Tunc ausæ dare signa tubæ: tunc æthera tendit,  
 Extremique fragor convexa irrupit Olympi:  
 Unde procul nubes, qua nulla tonitrua durant.  
 Excepit resonis clamorem vallibus Æmus,  
 Peliacisque dedit rursus geminare cavernis:  
 Pindus agit fremitus(1), Pangæaque saxa resultant,  
 Etæque gement rupes: vocesque furoris  
 Expavere sui tota tellure relatas.  
 Spargitur innumerum diversis missile votis  
 Vulnere pars optat, terræ pars figere tela,  
 Ac puras servare manus. Rapit omnia casus,  
 Atque incerta facit, quos vult, Fortuna nocentes.  
 Sed quota pars cladis jaculis, ferroque volanti  
 Exacta est? odiis solus civilibus ensis  
 Sufficit, & dextras Romana in viscera ducit.  
 Pompeji densis acies stipata catervis,  
 Junxerat in seriem nexis umbonibus arma.  
 Vixque habitura locum dextras, ac tela movendi  
 Constiterat, gladiosque suos compressa timebat.

(1) gemitus *vulgo*.

Præcipiti cursu vesanum Cæsaris agmen  
In densos agitur cuneos: perque arma, per hostem  
Quærit iter. Qua torta graves lorica catenas  
Opponit, tutoque latet sub tegmine pectus,  
Hac quoque perventum est ad viscera: totque per arma  
Extremum est, quod quisque ferit. Civilia bella  
Una acies patitur, gerit altera: frigidus inde  
Stat gladius; calet omne nocens a Cæsare ferrum,  
Nec Fortuna diu rerum tot pondera vergens,  
Abstulit ingētes fato torrente ruinas.

Ut primum toto diduxit cornua campo  
Pompejanus eques, bellicque per ultima fudit:  
Sparsa per extremos levis armatura maniplos  
Insequitur, sævasque manus inmittit in hostem.  
Illic quæque suo miscet gens prælia telo:  
Romanus cunctis petitur cruor: inde sagittæ,  
Inde faces, & saxa volant, spatioque solutæ  
Aeris, & calido liquefactæ pondere glandes.  
Tunc & Ituræi, Medique Arabesque, soluto  
Arcu turba minax, nusquam rexere sagittas:  
Sed petitur solus, qui campis inminet aer.  
Inde cadunt mortes: sceleris sed crimine nullo  
Externum maculant chalybem; stetit omne coactum  
Circa pila nefas: ferro subtexitur æther,  
Noxque super campos telis conserta pependit.  
Quum Cæsar metuens, ne frons sibi prima labaret  
Incurso, tenet obliquas post signa cohortes:

Inque latus belli, qua se, vagus hostis agebat,  
 Emittere subitum non motis cornibus agmen.  
 Inmemores pugnae, nulloque pudore timendi  
 Praecipites fecere palam, civilia bella  
 Non bene barbaricis umquam commissa catervis.  
 Ut primum sonipes transfixus pectora ferro  
 In caput effusi calcavit membra regentis:  
 Omnis eques cessit campis, glomerataque pubes (1)  
 In sua conversis praecipit agmina frenis.  
 Perdidit inde modum caedes, ac nulla secuta est  
 Pugna: sed hinc jugulis, hinc ferro bella geruntur.  
 Nec valet haec acies tantum prosternere, quantum  
 Inde perire potest. Utinam Pharsalia campis  
 Sufficiat cruor iste tuis, quem barbara fundunt  
 Pectora, non alio mutantur sanguine fontes,  
 Hic numerus totos tibi vestiat ossibus agros:  
 Aut si Romano compleri sanguine mavis,  
 Istis parce precor: vivant Galataeque, Syrique,  
 Cappadoces, Gallique, extremique orbis Iberi,  
 Armenii, Cilices: nam post civilia bella  
 Hic populus Romanus erit. Semel ortus in omnes  
 It timor, & fatis datus est pro Caesare cursus.  
 Ventum erat ad robur Magni, mediasque catervas,  
 Quod totos errore vago perfuderat agros:  
 Constitit hic bellum, fortunaque Caesaris haesit.

(1) nubes scripti quatuor.

Non illic regum auxiliis collecta Juventus  
 Bella gerit, ferrumque manus movère rogatæ:  
 Ille locus fratres habuit, locus ille parentes.  
 Hic furor, hic rabies, hic sunt tua crimina Cæsar.  
 Hanc fuge mens belli partem tenebrisque relinque,  
 Nullaque tantorum discat me vate malorum,  
 Quam multum bellis liceat civilibus, ætas.  
 A potius pereant lacrimæ, pereantque querelæ!  
 Quidquid in hac acie gessisti, Roma, tacebo.  
 Hic Cæsar, rabies populis, stimulusque furorum,  
 Ne qua parte sui pereat scelus, agmina circum  
 It vagus, atque animis ignes flagrantibus addit.  
 Inspicit & gladios, toti qui sanguine manent (1);  
 Qui niteant primo tantum mucrone cruenti,  
 Quæ presso tremat ense manus, quis languida tela,  
 Quis contenta ferat, quis præstet bella jubenti,  
 Quem pugnare juvet, quis vultum cive perempto  
 Mutet: obit latis projecta cadavera campis:  
 Vulnere multorum totum fusura cruorem  
 Opposita premit ipse manu. Quacumque vagatur  
 Sanguineum veluti quatiens Bellona flagellum,  
 Bistonas aut Mavors agitans, si verbere sævo  
 Palladia stimulet turbatos ægide currus.  
 Nox ingens scelerum, & cædes oriuntur, & instat  
 Immensæ vocis gemitus, & pondere lapsi

(1) madent MSS. *plures*.

Pectoris arma sonant, contractique ensibus enses.  
 Ipse manu subicit gladios, ac tela ministrat,  
 Adversosque jubet ferro confundere vultus.  
 Promovet ipse acies: impellit terga suorum:  
 Verbere conversæ cessantes excitat hastæ.  
 In plebem vetat ire manus, monstratque senatum.  
 Scit cruor imperii qui sit, quæ viscera rerum (1):  
 Unde petat Romam, libertas ultima mundi  
 Quo steterit ferienda loco. Perimixta secundo  
 Ordine nobilitas, venerandaque corpora ferro  
 Urgentur: cædunt Lepidos, cæduntque Metellos,  
 Corvinosque simul, Torquataque nomina, regum  
 Sæpe duces, summosque hominum te, Magne, remoto.

Illic plebeja contextus casside vultus,  
 Ignotusque hosti, quod ferrum Brute tenebas!  
 O decus imperii, spes o suprema senatus,  
 Extremum tanti generis per sæcula nomen,  
 Ne rue per medios nimium temerarius hostes,  
 Nec tibi fatales admoveris ante Philippos,  
 Thessalia periture tua. Nil proficis istic  
 Cæsaris intentus jugulo: nondum adtigit arcem,  
 Juris & humani culmen, quo cuncta premuntur,  
 Egressus, meruit fatis tam nobile letum:  
 Vivat, &, ut Bruti procumbat victima, regnet.

Hic patriæ perit omne decus: jacet aggere magno  
 Pa-

(1) legum vulgo. regum MSS. quidam.



Patricium campis non mixta plebe cadaver.  
 Mors tamen emicuit clarorum in strage virorum  
 Pugnacis Domitî; quem clades fata per omnes  
 Ducebant. Magni nusquam Fortuna sine illo  
 Succubuit: victus toties a Cæsare, salva  
 Libertate perit: tunc mille in vulnera lætus  
 Labitur, ac venia gaudet caruisse secunda.  
 Viderat in crasso versantem sanguine membra  
 Cæsar, & increpitans: „Jam Magni deseris arma,  
 „Successor (1) Domiti, sine te jam bella geruntur.“  
 Dixerat: at illi suffecit pectora pulsans  
 Spiritus in vocem, morientiaque ora resolvit.  
 „Non te funesta scelerum mercede potitum,  
 „Sed dubium fati Cæsar, generoque minorem  
 „Adspiciens, Stygias Magno duce liber ad umbras  
 „Et securus eo: sævo te Marte subactum,  
 „Pompejoque graves pœnas, nobisque daturum  
 „Quum morior, sperare licet.“ Non plura locutum  
 Vita fugit, densæque oculos vertère tenebræ.

Impendisse pudet lacrimas in funere mundi  
 Mortibus innumeris, ac singula fata sequentem  
 Quærere, letiferum per cujus viscera vulnus  
 Exierit; quis fusa solo vitalia calcet;  
 Ore quis adverso demissum faucibus ense  
 Expulerit moriens anima; quis corruat ictu,

(1) succensor, accensor *variant*.

Quis steterit, dum membra cadunt: qui pectore (1) tela  
 Transmittant, aut quos campis adfixerit hasta:  
 Quis cruor emissis perruperit aera venis,  
 Inque hostis cadat arma sui: quis pectora fratris  
 Cædat, &, ut notum possit spoliare cadaver,  
 Abscisum longe mittat caput: ora parentis  
 Quis laceret, nimiaque probet spectantibus ira  
 Quem jugulat, non esse patrem. Mors nulla querela  
 Digna sua est, nullosque hominum lugere vacamus.  
 Non istas habuit pugnæ Pharsalia partes,  
 Quas aliæ clades: illic per fata virorum,  
 Per populos hic Roma perit: quæ militis illic,  
 Mors hic gentis erat: sanguis ibi fluxit Achæus,  
 Ponticus, Assyrius: cunctos hædere cruores  
 Romanus, campisque vetat consistere torrens.  
 Majus ab hac acie, quam quod sua sæcula ferrent,  
 Vulnus habent populi: plus est quam vita salusque,  
 Quod perit: in totum mundi prosternimur ævum:  
 Vincitur his gladiis omnis, quæ serviet, ætas.  
 Proxima quid soboles, aut quid meruere nepotes  
 In regnum nasci? pavidi num gessimus arma?  
 Teximus aut jugulos? alieni præna timoris  
 In nostra cervice sedet. Post prælia natis  
 Si dominum Fortuna dabas, & bella dedisses.  
 Jam Magnus transisse deos, Romanaque fata

(1) pectora MSS. *plures*.

Senserat infelix: tota vix clade coactus  
 Fortunam damnare suam. Stetit aggere campi  
 Eminus, unde omnes sparsas per Thessala rura  
 Prospiceret clades, quæ bello obstante latebant.  
 Tot telis sua fata peti, tot corpora fusa,  
 Ac se tam multo pereuntem sanguine vidit.  
 Nec, sicut mos est miseris, trahere omnia secum  
 Mersa juvat, gentesque suæ miscere ruinæ:  
 Ut Latia post se vivat pars maxima turbæ,  
 Sustinuit dignos etiam nunc credere votis  
 Cœlicolas, voluitque sui solatia casus:  
 „Parcite, ait, superi cunctas prosternere gentes:  
 „Stante potest mundo, Romaque superstitè, Magnus  
 „Esse miser. Si plura juvant meâ vulnera, conjux  
 „Est mihi, sunt natî; dedimus tot pignora fati.  
 „Civiline parum est bello, si meque, meosque  
 „Obruet? exiguæ clades sumus, orbe remoto?  
 „Omnia quid laceras, quid perdere cuncta laboras?  
 „Jam nihil est, Fortuna, meum.“ Sic fatur: & arma,  
 Signaque, & afflicta omni jam parte (1) catervas  
 Circumit, & revocat matura in fata ruehtes,  
 Seque negat tanti. Nec deerat robur in enses  
 Ire duci, juguloque pati, vel pectore letum:  
 Sed timuit strato miles ne corpore Magni  
 Non fugeret, supraque ducem procumberet orbis:

(1) morte MSS. meliores sept.

Cæsaris aut oculis voluit subducere mortem.  
Nequidquam. Infelix, socero spectare volenti  
Præstandum est ubicumque caput. Sed tu quoque conjux  
Causa fugæ, vultusque tui: fatisque negatum  
Te absente mori. Tunc Magnum concitus aufert  
A bello sonipes, non tergo tela paventem,  
Ingentesque animos extrema in fata ferentem.  
Non gemitus, non fletus erat, salvaque verendus  
Majestate dolor, qualem te, Magne, decebat  
Romanis præstare malis. Non impare vultu  
Adspicis Emathiam: nec te videre superbum  
Prospera bellorum, nec fractum adversa videbunt.  
Quamque fuit læto per tres infida triumphos,  
Tam misero Fortuna minor. Jam pondere fati  
Deposito securus abis: nunc tempora læta  
Respexisse vacat: spes numquam implenda recessit:  
Quid fueris, nunc scire licet. Fuge prælia dira,  
Ac testare deos, nullum qui perstet in armis  
Jam tibi, Magne, mori: ceu flebilis Africa damnis,  
Et ceu Munda nocens, Pharioque a gurgite clades,  
Sic & Thessaliæ post te pars maxima pugnæ.  
Non jam Pompeji nomen popolare per orbem,  
Nec studium belli: sed par, quod semper habemus,  
Libertas, & Cæsar erunt: teque inde fugato  
Ostendit moriens, sibi se pugnasse, senatus.

Nonne juvat pulsum bellis cessisse, nec istud  
Prospexisse nefas, spumantes cæde catervas?

Respice turbatos incursu sanguinis amnes,  
Et soceri miserere tui. Quo pectore Romam  
Intrabit campis factus felicior istis?

Quidquid in ignotis solus regionibus exsul,  
Quidquid sub Phario positus patiere tyranno;  
Crede deis, longo fatorum crede favori,  
Vincere pejus erat. Prohibe lamenta sonare,  
Flere veta populos: lacrimas, luctusque remitte.  
Tam mala Pompeji, quam prospera mundus adoret.  
Adspice securus vultu non supplice reges:  
Adspice possessas urbes, donataque regna,  
Ægypton, Libyenque: & terras elige morti.

Vidit prima tuæ testis Larissa ruinæ  
Nobile, nec victum fatis caput: omnibus illa  
Civibus effudit totas per mœnia vires:  
Obvia ceu læto, præmittunt munera flentes:  
Pandunt templa, domos: socios se cladibus optant.  
Scilicet inmenso superest ex nomine multum,  
Teque minor solo: cunctas impellere gentes  
Rursus in arma potes, rursusque in fata redire.  
Sed,, quid opus victo populis, aut urbibus? inquit:  
„Victori præstate fidem.“ Tu Cæsar in alto  
Cædis adhuc cumulo patriæ per viscera vadis:  
At tibi jam populos donat gener. Avehit inde  
Pompejum sonipes: gemitus, lacrimæque sequuntur:  
Plurimaque in sævos populi convicia divos.  
Nunc tibi vera fides quæsitæ, Magne, favoris

Contigit, ac fructus. Felix se nescit amari.

Cæsar ut Hesperio vidit satis arva natare  
 Sanguine, parcendum ferro, manibusque suorum  
 Jam ratus, ut viles animas, perituraque frustra  
 Agmina permisit vitæ. Sed castra fugatos  
 Ne revocent, pellatque quies nocturna pavorem;  
 Protinus hostili statuit succedere vallo,  
 Dum Fortuna calet, dum conficit omnia terror,  
 Non veritus grave ne fessis, ac Marte subactis  
 Hoc foret imperium. Non magno hortamine miles  
 In prædam ducendus erat: „ Victoria nobis  
 „ Plena viri, dixit: superest pro sanguine merces,  
 „ Quam monstrare meum est: neque enim donare vocabo,  
 „ Quod sibi quisque dabit. Cunctis en plena metallis  
 „ Castra patent: raptum Hesperiiis ex gentibus aurum  
 „ Hic jacet, Eoasque premunt tentoria gazas.  
 „ Tot regum Fortuna simul, Magnique coacta  
 „ Exspectat dominos: propera præcedere miles  
 „ Quos sequeris: quascumque tuas Pharsalia fecit,  
 „ A victis rapiantur opes.“ Sic milite jusso,  
 Impulit amentes, aurique cupidine cæcos  
 Ire super gladios, supraque cadavera patrum,  
 Et cæsos calcare duces. Quæ fossa, quis agger  
 Sustineat belli pretium, scelerumque patentes?  
 Scire ruunt, quanta fuerint mercede nocentes.  
 Invenere quidem spoliato plurima mundo  
 Bellorum in sumtus congestæ pondera massæ:

Sed non implevit cupientes omnia mentes.  
 Quidquid fodit Iber, quidquid Tagus expuit auri,  
 Quodque legit dives summis Arimaspus arenis  
 Ut rapiant, parvo scelus hoc venisse putabunt.  
 Quum sibi Tarpejas victor desponderit arces,  
 Quum spe Romanæ promiserit omnia prædæ:  
 Decipitur, quod castra rapit. Capit impia plebes  
 Cespite patricio somnos: stratumque (1) cubile  
 Regibus infandus miles premit: inque parentum,  
 Inque toris fratrum posuerunt membra nocentes:  
 Quos agitat vesana quies, somnique furentes  
 Thessaliam miseris versant in pectore pugnam.  
 Invigilat cunctis sævum scelus, armaque tota  
 Mente agitant. Capuloque manus absente moventur.  
 Ingemuisse putes campos, terramque nocentem  
 Inspirasse animas, infectumque aera totum  
 Manibus, & Stygia superam formidine noctem.  
 Exigit a miseris tristes victoria pœnas,  
 Sibilaque & flammæ infert sopor: umbra peremti  
 Civis adest: sua quemque premit terroris imago.  
 Ille senum vultus, juvenum videt ille figuram:  
 Hunc agitant totis fraterna cadavera somnis:  
 Pectore in hoc pater est: omnes in Cæsare manes.  
 Haud alios Scythica nondum purgat...s in ara  
 Eumenidum vidit vultus Pelopeus Orestes:

(1) vacuumque *vulgo*. cæcumque, cæsumque, cassumque  
*MSS. var.*

Nec magis adtonitos animi sensere tumultus,  
 Quum fureret, Pentheus; aut quum desisset (1), Agave.  
 Hunc omnes gladii, quos aut Pharsalia vidit,  
 Aut, ultrix visura dies, stringente senatu,  
 Illa nocte premunt: hunc infera monstra flagellant.  
 Et quantum misero pœnæ mens conscia donat,  
 Quod Styga, quod manes, ingestaque (2) Tartara somnis  
 Pompejo vivente videt! Tamen omnia passo  
 Postquam clara dies Pharsalia damna rexit,  
 Nulla loci facies revocat feralibus arvis  
 Hærentes oculos. Cernit propulsa cruore  
 Flumina, & excelsos cumulis æquantia colles  
 Corpora, sidentes in tabem spectat acervos,  
 Et Magni numerat populos: epulisque paratur  
 Ille locus, vultus ex quo faciesque jacentum  
 Agnoscat. Juvat Emathiam non cernere terram,  
 Et lustrare oculis campos sub clade latentes:  
 Fortunam, superosque suos in sanguine cernit.  
 Ac ne læta furens scelerum spectacula perdat,  
 Invidet igne rogi miseris, cœloque nocenti  
 Ingerit Emathiam. Non illum Pœnus humator  
 Consulis, & Libya succensæ lampade Cannæ  
 Compellunt, hominum ritus ut servet in hoste:  
 Sed meminit nondum saturata cædibus ira,  
 Cives esse suos. Petimus non singula busta,

(1) descisset, sævisset, dedisset *MSS. var.*

(2) infestaque *vulgo.*



Discretosque rogos: unum da gentibus ignem:  
 Non interpositis urantur corpora flammis.  
 Aut generi si pœna juvat, nemus exstrue Pindi:  
 Erige congestas Etæo robore silvas,  
 Thessaliam videat Pompejus ab æquore flammam.  
 Nil agis hac ira: tabesne cadavera solvat,  
 An rogos, haud refert: placido natura receptat  
 Cuncta sinu, finemque sui sibi corpora debent.  
 Hos, Cæsar, populos si nunc non usserit ignis,  
 Uret cum terris, uret cum gurgite ponti.  
 Communis mundo superest rogos, ossibus astra  
 Mixturus. Quocumque tuam Fortuna vocabit (1),  
 Hæ quoque eunt animæ. Non altius ibis in auras,  
 Non meliore loco Stygia sub nocte jacebis.  
 Libera Fortunæ mors est: capit omnia tellus  
 Quæ genuit: cœlo tegitur, quod non habet urnam.  
 Tu, cui dant pœnas inhumato funere gentes,  
 Quid fugis hanc cladem? quid olentes deseris agros?  
 Has trahe Cæsar aquas: hoc, si potes, utere cœlo.  
 Sed tibi tabentes populi Pharsalia rura  
 Eripiunt, camposque tenent victore fugato.  
 Non solum Hæmonii funesta ad pabula belli  
 Bistonii venere lupi, tabemque cruentæ  
 Cædis odorati Pholoen liquere leones.  
 Tunc ursæ latebras, obscœni tecta, domusque

(1) locabit MSS. *plures*.

Deseruere canes, & quidquid nare sagaci  
 Aera non sanum, motumque cadavere (1) sentit.  
 Jamque diu volucres civilia castra secutæ  
 Conveniunt. Vos, quæ Nilo mutare soletis  
 Threicias hyemes, ad mollem serius austrum  
 Istis aves. Numquam tanto se vulture cœlum  
 Induit, aut plures presserunt aera pinnæ.  
 Omne nemus misit volucres, omnisque cruenta  
 Alite sanguineis stillavit roribus arbor:  
 Sæpe super vultus victoris, & impia signa  
 Aut cruor, aut alto defluxit ab æthere tabes,  
 Membraque dejecit jam lassis unguibus ales.  
 Sic quoque non omnis populus pervenit ad ossa,  
 Inque feras discerptus abit: non intima curant  
 Viscera, nec totas (2) avide sorbere medullas:  
 Degustant artus. Latiae pars maxima turbæ  
 Fastidita jacet; quam sol, nimbiue, diesque  
 Longior Emathiis resolutam miscuit arvis.  
 Thessalia infelix quo tanto crimine tellus  
 Læsisti superos, ut te tot mortibus unam,  
 Tot scelerum fatis premerent? quod sufficit ævum,  
 Inmemor ut donet belli tibi damna vetustas?  
 Quæ seges infecta (3) surget non decolor herba?  
 Quo non Romanos violabis vomere manes?


(1) cadavera MS. & *Lucret.*

(2) nec testas MS.

(3) infecta MSS. tres.

Ante novæ venient acies, scelerique secundo  
Præstabis nondum siccos hoc sanguine campos.  
Omnia majorum vertamus busta licebit,  
Et stantes tumulos, & qui radice vetusta  
Effudere suas, vicis compagibus, urnas:  
Plus cinerum Hæmonix sulcis telluris aratur,  
Pluraque ruricolis feriuntur dentibus ossa.  
Nullus ab Emathio religasset litore funem  
Navita, nec terram quisquam movisset arator,  
Romani bustum populi: fugerentque coloni  
Umbrarum campos, gregibus dumeta carerent:  
Nullusque auderet pecori permittere pastor  
Vellere surgentem de nostris ossibus herbam;  
Ac, velut impatiens hominum, vel solis iniqui  
Limite, vel glacie, nuda atque ignota jaceres,  
Si non prima nefas belli, sed sola tulisses.  
O superi, liceat terras odisse nocentes.  
Quid totum premitis, quid totum absolvitis orbem?  
Hesperix clades, & flebilis unda Pachyni,  
Et Mutina, & Leucas pueros fecere Philippos.





## LIBER OCTAVUS.

### ARGUMENTUM.

*Continet Octavus rate Lesbi litora natum,  
 Conjugis exanimæ refoventem pectora Magnum.  
 Tum circumfusas abeuntem flere catervas,  
 Bella quoque in partes deposcere Cæsarianas.  
 Inde recollectos dum consulit ille sodales,  
 Quærit & in Parthos fugiendi flectere calles,  
 Murmure cunctorum cæptum damnare coactus,  
 Tendit in Ægyptum fatis urgentibus ætus.  
 Rex puer a pravis monitoribus expavescens  
 Ad scelus infandum ruit ilicet inrevocatus.  
 Regni patronum capitis discrimine plectit,  
 Victoriq; nefas, quasi munus, reddere gestit.*

**J**AM super Herculeas fauces, nemorosaque Tempe,  
 Hæmoniaë deserta petens dispendia silvæ,  
 Cornipedem exhaustum cursu, stimulisque negantem  
 Magnus agens, incerta fugæ vestigia turbat,

Implicitasque errore vias. Pavet ille fragorem  
Motorum ventis nemorum, comitumque suorum,  
Qui post terga redit: trepidum, laterique timentem  
Exanimat. Quamvis summo de culmine lapsus,  
Nondum vile sui pretium scit sanguinis esse,  
Seque memor fati tantæ mercedis habere  
Credit adhuc jugulum, quantum pro Cæsaris ipse  
Avulsa cervice daret. Deserta sequentem  
Non patitur tutis fatum celare latebris  
Clara viri facies. Multi Pharsalia castra  
Quum peterent, nondum fama prodente ruinas,  
Occursum stupere ducis, vertigine rerum  
Adtoniti: cladisque suæ vix ipse fidelis  
Auctor erat. Gravis est Magno, quicumque malorum  
Testis adest. Cunctis ignotus gentibus esse  
Mallet, & obscuro tutus transire per urbes (1)  
Nomine: sed longi pœnas Fortuna favoris  
Exigit a misero, quæ tanto pondere famæ  
Res premit adversas, fatisque prioribus urguet.  
Nunc festinatos nimium sibi sentit honores,  
Atque lauriferæ damnat Sullana juventæ.  
Nunc & Corycias classes, & Pontica signa  
Dejectum meminisse piget. Sic longius ævum  
Destruit (2) ingentes animos, & vita superstes  
Imperio. Nisi summa dies cum fine bonorum

(1) per orbem *vulgo*.(2) deserit *MSS. iter*.

Adfuit, & celeri prævertit tristia leto,  
Dedecori est Fortuna prior. Quisquamne secundis  
Tradere se fatis audet, nisi morte parata?  
Litora contigerat, per quæ Penejus amnis  
Emathia jam clade rubens exhibat in æquor.  
Inde ratis trepidum ventis, ac fluctibus impar,  
Flumineis vix tuta vadis evexit in altum:  
Cujus adhuc remis quatitur Corcyra, sinusque  
Leucadii. Cilicum dominus, terræque Liburnæ,  
Exiguam vector pavidus correpsit in alnum.  
Conscia curarum secreta in litora Lesbi  
Flectere vela jubes, qua tunc tellure latebas  
Mœstior, in mediis quam si, Cornelia, campis  
Emathiæ stares. Tristes præsagia curas  
Exagitant: trepida quatitur formidine somnus:  
Thessaliæ nox omnis habet: tenebrisque remotis  
Rupis in abruptæ scopulos, extremaque curris  
Litora prospiciens fluctus: nutantia longe  
Semper prima vides venientis vela carinæ,  
Quærere nec quidquam de fato conjugis audes.  
En ratis, ad vestros quæ tendit carbasa portus  
Quid ferat ignoras: & nunc tibi summa pavoris,  
Nuntius armorum tristis, rumorque sinister.  
Victus adest conjux. Quid perdis tempora luctus?  
Quum possis jam flere, times. Tunc puppe propinqua  
Prosiluit, crimenque deum crudele notavit,  
Deformem pallore ducem, vultusque prementem

Cauitæ, atque atro squalentes pulvere vèstes.  
Obvia nox miseræ cœlum, lucemque tenebris  
Abstulit, atque animam clausit dolor: omnia pèrvis  
Membra relicta labant: riguerunt corda, diuque  
Spe mortis decepta jacet. Jam fune ligato  
Litoribus, lustrat vacuas Pompejus arenas.  
Quem postquam famulæ propius videre fideles,  
Non ultra gemitus tacitos incessere fatum  
Permiserè sibi, frustra que adtollere terra  
Semianimem conantur heram: quam pectore Magnus  
Ambit, & adstrictos refovet complexibus artus.  
Cœperat in summum revocato sanguine corpus  
Pompeji sentire manus, mœstamque mariti  
Posse pati faciem: prohibet succumbere fatis  
Magnus, & inmodicos castigat voce dolores.

„Nobile cur robur Fortunæ vulnere primo,  
„Femina, tantorum titulis insignis avorum  
„Frangis? Habes aditum mansuræ in sæcula famæ,  
„Laudis in hoc sexu, non legum jura, neque arma,  
„Unica materia est conjux miser. Erige mentem,  
„Et tua cum fatis pietas decertet, & ipsum,  
„Quod sum victus, ama: nunc sum tibi gloria major,  
„A me quod fasces, & quod pia turba senatus,  
„Tantaque discessit regum manus: incipe Magnum  
„Sola sequi. Deformis, adhuc vivente marito,  
„Summus, & augeri vetitus dolor: ultima debet  
„Esse fides, lugere virum. Tu nulla tulisti

„Bello damna meo. Vivit post prælia Magnus,  
„Sed Fortuna perit: quod defles, illud amasti.“

Vocibus his correpta viri, vix ægra levavit  
Membra solo, tales gemitu rumpente querelas:

„O utinam in thalamos invisi Cæsaris issem

„Infelix conjux, & nulli læta marito!

„Bis nocui mundo: me pronuba ducit Erinnyes,

„Crassorumque umbræ, devotaque manibus illis

„Assyrios in castra tuli civilia casus:

„Præcipitesque dedi populos, cunctosque fugavi

„A caussa meliore deos. O maxime conjux,

„O thalamis indigne meis, hoc juris habebat

„In tantum Fortuna caput! cur impia nupsi,

„Si miserum factura fui? nunc accipe pœnas,

„Sed quas sponte luam. Quo sit tibi mollius æquor,

„Certa fides regum, totusque paratior orbis,

„Sparge mari comitem. Mallem felicibus armis

„Dependisse (1) caput: nunc clades denique lustra

„Magne tuas. Ubiqumque jaces civilibus armis

„Nostros ulta toros, ades huc, atque exige pœnas,

„Julia crudelis, placataque pellice cæsa,

„Magno parce tuo.“ Sic fata, iterumque refusa

Conjugis in gremium, cunctorum lumina solvit

In lacrimas. Duri flectuntur pectora Magni,

Siccaque Thessaliæ confudit lumina Lesbos.

Tunc

(1) dependisse, dispendisse MSS.



Tunc Mitylenæum pleno jam litore vulgus  
 Adfatur Magnum: „Si maxima gloria nobis  
 „Semper erit tanti pignus servasse mariti,  
 „Tu quoque devotos sacro tibi fœdere muros,  
 „Oramus, sociosque lares dignare vel una  
 „Nocte tua: fac Magne locum, quem cuncta revisant  
 „Sæcula; quem veniens hospes Romanus adoret?  
 „Nulla tibi subeunda magis sunt mœnia viçio.  
 „Omnia victoris possunt sperare favorem:  
 „Hæc jam crimen habent. Quid, quod jacet insula ponto,  
 „Cæsar eget ratibus? Procerum pars magna coibit  
 „Certa loci. Noto reparandum est litore fatum.  
 „Accipe templorum cultus, aurumque deorum:  
 „Accipe, si terris, si puppibus ista juvenus  
 „Aptior est: tota, quantum valet, utere Lesbo.  
 „(Accipe: ne Cæsar rapiat, tu victus habeto.)  
 „Hoc solum crimen meritæ bene detrahe terræ,  
 „Ne nostram videre fidem felixque secutus,  
 „Et damnassee miser. “ Tali pietate virorum  
 Lætus, in adversis, & mundi nomine gaudens,  
 Esse fidem: „Nullo toto mihi, dixit, in orbe  
 „Gratius esse solum, non vobis pignore parvo  
 „Ostendi. Tenuit nostros hac obside Lesbos  
 „Adfectus: hic sacra domus, carique (1) penates,  
 „Hic mihi Roma fuit. Non ulla in litora puppim

(1) darique *Ald. & Junt.*

„Ante dedi fugiens, sævi quum Cæsaris iram  
„Jam scirem meritam, servata conjuge, Lesbos,  
„Non veritus tantam veniæ committere vobis  
„Materiem. Sed jam satis est fecisse nocentes:  
„Fata mihi totum mea sunt agitanda per orbem.  
„Heu nimium felix æterno nomine Lesbos!  
„Sive doces populos, Regesque admittere Magnum,  
„Seu præstas mihi sola fidem. Nam quærere certum est  
„Fas quibus in terris, ubi sit scelus. Accipe numen,  
„Si quod adhuc mecum es, votorum extrema meorum.  
„Da similes Lesbo populos, qui Marte subactum  
„Non intrare suos, infesto Cæsare, portus,  
„Non exire vetent.“ Dixit, mœstamque carinæ  
Imposuit comitem. Cunctos mutare putares  
Tellurem, patriumque solum: sic litore toto  
Plangitur, infestæ tenduntur in æthera dextræ:  
Pompejumque minus, cujus Fortuna dolorem  
Moverat, ast illam, quam toto tempore belli  
Ut civem videre suam, discedere cernens  
Ingemuit populus: quam vix si castra mariti  
Victoris peteret, siccis dimittere matres  
Jam poterant oculis: tanto devinxit amore  
Hos pudor, hos probitas, castique modestia vultus,  
Quod submissa nimis, nulli gravis hospita turbæ,  
Stantis adhuc fati vixit quasi conjuge victo.  
Jam pelago medios Titan demissus ad ignes,  
Nec quibus abscondit, nec si quibus exerit orbem,

Totus erat: vigiles Pompeji pectore curæ  
 Nunc socias adeunt Romani fœderis urbes,  
 Et varias regum mentes, nunc invia mundi  
 Arva super nimios soles, Austrumque jacentes.  
 Sæpe labor mœstus curarum, odiumque futuri  
 Projecit fessos incerti pectoris æstus,  
 Rectoremque ratis de cunctis consulit astris:  
 Unde notet terras; quæ sit mensura secandi  
 Æquoris in cœlo; Syriam quo sidere servet:  
 Aut quotus in plaustro Libyen bene dirigat ignis.  
 Doctus ad hæc satur taciti servator Olympi:  
 „Signifero quæcumque fluunt labentia cœlo  
 „Numquam stante polo, miseros fallentia nautas  
 „Sidera non sequimur: sed qui non mergitur undis  
 „Axis inocciduus, gemina clarissimus Arctō,  
 „Ille regit puppes. Hic quum mihi semper in altum  
 „Surget, & instabit summus minor Ursa ceruchis;  
 „Bosporon, & Scythiæ curvantem litora pontum  
 „Spectamus. Quidquid descendet ab arbore summa  
 „Arctophylax, propiorque mari Cynosura feretur,  
 „In Syriæ portus tendit ratis. Inde Canopus  
 „Excipit Australi cœlo contenta vagari;  
 „Stella timens Borean: illa quoque pergo (1) sinistra,  
 „Trans Pharon, in medio tanget ratis æquore Syrtin.  
 „Sed quo vela dari, quo nunc pede carbasa tendi

(1) perge *vulgo*. parte, parce *MSS.*

„Nostra jubes?“ dubio contra cui pectore Magnus,  
 „Hoc solum toto, respondit, in æquore (1) serva,  
 „Ut sit ab Emathiis semper tibi longius oris  
 „Puppis, & Hesperien pelago, cœloque relinquo:  
 „Cetera da ventis. Comitum, pignusque recepi  
 „Depositum: tunc certus eram, quæ litora vellem;  
 „Nunc portum Fortuna dabit.“ Sic fatur: at ille  
 Justo vela modo pendentia cornibus æquis  
 Torsit, & in lævum puppim dedit, utque secaret,  
 Quas Samiæ (2) cautes, & quas Chios asperat, undas,  
 Hos dedit in proram, tenet hos in puppe rudentes.  
 Æquora senserunt motus, aliterque secante  
 Jam pelagus rostro, nec idem spectante carina,  
 Mutavere sonum. Non sic moderator equorum,  
 Dexteriore rota lævum quum circumit axem,  
 Cogit inoffensæ currus accedere metæ.  
 Ostendit terras Titan, & sidera textit.  
 Sparsus ab Emathia fugit quicumque procella,  
 Adsequitur Magnum: primusque ab litore Lesbi  
 Occurrit natus, procerum mox turba fidelis.  
 Nam neque dejecto fatis, acieque fugato  
 Abstulerat Magno reges Fortuna ministros.  
 Terrarum dominos, & sceptrâ Eoa tenentes  
 Exsul habet comites. Jubet ire in devia mundi  
 Dejotarum, qui sparsa ducis vestigia legit.

(1) ab æquore MSS. probati.

(2) Asiæ, Sasinæ, Asinæ MSS.

„Quando, ait, Emathiis amissus cladibus orbis  
 „Qua Romanus erat, superest, fidissime regum,  
 „Eoam tentare fidem, populosque bibentes  
 „Euphraten, & adhuc securum a Cæsare Tigrin:  
 „Nec pigeat Magno quærentem fata remotas  
 „Medorum penetrare domus, Scythiosque recessus,  
 „Et totum mutare diem, vocesque superbo  
 „Arsacidæ perferre meas: Si fœdera nobis  
 „Prisca manent, mihi per Latium jurata Tonantem,  
 „Per vestros adstricta magos, implete pharetras,  
 „Armeniosque arcus Geticis intendite nervis:  
 „Si vos, o Parthi, peterem quum Caspia claustra,  
 „Et sequerer duros æterni Martis Alanos,  
 „Passus Achæmeniis late discurrere campis,  
 „In tutam trepidos numquam Babylona coegi:  
 „Arva super Cyri, Chaldæique ultima regni,  
 „Qua rapidus Ganges, & qua Nysæus Hydaspes  
 „Accedunt pelago, Phœbi surgentis ab igne  
 „Jam propior, quam Persis, eram: tamen omnia vincens  
 „Sustinui nostris vos tantum deesse triumphis:  
 „Solutusque e numero regum telluris Eoæ,  
 „Ex æquo me Parthus adit. Nec munere Magni  
 „Stant semel Arsacidæ. Quis enim post vulnera cladis  
 „Assyriæ justas Latii compescuit iras?  
 „Tot meritis obstricta meis, nunc Parthia ruptis  
 „Excedat claustris vetitam per sæcula ripam,  
 „Zeugmaque Pellæum. Pompejo vincite Parthi;

„Vinci Roma völet.“ Regem parere iubenti  
Ardua non piguit, positisque insignibus aulæ  
Egreditur famuli raptos indutus amictus.  
In dubiis tutum est inopem simulare tyranno.  
Quantum (1) igitur mundi dominis securius ævum  
Verus pauper agit! dimisso in litora rege,  
Ipse per Icarix scopulos, Ephesonque relinquens,  
Et placidi Colophona maris, spumantia parvæ  
Radit saxa Sami: spirat de litore Coö  
Aura fluens: Gnidon inde fugit, claramque relinquit  
Sole Rhodon, magnosque sinus Telmessidos undæ  
Compensat medio pelago. Pamphylia puppi  
Occurrit tellus: nec se committere muris  
Ausus adhuc ullis, te primum, parva Phaseli,  
Magnus adit. Nam te metui vetat incola rarus,  
Exhaustæque domus populis; majorque carinæ  
Quam tua turba fuit. Tendens hinc carbasa rursus  
Jam Taurum, Tauroque videt Dipsunta cadentem.  
Crederet hoc Magnus, pacem quum præstitit undis  
Et sibi consultum? Cilicum per litora tutus  
Parva puppe fugit: sequitur pars magna senatus  
Ad profugum collecta ducem: parvisque Syedris,  
Qua portu mittitque rates recipitque Selinus,  
In Procerum cœtu tandem mœsta ora resolvit  
Vocibus his Magnus: „Comites bellicæ, fugæque,

(1) quantum ex MSS. quanto vulgo.

„Atque instar patriæ, quamvis in litore nudo,  
 „In Cilicum terra, nullis circumdatus armis  
 „Consultem, rebusque novis (1) exordia quæram,  
 „Ingentes præstate animos: non omnis in arvis  
 „Emathiis cecidi, nec sic mea fata premuntur,  
 „Ut nequeam relevare caput, cladesque receptas  
 „Excutere. An Libyæ Marium potuere ruinæ  
 „Erigere in fasces, plenis & reddere fastis:  
 „Me pulsum leviori manu Fortuna tenebit?  
 „Mille meæ Grajo volvuntur in æquore puppes,  
 „Mille duces: sparsit potius Pharſalia nostras,  
 „Quam subvertit opes. Sed me vel sola tueri  
 „Fama potest rerum, toto quas gessimus orbe,  
 „Et nomen, quod mundus amat. Vos pendite regna  
 „Viribus, atque fide, Libyen, Parthosque, Pharonque,  
 „Quænam Romanis deceat succurrere rebus.  
 „Ast ego curarum, vobis, arcana mearum  
 „Expromam, mentisque meæ quo pondera vergant.  
 „Ætas Niliaci nobis suspecta tyranni est:  
 „Ardua quippe fides robustos exigit annos.  
 „Hinc anceps dubii terret sollertia Mauri:  
 „Namque memor generis Carthaginis impia proles  
 „Inminet Hesperia, multusque in pectore vano est  
 „Hannibal, obliquo maculat qui sanguine regnum,  
 „Et Numidas contingit avos: jam supplice Varo

(1) meis plerique MSS. & edd. vet.

- „Intumuit, viditque loco Romana secundo.  
„Quare agite, Eoum; comites, properemus in orbem.  
„Dividit Euphrates ingentem gurgite mundum,  
„Caspiaque inmensos seducunt claustra recessus,  
„Et polus Assyrias alter noctesque, diesque  
„Vertit, & abruptum est nostro mare discolor unda,  
„Oceanusque suus. Regnandi sola voluptas.  
„Celsior in campis sonipes, & fortior arcus;  
„Nec puer aut senior letales tendere nervos  
„Segnis, & a nulla mors est incerta sagitta.  
„Primi Pellæas arcu fregere sarissas,  
„Bactraque Medorum sedem, murisque superbam  
„Assyrias Babylona domus. Nec pila timentur  
„Nostra nimis Parthis, audentque in bella venire,  
„Experti Scythicas, Crasso pereunte, pharetras.  
„Spicula nec solo spargunt fidentia ferro;  
„Stridula sed multo saturantur tela veneno.  
„Vulnera parva nocent, fatumque in sanguine summo est.  
„O utinam non tanta mihi fiducia sævis  
„Esset in Arsacidis! fatis nimis æmula nostris  
„Fata movent Medos, multumque in gente deorum est.  
„Effundam populos alia tellure revulsos,  
„Excitosque suis inmittam sedibus ortus.  
„Quod si nos Eoa fides, & Barbara fallunt  
„Fœdera; vulgati supra commercia mundi  
„Naufragium Fortuna ferat. Non regna precabor,  
„Quæ feci; sed magna feram solatia mortis



„Orbe jacens alio, nihil hæc in membra cruenta,  
 „Nil socerum fecisse pie. Sed cuncta revolvens  
 „Vitæ fata meæ, semper venerabilis illa  
 „Orbis parte fui: quantus Mæotida supra!  
 „Quantus apud Tanain toto conspectus in ortu!  
 „Quas magis in terras nostrum felicibus adis  
 „Nomen abit; aut unde redit majore triumpho?  
 „Roma, fave cœptis: quid enim tibi lætius umquam  
 „Præstiterint superi, quam, si civilia Partho  
 „Milite bella geras, tantam consumere gentem,  
 „Et nostris miscere malis? Quum Cæsaris arma  
 „Concurrent Medis, aut me Fortuna necesse est  
 „Vindicet, aut Grassos.“ Sic fatus, murmure sentit  
 Consilium damnassee viros: quos Lentulus omnes  
 Virtutis stimulis, & nobilitate dolendi  
 Præcessit, dignasque tulit modo consule voces:

„Siccine Thessaliæ mentem fregero ruinæ?  
 „Una dies mundi damnavit fata? secundum  
 „Emathiam lis tanta datur? jacet omne cruenti  
 „Vulneris auxilium? solos tibi, Magne, reliquit  
 „Parthorum Fortuna pedes? quid transfuga mundi  
 „Terrarum totos tractus, cœlumque perosus  
 „Aversosque (1) polos, alienaque sidera quæris,  
 „Chaldæos culture focos & barbara sacra  
 „Parthorum famulus? quid caussa obtenditur armis,

(1) adversosque *vulgo*.

„Libertatis amor? miserum quid decipis orbem,  
 „Si servire potes? te, quem Romana regentem  
 „Horruit auditu, quem captos ducere reges  
 „Vidit ab Hyrcanis, Indoque ab litore, silvis,  
 „Dejectum fatis, humilem fractumque videbit,  
 „Extolletque animos Latium vesanus in orbem,  
 „Se simul, & Romam, Pompejo supplice, mensus?  
 „Nil animis, fatisque tuis effabere dignum:  
 „Exiget ignorans Latiae commercia linguæ,  
 „Ut lacrimis se, Magne, roges. Patimurne pudoris  
 „Hoc vulnus, clades ut Parthia vindicet ante  
 „Hesperias, quam Roma suas? civilibus armis  
 „Elegit te nempe ducem. Quid vulnera nostra  
 „In Scythios spargis populos, cladesque latentes?  
 „Quid Parthos transire doces? solatia tanti  
 „Perdit Roma mali, nullos admittere reges,  
 „Sed civi servire suo. Juvat ire per orbem  
 „Ducentem sævas Romana in moenia gentes,  
 „Signaque ab Euphrate cum Crassis capta sequentem?  
 „Qui solus regum, fato celante favorem,  
 „Defuit Emathiae, nunc tantas ille lacesset  
 „Auditi victoris opes, aut jungere fata  
 „Tecum, Magne, volet? non hæc fiducia genti est.  
 „Omnis in Arctoïs populus quicumque pruinis  
 „Nascitur, indomitus bellis, & mortis amator.  
 „Quidquid ad Eoos tractus, mundique teporem  
 „Labitur, emollit gentes clementia cœli.

„Illic & laxas vestes, & fluxa virorum  
 „Velamenta vides. Parthus per Media rura,  
 „Sarmaticos inter campos, effusaque plano  
 „Tigridis arva solo nullo superabilis hosti est  
 „Libertate fugæ: sed non, ubi terra tumebit,  
 „Aspera conscendit montis iuga; nec per opacas  
 „Bella gerit tenebras incerto debilis arcu,  
 „Nec frangit nando violenti verticis (1) ænnem,  
 „Nec tota in pugna perfusus sanguine membra  
 „Exigit æstivum calido sub pulvere solem.  
 „Non aries illis, non ulla est machina belli:  
 „Haud fossas implere valent: Parthoque sequente  
 „Murus erit, quodcumque potest obstare sagittæ.  
 „Pugna levis, bellumque fugax, turmæque vagantes,  
 „Et melior cessisse loco, quam pellere, miles.  
 „Illita tela dolis, nec Martem comminus umquam  
 „Ausa pati virtus, sed longe tendere nervos,  
 „Et, quo ferre velint, permittere vulnèra ventis.  
 „Ensis habet vires, & gens quæcumque virorum est  
 „Bella gerit gladiis, nam Medos prælia prima  
 „Exarmant, vacuæque jubent remeare pharetræ.  
 „Nulla manus illis, fiducia tota veneni est.  
 „Credis, Magne, viros, quos in discrimina belli  
 „Cum ferro misisse parum est? tentare pudendum  
 „Auxilium tanti est, toto divisus ut orbe

(1) vorticis MSS. plures, gurgitis alius.

„A terra moriari tua? tibi barbara tellus  
 „Incumbat, te parva tegant, ac vilia busta,  
 „Invidiosa tamen, Crasso quærente sepulcrum?  
 „Sed tua sors levior, quoniam mors ultima pœna,  
 „Nec metuenda viris. At non Cornelia letum  
 „Infando sub rege timet. Num barbara vobis  
 „Est ignota Venus, quæ ritu cæca ferarum  
 „Polluit innumeris leges, & fœdera tedæ  
 „Conjugibus, thalamique patent secreta nefandi?  
 „Inter mille nurus epulis vesana, meroque  
 „Regia non ullos exceptos legibus horret (1)  
 „Concubitus: tot femineis complexibus unum  
 „Non lassat nox tota marem. Jacuere sorores  
 „In regum (2) thalamis, sacrataque pignora matres.  
 „Damnat apud gentes sceleris non sponte peracti  
 „Œdipodionidas infelix fabula Thebas:  
 „Parthorum dominus quoties sic sanguine mixto  
 „Nascitur Arsacides? cui fas implere parentem,  
 „Quid rear esse nefas? proles tam clara Metelli  
 „Stabit barbarico conjux millesima lecto.  
 „Quamquam non ulli plus regia, Magne, vacabit  
 „Sævitia stimulata Venus, titulisque virorum.  
 „Nam quo plura juvent Parthum portenta, fuisse  
 „Hanc sciet & Crassi: ceu pridein debita fati  
 „Assyriis, trahitur cladis captiva vetustæ.

(1) audet *edd. Ald. & Junt.*

(2) fratrum *MSS. aliquot.*

„Hæreat Eoæ vulnus miserabile sortis;  
 „Non solum auxilium funesto ab rege petisse,  
 „Sed gessisse prius bellum civile pudebit.  
 „Nam quod apud populos crimen socerique, tuumque  
 „Majus erit, quam quod vobis miscentibus arma,  
 „Crassorum vindicta perit? incurrere cuncti  
 „Debuerant in Bactra duces, & ne qua vacarent  
 „Arma, vel Arctoum Dacis, Rhenique catervis  
 „Imperii nudare latus, dum perfida Susa  
 „In tumulos prolapsa virum, Babylonque jacerent (1).  
 „Assyriæ paci finem, Fortuna, precamur.  
 „Et, si Thessaliæ bellum civile peractum est,  
 „Ad Parthos, qui vicit, eat. Gens unica mundi est,  
 „De qua Cæsareis possim gaudere triumphis.  
 „Non tibi, quum gelidum primum transibis Araxen,  
 „Umbra senis mæsti Scythicis confixa sagittis  
 „Ingeret has voces? Tu, quem post funera nostra  
 „Ultorem cinerum nudæ speravimus umbræ,  
 „Ad fœdus, pacemque venis? Tum plurima cladis  
 „Occurrent monumenta tibi: quæ mœnia trunci,  
 „Lustrarunt cervice duces, ubi nomina tanta  
 „Obruit Euphrates, & nostra cadavera Tigris  
 „Detulit in terras, ac reddidit. Ire per ista  
 „Si potēs, in media socerum quoque, Magne, sedentem  
 „Thessalia placare potes. Quin respicis orbem

(1) jaceret plurimi MSS. & edd.

„Romanum? si regna times projecta sub Austro,  
 „Infidumque Jubam, petimus Pharon, arvaque Lagi.  
 „Syrtibus hinc Libycis tuta est Ægyptos: at inde  
 „Gurgite septeno rapidus mare submovet amnis:  
 „Terra suis contenta bonis, non indiga mercis,  
 „Aut Jovis: in solo tanta est fiducia Nilo.  
 „Sceptra puer Ptolemæus habet tibi debita, Magne,  
 „Tutelæ commissa tuæ. Quis nominis umbram  
 „Horreat? innocua est ætas: ne jura fidemque,  
 „Respectumque deûm veteris speraveris aulæ.  
 „Nil pudet adsuetos sceptris: mitissima sors est  
 „Regnorum sub rege novo.“ Non plura locutus  
 Impulit huc animos. Quantum spes ultima rerum  
 Libertatis habes! victa est sententia Magni.

Tunc Cilicum liquere solum, Cyproque citatas  
 Inmisere rates, nullas cui prætulit aras  
 Undæ diva memor Paphiæ, si numina nasci  
 Credimus, aut quemquam fas est cœpisse deorum.  
 Hæc ubi deseruit Pompejus litora, totos  
 Emensus Cypri scopulos, quibus exit in Austrum,  
 Inde maris vasti transverso nititur (1) æstu:  
 Nec tenuit gratam nocturno lumine Pharon,  
 Infimæque Ægypti pugnaci litora velo  
 Vix tetigit, qua dividui pars maxima Nili  
 In vada decurrit Pelusia septimus amnis.

(1) vertitur MSS. & add. fere omnes.

Tempus erat, quo Libra pares examinat horas  
 Non una plus æqua die, noctique rependit  
 Lux minor hybernæ verni solatia damni.

Comperit ut regem Casio se monte tenere,  
 Flecxit iter: nec Phœbus adhuc, nec carbasa languent.

Jam rapido speculator eques per litora cursu  
 Hospitis adventu pavidam compleverat aulam.

Consiliis vix tempus erat: tamen omnia monstra  
 Pellææ coiere domus: quos inter Achoreus

Jam placidus senio, fractisque modestior annis,  
 (Hunc genuit custos Nili crescentis in arva

Memphis vana sacris; illo cultore deorum  
 Lustra suæ Phœbes non unus vixerat (1) Apis)

Consilii vox prima fuit, meritumque, fidemque,  
 Sacraque defuncti jactavit pignora patris.

Sed melior suadere malis, & nosse tyrannos,  
 Ausus Pompejum leto damnare Pothinus:

„Jus, & fas multos faciunt, Ptolemæe, nocentes.

„Dat pœnas laudata fides, quum sustinet, inquit,

„Quos Fortuna premit. Fatis accede, deisque,

„Et cole felices, miseros fuge. Sidera terræ

„Ut distant, ut flamma mari, sic utile recto.

„Sceptrorum vis tota perit, si pendere justa

„Incipit: evertitque arces respectus honesti.

„Libertas scelerum est, quæ regna invisa tuetur,

(1) vexerat MSS. & add. permittit.

„Sublatusque modus gladiis. Facere omnia sæve  
 „Non impune licet, nisi quum facis. Exeat aula  
 „Qui volet (1) esse pius. Virtus, & summa potestas  
 „Non coeunt: semper metuet, quem sæva pudebunt.  
 „Non impune tuos Magnus contemserit annos;  
 „Qui te nec victos arcere ab litore nostro  
 „Posse putat. Neu te sceptris privaverit hospes,  
 „Pignora sunt propiora tibi: Nilonque, Pharonque,  
 „Si regnare piget, damnatæ redde sorori.  
 „Ægypton certe Latiis tueamur ab armis.  
 „Quidquid non fuerit Magni, dum bella geruntur,  
 „Nec victoris erit. Toto jam pulsus ab orbe,  
 „Postquam nulla manet rerum fiducia, quærit  
 „Cum qua gente cadat: rapitur civilibus umbris.  
 „Nec soceri tantum arma fugit: fugit ora senatus,  
 „Cujus Thessalias saturat pars magna volucres.  
 „Et metuit gentes, quas uno sanguine mixtas  
 „Deseruit: regesque timet, quorum omnia mersit:  
 „Thessaliæque reus, nulla tellure receptus,  
 „Sollicitat nostrum, quem nondum prodidit, orbem.  
 „Justior in Magnum nobis, Ptolemæe, querelæ  
 „Causa data est. Quid sepositam, semperque quietam  
 „Crimine bellorum maculas Pharon, arvaque nostra  
 „Victori suspecta facis? cur sola cadenti  
 „Hæc placuit tellus, in quam Pharsalia fata  
 „Con-

(1) vult MSS. plerique, Priscian. Salisb.



„Conferres, pœnasque tuas? jam crimen habemus  
 „Purgandum gladio, quod nobis sceptrâ senatus  
 „Te suadente dedit. Votis tua fovimus arma.  
 „Hoc ferrum, quod fata jubent proferre, paravi  
 „Non tibi, sed victo. Feriam tua viscera, Magne:  
 „Malueram soceri: rapimur, quo cuncta feruntur.  
 „Tene mihi dubitas an sit violare necesse,  
 „Quum liceat? nôstri quæ te fiducia regni  
 „Huc agit infelix? populum non cernis inermem,  
 „Arvaque vix refugo fodientem mollia Nilo?  
 „Metiri sua regna decet viresque fateri.  
 „Tu Ptolemæe potes Magni fulcire ruinam,  
 „Sub qua Roma jacet? bustum, cineresque movere  
 „Thessalios audes, bellumque in regna vocare?  
 „Ante aciem Emathiam nullis accessimus armis:  
 „Pompeji nunc castra placent, quæ deserit orbis?  
 „Nunc victoris opes, & cognita fata lacesis?  
 „Adversis non deesse decet, sed læta secutos (1).  
 „Nulla fides umquam miseros elegit amicos.“

Adsensere omnes sceleri. Lætatur honore  
 Rex puer însueto, quod jam sibi tanta jubere  
 Permittant famuli. Sceleri delectus Achilles.  
 Perfida qua tellus Casiis excurrit (2) arenis,  
 Et vada testantur junctas Ægyptia Syrtes,  
 Exiguam sociis monstri, gladiisque carinam,

(1) securis *Membrana vet.*

(2) exsultat *MSS. novemdec.*

Instruit. O superi, Nilusne, & barbara Memphis,  
Et Pelusiaci tam mollis turba Canopi  
Hos animos! sic fata premunt civilia mundum!  
Sic Romana jacent! ullusne in cladibus istis  
Est locus Ægypto, Phariusque admittitur ensis?  
Hanc certe servate fidem civilia bella:  
Cognatas præstate manus, externaque monstra  
Pellite, si meruit tam claro nomine Magnus  
Cæsaris esse nefas. Tanti Ptolemæe ruinam  
Nominis haud metuis? cœloque tonante, profanas  
Inseruisse manus impure, ac semivir audes?  
Non domitor mundi, nec ter Capitolia curru  
Inventus, regumque potens, vindexque senatus,  
Victorisque gener; Phario satis esse tyranno  
Quod poterat, Romanus erat. Quid viscera nostra  
Scrutaris gladio? nescis, puer improbe, nescis  
Quo tua sit Fortuna loco: jam jure sine ullo  
Nili sceptrâ tenes: cecidit civilibus armis  
Qui tibi régna dedit. Jam vento vela negarat  
Magnus, & auxilio remorum infanda petebat  
Litora: quem contra non longa vecta biremi  
Adpulerat scelerata manus: Magnoque patere  
Fingens regna Phari, celsæ de puppe carinæ  
In parvam jubet ire ratem, litusque malignum  
Incusat, bimaremque vadis frangentibus æstum,  
Qui vetet externas terras advertere (1) classes.

(1) adpellere MSS. plurimi.

Quod nisi fatorum leges, intentaque jussu  
 Ordinis æterni miseræ vicinia mortis  
 Dammatum leto traherent ad litora Magnum;  
 Non ulli comitum sceleris præsentia decrant.  
 Quippe fides si pura foret, si regia Magno  
 Sceptrorum auctori vera pietate pateret;  
 Venturum tota Pharium cum classe tyrannum.  
 Sed cedit fatis, sociosque relinquere jussus  
 Obsequitur, letumque juvat præferre timori.  
 Ibat in hostilem præceps Cornelia puppim,  
 Hoc magis impatiens egresso deesse marito,  
 Quod metuit clades. „Remane temeraria conjux,  
 „Et tu nate precor, longeque e litore casus  
 „Exspectate meos; & in hac cervicè tyranni  
 „Explore fidem,“ dixit. Sed dura vetanti  
 Tendebat geminas amens Cornelia palmas:  
 „Quò sine me crudelis abis? iterumne relinquitur  
 „Thessalicis subinotamalis? numquam omine læto  
 „Distrahimur miseri. Poteras non flectere puppim,  
 „Quum fugeres alto, latebrisque relinquere Lesbi,  
 „Omnibus a terris si nos arcere parabas?  
 „An tantum in fluctus placeo comes?“ Hæc ubi frustra  
 Effudit, prima pendet tamen anxia puppe:  
 Adtonitoque metu nec quòquam avertere visus,  
 Nec Magnum spectare potest. Stetit anxia classis  
 Ad ducis eventum, metuens non arma, nefasque;  
 Sed ne submissis precibus Pompejus adoret

Sceptra sua donata manu. Transire parantem  
Romanus Pharia miles de puppe salutat  
Septimius: qui, pro superûm pudor, arma satelles  
Regia gestabat posito deformia pilo:  
Inmanis, violentus, atrox, nullaque ferarum  
Mitior in cædes. Quis non, Fortuna, putasset  
Parcere te populis, quod bello hæc dextra vacaret,  
Thessaliaque procul tam noxia tela fugasses?  
Disponis gladios, ne quo non fiat in orbe,  
Heu, facinus civile tibi. Victoribus ipsis  
Dedecus, & numquam superûm caritura pudore  
Fabula; Romanus regi sic paruit ensis,  
Pellæusque puer gladio tibi colla recidit,  
Magne, tuo. Qua posteritas in sæcula mittet  
Septimium fama! scelus hoc quo nomine dicent,  
Qui Bruti dixere nefas? Jam venerat horæ  
Terminus extremæ, Phariamque ablatus in alnum.  
Perdiderat jam jura sui, quum stringere ferrum  
Regia monstra parant. Ut vidit comminus enses,  
Involvit vultus: atque indignatus apertum  
Fortunæ præstare caput, tunc lumina pressit,  
Continuitque animam, ne quas effundere voces  
Vellet, & æternam fletu corrumpere famam.  
At postquam mucrone latus funestus Achilles  
Perfodit, nullo gemitu consensit ad ictum,  
Despexitque nefas, servatque immobile corpus,  
Seque probat moriens, atque hæc in pectore volvit:

„Sæcula Romanos numquam tacitura labores  
„Adtendunt, ævumque sequens speculatur ab omni  
„Orbe ratem, Phariamque fidem. Nunc consule famæ.  
„Fata tibi longæ fluxerunt prospera vitæ:  
„Ignorant populi, si non in mortē probaris,  
„An scieris adversa pati. Ne cede pudori,  
„Auctoremque dole fati. Quacumque feriris,  
„Crede manum soceri. Spargant, lacerentque licebit,  
„Sum tamen, o superi, felix, nullique potestas  
„Hoc auferre deo. Mutantur prospera vita:  
„Non fit morte miser. Videt hanc Cornelia cædem,  
„Pompejusque meus. Tantum patientius oro  
„Claude dolor gemitus: natus, conjuxque peremtum  
„Si mirantur, amant.“ Talis custodia Magno  
Mentis erat: jus hoc animi morientis habebat.

At non tam patiens Cornelia cernere sævum  
Quam perferre nefas, miserandis æthera complet  
Vocibus: „O conjux, ego te scelerata peremi:  
„Letiferæ tibi causa moræ fuit avia Lesbos,  
„Et prior in Nili pervenit litora Cæsar.  
„Nam cui jus alii sceleris? sed quisquis in istud  
„A superis inmisit caput, vel Cæsaris iræ,  
„Vel tibi prospiciens, nescis crudelis, ubi ipsa  
„Viscera sint Magni: properas, atque ingeris ictus,  
„Qua votum est victo. Pœnas non morte minores  
„Pendat, & ante meum videat caput. Haud ego culpa  
„Libera bellorum, matrum quæ sola per undas,

„Et per castra comes, nullis absterrita fatīs,  
 „Viſtum, quod reges etiam timuere, recepi.  
 „Hoc merui conjux in tuta puppe relinqui?  
 „Perfide parcebas? te fata extrema petente  
 „Vita digna fui? moriar, nec munere regis.  
 „Aut mihi præcipitem nautæ permittite saltum,  
 „Aut laqueum collo tortosque aptare rudentes:  
 „Aut aliquis Magno dignus comes exigat ensem.  
 „Pompejo præſtare poteſt, quod Cæſaris armis  
 „Imputet. O ſævi, properantem in fata tenetis?  
 „Vivis adhuc conjux, & jam Cornelia non eſt  
 „Juris, Magne, ſui. Prohibent arceſſere mortem:  
 „Servor victori.“ Sic fata, interque ſuorum  
 Lapsa manus, rapitur, trepida fugiente carina.

At Magni quum terga ſonent, & pectora ferro,  
 Permansiſſe decus ſacræ venerabile formæ,  
 Iratamque deis faciem, nihil ultima mortis  
 Ex habitu, vultuque viri mutaſſe, fatentur  
 Qui lacerum videre caput. Nam ſævus in ipſo  
 Septimius ſcleris majus ſcelus invenit actu:  
 Ac reteggit ſacros, ſciſſo velamine, vultus  
 Semianimis Magni, ſpirantiaque occupat ora,  
 Collaque in obliquo poſuit languentia tranſtro.  
 Tunc nervos, venasque ſecat, nodosaque frangit  
 Oſſa diu: nondum artis erat caput enſe rotare.  
 At poſtquam trunco cervix abſeiſſa recēſſit,  
 Vindicat hoc Phariuſ dextra geſtare ſatelles.

Degener, atque operæ miles Romane secundæ,  
 Pompeji sacrum diro caput ense recidis,  
 Ut non ipse feras? pro summi fata pudoris!  
 Impius ut Magnum nosset puer, illa verenda  
 Regibus hirta coma, & generosa fronte decora  
 Cæsaries compressa manu est; Pharioque veruto,  
 Dum vivunt vultus, atque os in murmura pulsan-  
 Singultus animæ, dum lumina nuda rigescunt,  
 Suffixum caput est, quo numquam bella jubente  
 Pax fuit: hoc reges, campumque, & rostra movebat:  
 Hac facie Fortuna tibi Romana placebas.  
 Nec satis infando fuit hoc vidisse tyranno:  
 Vult sceleri superesse fidem. Tunc arte nefanda  
 Submota est capiti tabes: raptoque cerebro  
 Adsiccata cutis, putrisque effluxit ab alto  
 Humor, & infuso facies solidata veneno est.

Ultima Lageæ stirpis, perituraque proles,  
 Degener, incestæ sceptris cessure sorori,  
 Quum tibi sacrato Macedon servetur in antro,  
 Et regum cineres extructo monte quiescant,  
 Quum Ptolemæorum manes seriemque pudendam  
 Pyramides claudant, indignaque Mausolea:  
 Litora Pompejum feriunt, truncusque vadosis  
 Huc, illuc jaçtatur aquis. Adcone molesta  
 Totum cura fuit socero servare cadaver?  
 Hac Fortuna fide Magni tam prospera fata  
 Protulit: hac illum summo de culmine rerum

Morte petit, cladesque omnes exegit in uno  
Sæva die, quibus immunes tot præstitit annos:  
Pompejusque fuit, qui numquam mixta videret  
Læta malis: felix nullo turbante deorum,  
Et nullo parcente miser. Semel impulit illum  
Dilata Fortuna manu. Pulsatur arenis,  
Carpitur in scopulis, hausto per vulnera fluctu  
Ludibrium pelagi. Nullaque manente figura,  
Una nota est Magno capitis jactura revulsi.

Ante tamen Pharias victor quam tangat arenas,  
Pompejo furtim tumulum Fortuna paravit,  
Ne jaceat nullo, vel ne meliore sepulcro.

E latebris pavidus decurrit ad æquora Cordus.  
Quæstor ab Idalio Cinyrææ litore Cypri  
Infaustus Magni fuerat comes. Ille per umbras  
Ausus ferre gradum, victum pietate timorem  
Compulit, ut mediis quæsitum corpus in undis  
Duceret ad terram, traheretque ad litora Magnum.  
Lucis mœsta parum per densas Cynthia nubes  
Præbebat; cano sed discolor æquore truncus  
Conspicitur. Tenet ille ducem complexibus artis,  
Eripiente mari: nunc victus pondere tanto  
Exspectat fluctus, pelagoque juvante cadaver  
Impellit. Postquam sicco jam litore sedit,  
Incubuit Magno, lacrimasque effudit in omne  
Vulnus, & ad superos, obscuraque sidera satur:

Non pretiosa petit cumulado ture sepulcra



„Pompejus, Fortuna, tuus: non pinguis ad astra  
„Ut ferat e membris Eos fumus odores,  
„Ut Romana suum gestent pia colla parentem,  
„Præferat ut veteres feralis pompa triumphos,  
„Ut resonent tristi cantu fora, totus ut ignes  
„Projectis mœrens exercitus ambiat armis.  
„Da vilem Magno plebeji funeris arcam,  
„Quæ lacerum corpus siccos effundat in ignes.  
„Robora non desint misero, nec sordidus ustor.  
„Sit satis, o superi, quod non Cornelia fuso  
„Crine jacet, subicique facem complexa maritum  
„Imperat, extremo sed abest a munere busti  
„Infelix conjux; neque adhuc ab litore longe est.“  
Sic fatus, parvos juvenis procul adspicit ignes,  
Corpus vile suis, nullo custode cremantes.  
Inde rapit flammæ, semiustaque robora membris  
Subducens: „Quæcumque es, ait, neglecta, nec ulli  
„Cara tuo, sed Pompejo felicior umbra,  
„Quod jam compositum violat manus hospita bustum,  
„Da veniam: si quid sensus post fata relictum,  
„Cedis & ipsa rogo, paterisque hæc damna sepulcri,  
„Teque pudet, sparsis Pompeji manibus, uri.“  
Sic fatus, plenusque sinus ardente favilla  
Pervolat ad truncum; qui fluctu pæne relatus  
Litore pendebat. Summas dimovit arenas,  
Et collecta procul laceræ fragmenta carinæ  
Exigua posuit trepidus scrobe. Nobile corpus

Robora nulla premunt, nulla strue membra recumbunt;  
 Admotus Magnum, non subditus, accipit ignis.  
 Ille sedens juxta flammas: „O maxime, dixit,  
 „Ductor, & Hesperii majestas nominis una,  
 „Si tibi jactatu pelagi, si funere nullo  
 „Tristior iste rogos: manes, animamque potentem  
 „Officiis averte meis: injuria fati,  
 „Hoc fas esse jubet; ponti ne belua quidquam  
 „Ne fera, ne volucres, ne sævi Cæsaris ira  
 „Audeat: exiguum, quantum potes, accipe flammam  
 „Romana succense manu (1). Fortuua recursus  
 „Si det in Hesperiam, non hac in sede quiescent  
 „Tam sacri cineres: sed te Cornelia, Magne,  
 „Accipiet, nostraque manu transfundet in urnam.  
 „Interea parvo signemus litora saxo,  
 „Ut nota sit busto; si quis placare peremtum  
 „Forte volet, plenos & reddere mortis honores;  
 „Inveniat trunci cineres, & norit arenas,  
 „Ad quas, Magne, tuum referat caput.“ Hæc ubi fatus,  
 Excitat invalidas admoto fomite flammas.  
 Carpitur, & lentum destillat Magnus in ignem,  
 Tabe fovens bustum. Sed jam percusserat astra  
 Aurora præmissa dies: ille, ordine rupto  
 Funeris, adtonitus latebras in litore quærit.  
 Quam metuis demens isto pro crimine poenam,

(1) succensa manu MSS.

Quo te fama loquax omnes accepit in annos?  
 Conditā laudabit Magni socer impius ossa:  
 I modo securus veniæ, fassusque sepulcrum  
 Posce caput. Cogit pietas imponere finem  
 Officio. Semiusta (1) rapit, resolutaque nondum  
 Ossa satis, nervis, & inustis plena medullis  
 Æquorea restinguit aqua, congestaque in unum  
 Parva clausit humo. Tum ne levis aura retectos  
 Auferret cineres, saxo compressit arenam:  
 Nautaque ne bustum religato fune moveret,  
 Inscriptis sacrum semiusto stipite nomen:  
 HIC SITVS EST MAGNVS. Placet hoc, Fortuna, sepulcrum  
 Dicere Pompeji, quo condi maluit illum,  
 Quam terra caruisse socer? temeraria dextra  
 Cur obicis Magno tumulum, manesque vagantes  
 Includis? situs est, qua terra extrema refusum  
 Tendit in Oceanum. Romanum nomē, & omne  
 Imperium Magno tumuli est modus. Obrue saxa  
 Crimine plena deūm. Si tota est Herculis Œte,  
 Et juga tota vacant Bromio Nyseia; quare  
 Unus in Ægypto Magni lapis? omnia Lagi  
 Arva tenere potest. Si nullo cespite nomen  
 Hæserit, erremus populi, cinerumque tuorum,  
 Magne, metu nullas Nili calcemus arenas.  
 Quod si tam sacro dignaris nomine saxum;

(1) semusta *vulgo*.

(2)

Adde actus tantos, monumentaque maxima rerum:  
Adde truces Lepidi motus, Alpinaque bella,  
Armaque Sertori, revocato consule, victa,  
Et currus, quos egit eques: commercia tuta  
Gentibus, & pavidos Cilicas maris. Adde subactam  
Barbariem, gentesque vagas, & quidquid in Euro  
Regnorum, Boreaque jacet. Dic semper ab armis  
Civilem repetisse togam: ter curribus actis  
Contentum multos patriæ donasse triumphos.  
Quis capit hæc tumulus? surgit miserabile bustum  
Non ullis plenum titulis, non ordine tanto  
Factorum: solitumque legi super alta deorum  
Culmina, & exstructos spoliis hostilibus arcus,  
Haud procul est ima Pompeji nomen arena,  
Depressum tumulo, quod non legat advena rectus,  
Quod nisi monstratum Romanus transeat hospes.  
Noxia civili tellus Ægyptia fato,  
Haud equidem inmerito Cumanæ carmine Vatis  
Cautum, ne Nili Pelusia tangeret ora  
Hesperius miles, ripasque æstate tumentes.  
Quid tibi sæva precer tanto pro crimine tellus?  
Vertat aquas Nilus, quo nascitur orbe, retentus,  
Et steriles egeant hibernis imbribus agri,  
Totaque in Æthiopum putres solvaris arenas.  
Nos in templa tuam Romana accepimus (1) Isin,

(1) recepimus MSS. *o. f. o. d. e. c.*

Semideosque canes, & sistra jubentia luctus,  
 Et quem tu plangens hominem testaris Osirin:  
 Tu nostros, Ægypte, tenes in pulvere Manes.  
 Tu quoque, quum sævo dederis jam templa tyranno,  
 Nondum Pompeji cineres, o Roma, petisti:  
 Exsul adhuc jacet umbra ducis. Si sæcula prima  
 Victoris timuere minas; nunc excipe saltem  
 Ossa tui Magni, si nondum subruta fluctu  
 Invisa tellure sedent. Quis busta timebit?  
 Quis sacris dignam movisse verebitur umbram? (1)  
 Imperet hoc nobis utinam scelus, & velit uti  
 Nostro Roma sinu: satis o nimiumque beatus,  
 Si mihi contingat manes transferre revulsos  
 Ausoniam, si tale ducis violare sepulcrum.  
 Forsitan aut sulco sterili quum poscere finem  
 A superis, aut Roma volet feralibus Austris,  
 Ignibus aut nimius, aut terræ tecta moventi:  
 Consilio, jussuque deum transibis in urbem,  
 Magne, tuam, summusque feret tua busta sacerdos.  
 Nunc quis ad exustam Cancro torrente Syenen  
 Ibit, & imbrifera siccas sub Pliade (2) Thebas  
 Spectator Nili: quis rubri stagna profundi,  
 Aut Arabum portus mercis mutator Eoæ,  
 Magne, petet, quem non tumuli venerabile saxum,  
 Et cinis in summis forsan turbatus arenis

(1) urnam scripti quatuor.

(2) Plejade vulgo.

Advertet, manesque tuos placare juvabit;  
 Et Cäsio præferre Jovi? Nil ista nocebunt.  
 Famae busta tuæ. Templis, auroque sepultus  
 Vilior umbra fores; nunc est pro numine summo,  
 Hoc tumulto Fortuna jacens. Augustius aris  
 Victoris Libyo pulsatur in æquore saxum.  
 Tarpejis qui sæpe deis sua tura negarunt,  
 Inclusum Thusco venerantur cespite fulmen.  
 Proderit hoc olim, quod non mansura futuris  
 Ardúa marmoreo surrexit pondere moles.  
 Pulveris exigui sparget non longa vetustas  
 Congeriem, bustumque cadet, mortisque peribunt  
 Argumenta tuæ. Veniet felicior ætas,  
 Qua sit nulla fides saxum monstrantibus illud:  
 Atque erit Ægyptos populis fortasse nepotum  
 Tam mendax Magni tumulto, quam Creta Tonantis.





## LIBER NONUS.

### ARGUMENTUM.

*Nonus habet Sextum redeuntem a caede parentis,  
 Narraat & occursum fugientis, bella Catonis.  
 Mille carinarum fugientes classe vehuntur,  
 Et tamen in cuncta victorem parte verentur.  
 Quos Cato pertæsos sermonibus artificatis  
 Accipit & ducit per mille pericula mortis.  
 Hinc etenim Syrtes, hinc vasta vaporibus arva,  
 Hinc sitis, hinc pulvis, hinc obstant dira vehena.  
 Interea Cæsar Pompeji terga secutus  
 Navigat usque Pharon, ubi magnus litore motus,  
 Quasitique caput dextra monstrante lanista  
 Effusis lacrimis docet hoc se ferre moleste.*

**A**T non in Pharia manes jacuere favilla,  
 Nec cinis exiguus tantam compescuit umbram:  
 Prosiluit busto, semiustaque membra relinquens,  
 Degeneremque rogam, sequitur convexa Tonantis,

Qua niger astriferis connectitur axibus aer:  
 Quodque patet terras inter, lunæque meatus  
 (Semidei manes habitant, quos ignea virtus  
 Innocuos vitæ patientes ætheris imi  
 Fecit) & æternos animam collegit in orbes.  
 Non illuc auro positi, nec ture sepulti  
 Perveniant. Illic postquam se lumine vero  
 Implevit, stellasque vagas miratur, & astra  
 Fixa polis, vidit quanta sub nocte jaceret  
 Nostra dies, risitque sui ludibria trunci.  
 Hinc super Emathiæ campos, & signa cruenti  
 Cæsaris, ac sparsas volitavit in æquore classes;  
 Et scelerum vindex in sancto pectore Bruti  
 Sedit, & invicti posuit se mente Catonis.  
 Ille ubi pendebant casus, dubiumque manebat,  
 Quem mundi dominum facerent civilia bella,  
 Oderat & Magnum, quamvis comes isset in arma  
 Auspiciis raptus patriæ, ductuque senatus:  
 At post Thessalias clades jam pectore toto  
 Rompejanus erat. Patriam tutore carentem  
 Excepit, populi trepidantia membra refovit,  
 Ignavis manibus projectos reddidit enses:  
 Nec regnum cupiens gessit civilia bella,  
 Nec servire timens. Nil causa fecit in armis  
 Ipse sua (1): totæ post Magni funera partes  
 Libertatis erant: quas ne per litora susas

(1) causæ — suæ MSS. quatuordec.



Colligeret rapido victoria Cæsaris actu ,  
 Corcyraë secreta petit, ac mille carinis  
 Abstulit Emathiæ secum fragmenta ruinæ,  
 Quis ratibus tantis fugientia crederet ire  
 Agmina? quis pelagus victas artasse carinas?

Dorida tunc Malean, & apertam Tænaron umbris,  
 Inde Cythera petit: Boreaque urgente carinas .  
 Creta fugit: Dictæa legit, cedentibus undis,  
 Litora. Tunc ausum classi præcludere portus  
 Impulit, ac sævas meritum Phycunta rapinas  
 Sparsit: & hinc placidis alto delabitur auris  
 In litus, Palinure, tuum: neque enim æquore tantum  
 Ausonio monumenta tenes, portusque quietos  
 Testaris Libyes Phrygio placuisse marito.  
 Quum procul ex alto tendentes vela carinæ  
 Ancipites tenuere animos, sociosne malorum,  
 An veherent hostes: præceps facit omne tremendum  
 Victor, & in nulla non creditur esse carinæ.  
 Ast illæ puppes luctus, planctusque ferebant,  
 Et mala vel duri lacrimas motura Catonis.

Nam postquam frustra precibus Cornelia nautas  
 Privignique fugam tenuit, ne forte repulsus  
 Litoribus Phariis remearet in æquora truncus,  
 Ostenditque rogum non justi flamma sepulcri:  
 „Ergo indigna fui, dixit, Fortuna, marito  
 „Accendisse (1) rogum, gelidosque effusa per artus

(1) ascendisse MS.

„Incubuisse viro, laceros exurere crines?  
„Membraque dispersi pelago componere Magni?  
„Vulneribus cunctis largos infundere fletus?  
„Ossibus & tepida vestes implere favilla?  
„Quidquid ab extincto licuisset tollere busto,  
„In templis sparsura deum. Sine funeris ullo  
„Ardet honore rogos: manus hoc Ægyptia forsan  
„Obtulit officium grave manibus. O bene nudi  
„Crassorum cineres! Pompejo contigit ignis  
„Invidia majore deum. Similisne malorum  
„Sors mihi semper erit? numquam dare justa licebit  
„Conjugibus: numquam plenas plangemus ad urnas?  
„Quid porro tumulis opus est, aut ulla requiris  
„Instrumenta dolor? non toto pectore portas  
„Impia Pompejum? non imis hæret imago  
„Visceribus? quærat cineres victura superstes.  
„Nunc tamen hinc longe qui fulget luce maligna  
„Ignis, adhuc aliquid, Phario de litore surgens  
„Ostendit mihi, Magne, tui. Jam flamma resedit,  
„Pompejumque ferens vanescit solis ad ortus  
„Fumus, & invisi tendunt mihi carbasa venti.  
„Hac mihi non tellus Pompejo si qua triumphos  
„Victa dedit, non alta terens Capitolia currus  
„Gratior: elapsus felix de pectore Magnus;  
„Hunc volumus, quem Nilus habet, terræque nocenti  
„Non hædere queror: crimen commendat arenas.  
„(Linquere, si qua fides, Pelusia litora nolo.)

„Tu pete bellorum casus, & signa per orbem,  
„Sexte, paterna move: namque hæc mandata reliquit  
„Pompejus vobis in nostra condita cura:  
„Me quum fatalis leto damnaverit hora,  
„Excipite, o nati, bellum civile, nec umquam,  
„Dum terris aliquis nostra de stirpe manebit,  
„Cæsaribus regnare vacet. Vel sceptrâ, vel urbes  
„Libertate sua validas impellite fama  
„Nominis: has vobis partes, hæc arma relinquo.  
„Inveniet classes quisquis Pompejus in undas  
„Venerit: & noster nullis non gentibus heres  
„Bella dabit: tantum indomitos, memoresque paterni  
„Juris habete animos. Uni parere decebit,  
„Si faciet partes pro libertate, Catoni.  
„Exsolvi tibi, Magne, fidem, mandata peregi.  
„Insidiæ (1) valuerè tuæ, deceptaque vixi,  
„Ne mihi commissas auferrem perfida voces.  
„Jam nunc te per inane chaos, per tartara, conjux,  
„Si sunt ulla, sequar: quam longo tradita leto  
„Incertum est: pœnas animæ vivæis ab ipsa  
„Ante feram. Cernens potuit tua vulnera, Magne,  
„Non fugere in mortem: planctu contusa peribit,  
„Effluet in lacrimas; numquam veniemus ad enses,  
„Aut laqueos, aut præcipites per inania jactus.  
„Turpe mori post te solo non posse dolore.“

(1) Invidia MSS. quidam vet.

Sic ubi fata, caput ferali obduxit amictu,  
 Decrevitque pati tenebras, puppisque cavernis  
 Delituit: sævumque arte complexa dolorem  
 Perfruitur lacrimis, & amat pro conjuge luctum.  
 Illam non fluctus, stridensque rudentibus Eurus  
 Movit, & exurgens ad summa pericula clamor:  
 Votaque sollicitis faciens contraria nautis,  
 Composita in mortem jacuit, favitque procellis.

Prima ratem Cypros spumantibus accipit undis;  
 Inde tenens pelagus, sed jam moderatior, Eurus  
 In Libycas egit sedes, & castra Catonis.  
 Tristis, ut in multo mens est præsaga timore,  
 Adspexit patrios comites e litore Magnus,  
 Et fratrem: medias præceps quum fertur ad undas.  
 „Dic ubi sit, germane, parens: stat summa, caputque  
 „Orbis, an occidimus? Romanaque Magnus ad umbras  
 „Abstulit?“ hæc fatur: quem contra talia frater,  
 „O felix, quem Fors alias dispersit in oras,  
 „Quique nefas audis: oculos, germane, nocentes  
 „Spectato genitore fero. Non Cæsaris armis  
 „Occubuit, dignoque perit auctore ruinæ;  
 „Rege sub impuro Nilotica rura (1) tenente,  
 „Hospitii fretus superis, & munere tanto  
 „In proavos, cecidit donati victima regni.  
 „Vidi ego magnanimi lacerantes pectora patris:

(1) regna MSS. *plures*.

„Nec credens Pharium tantum potuisse tyrannum,  
 „Litore Niliaco socerum jam stare putavi.  
 „Sed me nec sanguis, nec tantum vulnera nostri  
 „Adfecere senis, quantum gestata per urbem  
 „Ora ducis, quæ transfixo deformia (1) pilo  
 „Vidimus: hæc, fama est, oculis victoris iniqui  
 „Servari; scelerisque fidem quæsisse tyrannum.  
 „Nam corpus Phariæne canes, avidæque volucres  
 „Distulerint, an furtivus, quem vidimus, ignis  
 „Solverit, ignoro. Quæcumque injuria fati  
 „Abstulit hos artus, superis hæc crimina dono:  
 „Servata de parte queror.“ Quum talia Magnus  
 Audisset: non in gemitus, lacrimasque dolorem  
 Effudit; justaque furens pietate profatur:  
 „Præcipitate rates e sicco litore nautæ;  
 „Classis in adversos erumpat remige ventos:  
 „Ite duces mecum: numquam civilibus armis  
 „Tanta fuit merces, inhumatos condere manes,  
 „Sanguine semiviri Magnum satiare tyranni.  
 „Non ego Pellæas arces, adytisque resectum  
 „Corpus Alexandri pigra Mareotide mergam:  
 „Non mihi Pyramidum tumulis evulsus Amasis,  
 „Atque alii reges Nilo torrente natabunt;  
 „Omnia dent pœnas nudo tibi, Magne, sepulcra:  
 „Evolvam busto numen jam gentibus Isin,

(1) sublimia *vulgo*.

„Et testum lino spargam per vulgus Osirin,  
 „Et sacer in Magni cineres maclabitur Apis,  
 „Suppositisque deis uram caput. Has mihi pœnas  
 „Terra dabit: linquam vacuos cultoribus agros,  
 „Nec, Nilus cui crescat, erit: solusque tenebis  
 „Ægypton, populis, genitor, superisque fugatis.“  
 Dixerat, & sævas classem rapiebat in undas.  
 Sed Cato laudatam juvenis compescuit iram.

Interea totis audito funere Magni  
 Litoribus sonuit percussus planctibus æther:  
 Exemploque carens, & nulli cognitus ævo  
 Luctus erat, mortem populos deflere potentis.  
 Sed magis, ut visa est lacrimis exhausta, solutas  
 In vultus effusa comas, Cornelia puppi  
 Egrediens, rursus geminato verberere plangunt.  
 Ut primum in sociæ pervenit litora terræ,  
 Collegit vestes, miserique insignia Magni,  
 Armaque, & impressas auro, quas gesserat (1) olim,  
 Exuvias, pictasque togas, velamina summo  
 Ter conspecta Jovi, funestoque intulit igni.  
 Ille fuit miseræ Magni cinis. Accipit omnis  
 Exemplum pietas, & toto litore busta  
 Surgunt Thessalicis reddentia manibus ignem.  
 Sic, ubi depastis submittere gramina campis,  
 Et renovare parans hibernas Apulus herbas,

(1) fecerat MSS. quidam.

Ignem foveat terras, simul & Garganus, & arva  
Vulturis, & calidi lucent buceta Matini.

Non tamen ad Magni pervenit gratius umbras,  
Omne quod in superos audet convicia vulgus,  
Pompejumque deis obicit, quam pauca Catonis  
Verba, sed a pleno venientia pectore veri.  
„Civis obit, inquit, multum majoribus impar  
„Nosse modum juris, sed in hoc tamen utilis ævo,  
„Cui non nulla fuit justæ reverentia, salva  
„Libertate potens, & solus plebe parata  
„Privatus servire sibi, rectorque senatus,  
„Sed regnantis, erat. Nil belli jure poposcit:  
„Quæque dari voluit, voluit sibi posse negari.  
„Inmodicas possedit opes: sed plura retentis  
„Intulit: invasit ferrum, sed ponere norat.  
„Prætulit arma togæ: sed pacem armatus amavit.  
„Juvit summa ducem, juvit dimissa potestas.  
„Casta domus, luxuque carens, corruptaque numquam  
„Fortuna domini. Clarum, & venerabile nomen  
„Gentibus, & multum nostræ quod proderat urbi.  
„Olim vera fides, Sulla Marioque receptis,  
„Libertatis obit: Pompejo rebus adempto  
„Nunc & ficta perit. Non jam regnare pudebit:  
„Nec color imperii, nec frons erit ulla senatus.  
„O felix, cui summa dies fuit obvia victo,  
„Et cui quærendos Pharium scelus obtulit enses:  
„Forsitan in soceri potuisses vivere regno.

„Scire mori, sors prima viris, sed proxima cogi.  
„Et mihi, si fatis aliena in jura venimus,  
„Da talem, Fortuna, Jubam: non deprecor hosti  
„Servari, dum me servet cervice recisa.“

Vocibus his major, quam si Romana sonarent  
Rostra ducis laudes, generosam venit ad umbram  
Mortis honos. Fremit interea discordia vulgi  
Castrorum, bellique piget post funera Magni:  
Quum Tarcondimotus linquendi signa Catonis  
Sustulit; hunc rapta fugientem classe secutus  
Litus in extremum, tali Cato voce notavit:

„O numquam pacate Cilix: iterumne rapinas  
„Vadis in æquoreas? Magnum Fortuna removit:  
„Jam pelago pirata redis.“ Tunc respicit omnes  
In cœtu, motuque viros: quorum unus, aperta  
Mente fugæ, tali compellat voce regentem:  
„Nos, Cato, da veniam, Pompeji duxit in arma,  
„Non belli civilis amor, partesque favori  
„Fecimus. Ille jacet, paci quem prætulit orbis,  
„Causaque nostra perit: patrios permitte penates,  
„Desertamque domum, dulcesque revisere natos.  
„Nam quis erit finis si nec Pharsalia, pugnae,  
„Nec Pompejus erit? perierunt tempora vitæ,  
„Mors eat in tutum: justas sibi nostra senectus  
„Prospiciat flammæ. Bellum civile sepulcra  
„Vix ducibus præstare potest. Non barbara victos  
„Regna manent: non Armenium mihi sæva minatur,



„Aut Scythium Fortuna jugum: sub jura togati .  
 „Civis eo. Quisquis Magno vivente secundus, „  
 „Hic mihi primus erit: sacris præstabitur umbris „  
 „Summus honor: dominum, clades quem cogit, habebō;  
 „Nullum, Magne, ducem. Te solum in bella secutus,  
 „Post te, fata sequor: neque enim sperare secunda  
 „Fas mihi, nec liceat. Fortuna cuncta tenentur (1)  
 „Cæsaris: Emathium sparsit victoria ferrum.  
 „Clausa fides miseris, & toto solus in orbe est,  
 „Qui velit, ac possit victis præstare salutem.  
 „Pompejo, scelus est bellum civile, peremto,  
 „Quo fuerat vivente, fides. Si publica jura,  
 „Si semper patriam sequeris Cato, signa petamus  
 „Romanus quæ consul habet.“ Sic ille profatus  
 Insiluit puppim, juvenum comitante tumultu.  
 Actum Romanis fuerat de rebus, & omnis  
 Indiga servitii fervebat litore plebes.

Erupere ducis sacro de pectore voces:

„Ergo pari voto gessisti bella juvenus  
 „Tu quoque pro dominis, & Pompejana fuisti,  
 „Non Romana manus? quod non in regna laboras,  
 „Quod tibi, non ducibus vivis, morerisque, quod orbem  
 „Adquiris nulli, quod jam tibi vincere tutum est,  
 „Bella fugis, quærisque jugum cervice vacante,  
 „Et nescis sine rege pati. Nunc caussa pericli

(1) feruntur *ditto*.

„Digna viris. Potuit vestro Pompejus abuti  
„Sanguine: nunc patriæ jugulos ensemque negatis,  
„Quum prope libertas. Unum Fortuna reliquit  
„Jam tribus e dominis. Pudeat: plus regia Nili  
„Contulit in leges, & Parthi militis arcus.  
„Ite, o degeneres, Ptolemæi munus, & arma  
„Spernite. Quis vestras ulla putet esse nocentes  
„Cæde manus? credet faciles sibi terga dedisse,  
„Credet ab Emathiis primos fugisse Philippis.  
„Vadite securi: meruistis iudice vitam  
„Cæsare, non armis, non obsidione subacti.  
„O famuli turpes, domini post fata prioris  
„Itis ad heredem. Cur non majora mereri,  
„Quam vitam, veniamque libet? rapiatur in undas  
„Infelix Magni conjux, prolesque Metelli:  
„Ducite Pompejos: Ptolemæi vincite munus.  
„Nostra quoque invisio quisquis feret ora tyranno,  
„Non parva mercede dabit. Sciet ista juvenus  
„Cervicis pretio bene se mea signa secutam.  
„Quin agite, & magna meritum cum cæde parate:  
„Ignavum scelus est tantum fuga.“ Dixit, & omnes  
Haud aliter medio revocavit ab æquore puppes,  
Quam simul effetas relinquunt examina ceras,  
Atque oblita favi non miscent nexibus alas,  
Sed sibi quæque volat, nec jam degustat amarum  
Desidiosa thymum: Phrygii sonus increpet æris,  
Adtonitæ posuere fugam, studiumque laboris

Floriferi repetunt, & sparsi mellis amorem:  
Gaudet in Hyblæo securus gramine pastor  
Divitias servasse casæ: sic voce Catonis  
Inculcata viris justæ patientia Martis.

Jamque actu belli non doctas ferre quietem  
Constituit mentes, serieque agitare laborum.  
Primum litoreis miles lassatur arenis.  
Proximus in muros, & mœnia Cyrenarum  
Est labor: exclusus nulla se vindicat ira:  
Pœnaque de victis sola est, vicisse, Catoni.  
Inde peti placuit Libyci contermina Mauris  
Regna Jubæ, sed iter mediis natura vetabat (1)  
Syrtybus: hanc audax sperat sibi cedere virtus.  
Syrtes vel primam mundo natura figuram  
Quum daret in dubio terræ pelagique reliquit.  
(Nam neque subsedit penitus, quo stagna profundum  
Acciperet, nec se defendit ab æquore tellus;  
Ambigua sed lege loci jacet invia sedes:  
Æquora fracta vadis, abruptaque terra profundo,  
Et post multa sonant projecti litora fluctus.  
Sic male deseruit, nullosque exegit in usus  
Hanc partem natura sui.) Vel plenior alto  
Olim Syrtis erat, pelago penitusque natabat:  
Sed rapidus Titan ponto sua lumina pascens,  
Æquora subduxit zonæ vicina perustæ:

(1) negarat, vetarat, natabit MSS.

Et nunc pontus adhuc Phœbo siccante repugnat.  
 Mox ubi damnosum radios admoverit ævum,  
 Tellus Syrtis erit: nam jam brevis unda superne  
 Innatat, & late periturum deficit æquor.

Ut primum remis actum (1) mare propulit omne  
 Classis onus, densis fremuit niger imbris Auster  
 In sua regna furens: tentatum classibus æquor  
 Turbine defendit, longeque a Syrtibus undas  
 Egit, & illato confregit litore pontum.  
 Tum quorum recto deprendit carbasa malo  
 Eripuit nautis, frustra que rudentibus ausis  
 Vela negare Noto spatium vicere carinæ,  
 Atque ultra proram tumuit sinus. Omnia si quis  
 Providus antennæ suffixit lintea summæ,  
 Vincitur, & nudis avertitur armamentis.  
 Sors melior classi, quæ fluctibus incidit altis,  
 Et certo jactata mari. Quæcumque levatæ  
 Arboribus cæsis flatum effudere prementem:  
 Abstulit has liber ventis contraria volvens  
 Æstus, & obnixum victor detrusit in Austrum.  
 Has vada destituunt, atque interrupta profundo  
 Terra ferit puppes: dubioque obnoxia fato  
 Pars sedet una ratis, pars altera pendet in undis.  
 Tunc magis impactum brevibus (2) mare, terraque sævit  
 Obvia consurgens: quamvis elisus ab Austro,

(1) istum, aptum, auctum MSS.

(2) brevius MSS. & edd. perimult.

Sæpe tamen cumulos fluctus non vincit arenæ.  
Eminet in pelagi tergo procul omnibus arvis,  
Inviolatus aquæ, sicci jam pulveris agger,  
Stant miseri nautæ, terræque hærente carina  
Litora nulla vident. Sic partem intercipit æquor:  
Pars ratium major regimen, clavumque secuta est,  
Tuta fugæ, nautasque loci sortita peritos,  
Torpentem Tritonos adit illæsa paludem.  
Hanc, ut fama, deus, quem toto litore pontus  
Audit ventosa perflantem murmura concha,  
Hanc & Pallas amat, patrio quæ vertice nata  
Terrarum primam Libyen (nam proxima cœlo est,  
Ut probat ipse calor) tetigit, stagnique quieta  
Vultus vidit aqua, posuitque in margine plantas,  
Et se dilecta Tritonida dixit ab unda.  
Quam juxta Lethon tacitus prælabitur amnis,  
Infernis, ut fama, trahens obliviam venis:  
Atque insopiti quondam tutela draconis,  
Hesperidum pauper spoliatus frondibus hortus.  
Invidus annoso famam qui derogat ævo,  
Qui vates ad vera vocat. Fuit aurea silva,  
Divitiisque graves, & fulvo germine rami:  
Virgineusque chorus nitidi custodia luci,  
Et numquam somno damnatus lumina serpens,  
Robora complexus rutilo curvata metallo.  
Abstulit arboribus pretium, nemorique laborem  
Alcides: passusque inopes sine pondere ramos

Retulit Argolico fulgentia poma tyranno .  
His igitur depulsa locis, ejectaque classis  
Syrtibus, haud ultra Garamantidas attingit undas:  
Sed duce Pompejo Libyes melioris in oris  
Mansit. At impatiens virtus hærere Catonis  
Audet in ignotas agmen committere gentes,  
Armorum fidens, & terra cingere Syrtin.  
Hæc eadem suadebat hiems, quæ clauserat æquor,  
Et spes imber erat, nimios metuentibus ignes:  
Ut neque sole viam, duro nec frigore sævam,  
Inde polo Libyes, hinc bruma temperet annus:  
Atque ingressurus steriles, sic fatur, arenas.

„O quibus una salus placuit mea castra secutis  
„Indomita cervice mori, componite mentes  
„Ad magnum virtutis opus summosque labores.  
„Vadimus in campos steriles, exustaque mundi,  
„Qua nimius Titan, & raræ in fontibus undæ,  
„Siccaque letiferis squalent serpentibus arva.  
„Durum iter ad leges, patriæque ruentis amorem  
„Per mediam Libyen veniant, atque invia tentent,  
„Si quibus in nullo positum est evadere voto,  
„Si quibus ire sat est. Neque enim mihi fallere quemquam  
„Est animus, testoque metu perducere vulgus.  
„Hi mihi sint comites, quos ipsa pericula ducent,  
„Qui, me teste, pati vel quæ tristissima, pulcrum,  
„Romanumque putant. At qui sponsore salutis  
„Miles eget, capiturque animæ dulcedine, vadat

„Ad dominum meliore via. Dum primus arenas  
„Ingrediar, primusque gradus in pulvere ponam.  
„Me calor æthereus feriat, mihi plena venenis  
„Occurrat serpens; fatoque pericula vestra  
„Prætentate meo: sitiât, quicumque bibentem  
„Viderit: aut umbras nemorum quicumque petentem,  
„Æstuet: aut equitem peditum præcedere turmas,  
„Deficiat; si quo fuerit discrimine notum  
„Dux, an miles eam. Serpens, sitis, ardor, arenæ,  
„Dulcia virtuti: Gaudet patientia duris.  
„Lætius est, quoties magno sibi constat, honestum,  
„Sola potest Libye turba præstare malorum,  
„Ut deceat fugisse viros.“ Sic ille calentes  
Incendit virtute animos, & amore laborum,  
Irreducemque viam deserto limite carpit:  
Et sacrum parvo nomen clausura sepulcro  
Invasit Libye securi fata Catonis.

Tertia pars rerum Libye, si credere famæ  
Cuncta velis: at si ventos cœlumque sequaris,  
Pars erit Europæ. Neque enim plus litora Nili,  
Quam Scythicus Tanais primis ab Gadibus absunt:  
Unde Europa fugit Libyen, & litora flexu  
Oceano fecere locum: sed major in unam  
Orbis abit Asiam. Nam quum communiter istæ  
Effundant Zephyrum, Boreæ latus illa sinistrum  
Contingens, dextrumque Notî, descendit in ortus,  
Eurum sola tenens. Libyæ quod fertile terræ est,

Vergit in occasus: sed & hæc non fontibus ullis  
Solvitur: Arctoois raris Aquilonibus imbres  
Accipit, & nostris reficit sua rura serenis.  
In nullas vitiatur opes; non ære, neque auro  
Excoquitur, nullo glebarum crimine, pura,  
Et penitus terra est. Tantum Maurusia genti  
Robora divitiæ, quarum non noverat usum;  
Sed citri contenta comis vivebat, & umbra.  
In nemus ignotum nostræ venere secures,  
Extremoque epulas, mensasque petimus ab orbe.  
At quæcumque vagam Syrtin complectitur ora  
Sub nimio projecta die, vicina perusti  
Ætheris, exurit messes, & pulvere Bacchum  
Enecat, & nulla putris radice tenetur.  
Temperies vitalis abest: & nulla sub illâ  
Cura Jovis terra est: Natura deside torpet  
Orbis, & inmotis annum non sentit arenis.  
Hoc tam segne solum raras tamen exserit herbas,  
Quas Nasamon gens dura legit, qui proxima ponto  
Nudus rura tenet, quem mundi barbara damnis  
Syrtis alit. Nam litoreis populator arenis  
Imminet, & nulla portus tangente carina,  
Novit opes. Sic cum toto commercia mundo  
Naufragiis Nasamones habent. Hac ire Catonem  
Dura jubet virtus. Illic secunda juvenus  
Ventorum, nullasque timens tellure procellas,  
Æquoreos est passa metus. Nam litore sicco,  
Quam



Quam pelago, Syrtis violentius accipit Austrum.  
Et terræ magis ille nocens. Non montibus ortum  
Adversis frangit Libye, scopulisque repulsum  
Dissipat, & liquidas e turbine solvit in auras:  
Nec ruit in silvas, annosaque robora torquens,  
Lassatur: patet omne solum, liberque meatu  
Æoliam rabiem totis exercet habenis:  
Et non imbriferam contorto (1) pulvere nubem  
In flexum violentus agit: pars plurima terræ  
Tollitur, & numquam resoluta vertice pendet.  
Regna vidit pauper Nasamon errantia vento,  
Discussasque domus: volitantque a culmine raptæ  
Detecto Garamante casæ. Non altius ignis  
Rapta vehit: quantumque licet consurgere fumo,  
Et violare diem, tantus tenet aera pulvis.  
Tum quoque Romanum solito violentior agmen  
Adgreditur, nullusque potest consistere miles,  
Instabilis raptis etiam, quas calcât, arenis.  
Concuteret terras, orbemque ab sede moveret,  
Si solida Libye compage, & pondere duro  
Clauderet exesis Austrum scopulosa cavernis:  
Sed quia mobilibus facilis turbatur arenis,  
Nusquam luctando stabilis manet: ima que tellus  
Stat, quia summa fugit. Galeas, & scuta virorum,  
Pilaque contorsit violento spiritus actu;

(1) cum torto *vulgo*.

Intentusque tulit magni per inania cœli.  
Illud in externa (1) forsân longeqûe remota  
Prodigium tellure fuit: delapsaque cœlo  
Arma timent gentes, hominumque erepta lacertis  
A superis demissa putant. Sic illa profecto  
Sacrificio cecidere Numæ, quæ læta (2) juventus  
Patricia cervice movet: spoliaverat Auster  
Aut Boreas populos ancilia nostra ferentes.  
Sic orbem torquente Noto Romana juventus  
Procubuit, metuensque rapi, constrinxit amictus,  
Inseruitque manus terræ: nec pondere solo,  
Sed nisu jacuit, vix sic immobilis Austro:  
Qui super ingentes cumulos involvit arenæ,  
Atque operit tellure viros. Vix tollere miles  
Membra valet, multo congestu pulveris hærens.  
Adligat & stantes adfusæ magnus arenæ  
Agger, & inmoti terra surgente tenentur.  
Saxa tulit penitus discussis proruta muris,  
Effuditque procul miranda sorte malorum:  
Qui nullas videre domos, videre ruinas.  
Jamque iter omne latet: nec sunt discrimina terræ  
Ulla, nisi ætheriæ medio velut æquore flammæ.  
Sideribus novere viam: nec sidera tota  
Ostendit Libyæ finitor circulus oræ,  
Multaque devexo terrarum margine celat.

(1) in extrema MSS. & *edd. plurim.*

(2) læta *vulgo.*

Utque calor solvit, quem torserat aera ventus,  
 Incensusque dies, manant sudoribus artus:  
 Arent ora siti: conspecta est parva maligna  
 Unda procul vena: quam vix e pulvere miles  
 Corripiens, patulum galeæ confudit in orbem,  
 Porrexitque duci. Squalebant pulvere fauces  
 Cunctorum: minimumque tenens dux ipse liquoris  
 Invidiosus erat., Mene, inquit, degener unum  
 „Miles in hac turba vacuum virtute putasti?  
 „Usque adeo mollis, primisque caloribus impar  
 „Sum visus? quantum pœna tu dignior ista,  
 „Qui, populo sitiente, bibas!“ Sic concitus ira  
 Excussit galeam, suffecitque omnibus unda.  
 Ventum erat ad templum, Libycis quod gentibus unum  
 Inculti Garamantes habent: stat sortifer (1) illic  
 Juppiter, ut memorant, sed non aut fulmina vibrans,  
 Aut similis nostro, tortis sed cornibus Hammon.,  
 Non illi Libyæ posuerunt ditia gentes  
 Tempa: nec Eois splendent donaria gemmis.  
 Quamvis Æthiopum populis, Arabumque beatis  
 Gentibus, atque Indis unus sit Juppiter Hammon,  
 Pauper adhuc deus est, nullis violata per ævum  
 Divitiis delubra tenens: morumque priorum  
 Numen Romano templum defendit ab auro.  
 Esse locis superos testatur silva per omnem

(1) corniger *vulgo*. sortiger *MSS.*

Sola virens Libyen. Nam quidquid pulvere sicco  
 Separat ardentem tepida Berenicida Lepti,  
 Ignorat frondes: solus nemus abstulit Hammon.  
 Silvarum fons caussa loco, qui putria terræ  
 Adligat, & domitas unda connectit arenas.  
 Sic quoque nil obstat Phœbo, quum cardine summo  
 Stat librata dies: truncum vix protegit arbor:  
 Tam brevis in medium radiis compellitur umbra.  
 Depreſsum eſt hunc eſſe locum (1), qua circulus alti  
 Solſcitii medium ſignorum percutit (2) orbem.  
 Non obliqua meant, nec Tauro Scorpios exit  
 Reſtior, aut Aries donat ſua tempora Libræ,  
 Aut Aſtræa jubet lentos deſcendere Piſces.  
 Par Geminis Chiron, & idem quod Carcinus ardens  
 Humidus Ægoceros: nec plus Leo tollitur Urna.  
 At tibi, quæcumque eſ Libyo gens igne dirempta,  
 In Noton umbra cadit, quæ nobis exit ad Arcton.  
 Et ſegnīs Cynosura ſubit: tu ſicca profundo  
 Mergi plauſtra putas, nullumque in vertice ſemper  
 Sidus habes immune mari, procul axis uterque eſt,  
 Et fuga ſignorum medio rapit omnia cœlo.

Stabant ante fores populi, quos miſerat Eos,  
 Cornigerique Jovis monitu nova fata petebant:  
 Sed Latio ceſſere duci: comiteſque Catonem  
 Orant, exploret Libyum memorata per orbem

(1) polum *quatuor meliores*.

(2) circumit *MSS. tres*.

Numina, de fama tam longi iudicet ævi.  
Maximus hortator scrutandi voce deorum  
Eventus Labienus erat., Fors obtulit, inquit,  
„Et Fortuna viæ, tam magni numinis ora,  
„Consiliumque dei: tanto duce possumus uti  
„Per Syrtes, bellicque ratos cognoscere casus.  
„Nam cui crediderim superos arcana daturos,  
„Dicturosque magis, quam sancto vera Catoni?  
„Certe vita tibi semper directa supernas  
„Ad leges, sequerisque deum. Datur, ecce! loquendi  
„Cum Jove libertas: inquire in fata nefandi  
„Cæsaris, & patriæ venturos excute mores:  
„Jure suo populis uti, legumque licebit,  
„An bellum civile perit. Tua pectora sacra  
„Voce reple: duræ saltim virtutis amator  
„Quære quid est virtus, & posce exemplar honesti.“

Ille deo plenus, tacita quem mente gerebat,  
Effudit dignas adytis e pectore voces.  
„Quid quæri Labienè jubes? an liber in armis  
„Occubuisse velim potius, quam regna videre?  
„An sit vita nihil, & longa? an differat ætas?  
„An noceat vis nulla bono? Fortunaque perdat  
„Opposita virtute minas? laudandaque velle  
„Sit satis, & numquam successu crescat honestum?  
„Scimus, & hæc nobis non altius inserit Hammon.  
„Hæremus cuncti superis, temploque tacente,  
„Nil facimus non sponte dei: nec vocibus ullis

„Numen eget: dixitque semel nascentibus auctor  
 „Quidquid scire licet: steriles nec legit (1) arenas,  
 „Ut caneret paucis, mersitque hoc pulvere verum.  
 „Estne dei sedes, nisi terra, & pontus, & aer,  
 „Et cœlum, & virtus? superos quid quærimus ultra?  
 „Juppiter est quodcumque vides, quocumque moveris.  
 „Sortilegis egeant dubii, semperque futuris  
 „Casibus ancipites: me non oracula certum,  
 „Sed mors certa facit: pavidò, fortique cadendum est.  
 „Hoc satis est dixisse Jovem.“ Sic ille profatur:  
 Servataque fide templi discedit ab aris,  
 Non exploratum populis Hammona relinquens.

Ipsè manu sua pila gerit, præcedit anhelì  
 Militis ora pedes: monstrat tolerare labores,  
 Non jubet: & nulla vehitur cervice supinus,  
 Carpentoque sedens. Somni parcissimus ipse est,  
 Ultimus haustor aquæ. Quum tandem fonte reperto  
 Indiga conatur laticis potare juvenus,  
 Stat, dum lixa bibat. Si veris magna paratur  
 Fama bonis, & si successu nuda remoto  
 Inspicitur virtus, quidquid laudamus in ullo  
 Majorum, Fortuna fuit. Quis Marte secundo,  
 Quis tantum meruit populorum sanguine nomen?  
 Hunc ego per Syrtes, Libyesque extrema triumphum  
 Ducere maluerim, quam ter Capitolia curru

(1) sterilesne elegit *MSS. plures.*

Scandere Pompeji, quam frangere colla Jugurthæ.  
 Ecce parens verus patriæ, dignissimus aris  
 Roma tuis; per quem numquam jurare pudebit,  
 Et quem, si steteris unquam cervice soluta,  
 Tunc olim factura deum. Jam spissior ignis,  
 Et plaga, quam nullam superi mortalibus ultra  
 A medio fecere die, calcatur, & unda  
 Rarior: inventus mediis fons unus arenis  
 Largus aquæ: sed quem serpentum turba tenebat  
 Vix capiente loco. Stabant in margine siccæ  
 Aspides, in mediis sitiebant Dipsades undis.  
 Ductor, ut adspexit perituros fonte relicto,  
 Adloquitur: „ Vana specie conterritæ leti  
 „ Ne dubita miles tutos haurire liquores:  
 „ Noxia serpentum est admixto sanguine pestis:  
 „ Morsu virus habent, & fatum in dente minantur.  
 „ Pocula morte carent.“ Dixit, dubiumque venenum  
 Hausit: & in tota Libyæ fons unus arena  
 Ille fuit, de quo primus sibi posceret undas.

Cur Libycus tantis exsudet (1) pestibus aer  
 Fertilis in mortes, aut quid secreta nocenti  
 Miscuerit natura solo, non cura, laborque  
 Noster scire valet: nisi quod vulgata per orbem  
 Fabula pro vera decepit sæcula caussa.  
 Finibus extremis Libyes, ubi fervida tellus

(1) exundet *vulgo*.

Accipit Oceanum demisso sole calentem,  
Squalebant late Phorcynidos arva Medusæ,  
Non nemorum protecta coma, non mollia sulco,  
Sed dominæ vultu conspectis aspera saxis.  
Hoc primum natura nocens in corpore sævas  
Eduxit pestes: illis e faucibus angues  
Stridula vibratis fuderunt sibila linguis,  
Femineæ qui more comæ per terga soluti,  
Ipsa flagellabant gaudentis colla Medusæ.  
Surgunt adversa subrectæ fronte colubræ,  
Vipereumque fluit depexo crine venenum.  
Hoc habet infelix, cunctis impune, Medusa,  
Quod spectare licet. Nam riçtus, oraque monstri  
Quis timuit? quem, qui recto se lumine vidit,  
Passa Medusa mori est? rapuit dubitantia fata  
Prævertitque metus: anima periire retenta  
Membra, nec emissæ riguere sub ossibus umbræ.  
Eumenidum crines solos movere furores:  
Cerberos Orpheo lenivit sibila cantu:  
Amphitryoniades vidit, quum vinceret, Hydram;  
Hoc monstrum timuit genitor, numenque secundum  
Phorcus aquis, Cetoque parens, ipsæque sorores  
Gorgones: hoc potuit cælo pelagoque minari  
Torporem insolitum, mundoque obducere terram.  
E cælo volucres subito quum pondere lapsæ:  
In scopulis hæsere feræ: vicina colentes  
Æthiopum totæ riguerunt marmore gentes.



Nullum animal visus patiens, ipsique retrorsum  
Effusi faciem vitabant Gorgonos angues.  
Illa sub Hesperiiis stantem Titana columnis  
In cautes Atlantæ dedit: cœloque timente  
Olim Phlægræos stantes serpente gigantas,  
Erexit montes, bellumque inmane deorum  
Pallados e medio confecit pectore Gorgon.  
Quo postquam partu Danaes, & divite nimbo  
Ortum Parrhasiæ vexerunt Persea pinnæ  
Arcados auctoris citharæ, liquidæque palæstræ,  
Et subitus præpes Cyllenida sustulit Harpen,  
Harpen alterius monstri jam cæde rubentem,  
(Ab Jove dilectæ fuso custode juvencæ:)  
Auxilium volucris Pallas tulit innuba fratri,  
Pacta caput monstri: terræque in fine Libyssæ  
Persea Phœbeos converti jussit ad ortus,  
Gorgonos averso sulcantem regna volatu:  
Et clipeum lævæ fulvo dedit ære nitentem,  
In quo saxificam jussit spectare Medusam.  
Quam sopor æternam tracturus morte quietem  
Obruit haud totam. Vigilat pars magna comarum,  
Defenduntque caput prætenti crinibus hydri:  
Pars jacet in medios vultus, oculique tenebras.  
Ipsa regit trepidum Pallas, dextraque tremante  
Perseos aversi Cyllenida dirigit Harpen,  
Lata colubriferi rumpens confinia colli.  
Quos habuit vultus lunati vulnere ferri

Cæsa caput Gorgon! quanto spirasse veneno  
Ore reor! quantumque oculos effundere mortis!  
Nec Pallas spectare potest: vultusque gelassent  
Perseos aversi, si non Tritonia densos  
Sparsisset crines, texissetque ora colubris.  
Aliger in cœlum rapta sic Gorgone fugit.  
Ille quidem pensabat iter, propiusque secabat  
Aera, si medias Europæ scinderet urbes;  
Pallas frugiferas jussit non lædere terras,  
Et parci populis. Quis enim non præpete tanto  
Æthera respiceret? Zephyro convertitur ales,  
Itque super Libyen, quæ nullo consita cultu,  
Sideribus, Phœboque vacat: premit orbita solis,  
Exuritque solum: nec terra celsior ulla  
Nox cadit in cœlum, lunæque meatibus obstat,  
Si flexus oblita vagi per recta cucurrit  
Signa, nec in Borean, aut in Noton effugit umbram.  
Illa tamen sterilis tellus, fecundaque nulli  
Arva bono, virus stillantis tabe Medusæ  
Concipiunt, dirosque fero de sanguine rores,  
Quos calor adjuvit, putrique incoxit arenæ.  
Hic, quæ prima caput movit de pulvere tabes,  
Aspida somniferam tumida cervice levavit.  
Plenior huic sanguis, & crassi gutta veneni  
Decidit: in nulla plus est serpente coactum.  
Ipsa caloris egens gelidum non transit in orbem  
Sponte sua, Niloque tenuis metitur arenas.

Sed quis erit lucri nobis pudor? inde petuntur  
 Huc Libycæ mortes, & fecimus Aspida mercem.  
 At non stare suum miseris passura cruorem,  
 Squamiferos ingens Hæmorrhøis explicat orbes:  
 Natus & ambiguæ coleret qui Syrtidos arva  
 Chersydros, trætique via fumante Chelydri:  
 Et semper recto lapsurus limite Cenchris:  
 Pluribus ille notis variatam pingitur alvum,  
 Quam parvis tinctus maculis Thebanus Ophites:  
 Concolor exustis, atque indiscretus arenis  
 Ammodytes: spinaque vagi torquente Cerastæ:  
 Et Scytale sparsis etiam nunc sola pruinis  
 Exuvias positura suas: & torrida Dipsas:  
 Et gravis in geminum surgens (1) caput Amphibæna:  
 Et Natrix violator aquæ, Jaculique volucres,  
 Et contentus iter cauda sulcare Parias,  
 Oraque distendens avidus spumantia (2) Prester:  
 Ossaque dissolvens cum corpore tabificus Seps.  
 Sibilaque effundens cunctas terrentia pestes,  
 Ante venena nocens, late sibi submovet omne  
 Vulgus, & in vacua regnat Basiliscus arena.  
 Vos quoque, qui cunctis innoxia nomina terris  
 Serpitis, aurato nitidi fulgore Dracones,  
 Pestiferos ardens facit Africa, ducitis altum  
 Aera cum pinnis, armentaue tota secuti

(1) vergens MSS. *triginta quinque*.

(2) fumantia, spirantia MSS.

Rumpitis ingentes amplexi verberare tauros.  
Nec tutus spatio est Elephas: datis omnia leto:  
Nec vobis opus est ad noxia fata veneno.  
Has inter pestes duro Cato milite siccum  
Emetitur iter, tot tristia fata suorum,  
Insolitasque videns parvo cum vulnere mortes.  
Signiferum juvenem Tyrrheni sanguinis Aulum  
Torta caput retro Dipsas calcata momordit.  
Vix dolor, aut sensus dentis fuit: ipsaque leti  
Fons caret invidia: nec quidquam plagâ minatur.  
Ecce subit virus tacitum, carpitque medullas  
Ignis edax, calidaque incendit viscera tabe.  
Ebibit humorem circum vitalia fusum  
Pestis, & in sicco linguam torrere palato  
Cœpit: defessos iret qui sudor in artus  
Non fuit, atque oculos lacrimarum vena refugit.  
Non decus imperii, mœsti non jura Catonis  
Ardentem tenere virum, quin spargere signa  
Auderet, totisque furens exquireret agris,  
Quas poscebat aquas sitiens in corde venenum.  
Ille vel in Tanain missus, Rhodanumque, Padumque  
Arderet, Nilonque bibens per rura vagantem.  
Accessit morti Libye, fatigue minorem  
Famam, Dipsas habet terris adjuta perustis.  
Scrutatur venas penitus squalentis arenæ:  
Nunc redit ad Syrtes, & fluctus accipit ore:  
Æquoreusque placet, sed non & sufficit, humor.

Nec sentit fatique genus, mortemque veneni:  
Sed putat esse sitim: ferroque aperire tumentes  
Sustinuit venas, atque os implere cruore.  
Jussit signa rapi propere Cato: discere nulli  
Permissum est hoc posse sitim. Sed tristior illa  
Mors erat ante oculos: miserique in crure Sabelli  
Seps stetit exiguus, fixo quem dente tenacem  
Avulsitque manu, piloque adfixit arenis.  
Parva modo serpens: sed qua non ulla cruentæ  
Tantum mortis habet. Nam plagæ proxima circum  
Fugit rupta cutis, pallentiaque ossa retextit.  
Jamque sinu laxo nudum est sine corpore vulnus,  
Membra natant sanie: suræ fluxere: sine ullo  
Tegmine poples erat: femorum quoque musculus omnis  
Liquitur, & nigra distillant inguina tabe.  
Dissiluit stringens uterum membrana, ruuntque  
Viscera: nec, quantum toto de corpore debet,  
Effluit in terras: sævum sed membra venenum  
Decoquit, in minimum mox (1) contrahit omnia virus.  
Vincula nervorum, & laterum textura, cavumque  
Pectus, & abstrusum fibris vitalibus, omne  
Quidquid homo est, aperit pestis. Natura profana  
Morte patet: manant humeri, fortesque lacerti:  
Colla, caputque fluunt. Calido non ocius Austro  
Nix resoluta cadit, nec solem cera sequetur.

(1) mors *vulgo*.

Parva loquor, corpus sanie stillasse perustum:  
Hoc & flamma potest. Sed quis rogus abstulit ossa?  
Hæc quoque discedunt, putresque secuta medullas  
Nulla manere sinunt rapidi vestigia fati.  
Cyniphias inter pestes tibi palma nocendi est:  
Eripiunt omnes animam, tu sola cadaver.  
Ecce subit facies leto diversa fluenti.  
Nasidium Marsi cultorem torridus agri  
Percussit Prester. Illi rubor igneus ora  
Succendit, tenditque cutem, pereunte figura,  
Miscens cuncta tumor toto jam corpore major:  
Humanumque egressa modum super omnia membra  
Efflatur sanies: late pollente veneno,  
Ipse latet penitus congesto corpore mersus:  
Nec lorica tenet distenti corporis auctum.  
Spumeus accenso non sic exsultat ahenò  
Undarum cumulus: nec tantos carbasa Coro  
Curvavere sinus. Tumidos non jam capit artus  
Informis globus, & confuso pondere truncus.  
Intactum volucrum rostris, epulasque daturum  
Haud impune feris, non ausi tradere busto,  
Nondum stante modo, crescens fugere cadaver.  
Sed majora parant Libycæ spectacula pestes.  
Impressit dentes Hæmorrhoids aspera Tullo  
Magnanimo juveni, miratorique Catonis.  
Utque solet pariter totis se effundere signis (1)

(1) sinis, tignis MSS. *varie*.

Corycii pressura croci: sic omnia membra  
 Emisere simul rutilum pro sanguine virus.  
 Sanguis erant lacrimæ: quæcumque foramina novit  
 Humor, ab his largus manat cruor: ora redundant,  
 Et patulæ nares: sudor rubet: omnia plenis  
 Membra fluunt venis: totum est pro vulnere corpus.  
 At tibi, Leve miser, fixus præcordia pressit  
 Niliaca serpente cruor: nulloque dolore  
 Testatus morsus subita caligine mortem  
 Accipis, & Stygias (1) somno descendis ad umbras.  
 Non tam veloci corrumpunt pocula leto,  
 Stipite quæ diro virgas mentita Sabinas  
 Toxicæ fatilegi carpunt matura Sabæi.

Ecce procul sævus sterilis se robore trunci  
 Torsit, & inmisit (jaculum vocat Africa) serpens:  
 Perque caput Pauli transactaque tempora fugit.  
 Nil ibi virus agit: rapuit cum vulnere fatum.  
 Depresum est, quæ funda rotat, quam lenta volarent,  
 Quam segnis Scythiæ strideret arundinis aer.

Quid prodest miseri Basiliscus cuspide Murri  
 Transactus? velox currit per tela venenum,  
 Invaditque manum: quam protinus ille resecto  
 Ense ferit, totoque semel demittit ab armo:  
 Exemplarque sui spectans miserabile leti  
 Stat tutus, pereunte manu. Quis fata putaret

(1) Socias MSS. *septemdec. optim.*

Scorpion, aut vires maturæ mortis habere?  
 Ille minax nodis, & recto verbere sævus,  
 Teste tulit cœlo victi decus Orionis.  
 Quis calcare tuas metuat Solpuga latebras?  
 Et tibi dant Stygiæ jus in sua fila sorores.  
 Sic nec clara dies, nec nox dabat atra quietem:  
 Suspecta est miseris in qua tellure jacebant.  
 Nam neque congestæ struxere cubilia frondes,  
 Nec culmis crevere tori: sed corpora fati  
 Expositi volvuntur humo, calidoque vapore  
 Adliciunt gelidas nocturno frigore pestes:  
 Innocuosque diu rictus torpente veneno  
 Inter membra (1) foveant: nec, quæ mensuraviarum,  
 Quisve modus norant, cœlo duce: sæpe querentes,  
 „Reddite dî, clamant, miseris, quæ fugimus, arma:  
 „Reddite Thessaliam. Patimur cur segnia fata  
 „In gladios jurata manus? pro Cæsare pugnant  
 „Dipsades, & peragunt civilia bella Cerastæ.  
 „Ire libet qua zona rubens atque axis inustus  
 „Solis equis: juvat ætheriis adscribere caussis  
 „Quod peream, cœloque mori. Nil Africa de te,  
 „Nec de te, natura, queror: tot monstra ferentem,  
 „Gentibus ablatum dederas serpentibus orbem:  
 „Impatiensque solum Cereris, cultore negato  
 „Damnasti, atque homines voluisti deesse veneno.  
 „In

(1) intra membra *ed. Juno.*



„In loca serpentum nos venimus: accipe pœnas,  
„Tu quisquis superûm commercia nostra perosus,  
„Hinc torrente plaga, dubiis hinc Syrtibus orbem  
„Abrumpens, medio posuisti limite mortes.  
„Per secreta tui bellum civile recessus  
„Vadit; & arcani miles tibi conscius orbis  
„Claustra petit mundi. Forsan majora supersunt  
„Ingressis. Coeunt ignes stridentibus undis,  
„Et premitur natura poli. Sed longius isthinc  
„Nulla jacet tellus, quam fama cognita nobis  
„Tristia regna Jubæ: quæremus forsitan istas  
„Serpentum terras? habet hoc solatia cœlum:  
„Vivit adhuc aliquid. Patriæ non arva requiro,  
„Europamque, alios soles, Asiamque videntem:  
„Qua te parte poli, qua te tellure reliqui  
„Africa. Cyrenis etiam nunc bruma rigebat.  
„Exiguane via legem convertimus anni?  
„Imus in adversos axes: evolvimur orbe:  
„Terga damus ferienda Noto. Nunc forsitan ipsa est  
„Sub pedibus jam Roma meis. Solatia fatis  
„Hæc petimus: veniant hostes, Cæsarque sequatur  
„Qua fugimus.“ Sic dura suos patientia questus  
Exonerat: cogit tantos tolerare labores  
Summa ducis virtus, qui nuda fusus arena  
Excubat, atque omni Fortunam provocat hora.  
Omnibus unus adest fatis: quocumque vocatur  
Advolat, atque ingens meritum, majusque salute

Contulit in letum vires: puduitque gementem  
Illo teste mori. Quod jus habuisset in ipsum  
Ulla lues? casus alieno in pectore vincit,  
Spectatorque docet magnos nil posse dolores.  
Vix miseris serum tantis lassata periclis  
Auxilium Fortuna dedit. Gens unica terras  
Incolit a sævo serpentum innoxia morsu,  
Marmaridæ Psylli: par lingua potentibus herbis:  
Ipse cruor tutus, nullumque admittere virus,  
Vel cantu cessante, potest. Natura locorum  
Jussit ut immunes mixti serpentibus essent.  
Profuit in mediis sedem posuisse venenis.  
Pax illa cum morte data est. Fiducia tanta est  
Sanguinis: in terras parvus quum decidit infans,  
Ne qua sit externæ Veneris mixtura timentes,  
Letifera dubios explorant aspide partus.  
Utque Jovis volucer, calido quum protulit ovo  
Implumes natos, solis convertit ad ortus:  
Qui pôtuere pati radios, & lumine recto  
Sustinuere diem cœli, servantur in usus,  
Qui Phœbo cessere, jacent: sic pignora gentis  
Psyllus habet, si quis tactos non horruit angues,  
Si quis donatis lusit serpentibus infans.  
Nec solum contenta sua gens illa salute,  
Excubat hospitibus, contraque nocentia monstra  
Psyllus adest populis. Qui tunc Romana secutus  
Signa, simul jussit statui tentoria ductor,

Primum quas valli spatium comprehendit arenas  
Expurgat cantu, verbisque fugantibus angues.  
Ultima castrorum medicatus circumit ignis.  
Hic ebulum stridit, peregrinaque galbana sudant,  
Et tamarix non læta comas, Eoque costos,  
Et panacea potens, & Thessala centaurea:  
Peucedanonque sonat flammis, Erycinaque thapsos,  
Et larices fumoque gravem serpentibus urunt  
Abrotanum, & longe nascentis cornua cervi.  
Sic nox tuta viris. At si quis peste diurna  
Fata trahit, magicæ tunc sunt miracula gentis,  
Psyllorumque ingens & rapti pugna veneni.  
Nam primum tacta designat membra saliva,  
Quæ cohibet virus, retinetque in vulnere pestes.  
Plurima tum volvit spumanti carmina lingua  
Murmure continuo, nec dat suspiria cursus  
Vulneris, aut minimum patiuntur fata tacere.  
Sæpe quidem pestis nigris inserta medullis  
Excantata fugit: sed si quod tardius audit  
Virus, & elicitum, jussumque exire repugnat;  
Tunc superincumbens pallentia vulnera lambit,  
Ore venena trahens, exsiccatur dentibus artus,  
Extractamque tenens gelido de corpore mortem  
Exspuit: & cujus morsus superaverit anguis,  
Jam promptum Psyllis vel gustu nosse veneni.  
Hoc igitur levior tandem Romana juvenus  
Auxilio, late squalentibus errat in arvis.

Bis positis, Phœbe flammis, bis luce recepta  
Vidit arenivagum surgens fugiensque Catonem.

Jamque illis magis, atque magis durescere pulvis  
Cœpit, & in terram Libye spissata redire.

Jamque procul raræ nemorum se tollere frondes:  
Surgere congesto non culta (1) mapalia culmo.

Quanta dedit miseris melioris gaudia terræ,  
Quum primum sævos contra videre leones?

Proxima Leptis erat, cujus statione quietam  
Exegere hiemem nimbis flammisque carentem.

Cæsar ut Emathia satiatus clade recessit,  
Cetera curarum projecit pondera, soli

Intentus genero: cujus vestigia frustra  
Terris sparsa legens, fama ducce tendit in undas,

Threiciasque legit fauces, & amore notatum  
Æquor, & Eroas lacrimoso litore turres,

Qua pelago nomen Nephelejas abstulit Helle.  
Non Asiam brevioris aquæ disternat usquam

Fluctus ab Europa, quamvis Byzantion arto  
Pontus, & ostriferam dirimat Chalcedona cursu,

Euxinumque ferens parvo ruat ore Propontis.  
Sigeasque petit famæ mirator arenas,

Et Simoentis aquas, & Grajo nobile busto  
Rhætion, & multum debentes vatibus umbras.

Circumit exustæ nomen venerabile Trojæ,

(1) non visa, nunc jussa MSS.

Magnaque Phœbei quærit vestigia muri.  
 Jam silvæ steriles, & putres robore trunci  
 Assaraci pressere domus, & templa deorum  
 Jam lassa radice tenent: ac tota teguntur  
 Pergama dumetis: etiam periere ruinæ.  
 Adspicit Hesiones scopulos, silvaeque latentes  
 Anchisæ thalamos; quo judex sederit antro:  
 Unde puer raptus cœlo: quo vertice Nais  
 Luserit Cœnone: nullum est sine nomine saxum.  
 Inscius in sicco serpentem pulvere rivum  
 Transierat, qui Xanthus erat: securus in alto  
 Gramine ponebat gressus; Phryx incola manes  
 Hecitoreos calcare vetat. Discussa jacebant  
 Saxa, nec ullius faciem servantia sacri;  
 Hecreas (1), monstrator ait, non respicis aras?  
 O sacer, & magnus vatum labor, omnia fato  
 Eripis, & populis donas mortalibus ævum.  
 Invidia sacræ, Cæsar, ne tangere famæ:  
 Nam, si quid Latiis fas est promittere Musis,  
 Quantum Smyrnæi durabunt vatis honores,  
 Venturi me, teque legent: Pharsalia nostra  
 Vivet, & a nullo tenebris damnabimur ævo.  
 Ut ducis implevit visus veneranda vetustas,  
 Erexit subitas congestu cespitis aras,  
 Votaque turicremos non irrita fudit in ignes.

(1) Hecreas *edd. voss.*

„ Dî cinerum, Phrygias colitis quicumque ruinas;  
„ Æneæque mei, quos nunc Lavinia sedes  
„ Servat & Alba lares, & quorum lucet in aris  
„ Ignis adhuc Phrygius, nullique adspêcta virorum  
„ Pallas, in abstruso pignus memorabile templo,  
„ Gentis Juleæ vestris clarissimus aris  
„ Dat pia tura nepos, & vos in sede priore  
„ Rite vocat: date felices in cetera cursus:  
„ Restituam populos. Grata vice mœnia reddent  
„ Ausonidæ Phrygibus Romanaque Pergama surgent.“  
Sic fatus, repetit classes, & tota secundis  
Vela dedit Coris, avidusque urgente procella  
Iliacas pensare moras, Asiamque potentem  
Prævehitur, pelagoque Rhodon spumante reliquit.  
Septima nox Zephyro numquam laxante rudentes  
Ostendit Phariis Ægyptia litora flammis.  
Sed prius orta dies nocturnam lampada textit,  
Quam tutas intraret aquas. Ibi plena tumultus  
Litora, & incerto turbatas murmure voces  
Accipit: ac dubiis veritus se credere regnis  
Abstenuit tellure rates. Sed dira satellites  
Regis dona ferens, medium provectus in æquor,  
Colla gerit Magni, Phario velamine tecta,  
Ac prius infanda commendat crimina voce.  
„ Terrarum domitor, Romanæ maxime gentis,  
„ Et, quod adhuc nescis, genero secure peremto;  
„ Rex tibi Pellæus belli pelagique labores

„Dōnat, &, Emathīs quod solum defuit armis,  
 „Exhibet: absenti bellum civile peractum est.  
 „Thessalias quærens Magnus reparare ruinas,  
 „Ense jacet nostro: tanto te pignore Cæsar  
 „Emimus: hoc tecum percussum est sanguine fœdus.  
 „Accipe regna Phari nullo quæsitâ cruore:  
 „Accipe Niliaci jus gurgitis; accipe, quidquid  
 „Pro Magni cervice dares; dignumque clientem  
 „Castris crede tuis, cui tantum fata licere  
 „In generum voluere tuum. Nec vile putaris  
 „Hoc meritum, facili nobis quod cæde paratum est.  
 „Hospes avitus erat: depulso sceptrâ parente  
 „Reddiderat. Quid plura feram? tu nomina tanto (1)  
 „Invenies operi, vel famam consule mundi.  
 „Si scelus est, plus te nobis debere fateris,  
 „Quod scelus hoc non ipse facis.“ Sic fatus, opertum  
 Detexit, tenuitque caput. Jam languida morte  
 Effigies habitum noti mutaverat oris.  
 Non primo Cæsar damnavit munera visu,  
 Avertitque oculos: vultus, dum crederet, hæsit:  
 Utque fidem vidit sceleris, tutumque putavit  
 Jam bonus esse socer; lacrimas non sponte cadentes  
 Effudit, gemitusque expressit pectore læto,  
 Non aliq̃ter manifesta putans abscondere mentis  
 Gaudia, quam lacrimis. Meritumque inmane tyranni  
 Destruit, & generi mavult lugere revulsum,

(1) nomina tanta MS.

Quam debere caput. Qui duro membra senatus  
 Calcarat vultu, qui sicco lumine campos  
 Viderat Emathios, uni tibi Magne negare  
 Non audet gemitus. O sors durissima fati!  
 Huccine tu Cæsar scelerato Marte petisti,  
 Qui tibi flendus erat? non mixti fœdera tangunt  
 Te generis, nec nata jubet mœrere, neposque.  
 Credis apud populos Pompeji nomen amantes  
 Hoc castris prodesse tuis. Fortasse tyranni  
 Angeris (1) invidia, captique in viscera Magni  
 Hoc alii licuisse doles, quererisque perisse  
 • Vindictam belli, raptumque ex jure superbi  
 Victoris generum. Quisquis te flere coegit  
 Impetus, a vera longe pietate recessit.  
 Scilicet hoc animo terras, atque æquora lustras,  
 Necubi suppressus pereat gener. O bene rapta  
 Arbitrio mors ista tuo! quam magna remisit  
 Crimina Romano tristis Fortuna pudori,  
 Quod te non passa est misereri, perfide, Magni  
 Viventis! nec non his fallere vocibus audet,  
 Adquiratque fidem simulati fronte doloris.  
 „Aufer ab adspectu nostro funesta, satellites,  
 „Regis dona tui: pejus de Cæsare vestrum,  
 „Quam de Pompejo meruit scelus: unica belli  
 „Præmia civilis, victis donare salutem

(1) tangeris *vulgo*.



„Perdidimus. Quod si Phario germana tyranno  
„Non invisa foret, potuissem reddere regi,  
„Quod meruit, fratrique tuum pro munere tali  
„Misissem, Cleopatra, caput. Secreta (1) quid arma  
„Movit, & inseruit nostro sua tela labori?  
„Ergo in Thessalicis Pellæo fecimus arvis  
„Jus gladio? vestris quæsita licentia regnis?  
„Non tuleram Magnum mecum Romana regentem;  
„Te Ptolemæe feram? frustra civilibus armis  
„Miscuimus gentes. Si qua est hoc orbe potestas  
„Altera, quam Cæsar: si tellus ulla duorum est.  
„Vertissem Latias ab vestro litore proras:  
„Famæ cura vetat, ne non damnasse cruentam,  
„Sed videar timuisse Pharon. Nec fallere vos me  
„Credite victorem: nobis quoque tale paratum  
„Litoris hospitium: ne sic mea colla gerantur,  
„Thessaliæ Fortuna facit. Majore profecto,  
„Quam metui poterat, discrimine gessimus arma:  
„Exsiliium, generique minas, Romamque timebam:  
„Pœna fugæ Ptolemæus erat. Sed parcimus annis,  
„Donamusque nefas. Sciat hac pro cæde tyrannus  
„Nil venia plus posse dari. Vos condite busto  
„Tanti colla ducis: sed non, ut crimina solum  
„Vestra tegat tellus; justo date tura sepulcro,  
„Et placate caput, cineresque in litore fusos

(1) *scelerata codd. tres.*

„Colligite, atque unam sparsis date manibus urnam.  
„Sentiat adventum soceri, vocesque querentis  
„Audiat umbra pias. Dum nobis omnia præfert,  
„Dum vitam Phario mavult debere clienti,  
„Læta dies rapta est populis: concordia mundo  
„Nostra perit: caruere deis mea vota secundis,  
„Ut te complexus, positis felicibus armis,  
„Adfectus abs te veteres, vitamque rogarem,  
„Magne, tuam: dignaque satis mercede laborum  
„Contentus, par esse tibi, tunc pace fideli  
„Fecissem, ut victus posses ignoscere divis,  
„Fecisses ut Roma mihi.“ Nec talia fatus  
Invenit fletus comitem, nec turba querenti  
Credidit: abscondunt gemitus, & pectora læta  
Fronte tegunt, hilaresque nefas spectare cruentum  
(O bona libertas) Cæsar quum lugeat, audent.





## LIBER DECIMUS.

### ARGUMENTUM.

*Enarrat decimus quod Cæsar mænibus urbis  
 Exceptus sævoque agitatæ murmure turbis  
 Senserit, haud sibi jam Magni conducere mortem,  
 Sed sibi, ni caveat, parilem succedere sortem.  
 Inde simultates Cleopatæ cum Ptolemæo  
 Pacat, & hinc luxu discumbit immoderato.  
 Inde sacerdotem fretum ratione senili  
 Orat, ut exponat fluvii primordia Nili.  
 Tum sibi, ceu genero, mortem consciscere nisum  
 Cum sceleris socio multat cervice Potbinum.  
 Hinc imperfecta moriens ratione poeta  
 Deserit in medio fuerant quæ substituenda.*

**U**T primum terras Pompeji colla secutus  
 Adtigit, & diras calcavit Cæsar arenas:  
 Pugnavit Fortuna ducis, fatumque nocentis  
 Ægypti, regnum Lagi Romana sub arma

Iret; an eriperet mundo Memphiticus ensis  
 Victoris, victique caput. Tua profuit umbra,  
 Magne, tui socerum rapuere a sanguine manes:  
 Ne populus post te Nilum Romanus amaret (1).  
 Inde Parætoniam fertur securus in urbem,  
 Pignore tam sævi sceleris sua signa secutam (2):  
 Sed fremitu vulgi fasces, & jura querentis  
 Inferri Romana suis, discordia sensit  
 Pectora, & ancipites animos, Magnumque perisse  
 Non sibi. Tum vultu semper celante pavores,  
 Intrepidus superûm sedes, & templa vetusti  
 Numinis, antiquas Macetûm testantia vires,  
 Circumit: & nulla captus dulcedine rerum,  
 Non auro, cultuque deûm, non mœnibus urbis,  
 Effossum tumulis cupide descendit in antrum.  
 Illic Pellæi proles vesana Philippi  
 Felix prædo jacet: terrarum vindice fato  
 Raptus: sacratis totum spargenda per orbem  
 Membra viri posuere adytis: Fortuna pepercit  
 Manibus, & regni duravit ad ultima fatum.  
 Nam sibi libertas umquam si redderet orbem,  
 Ludibrio servatus erat, non utile mundo  
 Editus exemplum, terras tot posse sub uno  
 Esse viro. Macetûm fines, latebrasque suorum  
 Deseruit, viâsque patri despexit Athenas:

(1) haberet *vulgo*.(2) secutis *vulgo*.

Perque Asiæ populos fatis urgentibus ædus  
Humana cum strage ruit, gladiumque per omnes  
Exegit gentes: ignotos miscuit amnes,  
Persarum Euphraten, Indorum sanguine Gangen:  
Terrarum fatale malum, fulmenque, quod omnes  
Percuteret pariter populos, & sidus iniquum  
Gentibus. Oceano classes inferre parabat  
Exteriore mari. Non illi flamma, nec undæ,  
Nec sterilis Libye, nec Syrtibus (1) obstitit Hammon.  
Isset in occasus, mundi devexa secutus,  
Ambissetque polos, Nilonque ab fonte bibisset:  
Occurrit suprema dies, natura que solum  
Hunc potuit finem vesano ponere regi:  
Qui secum Invidia, qua totum ceperat orbem,  
Abstulit imperium; nulloque herede relicto,  
Totius fati lacerandas præbuit urbes.  
Sed cecidit Babylone sua, Parthoque verendus.  
Pro pudor! Eoi propius timuere sarissas,  
Quam nunc pila timent populi. Licet usque sub Arcton  
Regnemus, Zephyrique domus, terrasque premamus.  
Flagrantis post terga Noti: cedemus in ortu  
Arsacidum domino. Non felix Parthia Crassis  
Exiguæ secuta fuit provincia Pellæ.

Jam Pelusiaco veniens a gurgite Nili  
Rex puer, imbellis populi sedaverat iras,

(1) Syrticus vulgo.

Obside quo pacis Pellæa tutus in aula  
 Cæsar erat: quum se parva Cleopatra biremi,  
 Corrupto custode Phari laxare (1) catenas,  
 Intulit Emathiis ignaro Cæsare tectis;  
 Dedecus Ægypti, Latio feralis Erinnyes,  
 Romano non casta malo. Quantum impulit Argos,  
 Iliacasque domus facie Spartana nocenti,  
 Hesperios auxit tantum Cleopatra furores.  
 Terruit illa suo, si fas, Capitolia sistro,  
 Et Romana petit imbelli signa Canopo,  
 Cæsare captivo Pharios ductura triumphos:  
 Leucadioque fuit dubius sub gurgite casus,  
 An mundum ne nostra quidem matrona teneret.  
 Hoc animi nox illa dabat, quæ prima cubili  
 Miscuit incestam ducibus Ptolemaida nostris.  
 Quis tibi vesani veniam non donet amoris,  
 Antoni? durum quum Cæsaris hauserit ignis  
 Pectus, & in media rabie, medioque furore,  
 Et Pompejanis habitata manibus aula,  
 Sanguine Thessaliæ cladis perfusus adulter  
 Admisit Venerem curis, & miscuit armis  
 Illicitosque toros, & non ex conjuge partus?  
 Pro pudor! oblitus Magni, tibi Julia fratres  
 Obscena de matre dedit: partesque fugatas  
 Passus in extremis Libyes coalescere regnis,

(1) laxata MSS. tres & ed. Lovan.

Tempora Niliaco turpis dependit amori,  
Dum donare Pharon, dum non sibi vincere mavult.  
Quem formæ confisa suæ Cleopatra sine ullis  
Tristis adit lacrimis, simulatum comta dolorem  
Qua decuit, laceros veluti dispersa capillos,  
Et sic orsa loqui: „Si qua est, o maxime Cæsar,  
„Nobilitas, Pharii proles clarissima Lagi,  
„Exsul in æternum sceptris depulsa paternis,  
„Si tua restituat veteri me dextera fato,  
„Complector regina pedes. Tu gentibus æquum  
„Sidus ades nostris. Non urbes prima tenebo  
„Femina Niliacas: nullo discrimine sexus  
„Reginam scit ferre Pharos. Lege summa peremti  
„Verba patris, qui jura mihi communia regni,  
„Et thalamos cum fratre dedit. Puer ille sororem,  
„Sit modolibet, amat: sed habet sub jure Pothini  
„Adfectus, ensesque suos. Nil ipsa paterni  
„Juris, nil repeto: culpa, tantoque pudore  
„Solve domum: remove funesta satellitis arma,  
„Et regem regnare jube. Quantosne tumores  
„Mente gerit famulus, Magni cervice revulsa!  
„Jam tibi (sed procul hoc avertant fata) minatur.  
„Sat fuit indignum, Cæsar, mundoque tibi que,  
„Pompejum facinus meritumque fuisse Pothini.“

Nequidquam duras tentasset Cæsaris aures:  
Vultus adest precibus, faciesque incesta perorat.  
Exigit infandam, corrupto judice, noctem.

Pax ubi parta duci, donisque ingentibus cmta est;  
 Excepere epulæ tantarum gaudia rerum:  
 Explicuitque suos magno Cleopatra tumultu  
 Nondum translatos Romana in sæcula luxus.  
 Ipse locus templi, quod vix corruptior ætas  
 Exstruit, instar erat: laqueataque tecta ferebant  
 Divitias, crassumque trabes absconderat aurum.  
 Nec summis crustata domus, sedisque nitebat  
 Marmoribus: stabatque sibi non segnis Achates,  
 Purpureusque lapis, totaque effusus in aula  
 Calcabatur Onyx: Hebenus Mareotica vastos  
 Non operit postes, sed stat pro robore vili  
 Auxilium, non forma domus. Ebur atria vestit,  
 Et subfixa (1) manu foribus testudinis Indæ  
 Terga sedent, crebro maculas distincta Smaragdo.  
 Fulcit gemma toros, & Jaspide fulva supellex:  
 Strata micant: Tyrio quorum pars maxima fuco  
 Cocta diu, virus non uno duxit ahenò;  
 Pars auro plumata nitet; pars ignea cocco,  
 Ut mos est Phariis miscendi licia telis.  
 Tum famulæ numerus turbæ, populusque minister,  
 Discolor hos sanguis, alios distinxerat ætas.  
 Hæc Libycos, pars tam flavos gerit altera crines,  
 Ut nullis Cæsar Rheni se dicat in arvis  
 Tam rutilas vidisse comas. Pars sanguinis usti  
Tor-

(1) suffecta MSS. plerique.



Torta caput, refugosque gerens a fronte capillos.  
Nec non infelix ferro mollita juvenus,  
Atque exsecra virum. Stat contra fortior ætas,  
Vix ulla fuscante tamen lanugine malas.

Discubuere illic reges, majorque potestas  
Cæsar: & inmodice formam fucata nocentem,  
Nec sceptris contenta suis, nec fratre marito,  
Plena maris rubri spoliis, colloque, comisque  
Divitias Cleopatra gerit, cultuque laborat.  
Candida Sidonio perlucet pectora filo,  
Quod Nilotis acus percussum pectine Serum  
Solvit, & extenso laxavit stamina velo.  
Dentibus hic niveis, sectos Atlantide silva  
Imposuere orbes; quales ad Cæsaris ora  
Nec capto venere Juba. Pro! cæcus, & amens  
Ambitione furor, civilia bella gerenti  
Divitias aperire suas, incendere mentem  
Hospitis armati. Non sit licet ille nefando  
Marte paratus opes mundi quæsisse ruina:  
Pone duces priscos, & nomina pauperis ævi  
Fabricios, Curiosque graves: hic ille recumbat  
Sordidus Hetruscis abductus Consul aratris,  
Optabit patriæ talem duxisse triumphum.  
Infudere epulas auro, quod terra, quod aer,  
Quod pelagus, Nilusque dedit, quod luxus inani  
Ambitione furens toto quæsit in orbe,  
Non mandante fame: multas volucresque ferasque

Ægypti posuere deos: manibusque ministrat  
Niliacas crystallus aquas: gemmæque capaces  
Excepere merum, sed non Mareotidos uvæ,  
Nobile sed paucis senium cui contulit annis  
Indomitum Meroe cogens spumare Falernum.  
Accipiunt sertas (1) nardo florente coronas,  
Et numquam fugiente rosa: multumque madenti  
Infudere comæ, quod nondum evanuit aura  
Cinnamon, externa nec perdidit aera terra.  
Adveſtumque recens vicinæ messis Amomon.  
Discit opes Cæsar spoliati perdere mundi,  
Et gesisse pudet genero cum paupere bellum,  
Et caussas Phariis Martis cum gentibus optat.

Postquam epulis, Bacchoque modum lassata voluptas  
Imposuit; longis Cæsar producere noctem  
Inchoat adloquiis: summaque in sede jacentem  
Linigerum placidis compellat Achorea diſtis:  
„O sacris devote senex, quodque arguit ætas,  
„Non neglecte deis, Phariæ primordia gentis,  
„Terrarum situm, vulgique edissere mores,  
„Et ritus, formasque deûm: quodcumque vetustis  
„Insculptum est adytis profer, noscique volentes  
„Prode deos. Si Cecropium sua sacra Platona  
„Majores docuere tui: quis dignior umquam  
„Hoc fuit auditu, mundique capacior hospes?  
„Fama quidem generi Pharias me duxit ad urbes,

(1) septas, festas, sectas MSS.

„Sed tamen & vestri: media inter prœlia semper  
 „Stellarum, cœlique plagis, superisque (1) vacavi,  
 „Nec meus Eudoxi vincetur Fastibus annus.  
 „Sed quum tanta meo vivat sub pectore virtus,  
 „Tantus amor veri, nihil est quod noscere malim,  
 „Quam fluvii caussas per sæcula tanta latentes,  
 „Ignotumque caput: spes sit mihi certa videndi  
 „Niliacos fontes; bellum civile relinquam.“  
 Finierat, contraque sacer sic orsus Achoreus:

„Fas mihi magnorum Cæsar secreta parentum  
 „Prodere, ad hoc ævi populis ignota profanis.  
 „Sit pietas aliis, miracula tanta silere:  
 „Ast ego cœlicolis gratum reor, ire per omnes  
 „Hoc opus, & sacras populis notescere leges.  
 „Sideribus, quæ sola fugam moderantur Olympi,  
 „Occurruntque polo, diversa potentia prima  
 „Mundi lege data est. Sol tempora dividit anni (2),  
 „Mutat nocte dies, radiisque potentibus astra  
 „Ire vetat, cursusque vagos statione moratur.  
 „Luna suis vicibus Tethyn, terrenaque miscet.  
 „Frigida Saturno glacies, & zona nivalis  
 „Cessit. Habet ventos, incertaque fulmina (3) Mavors.  
 „Sub Jove temperies, & numquam turbidus aer.  
 „At fecunda Venus cunctarum semina rerum

(1) curisque *duo ex melioribus.*

(2) ævi *MSS. pleriq. & edd. Aldine.*

(3) numina, flumina, flamina *MSS.*

„Possidet. Inmensæ Cyllenius arbiter undæ est.  
„Hunc ubi pars cœli tenuit, qua mixta Leonis  
„Sidera sunt Cancro, rapidos qua Sirius ignes  
„Exerit, & varii mutator circulus anni  
„Ægoceron, Cancrumque tenet, cui subdita Nili  
„Ora latent: quæ quum dominus percussit aquarum  
„Igne superjecto, tunc Nilus fonte soluto  
„Exit, ut Oceanus lunaribus incrementis  
„Jussus adest, auctusque suos non ante coartat,  
„Quam nox æstivas a sole receperit horas.  
„Vana fides veterum, Nilo, quo crescat in arva,  
„Æthiopum prodesse nives. Non Arctos in illis  
„Montibus, aut Boreas. Testis tibi sole perusti  
„Ipse color populi, calidique vaporibus Austri.  
„Adde, quod omne caput fluvii, quodcumque soluta  
„Præcipitat glacies, ingresso vere tumescit  
„Prima tabe nivis: Nilus nèque suscitât undas  
„Ante Canis radios, nec ripis adligat amnem  
„Ante parem nocti, Libra sub iudice, Phœbum,  
„Unde etiam leges aliarum nescit aquarum:  
„Nec tumet hybernus, quum longe sole remoto  
„Officiis caret unda suis: dare jussus iniquo.  
„Temperiem cœlo, mediis æstatibus exit,  
„Sub torrente plaga: neu terras dissipet ignis,  
„Nilus adest mundo, contraque incensa Leonis  
„Ora tumet: Cancroque suam torrente Syenen,  
„Imploratus adest: campos nec liberat undis,

„Donec in autumnum declinet Phœbus, & umbras  
„Extendat Meroe. Quis caussas reddere possit?  
„Sic jussit natura parens decurrere Nilum:  
„Sic opus est mundo. Zephyros quoque vana vetustas  
„His adscribit aquis, quorum stata tempora flatus,  
„Continuique dies, & in aere longa potestas:  
„Vel quod ab occiduo pellunt tot nubila cœlo  
„Trans Noton, & fluvio cogunt incumbere nimbos:  
„Vel quod aquas toties rumpentis litora Nili  
„Adsiduo feriunt, coguntque resistere fluctu.  
„Ille mora cursus, adversique óbice ponti  
„Æstuat in campos. Sunt qui spiramina terris  
„Esse putant, magnosque cavæ compagis hiatus.  
„Commeat hac tacitis penitus discursibus unda  
„Frigore ab Arctoo medium revocata sub axem:  
„Quum Phœbus pressit Meroen, tellusque perusta  
„Illuc duxit aquas, trahitur Gangesque, Padusque,  
„Per tacitum mundi; tunc omnia flumina Nilus  
„Uno fonte vomens non uno gurgite perfert.  
„Rumor, ab Oceano, qui terras adligat omnes,  
„Exundante procul violentum erumpere Nilum,  
„Æquoreosque sales longo mitescere tractu.  
„Nec non Oceano pasci Phœbumque polosque  
„Credimus: hunc, calidi tetigit quum brachia Cancri,  
„Sol rapit, atque undæ plus, quam quod digerat aer  
„Tollitur. Hoc noctes referunt, Niloque refundunt.  
„Ast ego, si tantam jus est mihi solvere litem,

„Quasdam, Cæsar, aquas post mundi sera peracti  
 „Sæcula, concussis terrarum erumpere venis,  
 „Non id agente deo, quasdam compage sub ipsa  
 „Cum toto cœpisse reor, quas ille creator,  
 „Atque opifex rerum certo sub jure coercet.  
 „Quæ tibi noscendi Nilum, Romane, cupido,  
 „Et Phariis, Persisque fuit, Macetumque tyrannis:  
 „Nullaque non ætas voluit conferre futuris  
 „Notitiam: sed vincit adhuc natura latendi.  
 „Summus Alexander regum, quos Memphis adorat,  
 „Invidit Nilo, misitque per ultima terræ  
 „Æthiopum lectos: illos rubicunda perusti  
 „Zona poli tenuit; Nilum videre calentem.  
 „Venit ad occasus, mundique extrema Sesostri,  
 „Et Pharios currus regum cervicibus egit:  
 „Antetamen vestros amnes Rhodanumque, Padumque,  
 „Quam Nilum de fonte bibit: Vesanus in ortus  
 „Cambyses longi populos pervenit ad ævi,  
 „Defectusque epulis, & pastus cæde suorum,  
 „Ignoto te, Nile, redit. Non fabula mendax  
 „Ausa loqui de fonte tuo est, ubicumque videris,  
 „Quæreris: & nulli contingit gloria genti,  
 „Ut Nilo sit læta (1) suo. Tua flumina prodam,  
 „Qua deus undarum celator, Nile, tuarum  
 „Te mihi nosse dedit. Medio consurgis ab axe,

(1) nota MSS. *quinque*.

„Ausus in ardentem ripas adtollere Cancrum:  
 „In Borean is rectus aquis, mediumque Booten:  
 „Cursus in occasum flexu torquetur, & ortus,  
 „Nunc Arabum populis, Libycis nunc æquus arenis:  
 „Teque vident primi, quærunt tamen hi quoque, Seres,  
 „Æthiopumque feris alieno gurgite campos:  
 „Et te terrarum nescit cui debeat orbis.  
 „Arcanum natura caput non prodidit ulli,  
 „Nec licuit populis parvum te, Nile, videre,  
 „Amovitque sinus, & gentes maluit ortus  
 „Mirari, quam nosse tuos. Consurgere in ipsis  
 „Jus tibi solstitiis, aliena crescere bruma,  
 „Atque hiemes adferre (1) tuas: solique vagari  
 „Concessum per utrosque polos. Hic quæritur ortus,  
 „Illic finis aquæ. Late tibi gurgite rupto  
 „Ambitur nigris Meroe fecunda colonis,  
 „Læta comis hebeni: quæ, quamvis arbore multa  
 „Frondeat, æstatem nulla sibi mitigat umbra:  
 „Linea tam rectum mundi fert illa Leonem.  
 „Inde plagas Phœbi, damnum non passus aquarum,  
 „Prævehcris, sterilisque diu metiris arenas,  
 „Nunc omnes unum vires collectus in amnem,  
 „Nunc vagus, & spargens facilem tibi cedere ripam.  
 „Rursus multifidas revocat piger alveus undas,  
 „Qua dirimunt Arabum populis Ægyptia rura

(1) perferre *edd. principes*.

„Regni claustra Philæ. Mox te deserta secantem,  
 „Quæ dirimunt nostro rubri commercia Ponti,  
 „Mollis lapsus agit. Quis te tam lene fluentem  
 „Moturum tantas violenti gurgitis iras,  
 „Nile, putet? sed quum lapsus abrupta viarum  
 „Excepere tuos, & præcipites cataraclæ,  
 „Ac nusquam vetitis ulla obsistere cautes  
 „Indignaris aquis: spuma tunc astra lacessis:  
 „Cuncta fremunt undis: ac multo murmure montis  
 „Spumeus invitis (1) canescit fluctibus amnis.  
 „Hinc, Abaton quam nostra vocat veneranda vetustas,  
 „Petra patens, (2) primos sentit percussa tumultus,  
 „Et scopuli, placuit fluvii quos dicere venas,  
 „Quod manifesta novi primum dant signa tumoris.  
 „Hinc montes natura vagis circumdedit undis,  
 „Qui Libyæ te, Nile, negant: quos inter in alta  
 „It convalle tacens jam moribus (3) unda receptis.  
 „Prima tibi campos permittit; aperta que Memphis  
 „Rura, modumque vetat crescendi ponere ripas.“

Sic velut in tuta securi pace trahebant  
 Noctis iter mediæ: sed non vesana Pothini  
 Mens imbuta semel tam sacra cæde, vacabat  
 A scelerum motu. Magno nihil ille perempto  
 Jam putat esse nefas: habitant sub pectore manes,

(1) *invidis vulgo.*

(2) *terra potens vulgo.*

(3) *jacens stat molibus var.*



Utriusque deæ dant in nova monstra furorem.  
Dignatur viles isto quoque sanguine dextras,  
Quo Fortuna parat victos perfundere Patres;  
Pœnaque civilis belli, vindicta senatus  
Pæne data est famulo. Procul hoc avertite fata  
Crimen, ut hæc Bruto cervix absente secetur.  
It scelus in Pharium Romani pœna tyranni,  
Exemplumque perit. Struit audax irrita fatis,  
Nec parat occultæ cædem committere fraudi;  
Invisumque ducem detecto Marte lacessit.  
Tantum animi delicta dabant, ut colla ferire  
Cæsaris, & socerum jungi tibi, Magne, juberet:  
Atque hæc dicta monet famulos perferre fideles  
Ad Pompejanæ socium sibi cædis Achillam,  
Quem puer imbellis cunctis præfecerat armis,  
Et dederat ferrum, nullo sibi jure retento,  
In cunctos, in seque simul. „Tu mollibus, inquit,  
„Nunc incumbere toris, & pingues exige somnos:  
„Invasit Cleopatra domum. Nec prodita tantum est,  
„Sed donata Pharos. Cessas accurrere solus  
„Ad dominæ thalamos? nubit soror impia fratri:  
„Nam Latio jam nupta duci est: interque maritos  
„Discurrens Ægypton habet, Romamque meretur.  
„Expugnare senem potuit Cleopatra venenis:  
„Crede miser puero: quem nox si junxerit una,  
„Et semel amplexus incesto pectore passus  
„Hauserit obscenum titulo pietatis amorem,

„Meque, tuumque caput, per singula forsitan illi  
„Oscula donabit. Crucibus, flammisque luemus  
„Si fuerit formosa soror. Nil undique restat  
„Auxilii: rex hinc conjux, hinc Cæsar adulter:  
„Et sumus, ut fatear, tam sæva iudice sontes.  
„Quem non ex nobis credit Cleopatra nocentem  
„A quo casta fuit? per te, quod fecimus una,  
„Perdidimusque nefas, perque ictum sanguine Magni  
„Fœdus, ades: subito bellum molire tumultu:  
„Irrue nocturnus, rumpamus funere tædas,  
„Crudelemque toris dominam mactemus in ipsis  
„Cum quocumque viro. Nec nos deterreat ausis  
„Hesperii Fortuna ducis. Quæ sustulit illum,  
„Imposuitque orbi, communis gloria nobis:  
„Nos quoque sublimes Magnus facit. Adspice litus  
„Spem nostri sceleris: pollutos consule fluctus,  
„Quid liceat nobis: tumulumque e pulvere parvo  
„Adspice Pompeji non omnia membra tegentem.  
„Quem metuis, par hujus erat. Non sanguine clari:  
„Quid refert? nec opes populorum, ac regna movemus.  
„Ad scelus ingentis fati sumus. Adtrahit illos  
„In nostras Fortuna manus. En altera venit  
„Victima nobilior. Placemus cæde secunda  
„Hesperias gentes. Jugulus mihi Cæsaris haustus  
„Hoc præstare potest, Pompeji cæde nocentes  
„Ut populus Romanus amet. Quid nomina tanta  
„Horremus, viresque ducis, quibus ille relictis

„Miles erit? nox hæc peraget civilia bella,  
„Inferiasque dabit populis, & mittet ad umbras,  
„Quod debetur adhuc, mundi caput. Ite feroces  
„Cæsaris in jugulum: præstet Lagea juvenus  
„Hoc regi, Romana sibi. Tu parce morari:  
„Plenum epulis, madidumque mero, Venerique paratum  
„Invenies: aude: superos tot vota Catonum,  
„Brutorumque tibi tribuent.“ Non segnis Achilles  
Suadenti parere nefas. Haud clara movendis,  
Ut mos, signa dedit castris, nec prodidit arma  
Ullius clangore tubæ: temere omnia sævi  
Instrumenta rapit belli. Pars maxima turbæ  
Plebis erat Latæ: sed tanta oblivio mentes  
Cepit, in externos corrupto milite mores,  
Ut duce sub famulo, jussuque satellitis irent,  
Quos erat indignum Phario parere tyranno.  
Nulla fides pietasque viris, qui castra sequuntur;  
Venalesque manus: ibi fas, ubi proxima merces:  
Ære merent parvo: jugulumque in Cæsaris ire  
Non sibi dant. Pro fas! ubi non civilia bella  
Invenit imperii fatum miserabile nostri?  
Thessaliæ subducta acies in litore Nili  
More furit patrio. Quid te plus, Magne, recepto  
Ausa foret Lagea domus? dat scilicet omnis  
Dextera, quod debet superis: nullique vacare  
Fas est Romano. Latium sic scindere corpus  
Dīs placitum: non in soceri generique favorem

Discedunt populi. Civilia bella satellites  
 Movit, & in partem Romani venit Achilles.  
 Et ni fata manus a sanguine Cæsaris arcent,  
 Hæ vincunt partes. Aderant maturus uterque:  
 Et districta epulis ad cunctas aula patebat  
 Insidias: poteratque cruor per regia fundi  
 Pocula Cæsareus, mensæque incumbere cœvix.  
 Sed metuunt belli trepidos in nocte tumultus,  
 Ne cædes confusa, manus permissaque fatis  
 Te, Ptolemæe, trahat. Tanta est fiducia ferri.  
 Non rapuere nefas: summi contemta facultas  
 Est operis: visum famulis reparabile damnum,  
 Illam mactandi dimittere (1) Cæsaris horam.  
 Servatur poenæ in aperta luce daturus.  
 Donata est nox una duci, vixitque Pothini  
 Munere Phœbeos Cæsar dilatus in ortus.

Lucifer a Casia prospexit rupe, diemque  
 Misit in Ægypton primo quoque sole calentem:  
 Quum procul e muris (2) acies non sparsa manipulis,  
 Nec vaga conspicitur, sed justos qualis in hostes  
 Recta fronte venit. Passuri comminus arma,  
 Laturique ruunt. At Cæsar mœnibus urbis  
 Diffusus, clausæ foribus se protegit aulæ,  
 Degeneres passus latebras. Nec tota vacabat  
 Regia compresso: minima collegerat arma

(1) permittere *MSS. quinq. & Lovan.*

(2) a muris *vulgo.*

Parte domûs: tangunt animos iræque, metusque:  
Et timet incursus, indignaturque timere.  
Sic fremit in parvis fera nobilis abdita claustris,  
Et frangit rapidos præmorso carcere dentes:  
Nec secus in Siculis fureret tua flamma cavernis,  
Obstrueret summam si quis tibi Mulciber Ætnen.  
Audax Thessalici nuper qui rupe sub Æmi,  
Hesperia cunctos proceres, aciemque senatus,  
Pompejumque ducem, caussa sperare vetante,  
Non timuit, fatumque sibi promisit iniquum,  
Expavit servile nefas, intraque penates  
Obruitur (1) telis; quem non violasset Alanus,  
Non Scythæ, non fixo qui ludit in hospite Maurus.  
Hic, cui Romani spatium non sufficit orbis,  
Parvaque regna putat Tyriis cum Gadibus Indos,  
Ceu puer imbellis, ceu captis femina muris,  
Quærit tuta domûs: spem vitæ in limine clauso  
Ponit, & incerto lustrat vagus atria cursu:  
Non sine rege tamen; quem ducit in omnia secum,  
Sumturus pœnas & grata piacula morti,  
Missurusque tuum, si non sint tela, neque ignis,  
In famulos, Ptolemæe, caput. Sic barbara Colchis  
Creditur ultorem metuens regnique, fugæque,  
Ense suo fratrisque simul cervice parata  
Exspectasse patrem. Cogunt tamen ultima rerum  
Spem pacis tentare ducem: missusque satellites

(1) obstruitur MS. & ed. Venet.

Regius, ut sævos absentis voce tyranni  
 Corriperet famulos, quo bellum auctore moverent.  
 Sed neque jus mundi valuit, nec fœdera sancta  
 Gentibus: orator regis, pacisque sequester,  
 Æstimat in numero scelerum ponenda tuorum,  
 Tot monstribus, Ægypte, nocens. Non Thessala tellus,  
 Vastaque regna Jubæ, non Pontus, & impla signa  
 Pharnacis, & gelido circumfluis orbis Ibero  
 Tantum ausus (1) scelerum, non Syrtis barbara, quantum  
 Deliciæ fecere tuæ. Premit undique bellum,  
 Inque domum jam tela cadunt, quassantque penates.  
 Non aries uno moturus limina pulsu,  
 Fracturusque domum; non ulla est machina belli:  
 Nec flammis mandatur opus: sed cæca juvenus  
 Consilii, vastos ambit divisa penates,  
 Et nusquam totis incursat viribus agmen.  
 Fata vetant, murique vicem Fortuna tuetur.  
 Nec non & ratibus tentatur regia, qua se  
 Protulit in medios audaci margine fluctus  
 Ambitiosa domus. Sed adest defensor ubique  
 Cæsar, & hos aditu gladiis, hos ignibus arcet:  
 Obsessusque gerit ( tanta est constantia menti)  
 Expugnantis opus. Piceo jubet unguine tactas (2)  
 Lampadas inmitti junctis in bella (3) carinis.

(1) ausi. *scripti septem.*

(2) tinctas *vulgo.*

(3) in vela *MSS.*

Nec piger ignis erat per stuppea vincula, perque  
Manantes cera tabulas: & tempore eodem  
Transtraque nautarum summique arsere ceruchi.  
Jam prope semiustæ merguntur in æquore classes;  
Jamque hostes, & tela natant. Nec puppibus ignis  
Incubuit solis: sed quæ vicina fuere  
Tecta mari longis rapuere vaporibus ignem:  
Et cladem fovere Noti, percussaue flamma  
Turbine, non alio motu per tecta cucurrit,  
Quam solet ætherio lampas discurrere sulco,  
Materiaque carens, atque ardens aere solo.  
Illa lues clausa paullum revocavit ab aula  
Urbis in auxilium populos. Nec tempora cladis  
Perdedit in somnos, sed cæca nocte carinas  
Insiluit Cæsar, semper feliciter (1) usus  
Præcipiti cursu bellorum, & tempore raptō.  
Tunc claustrum pelagi cepit Pharon. Insula quondam  
In medio stetit illa mari, sub tempore vatis  
Proteos: at nunc est Pellæis proxima muris.  
Illa duci geminos bellorum præstitit usus:  
Abstulit excursus (2) & fauces æquoris hosti;  
Cæsaris auxiliis aditus ac libera ponti  
Ostia permisit. Nec pœnas inde Pothini  
Distulit ulterius: sed non qua debuit ira,  
Non cruce, non flammis, rapuit non dente ferarum,

(1) felicibus *sex meliores*.

(2) & cursus *aliquot scripti*.

Heu facinus! cervix gladio male cæsa pependit:  
 Magni morte perit. Nec non subrepta paratis  
 A famulo Ganymede dolis pervenit ad hostes  
 Cæsaris Arsinoe: quæ castra carentia rege  
 Ut proles Lagea tenet, famulumque tyrannī  
 Terribilem justo transegit Achillea ferro.  
 Altera, Magne, tuis en! victima mittitur umbris:  
 Nec satis hoc Fortuna putat. Procul absit, ut ista  
 Vindictæ sit summa tuæ. Non ipse tyrannus  
 Sufficit in pœnas, non omnis regia Lagi.  
 Dum patrii veniant in viscera Cæsaris enses,  
 Magnus inultus erit. Sed non auctore furoris  
 Sublato cecidit rabies: nam rursus in arma  
 Auspiciis Ganymedis eunt: ac multa secundo  
 Prœlia Marte gerunt. Potuit discrimine summo  
 Cæsaris una dies (1) in famam, & sæcula mitti.  
 .. Molis in exiguæ spatio stipantibus armis,  
 Dum parat in vacuas Martem transferre carinas  
 Dux Latius, tota subiti formidine belli  
 Cingitur: hinc densæ prætexunt litora classes,  
 Hinc tergo insultant pedites: via nulla saluti,  
 Non fuga, non virtus: vix spes quoque mortis honestæ.  
 Non acie fusa, magnæ nec stragis acervo  
 Vincendus tunc Cæsar erat, sed sanguine nullo,  
 Captus sorte loci: pendet dubiusque timeret,  
Opta-

(1) illa dies MS.



Optaretne mori; respexit in agmine denso  
Scenam perpetuæ meritum jam nomina famæ  
Ad campos Epidamne tuos; ubi solus apertis  
Obsedit muris calcantem mœnia Magnum.

*FINIS PHARSALIÆ.*



INCERTI AUCTORIS  
 A D  
 CALPURNIUM PISONEM  
 POEMATION

LUCANO VULGO ADSRIPTUM.

**U**NDE prius cœpti surgat mihi carminis ordo,  
 Quosve canam titulos, dubius, feror. Hinc tua, Piso,  
 Nobilitas, veterisque citant sublimia Calpi  
 Nomina, Romanas inter fulgentia gentes:  
 Hinc tua me virtus rapit, & miranda per omnes  
 Vita modos: quæ, si deesset tibi forte creato  
 Nobilitas, eadem pro nobilitate fuisset.  
 Nam quid imaginibus, quid avitis fulta triumphis  
 Atria, quid pleni numeroso consule fasti,  
 Profuerint, si vita labat? perit omnis in illo  
 Nobilitas, cujus laus est in origine sola.  
 Felix, qui tantis animum natalibus æquas,  
 Et partem tituli, non summam ponis in illis,

Ipse canendus eris: nam quid memorare necesse est,  
 Ut domus a Calpo nomen Calpurnia ducat?  
 Claraque Pisonis tulerit cognomina prima,  
 Humida callosa quum pinseret hordea dextra?  
 Nec si cuncta velim, breviter decurrere possim:  
 Et prius ætheriæ moles circumvaga flammæ  
 Annua bis senis revocabit mensibus astra,  
 Quam mihi priscorum titulos, operosaque bella  
 Contigerit memorare: manus sed bellica patrum  
 Armorumque labor, veteres docuere Quirites,  
 Atque illos cecinere sui per carmina vates.  
 Nos quoque pacata Pisonem laude nitentem,  
 Exæquamus avis. Tamen etsi bella quierunt,  
 Non periit virtus: licet exercere togatæ  
 Munera militiæ: licet & sine sanguinis haustu  
 Mitia legitimo sub iudice bella movere.  
 Hinc quoque servati contingit gloria civis,  
 Altaque victrices intexunt limina palmæ.  
 Quin age majorum juvenis facunde tuorum,  
 Scande super titulos, & avitæ laudis honores,  
 Armorumque decus præcede forensibus actis.  
 Sic etiam magno jam tunc Cicerone vigente  
 Laureæ facundis cesserunt arma togatis.  
 Quæque patrum claros quondam visura triumphos  
 Olim turba vias impleverat agmine denso,  
 Ardua nunc eadem stipat fora, quum tua mœstos  
 Defensura reos vocem facundia mittit:

Seu trepidos ad jura decem citat hasta virorum,  
Et firmare jubet centeno judice causas:  
Seu capitale nefas operosa diluis arte,  
Laudibus ipsa tuis resonant fora. Tu quoque Piso  
Judicis adfectum, possessaque pectora ducis  
Victor, sponte sua sequitur quocumque vocasti:  
Flet, si flere jubes: gaudet gaudere coactus:  
Et te dante capit judex, quam non habet, iram.  
Sic auriga solet ferventia Thessalus ora  
Mobilibus frenis in aperto flectere campo,  
Qui modo non solum rapido permittit habenas  
Quadrupedi, sed calce citat, modo torquet in auras  
Flexibiles rictus, & nunc cervice rotata  
Incipit effusos in gyrum carpere cursus.  
Quis non adtonitus judex tua respicit ora?  
Quis regit ipse suam, nisi per tua pondera, mentem?  
Nam tu, sive libet pariter cum grandine nimbos,  
Densaque vibrata jaculari fulmina lingua,  
Seu juvat adstrictas in nodum cogere voces,  
Et dare subtili vivacia verba catenæ,  
Vim Laertiadæ, brevitatem vincis Atridæ.  
Dulcia seu mavis, liquidoque fluentia cursu  
Verba, nec incluso, sed aperto pingere flore,  
Inelyta Nestorei cedit tibi gratia mellis.  
Nec te Piso tamen populo sub judice sola  
Mirantur fora; sed numerosa laude senatus  
Excipit, & meritas reddit tibi curia voces.

Quis digne referat, qualis tibi luce sub illa  
Gloria contigerit, qua tu, reticente senatu,  
Quum tua bis senos numeraret purpura fasces,  
Cæsareum grato cecinisti pectore numen?  
Huc etiam tota concurrit ab urbe juvenus  
Auditura virum, si quando iudice fesso  
Turbida prolatis tacuerunt jurgia rebus:  
Tunc etenim levibus veluti proludit in armis,  
Compositisque suas exercet litibus artes.  
Quin etiam facilis Romano profluit ore  
Græcia, Cecropiæque sonat gravis æmulus undæ.  
Testis Acidalia quæ condidit alite muros,  
Euboicam referens secunda Neapolis arcem.  
Qualis io superi, qualis nitor oris amœnis  
Vocibus? hinc solido fulgore micantia verba  
Implevere locos: hinc exornata figuris  
Advolat, excussa velox sententia torno.  
Magna quidem virtus erat, & si sola fuisset,  
Eloquio sanctum modo permulcere senatum,  
Exonerare pios modo, nunc onerare nocentes:  
Sed super ista movet plenus gravitate serena  
Vultus, & insigni præstringit imagine visus.  
Talis inest habitus, qualem nec dicere mœstum,  
Nec fluidum, læta sed tetricitate decorum  
Possumus: ingenitæ stat nobilitatis in illo  
Pulcher honos, & digna suis natalibus ora.  
Additur huc & justa fides, & plena pudoris

Libertas, animusque mala ferrugine purus:  
Ipsaque possesso mens est opulentior auro.  
Quis tua cultorum juvenis facunde tuorum,  
Limina pauper adit, quem non animosa beatum  
Excipit, & subito juvat indulgentia censu?  
Quodque magis dono fuerit pretiosius omni,  
Diligis ex æquo: nec te Fortuna clientum,  
Natalesve movent: probitas spectatur in illis.  
Nulla superborum patiuntur dicta jocorum:  
Nullius subitos adfert injuria risus.  
Unus amicitiae summos tenor ambit, & imos.  
Rara domus tenuem non aspernatur amicum,  
Raraque non humilem calcat fastosa clientem.  
Illic casta licet mens, & sine crimine constet  
Vita, tamen probitas cum paupertate jacebit.  
Sed lateri nullus comitem circumdare quærit,  
Quem dat purus amor, sed quem tulit impia merces,  
Nec quisquam vero pretium largitur amico,  
Quem regat ex æquo, vicibusque regatur ab illo:  
Sed miserum parva stipe munerat, ut pudibundos  
Exercere sales inter convivia possit.  
Ista procul labes, procul hæc Fortuna refugit  
Piso tuam venerande domum; tu mitis, & acris  
Asperitate carens, positoque per omnia fastu,  
Inter ut æquales unus numeraris amicos:  
Obsequiumque doces, & amorem quæris amando.  
Cuncta domus varia cultorum personat arte,

Cuncta movet studium: nec enim tibi dura clientum  
Turba rudisve placet, misero quæ freta labore  
Nil nisi summoto novit præcedere vulgo:  
Sed virtus numerosa juvat. Tu pronus in omne  
Pectora ducis opus, seu te graviora vocarunt,  
Seu leviora juvant. Nec enim facundia semper  
Adducta cum fronte placet: nec semper in armis  
Bellica turba manet: nec tota classicus horror  
Nocte dieque gemit: nec semper Cnossius arcu  
Destinat, exempto sed laxat cornua nervo.  
Et galea miles caput, & latus ense resolvit.  
Ipsa vices natura subit, variataque cursus  
Ordinat, inversis & frondibus explicat annum.  
Non semper fluidis adopertus nubibus æther  
Aurea terriferis obcæcat sidera nimbis.  
Cessat hiems, madidos & siccatur vere capillos:  
Ver fugit æstates; æstatum terga lacessit  
Pomifer autumnus, nebulis cessurus, & undis.  
Ignea quin etiam superûm pater arma recondit;  
Et Ganymedeæ repetens convivia mensæ,  
Pocula sumit ea, qua gessit fulmina, dextra.  
Temporibus servire decet: qui tempora certis  
Ponderibus pensavit, eum si bella vocabunt,  
Miles erit: si pax, positis toga gestiet armis.  
Hunc fora pacatum, bellantem castra decebunt.  
Felix illa dies, totumque canenda per orbem,  
Quæ tibi, vitales quum primum traderet auras,

Contulit innumeras intra tua pectora dotes.  
Mira subest gravitas inter fora: mirus, omissa  
Paulisper gravitate, lepos. Si carmina forte:  
Nectere ludenti juvat fluitantia versu,  
Aonium facilis deducit pagina carmen.  
Sive chelyn digitis, & eburno verberare pulsas,  
Dulcis Apollinea sequitur testudine cantus,  
Et te credibile est Phœbo didicisse magistro.  
Nec pudeat pepulisse lyram, quum pace serena  
Publica securis exsulent otia terris.  
Nec pudeat Phœbea chelys, si creditur illis  
Pulsari manibus, quibus & contenditur arcus.  
Ipse fidem movisse ferox narratur Achilles,  
Quamvis mille rates Priamejus ureret heros,  
Et gravis obstreperet modulatis buccina nervis.  
Illo dulce melos Nerejus extudit heros  
Pollice, terribilis quo Pelias ibat in hostem.  
Arma tuis etiam si forte rotare lacertis,  
Inque gradum clausis libuit consistere membris  
Et vitare simul, simul & captare petentem:  
Mobilitate pedum celeres super orbibus orbes  
Flectis, & obliquis fugientem cursibus urges.  
Et nunc vivaci scrutaris pectora dextra,  
Nunc latus adversum necopino percutis ictu.  
Nec tibi mobilitas minor est, si forte volantem  
Aut geminare pilam juvat, aut revocare cadentem  
Et non sperato fugientem reddere gestu.



Hæret in hæc populus spectacula, totaque ludos  
Turba repente suos jam sudabunda relinquit.  
Te si forte juvat studiorum pondere fessum,  
Non languere tamen, lususque movere per artem,  
Callidiore modo tabula variatur aperta,  
Calculus, & vitreo peraguntur milite bella,  
Ut niveus nigros, nunc & niger adliget albos.  
Sed tibi quis non terga dedit? quis te duce cessit  
Calculus? aut quis non periturus perdidit hostem?  
Mille modis acies tua dimicet: ille petentem  
Dum fugit, ipse rapit: longo venit ille recessu,  
Qui stetit in speculis: hic se committere rixæ  
Audet, & in prædam venientem decipit hostem.  
Ancipites subit ille moras, similisque ligato  
Obligat ipse duos: hic ad majora movetur,  
Ut citus & fracta prorumpat in agmina mandra,  
Clausaque dejecto populetur mœnia vallo.  
Interea sedis, quamvis acerrima surgant  
Prælia, militibus: plena tamen ipse phalange,  
Aut etiam paucis spoliata milite vincis,  
Et tibi captiva resonat manus utraque turba.  
Sed prius emenso Titan versetur Olympo,  
Quam mea tot laudes decurrere carmina possint.  
Felix, & longa juvenis dignissime vita,  
Eximiumque tuæ gentis decus, accipe nostri  
Certus, & hoc veri complectere pignus amoris.  
Quod si digna tua minus est mea pagina laude,

At voluisse sat est: animum, non carmina jacto.  
Tu modo lætus ades, forsan meliora canemus.  
Et vires dabit ipse favor, dabit ipsa feracem  
Spes animum: dignare tuos aperire Penates.  
Hoc solum petimus: nec enim me divitis auri  
Imperiosa fames, & habendi sæva libido  
Impulerant, sed laudis amor: juvat, optime, tecum  
Degere, cumque tuis virtutibus omne per ævum  
Carminibus certare meis: sublimior ibo,  
Si famæ mihi pandis iter, si detrahis umbram.  
Abdita quid prodest generosi vena metalli,  
Si cultore caret? quid inertī condita portu,  
Si ductoris eget, ratis efficit, omnia quamvis  
Armamenta ferat, teretique fluentia malo  
Possit, & excusso dimittere vela rudente?  
Ipse per Ausonias Æneja carmina gentes  
Qui sonat, ingenti qui nomine pulsat Olympum,  
Mæoniumque senem Romano provocat ore,  
Forsitan illius nemoris latuisset in umbra,  
Quod canit, & sterili tantum cantasset avena,  
Ignotus populis, si Mæcenate careret.  
Qui tamen haud uni patefecit limina vati,  
Nec sua Virgilio permisit numina soli.  
Mæcenas Tragico quatientem pulpita cæstu  
Evexit Varium. Mæcenas alta Thoanti  
Eruit, & populis ostendit nomina Grajis.  
Carmina Romanis etiam resonantia chordis;

Ausoniamque chelin gracilis patefecit Horatius.  
O decus, & toto merito venerabilis ævo  
Pierii tutela chori, quo præside tuti  
Non umquam vates inopi timuere senectæ.  
Quod si quis nostris precibus locus, & mea vota  
Si mentem subiere tuam, memorabilis olim  
Tu mihi Mæcenæ tereti cantabere versu.  
Possumus æternæ nomen committere famæ:  
Si tamen hoc ulli de se promittere fas est,  
Et deus ultor abest: superest animosa voluntas,  
Ipsaque nescio quid mens excellentius audet.  
Tu nanti protende manum: tu, Piso, latentem  
Exsere. Nos humilis domus, & sincera parentum,  
Sed tenuis Fortuna sua caligine celat.  
Possumus impositis caput exonerare tenebris,  
Et lucem spectare novam, si quid modo lætus  
Adnuis, & nostris subscribis, candide, votis.  
Est mihi, crede, meis animus constantior annis;  
Quamvis nunc juvenile decus mihi pingere malas  
Cœperit, & nondum vicesima venerit ætas.  
Quod si tam validæ mihi robur mentis inesset,  
Et solidus primos impleret spiritus annos,  
Auderem voces per carmina nostra referre  
Piso tuas: sed fessa labat mihi pondere cervix,  
Et tremefacta cadunt succiso poplite membra.  
Sic nec olorinos audet Pandionis ales  
Parva referre sonos, nec, si velit improba, possit.

Sic & Ædonia superantur voce cicadæ,  
Stridula quum rapido faciunt convicia Soli.  
Quare age Calliope, posita gravitate forensi,  
Limina Pisonis mecum pete: plura supersunt,  
Quæ laudare velis inventa penatibus ipsis.





# PETRONII ARBITRI

## SPECIMEN

### BELLI CIVILIS. (\*)

*Ecce, belli civilis ingens opus quisquis attigerit, nisi plenus literis, sub onere labetur. Non enim res gestæ versibus comprehendendæ sunt, quod longe melius historici faciunt, sed per ambages, deorumque ministeria, & fabulosum sententiarum tormentum præcipitandus est liber spiritus; ut potius furentis animi vaticinatio appareat, quam religiosæ orationis sub testibus fidis. \* tanquam si placet hic impetus, etsi nondum recepit ultimam manum.*

**O**RBE jam totum victor Romanus habebat,  
Qua mare, qua terræ, qua sidus currit utrumque,  
Nec satiatus erat. Gravidis freta pulsa carinis

(\*) Hoc Belli Civilis Specimen, æque ac sequens Supplementum extant in editione Parisiensi Barbou anni 1767.

Jam peragrabantur. Si quis sinus abditus ultra,  
Si qua foret tellus quæ fulvum mitteret aurum,  
Hostis erat: fatisque in tristia bella paratis  
Quærebantur opes. Non vulgo nota placebant  
Gaudia: non usu plebejo trita voluptas:  
Assyria concham laudabat miles in unda.  
Quæsitus tellure nitor certaverat ostro.  
Hinc Numidæ crustas, hinc nova vellera Seres,  
Atque Arabum populus sua despoliaverat arva.  
Ecce aliæ clades, & læsæ vulnera pacis.  
Quæritur in silvis Mauri fera: & ultimus Ammon  
Afrorum excutitur. Ne desit bellua dente  
Ad mortes pretiosa suas. Premit advena classes  
Tigris, & aurata gradiens veſtatur in aula,  
Ut bibat humanum populo plaudente cruorem.  
Heu pudet effari, perituraque prodere fata:  
Persarum ritu male pubescentibus annis  
Surripuere viros; exsectaque viscera ferro  
In venerem fregere: atque ut fuga mobilis ævi  
Circumscripta mora properantes differat annos,  
Quærit se natura, nec invenit. Omnibus ergo  
Scorta placent, fractique enervi corpore gressus:  
Et laxi crines, & tot nova nomina vestis,  
Quæque virum quærunt. Ecce Afris eruta terris  
Citrea mensa, greges servorum, ostrumque renidens  
Ponitur, ac maculis imitatur vilibus aurum,  
Quæ sensum turbant. Hostile ac mobile lignum

Turba sepulta mero circumvenit: omniaque orbis  
 Præmia, correptis miles vagus extruit armis.  
 Ingeniosa gula est. Siculo scarus æquore mersus  
 Ad mensam vivus perducitur, inde Lucrinis  
 Eruta litoribus vendunt conchyliæ cœnas,  
 Ut renovent per damna famem. Jam Phasidos unda  
 Orbata est avibus: mutoque in litore tantum  
 Solæ desertis aspirant frondibus auræ.  
 Nec minor in campo furor est, emptique Quirites  
 Ad prædam strepitumque lucri suffragia vertunt.  
 Venalis populus, venalis curia Patrum:  
 Est favor in pretio, senibus quoque libera virtus  
 Exciderat, sparsisque opibus conversa potestas,  
 Ipsaque majestas auro corrupta jacebat.  
 Pellitur a populo victus Cato: tristior ille est  
 Qui vicit, fascesque pudet rapuisse Catoni.  
 Namque hoc dedecus est populi, morumque ruina.  
 Non homo pulsus erat; sed in uno victa potestas  
 Romanumque decus. Quare tam perdita Roma  
 Ipsa sui merces erat, & sine vindice præda.  
 Præterea gemino deprensam gurgite prædam  
 Fœnoris illuvies, ususque exederat æris.  
 Nulla est certa domus, nullum sine pignore corpus;  
 Sed veluti tabes tacitis concepta medullis  
 Intra membra furens curis latrantibus errat.  
 Arma placent miseris, detritaque commoda luxu  
 Vulneribus reparantur. Inops audacia tuta est.

Hoc mersam cœno Romam, somnoque jacentem  
Quæ poterant artes sana ratione movere,  
Ni furor, & bellum, ferroque excita libido?  
Tres tulerat Fortuna duces; quos obruit omnes  
Armorum strue diversa feralis Enyo.  
Crassum Parthus habet; Libyco jacet æquore Magnus:  
Julius ingratam perfudit sanguine Romam.  
Et, quasi non posset tot tellus ferre sepulcra,  
Divisit cineres. Hos gloria reddit honores.  
Est locus exciso penitus demersus hiatu,  
Parthenopen inter, magnæque Dicarchidos arva,  
Gocytia perfusus aqua. Nam spiritus extra  
Qui furit effusus funesto spargitur æstu.  
Non hæc autumnus tellus viret, aut alit herbas  
Cespitem lætus ager. Non verno persona cantu  
Mollia discordi strepitu virgulta loquuntur:  
Sed chaos, & nigro squallentia pumice saxa  
Gaudent ferali circumtumulata cupressu.  
Has inter sedes Ditis pater extulit ora,  
Bustorum flammis, & cana sparsa favilla:  
Ac tali volucrum Fortunam voce lacessit:  
„Rerum humanarum, divinarumque potestas,  
„Fors, cui nulla placet nimium securâ potestas,  
„Quæ nova semper amas, & mox possessa relinquis;  
„Ecquid Romano sentis te pondere victam?  
„Nec posse ulterius perituram extollere molem?  
„Ipsa suas vires odit Romana juvenus,  
„Et



„Et quas struxit opes, male sustinet. Aspice late  
 „Luxuriam spoliorum, & censum in damna furem.  
 „Ædificant auro, sedesque ad sidera mittunt:  
 „Expelluntur aquæ saxis: mare nascitur arvis;  
 „Et permutata rerum statione rebellant.  
 „En etiam mea regna petunt. Perfossa dehiscit  
 „Molibus insanis tellus, jam montibus haustis  
 „Antra gemunt: & dum varios lapides invenit usus,  
 „Inferni manes cælum sperare jubentur.  
 „Quare age, Fors, muta pacatum in prælia vultum,  
 „Romanosque cie, ac nostris da funera regnis.  
 „Jam pridem nullò perfundimus ora cruore,  
 „Nec mea Tisiphone sitientes perluit artus  
 „Ex quo Syllanus bibit ensis, & horrida tellus  
 „Extulit in lucem nutritas sanguine fruges.“  
 Hæc ubi dicta dedit; dextræ conjungere dextram  
 Conatus, rupto tellurem solvit hiatu.

Tunc fortuna levi defudit pectore voces:

„O genitor, cui Cæcyti penetralia parent,  
 „Si modo vera mihi fas est impune profari,  
 „Vota tibi cedent: nec enim minor ira rebellet  
 „Pectore in hoc, leviorque exurit flamma medullas.  
 „Omnia, quæ tribui Romanis arcibus, odi;  
 „Muneribusque meis irascor: destruet istas  
 „Idem, qui posuit, moles Deus. Est mihi cordi  
 „Quippe cremare viros, & sanguine pascere luxum.  
 „Cerno equidem gemina jam stratos morte Philippos,

„Thessaliæque rogos, & funera gentis Iberæ.  
„Jam fragor armorum, trepidantes personat aures.  
„Et Libyæ cerno tua Nile gementia claustra,  
„Æthiacosque sinus, & Apollinis arma timentes.  
„Pande age terrarum sitientia regna tuarum,  
„Atque animas arcesse novas. Vix navita Porthmeus  
„Sufficiet simulacra virum traducere cimba,  
„Classe opus est: tuque ingenti satiare ruina  
„Pallida Tisiphonæ, concisaque vulnera mande,  
„Ad Stygios manes laceratus ducitur orbis.“  
Vix dum finierat, quum fulgure rupta corusco  
Intremuit nubes, elisosque abscidit ignes.  
Subsedit pater, iunubarum, gremioque reducto  
Telluris, pavitans fraternos palluit ictus.  
Continuo clades hominum venturaque damna  
Auspiciis patuere Deum, namque ore cruento  
Deformis Titan vultus caligine texit.  
Civiles acies jam tum spirare putares.  
Parte alia plenos extinxit Cynthia vultus,  
Et lucem scelerei subduxit. Rupta tonabant omnes  
Verticibus lassis montis juga, nec vaga passim  
Flumina per notas ibant morientia ripas.  
Armorum strepitu cælum furit, & tuba Martem  
Sideribus transmissa ciet; jamque Ætna voratur  
Ignibus insolitis, & in æthiera fulmina mittit.  
Ecce inter tumulos, atque ossa carentia bustis  
Umbrarum facies diro stridore minatur.

Fax stellis comitata novis incendia ducit;  
 Sanguineoque recens descendit Jupiter imbre.  
 Hæc ostenta brevi solvit Deus. Exuit omnes  
 Quippe moras Cæsar, vindictæque actus amore  
 Gallica projecit, civilia sustulit arma.  
 Alpibus aeriis, ubi Grajo nomine, pulsæ  
 Descendunt rupes, & se patiuntur adiri,  
 Est locus Herculeis aris sacer. Hunc nive dura  
 Claudit hiems, canoque ad sidera vertice tollit.  
 Cælum illinc cecidisse putes. Non solis adulti  
 Mansuescit radiis, non verni temporis aura:  
 Sed glacie concreta rigens, hiemisque pruinis  
 Totum ferre potest humeris minitantibus orbem.  
 Hæc ubi calcavit Cæsar juga milite læto,  
 Optavitque locum, summo de vertice montis  
 Hesperiae campos late prospexit, & ambas  
 Intentans cum voce manus ad sidera dixit:  
 „Jupiter omnipotens, & tu Saturnia Tellus,  
 „Armis læta meis, olimque onerata triumphis:  
 „Testor ad has acies invitum arcessere Martem,  
 „Invitas me ferre manus: sed vulnere cogor,  
 „Pulsus ab urbe mea, dum Rhenum sanguine vinco;  
 „Dum Gallos iterum Capitolia nostra petentes  
 „Alpibus excludo: vincendo certior exul:  
 „Sanguine Germano, sexagintaque triumphis,  
 „Esse nocens cœpi. Quanquam quos gloria terret,  
 „Aut qui sunt, qui bella volunt? mercedibus emptæ,

„Ac viles operæ; quorum est mea Roma noverca:  
 „Ut reor, haud impune; nec hanc sine vindice dextram  
 „Vinciet ignavus. Victores ite ferentes,  
 „Ite mei comites, & causam dicite ferro..  
 „Namque omnes unum crimen vocat: omnibus una  
 „Impendet clades. Reddenda est gratia vobis:  
 „Non solus vici. Quare, quia pœna trophæis  
 „Imminet, & sordes meruit victoria nostra,  
 „Judice fortuna cadat alea. Sumite bellum,  
 „Et tentate manus. Certe mea causa peracta est.  
 „Inter tot fortes armatus nescio vinci.“

Hæc ubi personuit, de cœlo Delphicus ales  
 Omina læta dedit, pepulitque meatibus auras.  
 Nec non horrendi nemoris de parte sinistra  
 Insolitæ voces flamma sonuere sequenti.  
 Ipse nitor Phœbi vulgato lætior orbe  
 Crevit, & aurato præcinxit fulgure vultus:  
 Fortior ominibus movit Mavortia signa  
 Cæsar; & insolito gressu prior occupat haustus.  
 Præma quidem glacies, & cana juncta pruina  
 Non pugnavit humus, mitique horrore quievit:  
 Sed postquam turmæ nimbos fregere ligatos,  
 Et pavidus quadrupes undarum vincula rupit,  
 Incaluere nives, mox flumina montibus altis  
 Undabant modo nata: sed hæc quoque jussa putares.  
 Stabant & vincla fluctus stupuere pruina:  
 Et paulo ante lues jam concidenda jacebat.

Tum vero malefida prius vestigia lusit,  
 Decepitque pedes. Passim turmæque virique,  
 Armaque congesta strue deplorata jacebant.  
 Ecce etiam rigido concussæ flamine nubes  
 Exonerabantur, nec rupti turbine venti  
 Deerant, aut tumida confraçtum grandine cælum;  
 Ipsæ jam nubes ruptæ super arma cadebant,  
 Et concreta gelu Ponti velut unda ruebat.  
 Victa erat iagenti Tellus nive, victaque cœli  
 Sidera, victa suis hærentia flumina ripis;  
 Nondum Cæsar erat: sed magnam nixus in hastam  
 Horrida securis frangebat gressibus arva.  
 Qualis Caucasæa decurrens arduus arce  
 Amphitryoniades; aut torvo Jupiter ore,  
 Quum se verticibus magni demisit Olympi,  
 Et periturorum disjecit tela Gigantum.  
 Dum Cæsar tumidas iratus deprimat arces:  
 Interea volucer motis conterrita pennis  
 Fama volat, summique petit juga celsa Palatî:  
 Atque hoc Romano attonito fert omnia signa:  
 Jam classes fluitare mari, totasque per Alpes  
 Fervere Germano perfusas sanguine turmas.  
 Arma, cruor, cædes, incendia, totaque bella  
 Ante oculos volitant. Ergo pulsata tumultu  
 Pectora per dubias scinduntur territa causas.  
 Huic fuga per terras, illi magis unda probatur;  
 Et patria est Pontus jam tutior. Est magis, arma

Qui tentata velit: fatisque jubentibus actus,  
Quantum quisque timet, tantum fugit. Ocyor ipse  
Hos inter motus populus, miserabile visu,  
Quo mens icta jubet, deserta ducitur urbe.  
Gaudet Roma fuga, debellatique Quirites  
Rumoris sonitu mœrentia tecta relinquunt.  
Ille manu trepida natos tenet: ille penates  
Occultat gremio, deploratumque relinquit  
Limen, & absentem votis interficit hostem.  
Sunt qui conjugibus mœrentia pectora jungant,  
Grandævosque patres; onerisque ignara juvenus  
Id, pro quo metuit, tantum trahit. Omnia secum  
Hic vehit imprudens, prædamque in prælia ducit.  
Ac velut ex alto quum magnus inhorruiť Auster,  
Et pulsas evertit aquas, non arma ministris,  
Non regimen prodest: ligat alter pondera pinus,  
Alter tuta sinu tranquillaque litora quærit:  
Hic dat vela fugæ, Fortunæque omnia credit.  
Quid tam parva queror? gemino cum Consule Magnus,  
Ille tremor Ponti, sævi quoque terror Hydaspis,  
Et piratarum scopulus: modo quem ter ovantem  
Jupiter horruerat; quem fracto in gurgite Pontus,  
Et veneratus erat submissa Bosporus unda,  
Proh pudor! Imperii deserto nomine fugit,  
Ut Fortuna levis Magni quoque terga videret.  
Ergo tanta lues Divum quoque numina vidit:  
Consensitque fugæ cæli timor. Ecce pèr orbem

Mitis turba Deūm, terras exosa furentes  
 Deserit; atque hominum damnatum avertitur agmen.  
 Pax prima ante alias, niveos pulsata lacertos  
 Abscondit galea victum caput, atque relicto  
 Orbe fugax Ditis petit implacabile regnum.  
 Huic comes it sincera Fides, & crine soluto  
 Justitia, ac mœrens lacera Concordia palla.  
 At contra, sedes Erebi qua rupta dehiscit,  
 Emergit late Ditis chorus, horrida Erinnyes,  
 Et Bellona minax, facibusque armata Megæra:  
 Lethumque, Insidiæque, & lurida Mortis imago.  
 Quas inter Furor, abruptis ceu liber habenis  
 Sanguineum late tollit caput, oraque mille  
 Vulneribus confossa cruenta casside velat.  
 Hæret detritus lævæ Mavortius umbo,  
 Innumerabilibus telis gravis: atque flagranti  
 Stipite dextra minax terris incendia portat.  
 Sentit terra Deos, mutataque sidera pondus  
 Quæsivere suum. Namque omnis Regia cœli  
 In partes diducta ruit: primumque Dione  
 Cæsaris acta sui ducit. Comes additur illi  
 Pallas, & ingentem quatiens Mavortius hastam;  
 Magnaque cum Phœbo soror, & Cyllenia proles  
 Excipit, ac totis similis Tyrinthius actis.  
 Infremuere tubæ, ac scisso Discordia crine  
 Extulit ad Superos Stygium caput. Hujus in ore  
 Concretus sanguis, contusaque lumina flebant.

Stabant ærati scabra rubigine dentes;  
 Tabo lingua fluens, obsessa draconibus ora,  
 Atque intertorto laceratam pectore vestem  
 Sanguineam tremula quatiebat lampada dextra.  
 Hæc ut Cocyti tenebras, & Tartara liquit,  
 Alta petit gradiens juga nobilis Appennini,  
 Unde omnes terras, atque omnia litora posset  
 Aspicere, ac toto fluitantes orbe catervas:  
 Atque has erumpit furibundo pectore voces:  
 „Sumite nunc gentes accensis mentibus arma;  
 „Sumite, & in medias immittite lampadas urbes.  
 „Vincetur quicumque latet: non femina cesset,  
 „Non puer, aut ævo jam desolata senectus.  
 „Ipsa tremat Tellus, lacerataque testâ rebellent.  
 „Tu legem, Marcelle tene: tu concute plebem  
 „Curio, tu fortem ne supprime Lentule Martem.  
 „Quid porro tu Dive tuis cunctaris in armis?  
 „Non frangis portas? non muris oppida solvis,  
 „Thesaurosque rapis? nescis tu Magne tueri  
 „Romanas acies? Epidauria mœnia quære,  
 „Thessalicosque sinus humano sanguine tinge.“  
 Factum est in terris, quidquid Discordia jussit.



*SUPPLEMENTUM*  
**LUCANI.**  
LIBRI SEPTEM,  
*AUCTORE*  
**THOMA MAIO**  
**ANGL.**


THE  
JOURNAL OF THE  
ROYAL ANTHROPOLOGICAL INSTITUTE

VOL. LXXV. PART I. 1945

CONTENTS

THE JOURNAL OF THE  
ROYAL ANTHROPOLOGICAL INSTITUTE

A



SUPPLEMENTUM  
LUCANI.  
LIBER PRIMUS.

ARGUMENTUM.

*Rex Ptolemæus a Cæsare dimissus bellum parat.  
Oraculum Serapidis. Ptolemæi mors.*

**P**ERDIDERANT freta sæva minas, & ab æquore tutus,  
Tutus ab insidiis imbellibus, & scelerata  
Ægypti rabie, consedit litore Cæsar,  
Vindictam spirans, tantaque efferbuit ira,  
Quantam non Pharii potuit restinguere regni  
Exitium. Justa est belli data causa gerendi:  
Sed pudor, & magnam premit indignatio mentem  
Bella dari tam justa, aut mollem audere Canopum  
Cæsareas iras, infectaque tela mereri,  
Quæ vix armipotens est ausa lacessere Roma;

Nec damno tantas iras levioꝛe luisset  
Quam libertatis jactura, & funere Magni.

Quod tamen incolumis per tanta pericula Cæsar  
Evasit, Superis poteras ignoscere, Roma,  
Si sola Ægyptus redivivæ vulnera dextræ  
Et sævos posthac gladios sensura fuisset.  
Inferias tibi, Magne, pias hæc bella dedissent  
Et grâtas Latio. Pharia de clâde triumphum  
Victori placida donasset fronte Senatus,  
Templa coronasset votis, plausuque superbum  
Speclasset læto currum Romana juvenus.  
Hæc patriæ forsân victoria conciliasset  
Cæsaris arma suæ, ni dira sequentia bella,  
Ni Libycæ clades, & tristis funera Mundæ  
Victrices alio fœdassent crimine dextras.

At Nili scelerata cohors, quæ sceptrâ dedisset  
Reginæ Arsinoe, subito mutata rebellat,  
Fœmineum imperium, fastusque exosa superbos  
Eunuchi Ganymedis, & implet castra tumultu.  
Nec pavidum, murmur; consensu audacia crevit,  
Tantaque turba metu pœnarum solvit ab omni.  
Nec mora: delecti ad tentoria Cæsaris ibant  
Invita Arsinoe, pacem Regemque petentes,  
Et delictorum veniam, dirumque Pothinum  
Ut scelestum auctorem, & sævum execrantur Achillam,  
Qui facinus mērita jam tandem morte luissent.

Ausonius Ductor, quamvis jam fervidus ira,

Pacem optans, Phariaque timens regione teneri  
Dum procul Emathiæ coeant fragmenta ruinæ,  
Dum, quas dispersit clades Pharsalica; rursus  
Jungantur vires, & castra hostilia crescant,  
Castigat primo dictis; mox fronte serena  
Dat veniam precibus; nec tanta Cæsaris ira  
Dignatur viiles populos, impendere totos  
Irarum fluctus cupiens civilibus armis.  
Nil nisi Romani Imperii patriæque ruinas  
Aut scelera esse suis aut digna pericula fatis  
Credidit, & imbellem Ptolemæum in regna remittit.

Quid tandem, miserande puer, tibi proderit ista  
Libertas, quam morte lues, regniue ruina?  
Tutior ah longe custodia Cæsaris esset  
Quam data libertas; nec cum captivus agebas  
Esse nocens poteras. Te sævi Cæsaris ira  
Liberat ut fieres. Phariæ nam noverat aulæ  
Perfidiam, moresque tuos, tua crimina sperans.  
Ut mox justa cadas Cleopatrx victima regno;  
Cujus adulterii pretium Nilotica sceptrâ  
Donabit Cæsar, dulcique impendet amori.

Nec Latium versuta Ducem spes ista fefellit.  
Namque infelicem Ptolemæum in regna remissum  
(Sive Ægyptiacæ fuit inconstantia gentis,  
Seu Regis vitium) confestim oblivio cepit  
Et dextræ fideique datæ; nova bella parabat,  
Consiliis pravis, & spe delusus inani,

Inque suam accelerat properantia fata ruinam.  
Et ne subsidiis accrescant castra marinis  
Cæsarea, instructam disponit in æquora classem,  
Qua levis Ægypto disternat unda Canopum.  
Inceptum visa est primum Fortuna juvare.  
Incidit in classem hanc sociis divisa carinis  
Cæsaris una ratis, quæ fortem Euphranora vexit:  
Hanc omni Phariæ puppes statione solutæ  
Circumeunt. Periit numeris oppressa triremis.

Regius interea per Deltam exercitus ibat  
Terrestris, multasque via muniverat arces.  
Jam belli molem pulcherrima Delta tenebat,  
Delta Ægyptiaci decus atque opulentia regni;  
Per cujus virides sinuato gurgite campos  
Huc illuc ludit Nilus, gyrisque recurrens  
Nunc ambit, nunc implicitis intersecat undis  
Pinguia culta suis, & nigra ditat arena.  
Huic nomen terræ dat litera Delta triformi.  
Oceano Boreale latus defenditur, in quem  
Infundit sese septeno gurgite Nilus.  
Quæ restant latera inde duo, duo brachia Nili  
Ultima constituunt. Hæc inter brachia, quinque  
In mare gurgitibus per Deltam volvitur amnis.

Magnus ab Æthiopum campis nigrantibus amnis  
Volvitur, atque uno longe decurrit in alveo  
Usque ad planitiem, qua surgit maxima Memphis  
Pyramidum aggeribus totum celebrata per orbem.

Indulsit nimium faciles telluris opimæ  
 Fertilitas fruges populo, nimiumque pepercit  
 Agricolæ manibus, tanti jactura laboris  
 Ut fieri posset; moles ut vulgus inanes,  
 Vanaque Pyramidum miracula stupesceret Orbis.  
 Tot potuere manus steriles invertere glebas,  
 Emendare solum, muris circumdare terras,  
 Et tanto imbellem munimine cingere gentem,  
 Ut non incursum populi timuisset Eoi,  
 Non Persarum acies, pharetrataque robora Susæ;  
 Nec Macedum æratæ cessisset præda Phalangi  
 Fertilis Ægyptus; sed inexpugnabilis armis,  
 Atque sui juris seculum mansisset in omne.

Volvitur a Memphi partito gurgite Nilus,  
 Extremoque Eurum versus ferit æquora cornu  
 Ad Pelusiacas arcēs; at gurgite mollis,  
 Alluit occiduo litus portumque Canopi.  
 Huic dedit antiquum Menelai Navita nomen,  
 Litore (si famæ credas) tumulatus in isto,  
 Cum Pharii justus tenuit diademata regni  
 Proteus. Eripuit Paridi castissimus ille  
 Tindarida, & nullo vitiatam crimine servans  
 Post Trojam excisam ferro flammisque marito  
 Reddidit. Hæc tellus inter duo flumina Delta est  
 Dives opum, dives pecorum, lætisque colonum  
 Frugibus exaturans, atque urbibus inclyta magnis.  
 Quid Butum, Butive lacum, quo gentibus olim

Niliacis responsa dabat Phœbeja mater:  
 Quid sævam hospitibus memorem Busiridis urbem,  
 Funestasque aras? teve urbs pulcherrima, nomen  
 Cui Venus ipsa dedit? vel te delubra Minervæ  
 Alta tenens Sais, quam rex Psammiticus olim  
 Condidit? antiquæ juxta stant moenia Mendes,  
 Qua Deus Arcadiæ Pan pastoralis in urbe  
 Religione patrum colitur. Cum matribus illis  
 (Ut perhibent) capri coiere, & semine misto  
 Fœdare uteros. Olim sic ille creatus,  
 Qui pueri nimio Cyparissi ardebat amore.  
 Ante tamen quam rex Ptolemæus ab urbe Canopo  
 Per Deltam transire parat, (nam nota Canopo  
 Tempa Serapis habet) scrutari oracula divum,  
 Et belli casus cupit explorare futuros.

Hic Deus alta tenens molli delubra Canopo,  
 Quem serpentina Nilotica terra figura  
 Vicinique colunt, non vocè oracula reddit,  
 Corniger ut Libycis colitur qui Syrtibus Ammon;  
 Non esuve, fameve, velut Memphiticus Apis,  
 Certa boni, fative mali præsagia pandit;  
 Nec Phœbo similis Cyrrhæo, Virginis implet  
 Concussos artus miseræ, quam pœna recepti  
 Numinis, aut pretium mors immatura sequatur;  
 Erudit at placide humanam per somnia mentem,  
 Nocturna que quiete docet: nulloque labore  
 Hic tantum parva est pretiosa scientia, nullo

Excus-



Excutitur studio verum. Mortalia corda  
Tunc Deus iste docet, cum sunt minus apta doceri,  
Cum nullum obsequium præstant, meritisque fatentur  
Nil sese debere suis; tunc recta scientes  
Cum nil scire valent. Non illo tempore sensus  
Humanos forsán dignatur numen inire,  
Cum propriis possunt per se discursibus uti,  
Ne forte humana ratio divina coiret.

Jamque Sacerdotes Regem in penetralia templi  
Duxerunt. Tyrio resplendens sanguine & auro  
Stratus erat lectus, quo tu, Ptolemæe, recumbens  
Fædici infelix captas præsgia somni.  
Sacratos intrant templi sola illa recessus  
Somnia, quæ Deus ipse creat; nam cætera cuncta,  
Quæ vel temperies varias, variosve sequuntur  
Corporis humores, vel quæ repetita diei  
Aut studia, aut curæ finxerunt somnia, templo  
Exteriore volant multas imitantia formas.  
Illic præ reliquis fuscam exhilarantia noctem  
Formosa specie, roseisque volantia pennis  
Sanguinea apparent, templique in margine ludunt.  
His quoque de Veneris campo, placidoque vireto  
Mille pharetrati fratres, gens mollis Amorum  
Occurrunt noctu, & templo consortia jungunt.  
Illic flammatis alis, vel fulguris instar  
Nocturnæve facis, per summa cacumina templi  
Somnia de flava nascentia bile, volatu

Irato strepitant, tamquam hostem quærere semper  
Audacem, & sævas assueta lacessere pugnas;  
Excelsoque parant cœlum superare volatu.  
At contra timide tenebrosa per atria templi  
Quæ nigra de bile fluunt, demissius ibant;  
Nocturnæque ut aves strident feralibus alis,  
Inter busta volant, & fœdis sola sepulcris.  
Invitant Stygios mœsta ad consortia Manes.  
Illic per postes, albataque mœnia templi  
Ignavo incessu, tardæ testudinis instar,  
Somnia, quæ pituita creat, trepidantia serpunt;  
Ne si forte cadant, liquidis mergantur in undis;  
Nam semper vana falluntur imagine lymphæ.  
Hæc inter volitant imitantia mille figuris  
Quidquid agunt homines passim; totidemque feruntur  
Quot patitur magnus diversa negotia Mundus,  
Aut objecta tenet. Cedunt hæc somnia cuncta  
Divinis, quæ dat Numen, longeque remota  
Non audent templi sacros intrare recessus.

Nocte fere media Ptolemæi pectora somnus  
Vicerat optatus, cum jam divina Serapis  
Somnia, mutandum Ægypti narrantia regnum,  
Miserat. Incessu tardo delubra petebat  
Bos niger ingenti specie; geminisque micabat  
Pelle insignitus stellis; quarum altera tergo,  
Alterâ fronte fuit media. Lugubre videtur  
Mugire, atque oculis lacrymas effundere nigris,

Confectus macie, tanquam qui pabula nulla  
Gustasset mœrens. Post majestate decora  
Incedit, quamvis pullato scœmina cultu  
Turrigero laceros effundens vertice crines,  
Atque catenatos tendens post terga lacertos.  
Tum, velut inferni plorarent carcere Manes,  
Eruptit subito tumulis lacrymabile murmur  
Ex imis, scindi regalia Mausolea  
Vidit, & erupto Ptolemæum exire sepulcro  
Lagæum primo, reliquos hunc ordine reges  
Pone sequi, miseræ crudelia fata gementes.  
His vero attonitus visis Ptolemæus (ab omni  
Nam gelidus trepido manavit corpore sudor)  
Excusso somno templum circumspicit omne,  
Talia Divorum quærens ostenta; sed illa  
Quæ vidit clausis, oculis non vidit apertis.  
Jamque sacerdotes veniunt, & somnia Regis  
Audita horrentes, hinc lamentabile fatum,  
Atque propinquantem regni dixere ruinam  
Niliaci. Tum Dis patriis lustrantur, & aras  
Incendunt votis. Sed Dî propiore ruina  
Te, Ptolemæe, prement. Casus, miserande, futuros  
Dum patriæ narrat, celat tua fata Serapis.

Interca valido Mithridates agmine nuper  
Per Cilicum populos Syriæque extrema coacto,  
Ad Pelusiacam properans pervenerat arcem,  
Quæ viridem Ægyptum Syriæ determinat arvis.

Nam tota Ægyptus claustris munita duobus  
 Nititur; accessum prohibens arx ista pedestrem,  
 Ut Pharos æquoreum. Tanti sunt mœnia regni.  
 Sed non egregium omnino Pelusia tardant  
 Claustra ducem. Una dies arcemque expugnat & urbem.  
 Inde rapit celeri Mithridates agmine cursum,  
 Et se Cæsareis properat conjungere castris.  
 Hoc metuens equitum præmiserat agmina turmis  
 Obvia Cæsareis Ptolemæus; dum sibi castra  
 Colle locat celso, late qui despicit omnem  
 Planitiem, Ægyptus qua terram effusa patentem  
 Explicat. Est proprio mons undique robore tutus:  
 Difficilem declive solum, præruptaque saxa  
 Una parte dabant ascensum: tuta palude  
 Pars alia est: rapido pars tertia cingitur amne.  
 Sola angusta aditus ad montem præbuit isthmus.

Sed non castrorum tanto munimine tutum  
 Se satis esse ratus, procul illo arcere parabat  
 Cæsaris occursum; pontes, aditusque remotos  
 Milite custodit præmisso, & dissita longe  
 Flumina nequidquam (infelix) defendere tentat.  
 Nam neque Romanis animis fiducia cessit  
 Contra hostes, contraque locos pugnare paratis:  
 Virtutem Phariæ nec sustinere catervæ  
 Ausoniam. Cedunt ripis, & terga per agros  
 Præcipitos dantes victoribus omnia relinquunt.

Contectam vidit castris Ptolemæus ab altis

Corporibus terram, rubefactaque cæde suorum  
Prata quibus steterant, proprii præsagia fati  
Tristia concipiens animo; dum castra petentes  
Quos fuga servavit pauci, non viribus augent  
Auxiliove suos, implent sed cuncta timore.  
Quorum victores fugientia terga secuti  
Instabant; acrique ad Regia castra tumultu  
Perveniant; quæ jam Cæsar conamine toto,  
Dum fortuna calet, dumque omnia plena timore,  
Impiger aggreditur; nec adhuc victoria certa  
Esse videbatur, Pharii dum castra tenebant.  
Ite viri, dixit, belloque imponite finem.  
Virtutis pretium, mercedem sanguinis, auro  
Argentoque referta tenent tentoria Regis;  
Niliacas gemmas, Erythræo e litore conchas,  
Totque simul Procerum congestas undique gazas,  
Quæ vobis debentur, ait, nunc sumere restat,  
Et rapere a victis. Nec prædam quærere tantam  
Segnis erat miles; parvam primo occupat Isthmon.  
(Sola aditum hæc præbens disjungit ab amne paludem)  
Illam præcipue pubes Ægyptia servat.  
Illic concurrunt, oriturque miserrima cædes.  
Hos formido ingens, & si vincantur in armis  
Desperata salus: prædæ spes excitat illos.  
Illic immensa rabie decernitur; amnis  
Atque palus multo fœdantur utrinque cruore,  
Semianimesque artus, & saucia corpora volvunt;

Quæ gemino pereunt fato. Dumque hostibus hostes  
Conseruere manus, alteraque brachia nexu  
Robusto tenere, cadunt in flumina jundi;  
Nec furiosa illic linqunt certamina; pugna  
Contendunt ambo collapsi flumine vana;  
Nam victum Stygias sequitur cito victor ad umbras.  
Dumque omnes illa castrorum parte feroces  
Concurrere manus Phariæ; celsum undique Cæsar  
Contemplans montem, prærupta parte videbat.  
(Qua miseris est collis inexpugnabilis esse  
Niliacis visus) nullo custode teneri;  
Confestimque leves illuc jubet ire catervas  
Quas Carfulenus duxit. Nec dura videntur  
Hæc mandata Ducis; scandunt acclivia saxa,  
Præcipientemque locum capiunt. Mors opprimit inde  
Niliacos, poterat minimo unde labore repelli.  
Jam Carfulenus per collem ascenderat audax,  
Cumque levi intrarat Ptolemæi castra cohorte.  
Attoniti fugiunt custodes; castra tumultu  
Implentur; subitis perculsi casibus omnes  
Huc illuc miseri discurrunt; quidve relinquant,  
Quidve petant capti non norunt. Cæsariani  
(Dum trepidant intus, dum conficit omnia terror)  
Acriter instantes irrumpunt undique castris.  
Implorat frustra veniam gens victa; furentes  
Nec tenuit Cæsar gladios; mactare nocentes  
Imperat, in visoque orbem purgare cruore.

Pars turbæ miseræ Latiis nutrita sub armis,  
Et de Romuleis legionibus ante fuisset.  
Hos olim e Syria duxit Gabinius audax  
Exulis auxilio regis, belloque peracto  
Pila satellitio Phario Romana reliquit.  
Tempore torpuerant vires, luxuque Canopi  
Cæperunt fracti veteres dediscere ritus,  
Atque Ægyptiacos paulatim assumere mores.

Non procul a castris fugiens conspexit in undis  
Rex miser haud magno pendentem a fune carinam;  
Et cito conscendens, comites de litore jussit  
Solvere, purpureos humeris dejecit amictus,  
Ne nosci fugiens posset. Sed dura salutem  
Fata negant; misero detracta insignia solum  
Hoc Ptolemæe dabant, ut vilior umbra jaceres.  
Namque hanc de castris Ægyptia turba carinam  
Assequitur fugiens, properantque ascendere cuncti.  
Cæsarei urgebant gladii post terga; fugasset  
Jam timor officium; pavidis reverentia nulla  
Regis erat, nimio dum pondere victa carina  
Deficit, & rapidis Ptolemæus mergitur undis.

Plebejo extinctus fato, gelidoque sepultus  
Rex, Ægypte, tuus Nilo jacet, ultima tantæ  
Et miseranda domus soboles. Non Mausoleis  
Excelsis habitant Manes, non Regia templis  
Condita, marmoreis aut montibus ossa quiescunt  
Lagææ de more domus, quæ funera luxu,

Divitiisque solet nimis violare sepulcra.

Quam breve crudeles regnum, Ptolemæe, dederunt  
Dî tibi! non aliter Pharium diadema gerebas  
Hostia quam tristem gestat moritura coronam.  
Sed breviora tamen si Dî tibi regna dedissent,  
Ad Styga venisses felicior umbra, priusquam  
Sanguine Niliacas perfudit Magnus arenas,  
Depulso qui sceptrâ tuo dedit ante parenti;  
Te nunc occisi, rex ingratissime, Magni  
Manibus inferias Cæsar (quem demeruisse  
Crimine sperasti) mittit; Generique perempti  
Ne possit debere nefas, ulciscitur ipse,  
Inque tua titulum pietatis cæde requirit.

Pellæam tendens victor jam Cæsar ad urbem,  
Ne Ducis adventum tanti, justasque timeret  
Iras victoris sibi conscia turba rebellis,  
Præmittit veniam cunctis, trepidantia solvens  
Corda metu, leges populo, proavitaque jura  
Se concessurum affirmans, & debita stirpi  
Lagææ dudum Pharii diademata regni.







## LIBER SECUNDUS.

### ARGUMENTUM.

*Cæsar amore Cleopatrx captus in Ægypto moratur, dum L. Scipio cum Rege Juba bellum in Africa renovat. Cæsar Pharnacem vincit.*

**S**plendida Pellæam celebrant jam festa per urbem,  
 Et Ducis Ausonii laudes ad sidera tollunt  
 Servati Cives (dum passim altaria fumant)  
 Votaque Dīs solvunt. Nescis, gens impia, nescis  
 Cui causæ hanc debes veniam, patriæque salutem.  
 Non hanc semideive Canes, aut barbara præstant  
 Numina, queis ritu persolvis vota profano;  
 Nec Ducis inflectunt animum fulgentia testæ,  
 Non veterum monumenta Ducum, non templa Deorum,  
 Nec Macedûm cineres Regis, quos Cæsar adorat  
 Plus aris templisque tuis: sed inania sacra,  
 Infirmosque Deos facie Cleopatra potente  
 Protegit, & stupro redimit Memphitica sceptræ.  
 Nec visum est æquum Cœlestibus, ut meliori  
 Deberent causæ tam turpia regna salutem.

Jamque sui Pharias regnans Cleopatra per urbes

Auctorem fati regali splendida cultu  
Excipit, & magno celebrat convivia luxu.  
Atria fulgebant tali laqueata paratu  
Qualem magna solent, sed jam ruitura, studere  
Regna, quibus veteres, quas longa potentia fecit,  
Ostentantur opes, vitiis alimenta futuris.  
Sed non divitiæ, non auro fulva supellex,  
Gemmæ tibi tori passim, pictive tapetes  
Cæsareos pascunt oculos, nec talia curat,  
Dum prope sidereo cunctis splendoribus ore  
Præradiat, vultuque movet Cleopatra superbo.  
Hanc videt, huic oculis & pectore totus inhæret;  
Quoque magis cernit, magis ardet; cætera visu  
Splendida quæ primo, sordent objecta secundo:  
Fœmineus decor augetur, crescitque revisus.  
Purpureas stupet ille comas, & candida colla,  
Queis gemmis lux major inest. Abscondere formam  
Divitiæ eximiam, non exornare videntur;  
Quamvis non desunt Erythræo e litore gemmæ,  
Non spolia Eoi Gangis, non quidquid in undis  
Volvitur Assyriis, aut dives mittit Hydaspes;  
Non Arabum ex petris viridi splendore smaragdus,  
Nec lapis auratus, quem dat Mæotica tellus.  
Sidereis adamas radiis hebetatur ocelli,  
Quoque minus lucet, formæ magis auget honorem.  
Sapphirum pulchro pendentem pectore vincunt  
Cærule venarum violaria; labra rubinus

Non rosca æquaret, nisi primo viſta fuiſſet,  
Et pudor augetet quem dat Natura ruborem.

Auſonius Duſtor jamdudum ſaucius, ignem  
Concipit inde novum, nimioque accenditur æſtu;  
Nec placidam celare ſtudet, ſed pſcere flammam.  
Quænam, inquit, noſtris obſtare potentia votis,  
Aut quæ fama poteſt? quid ſic duriffima virtus  
Oppugnata ageret? Facies abſolveret iſta  
Judice raptorem cœlo, nam talia quondam  
Stupra Deis ſummis celebres tribuere poetæ,  
Æthere qui toties poſuere Tonantis amicas,  
Et forma eximias fecere Heroidas aſtra.  
Temporibus ſi viſa illis Cleopatra fuiſſet,  
Non coma Niliacæ Berenices aurea cœlo  
Fuiſſet, pulchræ nec Pleiades aſtra fuiſſent;  
Non ſtupri pretium radiantia plauſtra tuliſſet  
Calliſto, aut Bacchi conjux formoſa coronam,  
Donec partem aliquam Cleopatræ ſtella ſereni  
Nobilitare poli certam dignata fuiſſet.  
Jupiter exemplum mihi ſit, quem sæpe coegit  
Sævus amor magno furtim descendere cœlo:  
Vel potius noſtra abſolvant delicta Tonantem,  
Cæſareum Jovi veniam det nomen amoris.

Ne, Cæſar, tua vota time; non pervigil iſta  
Hesperidum ſerpens fulgentia poma tuetur,  
Nec nimio forma eſt hæc cuſtodita pudore.  
Sed puerilis Amor, vanique Cupidinis ignes,

Pectora qui stimulare solent innoxia vulgi,  
Pastoresque rudes urunt, rurisque puellas,  
Non tibi rem peragunt, Cæsar; nec causa domare  
Vulgaris potuit Reginæ corda superbæ;  
Formosamve tuis Cleopatram amplexibus offert  
Dulcis amor Veneris: sed regni insana Cupido,  
Majestas, nimiisque optata potentia votis.  
Hic amor, affectus alios Ptolemæidis omnes  
Pectore sustulerat. Penitus si nullus inesset  
Venarum calor, aut artus depasceret ignis,  
Lascivos tamen amplexus in Cæsaris isset  
Frigida, & Ambitio solvisset tanta pudorem.  
Quæ te causa fidem, Cæsar, violare coegit,  
Visceraque in patriæ sceleratos impulit enses  
Emathios Latio perfundens sanguine campos,  
Illa pudicitiam Reginæ in pectore vicit,  
Prostituitque tibi. Nec quisquam Cæsaris altos  
Suspiciat posthac animos, cum spiritus idem  
Fœmineum impellit pectus. Qua Cæsar, eadem  
Ambitione nocens facta est Cleopatra; fidelis  
Nec manet hic civis, nec conjux illa pudica.

Ne tamen illicito Cæsar videatur amori,  
Non patriæ vicisse suæ, (nam Ægyptia tellus  
Victa licet, nondum Latia est provincia facta,  
Sed sceptro subjecta manet) veritusque rebellem  
Niliacum subito populum, si regna teneret  
Fœmina, dum stirpis Lagææ mascula proles

Vivat adhuc, puerum Ptolemæum lustra videntem  
Vix bina, Arsinoes, quam duxerat ante, sororis  
Conjugio avulsum Cleopatrarum jungit, & illum  
Immaturum annis Phario diademate cingit.  
Hunc vocat Ægyptus Regem, Cleopatra maritum;  
Defunctique locum fratris supplere videtur  
Conjugio & regno. Quid præter nomina vana  
Conjugii, regnique, puer miserande, tenebis?  
Quid præter titulos, thalamum dum Cæsar adulter  
Possidet, & regnum conjux Cleopatra gubernat?  
Nec rivalis adhuc fieri puerilibus annis  
Cæsareive potes thalami, regnive sororis.  
Sed tenera poteris felix ætate videri,  
Qua non incesti cognosces gaudia lecti,  
Obscænoque carens fructu, noxaque carebis.  
Conjugium innocuum magis hoc est, quo minus aptum;  
Conjugis incesti sine crimine nomen habebis,  
Et sine curarum retinebis pondere regnum.

Humanti Nox atra polos involverat umbra,  
Inque vicem Phœbi redeuntia sidera cœli  
Ornant varie faciem, cum captus amore  
Illicito Ductor Latius, vinoque solutus,  
Dulcibus indulget votis, tandemque cupito  
Reginæ fruitur thalamo, pulcherrima lecti  
Gaudia degustans. Tantum suadere potestas,  
Donaque, & illustris gestarum gloria rerum  
Fœmineæ poterant menti. Nec crimen inesse

Concubitu nimium tali, Cleopatra, putabunt  
Qui Ptolemæorum thalamos, consuetaque jura  
Incestæ novere domus, fratremque sorori  
Conjugio junctum, sacræ sub nomine tedæ  
Majus adulterio delictum. Turpius isset  
(Quis credit?) justi ad thalamos Cleopatra mariti;  
Utque minus lecto peccaret, adultera facta est.

Pœna tamen sequitur; furtivi pignus amoris,  
Cæsario infelix, fatis generatus iniquis  
Cæsaris Augusti cadet olim victima ferro  
Cæsareos tristans cognata cæde Penates.

Tempora dum Phario Ductor dependit amor  
Ausonius, Libycis iterum fragmenta ruinæ  
Thessalicæ terris cœunt, quæ magnus agebat  
Scipio dux belli. Cum quo (jam Cæsaris hostis,  
Quamvis ille truces toties sub Cæsare Gallos  
Stravisset) fortis stabat Labienus in armis.  
Hic sanctus Cato privata non concitus ira,  
Sed patriæ imperium, & communia signa secutus  
Militat; injustis hic stat Petrejus in armis,  
Oblitus fidei, terris quem Cæsar Iberis  
Donasset vita; & Varus, cui cesserat omnis  
Africa, Romanis quæ tum sub fascibus esset,  
Quam ditio potens olim Carthago tenebat.  
Delectas Libyæ turmas, & Punica secum  
Agmina ducebat Varus, fallacia corda,  
Membra leves: rubris induti vestibus ibant

Ut fustum in bello hac celarent arte cruorem.  
Sub Varo populos sitientibus arida venis  
Cyrene Barceque suos ad prælia mittunt,  
Quæque Afris Siculos permiscuit Æa colonos.  
Tabraca bellantes Tyrio de sanguine turmas  
Mittit, & antiqua Phœnicum stirpe creatos  
Dat populos Libycis dilectus regibus Hippos;  
Atque Utica, & tanto Tapsus post inclyta bello.

Advenit his Libyco regum Juba maximus orbe,  
Qui jam Cæsarea lætum de clade triumphum  
Duxerat; infelix cecidit cum Curio fraude  
Deceptus. Domino imperium non latius ulli  
Contigit. Occiduo de cardine terminat Atlas:  
Parte alia Thera, & confinis Syrtribus Ammon.  
Undique diversæ gentes, populique remoti  
Conveniunt ad signa Jubæ. Fulgentia signa  
Medorum antiqua Mauri de stirpe tulerunt.  
Atque inopes, qui cum mundo commercia solis  
Naufragiis Nasamones habent. Garamantes iniquo  
Sub cælo positi, steriles qui semper arenas  
Squalidaque arva tenent solis fœcunda venenis.  
Cumque his Marmaridæ medicas egere catervas,  
Serpentum morsus cantu curare parati.  
Audaces Numidæ, & frænorum nescia turba  
Massyli, levibus norunt qui flectere virgis  
Ora ferocis equi; gregibusque assueta ferarum  
Gens Getula viros mittit, qui cominus iras

Indomitorum ausi sunt irritare leonum.  
 Autololesque vagi, pedibus qui vincere cursum  
 Venatoris equi celerem, cervique fugacis  
 Assueti; atque Mibæ vicino Sole perusti,  
 Qui ferrum infamant, scelerataque tela venenis;  
 Et membra hirsuta capri qui pelle teguntur  
 Cynipii venere Macæ, fortisque juvenus  
 Quam Vaga, quamque Uzzita dabat, quam regia Zama  
 Nutrivit, vexilla Jubæ comitantur euntis.  
 Scipiadæ, Latiisque Aquilis hæc agmina jungit  
 Rex Juba; jamque actis intendunt viribus omnem  
 (Cum primum Zephyro putris se gleba resolvit)  
 In Latium belli casum transferre futuri.  
 Sed celer in cunctis, semperque inferre suetus  
 Nunquam bella pati Cæsar, mox irrita fecit  
 Hæc decretâ Ducum, bellumque huc attulit omne.  
 Heu nimium cito Marmaricis cernetis in oris,  
 Quem vos Hesperia statuistis quærere terra.  
 Dulcibus interea illecebris, luxuque Canopi  
 Captus, & afflatus fallente Cupidine Cæsar,  
 Lascivas ducit Veneris sub numine nòctes,  
 Oblitus Libyæ tantas coalescere vires,  
 Fortunamque suam, & surgentia regna morantes.  
 Talibus illecebris, & molli fractus amore  
 Formosæ Echalidos Reginæ dicitur olim  
 Maximus Alcides. Humeros non fulva leonis  
 Terga Cleonæi velant, nodosave fortem

Cla-



Clava armat dextram; domitores mille laborum .  
 Desidia incipiunt duri torpere lacerti.  
 Nec jam vindicibus pacati viribus orbis  
 Terrentur Reges: sed plus Junonis iniquæ  
 Spes sævas facie formosa scæmina juvit,  
 Quam poterant ferratæ acies, aut omnia terræ,  
 Aeris, Oceanique, & Ditis monstra profundi.

Sed longo Fortuna Ducem torpere veterno  
 Non patitur tantum; medio nec Cæsaris acta  
 Deficere in cursu; sive accelerare ruinam  
 Romanam cupit inconstans, exosa potentem  
 Jam populum, & vires nimias quas fecerat ipsa:  
 Sive Deam puduit, leges venerandaque jura  
 Cæsaris ignavæ solum debere salutem  
 Desidiæ, & potius statuisset perdere Marte  
 Quam sic servare; ut bellum, quod struxerat olim,  
 Destrucet rursum Imperii fastigia tanti:  
 Nec plus res Latias facie Cleopatra nocente  
 Quam gladii ultores, & Thessala castra juvarent.

Non tamen a Phariis primo civilia bella  
 Deliciis traxere Ducem, tantumve soporem  
 Excussere tubæ Latæ. Rex debilis illum  
 Et cito casurus Pharnaces excitat, ut non  
 Ipse ruat solus: sed secum nobilioris  
 Fata trahat populi. Sic cum Leo magnus apertis  
 Dormivit campis, passim formidine nulla  
 Illæsi carpere greges sua pabula; parvus

Forte culex stimulis audacibus ora leonis  
 Cum pupugit, somno excusso fera nobilis ira.  
 Infrendens magna, postquam protriverit hostem  
 Exiguum, nondum vindictam nactus, in omnem  
 Prosiluit campum, grassataque sanguine multo  
 Stravit equos, stravit tauros, armentaue tota  
 Exigui culicis temeraria facta luerunt.

Munere Pompeji Pharnaces impius olim  
 Cimmerium, & pretium sceleris, diadema recepit.  
 Natus erat magno Ponti Mithridate, potentis  
 Qui populis Asiæ quondam, Grajisque subactis  
 Æmula Romanis per terras arma gerebat.  
 Qui victus tandem, & Pompeji viribus omni  
 Exutus regno, nati impietate nefandi  
 Proditus est, ceciditque minor sic gloria Magno.  
 Pharnacem nimia nunc ambitione tumentem,  
 Cum paribus dudum signis concurrere signa  
 Romanasque acies, & tantæ robora gentis  
 In se civili novit conversa furore,  
 Quærendi regnum pepulit spes vana paternum.  
 Quem fallax primo jovit Fortuna, futuris  
 Deceptura malis; Urbisque ad mœnia magnæ,  
 Quam debellati Mithridatis struxerat olim  
 Pompejus monumentum ingens, devicit iniquis  
 Te, Domiti infelix, fatis; ad nota tulerunt  
 Mœnia barbarici Romanâ piacula Manes.

Lucida jam novies repararat cornua Phœbe

Ex quo Niliacas devenit Cæsar in oras,  
Reginæque tument vitiati pondera ventris.  
Quam verbis abiens solatur Cæsar amicis:  
„O fortunarum reſtrix Cleopatra mearum,  
„Cæsaris & fatum, qui cætera fata gubernat,  
„Me nunc bella vocant. Crudelis amantibus arma  
„Crudelisque sibi Pharnaces impia movit,  
„Exitioque suo nostrum interrumpit amorem.  
„Tu cohibe lacrymas; devictus sentiet hostis  
„Cæsaris armati gemitus, & clade suorum  
„Agnoscet quanta Cleopatrarum amplexibus ira  
„Divellor. Sed non nostris concurrere turmis  
„Debilis audebit Pharnaces. Arma relinquet,  
„Quæ temere sumpsit, subito: nomenque fugabit  
„Cæsaris invalidas acies. Avellor amore,  
„Non ad bella vocor; citius victoria cedit  
„Nuncquam pugna mihi; facilis venit, ecce, triumphus.  
„Verum ut te caream, nec erit victoria læta;  
„Nec laurus jucunda mihi; non ipsa triumpho  
„Quæ comes est, tantum pensabit gloria damnum.  
„A te discedam tristis, pulcherrima rerum,  
„A te, quæ fusca Ægypti lucentibus arva  
„Irradias oculis, & splendidiora Deorum  
„Tramite cœlesti, cui lactea nomina Græci  
„Antiqui tribuere, facis; sine qua mihi tellus  
„Nulla placet, triste exilium Roma ipsa videtur,  
„Sed nos hinc majora vocant certamina; nondum

„Attigit optati Cæsar fastigia regni.  
„Quantos debet adhuc nobis Fortuna triumphos!  
„Quantaque civilis, quod restat, præmia belli  
„Te, Cleopatra, manent! formam hanc venerabitur orbis  
„Sideream. Australi populi qui litore degunt,  
„Et nunquam Oceano fulgentia plaustra Bootæ  
„Mersa vident: & quæ septem subjecta Trioni  
„Gens jacet, in cujus nunquam regione Canopus  
„Cernitur, hoc tantum cælo contenta vagari,  
„Nomen adorabunt Cleopatrarum: litore gentes  
„Occiduo, & quæ surgentem videt India Solem.  
„Cum Nilo Tiberis tibi serviet, & tua regna  
„Defendent Aquilæ nostræ, Romanaque signa;  
„Dum Reges inter famulos Cleopatra superbos,  
„Et sceptris subjecta suis nova sceptrata videbit.  
„Talia nam (si nota satis mihi Numina) spondet  
„Hoc bellum Regina tibi. Nunc fata sequenda,  
„Et cito quo ducunt. Uteri per cara tumentis  
„Pignora, civilis belli post fata revertar.“  
At blandis Cleopatra dolis instructa, venustas  
Cui niyæ frontis tanta est, ut luctus, & ipsæ  
Vel lacrymæ deceant, lacrymis sic infit obortis:  
„Non tanti facio, Cæsar, mea vota precesque,  
„Ut decreta Ducis tanti mutare valerent,  
„A quibus humani generis fortuna per orbem  
„Pendet; queis stellæ, queis Numina cuncta vacabunt,  
„Audax Religio nimium, Pietasque superba.

„Censetur, quæ magna optat mutare Deorum  
 „Consilia. Ah potius flammæ, votisque resistam  
 „Ipsa meis, dulcemque sibi Cleopatra negabit  
 „Cæsaris aspectum, quam tanta negotia, totque  
 „Bellorum laurus tardabit nostra voluptas.  
 „Sed tamen ignoscas paulum si, Cæsar, amori,  
 „Indulget Cleopatra suo, si vivere tecum  
 „Exoptat, si castra sequi victricia. Non pax  
 „Tutior ulla mihi quam classica Cæsaris essent,  
 „Quo propius bellum sub te ductore secuta,  
 „Hoc magis a belli fuero terrore remota.  
 „Sed jam jussa sequar, Phariisque videbor in oris  
 „Tutela secura tua, magnique putabo  
 „Cæsaris occiduis Alcidae a Gadibus usque  
 „Eoum Gangem victricem extendere dextram,  
 „A Thule ad populos Austri. Tam dissita Mundo  
 „Litora nulla jacent, ut jam divortia longa  
 „Inter nos faciant, si sit tam Cæsar amando  
 „Quam vincendo celer. “ Lacrymas tum sponte cadentes  
 Combibit ore avido Cæsar, repetitaque jungit  
 Oscula. Niliacis tandem digressis ab oris,  
 Tendit in Armeniam Libycis velocior Austris  
 Pharnacem exquirens; altæ hunc prope mœnia Zelæ  
 Invenit, & solo conspectu fundit inertem.  
 Tam cito devictus pugnae non ulla reliquit,  
 Sed tantum monumenta fugæ; nec fama loquetur  
 Pharnacis de bello aliud, quam tempore Cæsar.

Quod venit, viditque hostes, & vicit eodem.

Heu quantum famæ Magni fuga detrahit illa  
Pharnacis timidi, dum Cæsariana juvenus  
Mollitiem cernit gentis! Non digna triumpho,  
Nec titulis tantis jam Pontica regna subacta  
Armenosque putant victos. Non destruit illo  
In bello Cæsar tantum diademata regis,  
Sed Magni decus; exultans tum talia fatur:  
„O felix Pompei! cui nomina tanta subactæ  
„Degeneres istæ gentes, laurosque dederunt,  
„Quando ego pugnaces Gallos, fortesque Sicambros  
„Vincendo, nullum videor meruisse triumphum.  
„Fatum bella tibi si transalpina dedisset,  
„Nostrarum forsitan nosses discrimina laudum.  
„Non hæc omnino civilia bella fuissent.“  
Sed majora vocant illinc discrimina belli  
Victrices Aquilas. Libycis consedit in arvis  
Scipio Romanis cinctus legionibus, hostis  
Securus nimium, gelidi cum jam Capricorni  
Terga premens, horas contraxerat inde diurnas  
Phœbus; & acris hyems cursum frænarat aquarum,  
Nudaque vestierat niveis nemora alta pruinis.  
Sed præceps Cæsar, quem nunquam in bella ruentem  
Tempestas, tristesve hyemes potuere morari,  
Ter jam Romulea factus Dictator in urbe  
Vela dedit ventis, paulumque moratus in oris  
Sicaniis, iterum Lilybæo a litore solvit,

Et prætervehitur magnæ Carthaginis arces  
Semirutas, Clupeamque videns, male litora nota  
Damnat, ubi infelix perituris Curio turmis  
Appulit. Infaustas oras, Uticamque relinquit,  
(Quam Cato tum legum vindex justissimus armis  
Præsidioque tenet, nomen qui sumet ab urbe,  
Æternamque urbi reddet per sæcula famam)  
Inde Adrumetum tendens, ubi Scipio belli  
Ingentis Ductor Romanis stabat in armis.



# LIBER TERTIUS.

## ARGUMENTUM.

*Levia aliquot Ducum prælia. Cn. Pompejus a Catone  
objurgatus in Hispaniam navigat. Pugna Thap-  
siaca, & Victoria Cæsaris describitur.*

**J**Amque propinquabat bellum, Libyæque nefandi  
Concurrunt iterum gladii, quos Thessala tellus  
Vidisset. Pugna cur, Dî, voluistis in illa  
Restare exiguum nequidquam sanguinis urbi?  
Ut flueret torrente novo, fieretque secundum  
Hic civile nefas? Una num clade pudebat  
(Quantumvis magna) Romanam excindere gentem?  
Aut una tanti populi regione jacere  
Non est passa graves tristis Fortuna ruinas?  
Jam Roma in Libya est. Latii quæ terra triumphos  
Spectasset toties, jam tristia vulnera spectat.

Sed levibus tantum pugnis contenta parumper  
Fortuna, extremi differt certamina Martis,  
Tot subito gentes, perituraque millia letho  
Condemnare pudet; nec adhuc feralia Thapsi  
Arva Jubæ casus magni, vel triste videbunt



Scipiadæ exitium, donec coeuntia signa  
Ductorum, atque aliquos belli Rhuspina tumultus  
Vidit, & exhibuit tantæ præludia cladis.  
Scipiadæ a castris Rex (in sua regna reversus)  
Quæ longe infestis populatur Sittius armis)  
Discedit paulum; plenamque hostilibus armis  
Advenit Libyen una legione, relicto  
Robore militiæ Lilybæo in litore Cæsar.  
Nec de more suo dederat mandata relictis  
Militibus quo convenient, quæ signa sequantur,  
Quemve petant portum, permittens omnia fatis,  
Fortunæque suæ fidens. Cur, Cæsar inique,  
Non pudet in minimis toties instare favori  
Fortunæ, & toties casus tentare per omnes?  
Non tibi sat visum est, bello quod semper aperto  
Res agit illa tuas, & tantos conficit hostes  
Cum plena pugnas acie, sine milite ni te  
Protegat, & tua prospiciens temeraria cœpta  
Dirigat in melius, Ducis objectumque periclis  
Privatis toties redimat caput? An tibi parvum est  
Effugisse Phari insidias, parvaque carina  
Nocturni tutum vicisse pericula ponti?  
Cur Divæ, imperium tibi quæ promiserit orbis,  
Casibus exiguis pretiosum absumis amorem?  
Postquam Adrumeti frustra corrumpere fidum  
Confidium, qui Scipiadæ servaverat urbem  
Præsidium, Cæsar tentaverat, ordine certo,

Instructaque redit legione, nec urbe potiri,  
 Sed tuto remeare cupit. Sed vix fuga tanto  
 Induperatori concessa est tuta; frequentes  
 Confidii erumpunt equites, atque agmina turbant.  
 Summaque Ductoris laus est, & Cæsare digna  
 Rhuspina salvis potuisse redire catervis.  
 Sola urbes inter Libycas jam Cæsarianæ  
 Perfugium tenui restat Rhuspina cohorti.  
 Hinc iterum Ductor fatis egressus eisdem  
 Dum cepit Leptim, & firmavit robore, pæne  
 Amisit rursus reditum. Labienus in armis  
 Acer erat, validisque vias præcluserat omnes  
 Insidiis. Virtute opus est, & Cæsare toto.  
 Fortunaque ejus summa jam tempus egebat.  
 Et vicere viri virtus, fortunaque. Visæ  
 Tempore sunt apto insidiæ; victorque cruento  
 Perque viros, perque arma, viam mucrone recludit;  
 Bisque fugam Cæsar solam vincendo paravit.

Dum prope signa Ducum vidit Rhuspina duorum,  
 Infestasque Aquilas, Uticæ Pompejus agebat.  
 Hanc Cato præsidiis tenuit; cum sic Cato sanctus  
 Alloquitur juvenem, & dictis castigat amicus.  
 „Surge animis, Pompei, magnum patris assere nomen,  
 „Et generis fatum tanti. Scrutare remotos  
 „Terrarum tractus, per regnaque dissita quære  
 „Quantus erat fama genitor, quantasque reliquit  
 „Nominis hæredi solo vel nomine vires.

„Pompeji nato gladios quæ terra negabit?  
„Quæ tibi non classes (armis pacata paternis)  
„Æquora præbebunt? Hostis te viribus æquum  
„Tanta facit fama, & mundo venerabile nomen.  
„Si libet occiduos Orbis tentare recessus,  
„Hispanosque armare truces, tua signa sequetur  
„Cantaber, & Cæcis sociatus nomen Iberus;  
„Et tota Herculeis pubes a Gadibus, altos  
„Ad Pyrenæos, extremaque litora mundi.  
„Si nihil omnino patriæ miseranda moveret  
„Afflictæ facies, si nil moritura moveret  
„Libertas, possesque hilaris servire tyranno:  
„Te privata tamen facerent mala Cæsaris hostem.  
„Si pater arma tuus pro libertate gerebat,  
„Nullus in Emathiis plus, quam tu, perdidit arvis:  
„Sed sibi si genitor campo pugnavit in illo,  
„Multo sunt tua damna illic majora, tibique  
„Abstulit imperium victoria Cæsaris orbis.  
„Sed bona, quæ moriens Genitor tibi vera reliquit  
„Sunt vitæ exemplum, & gestarum imitatio rerum.  
„Hæc tibi perpetuo, quæ non invisâ potestas  
„Cæsaris, aut fortuna potest auferre, manebunt.  
„Labentem patriam teneris suscepit ab annis,  
„Nullus adhuc titulis, nulloque insignis honore:  
„Nec vires habuit nisi quas virtute paravit.  
„Quantos ille Duces juvenili ardore subegit,  
„Cum Marii mœstam lacerasset factio Romam,

„Et miseram assiduè implesset cædibus urbem!  
 „Quot tum pro patria felicia bella peregit!  
 „Illius auspiciis audax est Carbo peremptus,  
 „Et cecidit terris Sertorius exul Iberis,  
 „Præclarum Libyco (dignus tunc nomine Magni)  
 „Duxit (adhuc Romanus Eques) de Rege triumphum.  
 „Hæc fecit; nondumque tuos excesserat annos.  
 „Sed tu cur Libycis resides privatus in oris?  
 „Unius auxilium dextræ præstare valebis  
 „Hic tantum patriæ. Procul hinc tu collige vires,  
 „Et libertati Ductor succurre cadenti:  
 „Vel dignam tantis natalibus oppete mortem.“  
 Nil contra juvenis; sed tanquam Roma Catonis  
 Ex ore admoveat, promantve oracula vocem;  
 Obsequitur citius dicto, & dans carbasa ventis  
 Digreditur Libycis nunquam rediturus ab oris;  
 Ut cadat Europa magnus, Ductorque per agros  
 Tot ferat Hispanos Romanæ vulnera gentis,  
 Quot prima Emathiis victoria Cæsaris arvis,  
 Proxima vel faciet Libycis. Nimis invida quanquam  
 Nobilis, o Pompei, longe tibi fata negarunt  
 (Quæ patri dederant) felicia tempora vitæ:  
 Morte tamen patrem æquabis, magnaue ruina,  
 Nec fera fatalem vincet Pharsalia Mundam.  
 Sicaniis Cæsar vires jam nactus ab oris  
 Protinus Uzzitæ excelsum prope mœnia montem  
 Occupat. Huc ducunt collatis undique signis

Rex Juba Scipiadesque suas ad prælia turmas.  
Conspectu Uzzitæ bellum jam constitit omne.  
Scipio detrectat pugnam: nec dulcia tantis  
Uzzitæ fato damnantur cladibus arva:  
Quamvis ter Cæsar certaminis acer amore  
Instruit armatas acies, ter provocat hostes.  
Sed nullam pugnæ cum spem superesse videbat,  
Destituit rursus montem; & læto omine Thapsi  
Nocte iter emensus, fatalia venit in arva.  
Illic Vergilius valido castella tenebat  
Milite, Scipiadæ fidus, causæque Senatus.  
Scipiadæ, Regisque Jubæ vexilla sequuntur  
Ad Thapsum, quamvis cladis præsaga futuræ  
Æthera non cessant dare signa minacia. Lumen  
Horridius tenebris præbebant fulgura. Stellæ  
Insolitæ visæ; intonuit sine nubibus aer:  
Et fragor armorum nocturnas terruit auras.  
Ærata mœstus manavit casside sudor:  
Et dura attonitis ardebant pila manipulis.  
Vix poterant infausta examine tecta revelti  
Signa solo: noctu Libycorum audita leonum  
Murmura sæva. Solum Thapsi, montesque moveri  
Cœliferumque Atlanta putant. Non læta videtur  
Ulla avis; infaustus bubo, nocturnaque, castris.  
Strix queritur. Nec cum Superi mortalibus ista  
Prodigia ostendunt, clades vitare futuras,  
Sed tantum trepidare docent. Feralia Thapsi

Scipiadae peritura acies jam venit in arva,  
Quæ tot damnassent crudelia fata ruinis.

Æquore, quo Siculis Libye disjungitur oris,  
Alluitur longo tractu peninsula Thapsus.  
Qua spectat Borean: adversa parte palude  
Cingitur: in medio est aditus terrestris ad urbem.  
Hanc isthmon quamvis non late extenditur, altum  
Dividit in medio stagnum, binasque relinquit  
Angustas utrinque vias. Hæc Cæsar ad ora  
Exteriora isthmi pervenerat agmine læto,  
Castraque munierat vallis fossaque profunda  
Qua Thapsum spectant: ne forsán terga suorum  
In pugna opprimerent hostes ex urbe ruentes.

Sed fauces pæne angustas obsederat isthmi  
Scipio: Cæsareis adversaque castra locasset  
Magnum opus intendens, si non cita pugna daretur,  
Aggeribus structis, ductaque ad litora fossa,  
Deceptos illis includere faucibus hostes.  
Sed cœptum celare suum, vel ferre paratus  
Incursum belli, pulchro instruit ordine turmas.  
Romanas medio legiones ipse gubernat;  
Tot varias dextro gentes sua signa secutas  
Rex Juba ducebat cornu; lævumque tenebat  
In Libycis Varus, Gallis Labienus in armis  
Teutonicisque ferox; alarum frontibus, altis  
Aggeribus bello similes stabant elephantes.  
His juncti Getuli equites, Numidæque steterunt.

Pone feras varix gentes levia arma gerebant,  
 Armati jaculis Mauri, pharetrisque veneno  
 Illita gestabant scelerati spicula Mibæ.  
 Cæsaris at postquam instructam procedere vidit  
 Scipiades aciem, clara sic voce cohortes  
 Incitat: „Oh Romana manus, spes sola Senatus,  
 „Et patriæ tutela, animis si robora posset  
 „Addere Ductoris facundia, quanta diserto  
 „Argumenta darent miseræ tot vulnere Romæ;  
 „Viribus extinctæ leges, venerandaque jura,  
 „Ipsaque libertas armis oppressa nefandis?  
 „Si patriæ clades, si publica damna movere  
 „Nil poterant mentes, cui non Pharsalia luctus  
 „Exhūbuit proprios, privataque funera? Quis non  
 „Aut fratres illic, aut natos mceret ademptos?  
 „Jam nunc ultrices spectant tot pignora dextas,  
 „Tot cari Manes. Tanto hic nos justius arma  
 „Induimus quam Thessalicis Pompejus in arvis,  
 „Quanto Thessalicis augentur crimina campis  
 „Cæsaris. Accedent tam justæ Numina causæ.  
 „Nec, quoniam Emathia cecidit sub Cæsare Roma,  
 „Vos transisse Deos, Romanaque jura perosos  
 „Credite. Pompejo solitum Fortuna negavit  
 „Non Urbi auxilium; toties lassata triumphis  
 „Privati, verita est ne, si cecidisset in arvis  
 „Emathiis Cæsar, deceptus crederet Orbis  
 „Non Romæ sed Pompejo donasse triumphum,

„Privatique fuisse Deam. Non amplius Urbem  
 „Destituet. Fortuna suam, fatisque nefandi  
 „Cæsaris Ausoniæ sacras succumbere leges  
 „Imperiumque sinet. Non sunt hæc signa Deorum  
 „Iratum Urbi (si me non omina fallunt)  
 „Ductorem vobis Libyco pugnantibus orbe  
 „Quod dant Scipiadem. Felicia nominis hujus  
 „Fata hic, aut Afros non est memorare necesse  
 „(Quos non ulla potest regio nescire) triumphos.  
 „Talia fas nobis sperare est; non minor armat  
 „Nos pietas. Latii nec nominis Annibal hostis  
 „Cæsare deterior. Patriæ junxere salutem  
 „Cum vestra Superi. Manibus reddetur eisdem  
 „Roma sibi & vobis. Virtute accersite fatum.  
 „Communi proprios cum libertate Penates,  
 „Conjugia atque domos istis conquirite campis.  
 Militis erigitur virtus, animosa cohortes  
 Ira subit Latias, pugnaeque accendit amore.  
 Nec minus interea vario clamore fremebat  
 Dissona turba Jubæ, & belli undique signa petebat.  
 „Cæsar, ut optatum Dis advenisse secundis  
 Pugnandi vidit tempus, sic voce cohortes  
 Incitat audaces: „Dextris victricibus iste  
 „Ultimus en sudor, qui tot mercede labores  
 „Pensabit digna, qui tot livore negatos  
 „Hactenus, & magna meritos virtute triumphos  
 „Asseret. Ista dies quascunque aut Gallia laurus,  
 „Aut



„Aut Rheni gentes, aut victa Britannia debent  
„Virtuti dudum vestræ, nuperve subactæ  
„Promittunt gentes, invitis hostibus, omnes  
„Invito livore dabit: longeque triumphum  
„Majorem de rege Juba victoribus addet.  
„Nec dubitare mihi fas est; fallentia nunquam  
„Signa, truces oculos video, vultusque minaces.  
„Victores novisse suos, fragmenta ruinæ  
„Emathiæ discant.“ Dixisset plura; repente  
Cum fera de dextro cecinerunt classica cornu,  
Prosiliuntque acres (nec eas retinere Tribunus  
Centuriove potest) ad prælia sponte catervæ.  
Non inhibet Cæsar, sed laxat fræna furori.  
Carcere sic pronus nimium ad certamina currus  
Cum forte erumpit, lorisque auriga retentis  
Frustra inhibere studet, tandem dat victus habenas.

Utraque jam tanto concurrunt agmina motu,  
Quanto (si longæ flexum natura Malææ  
Donaret nautis) adversis bina coirent  
Æquora gurgitibus. Pulsat fragor æthera, montes  
Undique vicini excipiunt, resonantque furentes  
Pugnantum voces. Siculas it clamor ad oras.  
Huncque reperiunt Libeja saxa, timentque  
Vel sonitum belli terra retinere quieta.  
Non ita pinifero Boreas cum Thræcius Ossæ  
Incubuit, resonant quassatæ turbine silvæ;  
Murmure nec tanto Nilus, cum de Cataractis

Præcipitat duris illisas cautibus undas  
Astra lavans, surdas habitantibus obstruit aures.  
Scipiadæ dulcis stimulat vindicta catervas:  
Cæsareas ingens premit indignatio turmas,  
Quod nova defuncto succedant prælia Magno:  
Inventusque alius Ductor civilibus armis.  
Sanguine merguntur campi, vicinaque multo  
Tincta cruore palus; & quod tot vulnera rubrum  
Emittunt flumen, fœcundam putria terræ  
Alligat in glebam, & steriles connectit arenas.  
Inter utramque aciem volitat feralis Enyo,  
Lampada funestam quatiens. Reseraverat antrum  
Tartareus Rector pallens, utque arma nefanda  
Spectarent, caperentque sui solatia fati,  
Invisas illuc Libyes emiserat umbras.  
Undique consedere arvis, nigraque corona  
Infecere diem, versatilis umbra Jugurthæ,  
Annibalis sævi Manes, captique Syphacis:  
Qui nunc eversas secum Carthaginis arces  
Ignovere Deis, postquam feralia campi  
Prælia Thapsiaci, & Latios videre furores.  
Sed tamen Ausoniæ civilia vulnera dextræ  
Afra luet tellus, & plus vastabitur, ætas  
Proxima quam reparare potest. Inarata jacebunt  
Arva, ruentque suis vacuatæ civibus urbes.  
Quæque viri coluere, feræ nunc rura tenebunt.  
Qua Reges olim per gentes jura dederunt,

Tigris erit, pardusque, & habebunt regna leones.  
Innocuus vivet serpens, & nulla, venenis  
Dum deerunt homines, pestis censebitur Orbi.

Cæsareis leviter percussi pectora telis  
In sua conversis elephantés agmina frænis  
Præcipites rabie currunt. Tum robore densos  
Indomito turbant cuneos, atque agmina Regis  
Prosternunt confusa Jubæ. Nil arte valebant  
Rectores miseri, nil vi; Fortuna regebat  
Sola feras, contraque suos pro Cæsare misit.  
Illi hostes, illi socii, dum nemo gubernat,  
Quos Fortuna facit. Vicinum elephantibus agmen  
Getuli, Numidæ equites crudeliter illic  
Calcabantur humi. Vasta pars mole ferarum  
Contrita est; fossas pars præcipitatur in altas.  
Tunc infelices tutela orbati elephantum  
Tot Libyæ populi, & gentes levia arma gerentes  
Cæduntur cumulis passim, jugulisque fatigant  
Cæsareos solis; nec stantes amplius hosti  
Hic bellum sed præda manent. Hastilibus igne  
Duratis quid Bamuræ jam nuda Juventus?  
Quid levibus contra Romanos cominus hostes  
Autololes jaculis? nil illis ignea plantæ  
Vis prodest, cursusque levi velocior aura.  
Non bene Cyniphiis hirsuti tegmina capri  
Pectora defendunt. Vix contra Cæsaris enses  
Æs ferrumque valent. Implentur sanguine fossæ,

Mœsta madet tellus, & de tot gentibus unus  
Purpureus cæsis infecit pascua torrens.  
Non Juba per mortes hominum, privataque fata,  
Sed gentes pariter cæsas, populosque jacentes  
Metitur quantis pereunt sibi regna ruinis.  
Nec sua post tantam cladem munita putavit  
Castra satis, miseram victis præstare salutem;  
Sed cum Petrejo fugiens tentoria cunctis  
Splendida divitiis hosti permisit avaro.  
Quæ cito Cæsarei victorum terga sequentes  
Diripiunt, opibusque Jubæ, tantisque potiti  
Bellorum exuviis operum mercede, priusquam  
Sanguinolenta fuit victoria plena, fruuntur.

Sed non tam celeri bellum pro Cæsare cursu,  
Qua Latiis stabat vallatus Scipio turmis  
Atque pares fulsere Aquilæ, Fortuna peregit.  
Hic incerta diu varii stetit alea belli:  
Hic hæsit fatum, & dubiis victoria pennis  
Inter utrumque agmen visa est volitare; repellit  
Viribus hæc acies vires; alternaque dextras  
Crimina civiles fœdant; dum maxima regnant  
Hic odia, hic cædes; animos in prælia tanquam  
Causa mala augeret; tantoque ardentior ira  
Quo scelerata magis dubitant ostendere fata  
Quid tandem Romæ fortunave Cæsaris esset.  
Ex acie tandem Libycæ fugere cohortes  
Quæ duce sub Varo steterant; dare terga coactus

Dux simul; & tu Gallorum, Labiene, tuorum  
Corpora cæsa videns, Thapsi funesta relinquis  
Arva gemens; aliis demum civilibus armis,  
Romanisque iterum servate furoribus, arvo  
Pars Latix cladis Mundano magna jacebis.  
Nec fato occumbes (acerrime Cæsaris hostis)  
Dum potis est certare suo cum Cæsare Roma.

Scipio ut adversas videt increbescere vires,  
Cedentesque suas, nec jam reparabile bellum,  
Fluctuat ancipiti divisus pectora cura;  
Ingerat an medios sese moriturus in hostes,  
Ut populi caput Hesperii, Ductorque Senatus  
Summo in honore cadat felix, Stygiasque per undas  
Maxima Romani descendat nominis umbra:  
An speraret adhuc, atque ultra fidere fati  
Ausoniis, tantoque velit superesse dolori.  
Decepit tandem fiducia vana futuri  
Successus miserum, pulchrumque excussit amorem  
Mortis: ut Emathia, caput oblatura superbo  
Victori, Magnum spes dira fefellerat olim.  
Hos animo casus volventem concitus aufert  
Scipiadem ex acie sonipes; cum territa passim  
Agmina cæperunt toto discurrere campo;  
Cedentesque equites tutas petiere latebras  
Montibus Uzzitæ: peditum pars magna petebat  
Castra Jubæ, si forte brevem præstare salutem  
Defessis alti poterant munimina valli.

Sed postquam se deceptos, & castra cruentis  
Cæsareis possessa vident, tum tela cohortes  
Viſtæ projiciunt, & inermia brachia tendunt.  
Sed nihil (oh rabies civilis dira furoris)  
Profuit heu miseris submissio. Cæde nefanda  
Sternuntur, quamvis gladios inhibere suorum  
Contendit Cæsar frustra, & clamore furentes  
Increpuit magno: „ Cives nunc esse memento,  
„ Non hostes, miles; partum virtute triumphum  
„ Cur feritate nova maculas? hæc sanguine sero  
„ Quam paris invidia est plus quam victoria nobis. „  
Sæpius hæc mœstus clamat; pars nullaque belli  
Civilis tum Cæsar erat. Sed perdere cives  
Quæ toties poterant, non jam servare valebant  
Jussa Ducis. Jugulant miseranda cæde cohortes  
Scipiadæ, stricisque odium mucronibus explent  
Invito Duce Cæsarei. Et qui jussa per annos  
Tot Ducis implessent magni crudelia semper,  
Nunc solum, cum justa dedit mandata, rebellant.  
Jam vero ingentem pro Cæsare fata ruïnā  
Sparsissent campis, & tecta cadavere tota  
Planities funesta jacet. Tandemque sequendo  
Defessas Cæsar revocans ad signa cohortes,  
Prospera divitiis Regum certamina donat.





## LIBER QUARTUS.

### ARGUMENTUM.

*Juba & Petrejus se mutuis vulneribus interficiunt.  
Scipionis & Catonis fata describuntur.*

**N**ON funesta tamen clades quas fecerat omnes  
Terra capit Thapsi; tantæve jacere ruinæ  
Angusto potuere loco. Quot fata per oras  
Thapsiacæ spargent ingentia vulnera pugnæ,  
Ne non diversis famam regionibus olim  
Funera tantorum faciant divisa virorum!

Rex Juba Petrejo & paucis comitantibus urbem  
Ad Zamam imperii sedem, qua pignora cara  
Uxoresque suas, gazasque reliquerat omnes,  
Advenit infelix. Sed jam clausere rebelles  
Zamenses Regi portas, victoque negarunt  
Introitus, odium sævi crudele tyranni  
Ausu fortuna tandem pereunte fateri.  
Nil precibus, mixtisve minis, vultave moventur.  
Perdita majestas victo; penditque prioris  
Jam Juba sævitæ pœnas. Oh sera tyranni  
Cognitio! dum regna manent, se nescit amatum.

Invisumve suis. Affectus sola latentes  
Servorum pandit Fortuna adversa: sed illa,  
Quæ post regna venit, cui nulla potentia juncta est,  
Cognitio torquet miseros; nec reddere grates,  
Nec licet ulcisci. Seros (& non nisi tantum  
Ut doleant) oculos aperit Fortuna tyrannis.

Exclusi rapido fugiunt per devia cursu,  
Et Villam, paucis equitum stipantibus, intrant  
Rex Juba Petrejusque simul. Tum fessa quiete  
Corpora componunt stratis, ægrosque per omnes  
Devolvunt animos casus, solamina donec  
Ultima lassatis ingens audacia præbet.  
Continuo instaurant epulas, plenisque Lyæo  
Discumbunt mensis. Postquam compressus edendi  
Est amor; intrepido tandem sic inchoat ore,  
Petrejumque toris Juba Rex affatur ab altis:  
„En Romane vides quo nos Fortuna redegit:  
„Sola relicta salus clementia Cæsaris; at non  
„Nos duo tam fuimus temnendi Cæsaris hostes,  
„Adversusve illum tam innoxia gessimus arma,  
„Ut veniam liceat salvo sperare pudore,  
„Oblatave frui. Quæ non dant arma salutem,  
„Dent libertatem nobis. Me certa manebit  
„Libertas ferro; nec dignam credere vitam  
„Hanc possum votis, ut supplice Rege superbus  
„Intumeat Cæsar; nec quem vidisset honore  
„In summo forsán (si vel Pompejus in arvis



„Thessalicis olim, vel nostris Scipio terris  
„Vicisset) me jam captivum Roma videbit,  
„Regia præbentem ridenda Quiritibus ora  
„Ante triumphantes currus, ut victa Syphacis  
„Atque catenati traxerunt colla Jugurthæ.  
„Nec Juba ridendum, nec erit miserabile nomen  
„Cæsareis. Non corda mihi, non tela, manusve  
„Ad letum desunt: sed te, Petreje, supremæ  
„Participem facio famæ, mortisque decoræ.  
„Causa reos eadem junxit, fortunaque victos;  
„Nunc eadem virtus morientes jungat utrosque.  
„Stringe ensem, & mecum pariter nunc utere dextra.  
„Quæramus pulchram per mutua vulnera mortem,  
„Et libertatem citius quis donet amico  
„Contendat feralis Amor“. Petrejus ense  
Sic breviter stricto: „Libycorum maxime Regum,  
„Cujus honoratum per sæcula nomen habebit  
„Ausonia, hanc laudem cui me debere fatebor,  
„(Nec pudet Hesperium Ductorem discere, tanto  
„Rege docente, mori) Latius gaudebit honore  
„Hoc Genius, ne te captivum Roma videret,  
„Quem libertates nostras legesque tuentem  
„Laudavit toties, sociique infamia Regis  
„Cæsaris injustos posset decorare triumphos.  
„Roma Jubæ, sicut Masinissæ, nomen amabit;  
„Nec meliore nota signabit Cæsaris acta  
„Quam Catilinæ olim, & diri consulta Cethegi.“

Dixerat, & totis concurrunt viribus ambo,  
Grataque dant, referuntque per ictus vulnera crebros.  
Crederet hoc quisquam, tanto conamine, tanta  
Pugnatum virtute mori, non vincere? tandem  
Petrejus cecidit. „Retine, Petreje, parumper  
„Festinantem animam, clamat Juba, dum comes umbræ  
„„Umbra tuæ hoc gladio ad Stygias demittitur undas.  
„Quis regni posthac confidet viribus? aut quem  
„Gloria decipiet sceptri, soliive superbi  
„Lubrica majestas? Cunctis desertus ad umbras  
„Nudus eo, nuper Libyco Juba maximus orbe.  
„At vobis, populi infidi, & tibi, Zama rebellis,  
„Sit Latium precor usque jugum grave, perfidiamque  
„Hanc vestram domino domino pejore luatis“.  
Tunc iterum gladio pectus ferit; evolat acer  
Spiritus, æternæque oculos clausere tenebræ.

Ecce alios luctus, aliudque per æquora funus  
Nobile Thapsiacis Fortuna vehebat ab arvis.  
Scipio Dux belli tanta de clade superstes  
Non dedignatus parva tentare carina  
Et sola Libycum pelagus, properabat ad oras  
Hispanas, ubi Pompeji civilia cogunt  
Rursus in arma viros; sed tempestate repulsus  
In portum Hipponis vehitur. Se Scipio sentit  
Cum nave amissum; nec portum evadere vento  
Opposito licuit. Clara tum voce dolorem  
Testatus clamat: „Pelagusque ipsæque Procellæ,

„Et conjurati pugnant pro Cæsare venti.  
„Oh utinam Thapso cecidissem; strage virorum  
„Mixtus; nec tanto placuisset vita superstes  
„Imperio, (Ductor summo Romanus honore  
„Ad Stygias venissem undas,) aut ante tulisset  
„Hanc male servatam potius Pharsalia vitam,  
„Quam Thapso infelix duxissem bella Senatus,  
„Ultaque Scipiadem vidisses Africa victum.  
„Vos claræ majorum animæ, quos Africa sensit  
„Sæpe triumphantes, ut cum Carthaginis altæ  
„Excidio, captusque Syphax, claraque fugatus  
„Annibal ex acie testantur, fata Nepotis  
„Ne pudeat vestri, miserandaque bella videre.  
„Nam neque me Libye vicit: sed viribus ipsa  
„Scipiadem, seseque suis hic Roma subegit.  
„Cum patria a patria vincor moriorque cadente  
„Libertate libens. Misère hunc Numina ventum  
„Adversum, ut morerer; ne spe delusus inani  
„Optarem forsan tanto superesse dolori.  
„Hispanas iterum Romana ad prælia gentes  
„Pompeji cogant juvenes, legesque requirant,  
„Et libertates: mea nunc fortuna peracta est.  
„Et quanquam hæc armata manus testabitur orbi  
„Me terra potuisse mori: placet æquore mergi,  
„Ignotumque illic funus per sæcla manere.  
„Oh nunquam veniat fluitans ad litora truncus,  
„Ne Libyca condatur humo; victique futuris

„Scipiadæ ostendent monumenta nepotibus Afri!“  
Tunc latus ense fodit, nec eo contentus in æquor  
Prosilit; emissi spargit pars transtra carinæ  
Sanguinis: æquoreos tingit pars altera fluctus;  
Migrantique animæ fatum non sufficit unum.  
Demersum monstris jacet, cheu! præda marinis  
Nobile Scipiadæ corpus, nec colliget urna  
Flebilis hos cineres; nec tanto nomine dignas  
Exequias tibi Roma dabit; passivæ capillis  
Scipiadem; extremum generis, lugebit ademptum.

Agmina de campis passim fugientia cunctas  
Implessent magnis Libyæ terroribus oras.  
Præditiis tum forte Uticam Cato nobilis urbem  
Ausoniis tenuit: qui nota clade Senatus  
Scipiadæque fuga, victorem arcere parabat,  
Hortaturque suos alacer defendere muros.  
Sed frustra: heu nimium trepidantia pectora sensit!  
Et victum fama non visi Cæsaris agmen.  
Tum Cato militibus vultu immutatus eodem  
Ignovit pavidis. Ultro fugientibus ipse  
Prospexit, classes portu contraxit ab omni  
Vicino, remosque dedit properantibus aptos.  
Cunctorumque, suam quamvis projecerat ipse,  
Non dedignatur Ductor curare salutem.  
Solatus cives Uticæ, & trepidantia verbis  
Pectora confirmans placidis, quam certa supersit  
Spes illis veniæ, victis clementia quanta

Cæsaris, edocuit. Talis cupit ipse videri  
Civibus, ut qui non donatam a Cæsare vitam  
Sperneret. Illum etiam, cui non durissima virtus  
Affectus celare suos permiserat unquam,  
Quem nullus simulare timor docuisset, aperto  
Vel deflexisset rigidi de tramite veri,  
Tandem mortis amor cogit simulare Catonem.

Orbarant homines jam luce silentia noctis  
Inque vicem fessis donarant regna quietem;  
Cum gratos cuncti, quos cura dolorque sinebant,  
Carpebant somnos: sed non tranquilla Catonem  
Exemit virtus curis mortalibus, alto  
Ut jaceat somno oppressus: sed libera mentis  
Erigat ut se vis, contempleturque futura  
Sæcula, & æternos vitæ immortalis honores.

Ante tamen contemplatrix quam dogmata veræ  
Scrutari possit Sophiæ, moralibus apte  
Præceptis purganda anima est; prius ejiciendi  
Affectus pravi, cunctæque e pectore sordes,  
Ira nocens, & luxuries, & fœda libido.  
Hos igitur motus animi (purgantia sicut  
Corporis humores prave medicamina tollunt)  
Moralis plene educat Medicina, priusquam  
Divinum, summumque bonum scrutarier ausa  
Sit contemplando, ne densis pressa tenebris  
Mens erret cæca, & vitiis decepta fatiscat.  
Sic longa virtute fuit mens sancta Catonis

Purgata; atque illi vitæ immortalis honorem  
Jam contemplanti divini fata Platonis  
Phædonem tradunt; cum lætus talia fatur:  
„Salve sancte liber Superis demisse Catoni;  
„Dirige tu cursum, vitæque extrema meantis  
„Instrue; non alium moriturus quæro magistrum;  
„Nec restare alias voluerunt Numina curas.  
„Jamque mori certo liceat mihi discere, quid sit  
„Mors, quid vita fuit, quid erit; num nulla futura est;  
„An vivant animæ post funera: præmia justis  
„Quæ restent: quæ sacrilegos vindicta manebit“.

Dum contemplatur, mentis se libera tollit  
Nec turbata acies, abstractaque corpore vires  
Exercere suas contendit pura facultas.  
Tunc volitans excelsa petit, nimiumque remotæ  
A terris, quo non oculi, non organa sensus  
Corporei penetrare valent, fulgentia cœli  
Corpora scrutatur; nec eis contenta, requirit  
Splendoris fontem cuncti, lucisque beatum  
Principium, æternique Dei vestigia adorat.  
Hæc magis atque magis cœlestia discere tentat  
Contemplans anima: at cæcis obducta tenebris,  
Et depressa gravi connexu corporis, ipsa  
Se non posse videre videt. Solatia sola hæc,  
Quod meliore frui post mortem lumine sperat.  
Immortalem animam spes hæc probat: aut tibi frustra  
Spem dedit omnipotens: frustra te jussit amare

Quæ nunquam poteris cognoscere: cur sapientes  
Dum terris vivunt spernunt terrena, nec aurum,  
Regna, voluptates quærunt, quæ sola videntur  
Splendida: sed quæ non cernunt cœlestia tantum  
Depereunt, si non cœlestia gaudia tandem  
Exciperent? Sed non illuc ascendere possunt  
Corpora, quæ gravia, & terrenis mixta creantur  
Principiis, in quæ tandem resoluta redibunt,  
In terramque cadent. Animæ est cœlestis origo,  
Igneus atque vigor, substantia pura, suique  
In toto similis; variis nec partibus illa  
Composita est; ideo nullo dissolvitur ævo;  
Sed sibi corporeo laxata a carcere vivit.  
Felices posthac animæ, quas corpora nullis  
Fœdarunt vitiis, nullaque libidine mersas  
Detinuere olim, quæ, dum sub carne latebant,  
Contemplatrices abstractæ a carne volarant  
Sæpius ad cœlos, cœlis post fata quibuscum  
Fœdera sanxerunt viventes sacra, locantur,  
Æternaque illic lætantes luce fruuntur:  
At tenebrôsæ animæ, nimium quæ carnibus olim  
Demersæ jacuere suis, queis tetra libido  
Atque voluptates, solum quas sensus alebat,  
In terris notæ, posthac de carne solutæ  
Aspectum cœli, cum quo commercia nulla  
Viventes habuere, timent, nec luce fruuntur:  
Sed tenebris dilecta nimis prope corpora semper

Ferales errant umbræ, mœstæque sepulcra  
Bustaque fœda colunt. Hinc noctu spectra videntur,  
Quæ terrent homines, animæ sunt ista malorum,  
Quæ, quoniam crassæ sunt, corporeæque, videntur.  
„Quam diversæ (inquit) restant post funera sortes!  
„Credo equidem, divine Plato, te dogmata vera  
„Hæc ipsum docuisse Deum. Deus ipse sequendam  
„(Aut Natura homines ratioque innata fefellit)  
„Proposuit virtutem, & præmia debita justis.  
„Hæc, quoniam justos injusta potentia fraudat  
„Sæpius in terris, & gens humana rebellat,  
„Solvere post mortem justissimus ipse tenetur“.

Funera non metuit sapiens suprema; nec illi,  
Qui contemplando toties super astra levavit  
Carnoso abstractam penitus de carcere mentem,  
Corporis atque animæ faciens divortia tanta  
Quanta homini licuit, mors formidanda venire  
Aut ignota potest. Nam mors divortia tantum  
Plena hæc, quæ sapiens toties optasse videtur  
Et toties tentasse, facit, Superosque petenti  
Libertatem animæ claustris concedit apertis.  
Si sæpe impatiens vitam projecit amator,  
Atque manu pectus propria perfodit, ut umbra  
Defunctam Stygias sponsam sequeretur ad umbras:  
(Qua tamen haud ille conceditur orbe potiri)  
Num sapientum animæ summi quæ gaudia cœli  
Depereunt, verique boni capiuntur amore,

Quo



Quo nequeunt in carne frui, de carcere tandem  
Corporeo solvi, claustrisque exire recusent,  
Cum Deus ipse fores aperit, licitamque meanti  
Dat Natura viam? At donec Deus ille creator,  
Qui terrena animam primo statione locavit,  
Evocet, haud illa statione excedere fas est.

Hic dubitans hæsit paulum Cato. „Non datur ergo  
„Sponte mori victis (inquit); nec obire Catoni  
„Dum dabit injustus victor mandata, licebit?  
„Cæsaris expectem gladios, atque in caput istud  
„Jus illi agnoscam, Superi? Dominumque fatebor  
„Esse meum, quem Roma suum decreverat hostem,  
„Quemque ego damnaram? Num justam injusta dederunt  
„Bella potestatem? Non sic, oh Numina certe  
„Humanas placuit vobis confundere leges,  
„Et dare jus sceleris. Sed si non sponte Catoni  
„Projicere hanc lucem fas est, at crimine vitam  
„Grandius est retinere nefas. Quam grande putarem  
„Esse nefas nobis, turpem producere vitam  
„Cæsaris imperiis, & regna injusta probare!  
„Quam Romæ damnosa forent exempla Catonis!  
„Pompeji juvenes, qui nunc ad prælia gentes  
„Hispanas armant, patriæque impendere vitas  
„Non dubitant, justæ posthac non credere causæ,  
„Sed pulchris fortasse volent desistere cœptis,  
„Nec libertatem per tanta pericula, per tot  
„Ærumnas quærent, cum nobis regna probeantur,

„Et non displiceat duro servire Catoni.  
„Ah potius fragilem hanc sit fas abrumpere vitam,  
„Quam te, Libertas, violem. Sed Numina si te  
„Nunc tandem jussere mori, tua funera saltem  
„Prosequar, & Stygias liber comitabor ad umbras.  
„Non ultra dubitare licet“. Tunc pectora dextra  
Nuda ferit, moriensque cadit; morientis ad ictum  
Undique concurrunt famuli; labentia tollunt  
Membra viri, vulnus refovent; mortique quietem  
Eripiunt tantum, dum, quam projecerat ipse  
Tanto animo, heu frustra, contendunt reddere vitam,  
Impatiens lucis propria Cato vulnera dextra  
Dilacerat: mortemque docet non posse negari.

Cæsar Thapsiaca victor de clade reversus  
Tendit Adrumetum, cum jam victoria passim  
Securum præstabat iter. Non arma, nec ullæ  
Insidiæ clausere vias. Ignoscit ubique  
Supplicibus: cum nulla videt restare pericla,  
Tutaque fortuna facta est clementia tanta.  
Inde Uticam advenit Cæsar, fatoque Catonis  
Audito ingemuit; questusque, „Oh invidè, dixit,  
„Cur odio moreris nostri? vitamque relinquis  
„Ne non Cæsareæ bonitati injuria fiat?  
„Heu tibi crudelis nimium moriendo fuisti,  
„Ut moriendo mihi posses crudelior esse:  
„Durior interitu, quam vita armisque fuisti,  
„Hostis es; atque odium nostri, quod sanguine nostro

„Non potuisti unquam, voluisti sanguine saltem  
 „Nunc satiare tuo, teque ipsum impendere damno  
 „Cæsaris. Evitas nostrum; crudelis, amorem,  
 „Ut luctum facias. Mihi quid clementia prodest,  
 „Cui non Romani dubitant præponere mortem?  
 „Infelix Magnus sese committere fraudi  
 „Barbaricæ potius quam nostro elegit amor.  
 „Sed tamen ille suas sperans reparare ruinas  
 „Auxilium infido, non mortem, a Rege petivit,  
 „Quam tamen invitus subiit. Tu sponte peristi  
 „Invidiam facture mihi. Sed detrahet illam  
 „Invidiam, & spes injustas clementia vincet.  
 „Deflebo funus, natumque amplectar honore;  
 „Nec me crudelem victo fore sentiet Orbis“.

Dans veniam Cæsar timidis Uticensibus, agmen  
 Defessum reficit, paulumque moratus in urbe  
 Munimenta videns, circumspicit undique latam  
 Planitiem. Prope silva stetit (regionibus illis  
 Rara nimis) non ampla tamen, quam lentus alebat  
 Bagrada, qui siccas illic connectit arenas.  
 Horrida silva fuit, conjunctis aera ramis  
 Obscurum & tristes exclusis Solibus umbras  
 Complectens: nemus hoc ingressus Cæsar opacum,  
 Antrum immane videt nigro squalore repletum,  
 Et marcente situ, quem nox ibi longa creasset,  
 Infecit gravidas erumpens halitus auras.  
 Attonito terrore loci, tandemque roganti

Rem notam populis astans Libys incola narrat.

- „Hæc, Cæsar, multos jam non habitata per annos  
 „Antra immensa olim monstrum exitiale tenebat,  
 „Pestis, & ira Deûm, serpens cui sæcula nulla  
 „Produxere parem terris; non tanta palude  
 „Lernæa tumuit reparatis anguibus hydra;  
 „Nec qui poma draco custodiit aurea; nec, quem  
 „Servantem vigili Phryxæum lumine vellus  
 „Somniferis tandem domuit Medea venenis.  
 „Nec tu Phœbeis Python confixe sagittis  
 „Tantus eras, populis species incognita primis.  
 „Serpente in tanto potuisset Gorgonis omne  
 „Absumi virus; Libycis nec majus arenis  
 „Hoc monstro, semen si defluxisset in unum,  
 „Pestiferæ tabes generasset tota Medusæ.  
 „Tam longum sese (centum porrectus in ulnas,  
 „Quippe fuit) volvit serpens per fluminis undas,  
 „Ut quoties gyris distendit terga solutis  
 „Adversa prædam potuit deprendere ripa.  
 „Sæpe illic tigris spumantes oblita rictus,  
 „Atque cruentati taurorum cæde leones  
 „Flumina dum libant, monstri conduntur in alvo.  
 „Atque utinam his tantum prædis contenta fuisset  
 „Ingluvies; periire homines, quicumque per æstum  
 „Umbrosæ fessi petierunt tegmina silvæ,  
 „Aut quicumque istos, adverso numine ducti,  
 „Advenere viri gelidos haurire liquores.

„Nam simul ac nigro serpens caput extulit antro  
 „Horrendus, totamque implerunt sibila silvam,  
 „Attonitos timor invasit; non ulla salutis  
 „Spes manibus, non ulla fuga. Deprendere prædam  
 „Distendit subito toto se corpore serpens:  
 „Sæpius in flumen, monstrum vitare nefandum,  
 „Desiluere viri; sed non præstare salutem  
 „Flumen eis potuit. Nantes correpsit in undis,  
 „Nec mergi licuit miseris, pejora manebant  
 „Fata illos, monstri obscæna conduntur in alvo.  
 „Sic impune diu silva grassatus in ista  
 „Egressus tandem est, & se ad majora paravit  
 „Quid pecudum strages, quid singula fata virorum  
 „Persequar? haud vacat hic privatas dicere clades.  
 „In populos furit; & totis cum gentibus atrox  
 „Bella gerens, ausus Romana lacessere castra est:  
 „Cum primum turmas Libyes ad litora duxit  
 „Regulas Ausonias, & in his consederat arvis,  
 „(Quis mihi de tanto credet certamine?) solus  
 „Invasit totas acies. Exercitus ille,  
 „Qui sibi promisit Libyæ, & Cæthaginiæ altæ  
 „Imperium, quem tot gentes, mundique timebat  
 „Tertia pars, uno vix se defendit ab angue.  
 „Dux capere arma jubet, nec solis ensibus illic;  
 „Aut pilis, sed balistis, quæ mœnia summa  
 „Et turres quaterent, monstro nova bella parari.  
 „Protinus insonuere tubæ; tunc erigit alte

„Se, dirumque caput serpens attollit in auras,  
„Undique despiciens campos, tantusque videtur  
„Quantus is est: geminas cœlo qui dividit Arctos.  
„Tunc asper sævit; Stygias de gutture diro  
„Exhalans nebulas, & flammea lumina torquet.  
„Squamea cum volvit sublatus terga, putares  
„Excelsum ad pugnas castellum sponte moveri.  
„Distantum longe subito se immittit in ora.  
„Hos morsu, afflatu necat hos, hos tollit in altum,  
„Ut casu interimat miseros; totasque cohortes  
„Sternit humo, latas cauda dum verrit arenas,  
„Consternuntur equi passim, frænisque rebelles  
„Invitos sævi dominos serpentis ab ira  
„Dum fugiunt campo portant. Cessere manipuli,  
„Tergaque vertissent (si fas est credere) cuncti,  
„Ni tandem valido contortum hastile lacerto,  
„Dum sese arrectu tollit, sub pectore diro ..  
„Hæsisset. Fluxit sanies de vulnere nigra.  
„Horrendum immugit tum primum vulnera passus  
„Longævus serpens, caudaque flagellat archas  
„Iratus; cuncti clamorem ad sidera tollunt,  
„Speque alacres validis mittunt per inane lacertis  
„Undique pila. Ferit pars magna innoxia tergum  
„Squamosum monstri, crepitantque sonantia tela,  
„Ut sonat æstivus salientis grandinis imber,  
„Tegmina tectorum feriens. Hastilia quædam  
„Fortunata magis maculoso vulnera ventri

„Infligunt. Solus levibus penetrabilis illi  
„Venter erat telis. Nigro humectantur arenæ  
„Sanguine serpentis; sæcundæque ante venenis  
„Gorgonea de tæbe, novo nunc semine tristes  
„Concipiunt iterum pestes, & monstra nefanda.  
„Nec minus iratus serpens, tantique doloris  
„Impatiens sævit campis, & corpora leto  
„Prosternit. Levibus necquidquam prælia pilis  
„Aut jaculis tantum tentasset miles in hostem;  
„Robore ni tandem demissa Phalarica magno  
„Immensi spinam fregisset pondere dorsi.  
„Tum fractus vires, & tanto languidus ictu  
„Decubuit. Solito non sese attollere nisu  
„Jam potuit, patulo tantum minitatur hiatu,  
„Et nebulas læsis expirat faucibus atras  
„Sic quoque letalis; tandem stridore per auras  
„Tormento volitat trabs acta, caputque nefandum  
„Discutit, & cerebro nigras dispergit arenas.  
„Horrendus tandem serpens tot jugera magno  
„Ventre premens, ipsa metuendus morte jacebat“.

Postquam oculos silvæ miracula tanta vetustæ  
Cæsaris implessent, Utica discessit ab urbe,  
Et victi per regna Jubæ victricia ducens  
Agmina, regalis famosa ad mœnia Zamæ  
Pervenit. Ducis hic Petreji animosa Jubæque  
Funera cognoscens, animo tam tristia fata,  
Fortunæque vices summæ miseratur amaras.

Tunc urbe exceptus Zamenses laudat, & illis  
Præficit imperio Crispum. Maurusia tellus  
Romula de tanto facta est provincia regno:  
Inde Uticam remeans, ventis dans carbasa, Sardon  
Appulit, atque illa paulum tellure moratus,  
Tutus ad Ausoniæ pervenit litora Cæsar.





# LIBER QUINTUS.

## ARGUMENTUM.

*Triumphus Cæsaris quatuor continuis diebus. Templum Veneri extructum. Pompeji Juvenis bellum in Hispania renovant.*

**R**omuleas arces celeri victoria fama  
 Cæsaris intrasset. Fictis certare parati  
 Obsequiis complent Phœbeja palatia Patres.  
 Atque quater denis (quamvis devicta sit ipsa  
 Illo Roma die) decernunt vota diebus.  
 Cæduntur tauri, gratoque altaria ture  
 Cuncta calent. Nec tot sunt templa ornata coronis,  
 Cum Latio audita est olim victoria felix  
 Scipiadae, & fusus Zamensibus Annibal arvis,  
 Aut cum Teutonicis intravit mœnia victor  
 Exuviis Marius. Non plus felicibus armis  
 Externisve unquam lætata es, Roma, tropæis,  
 Quam nunc amissa pro libertate triumphas.

Tum justo, meruit quem Gallia victa triumpho,  
 Dilatoque diu, jungunt decreta Senatus  
 Tres alios, veteres ut possit Cæsar honore

Obscurare Duces ; pompasque excedere cunctas ;  
 Utque triumphales utroque a cardine lauri  
 Ornarent pariter currus: Australibus illa  
 Splendida divitiis, Boreæ generosior ista.  
 Robore & exuviis: ut pictis mixta Britannis  
 Agmina Niliaca incedant: ut sole perustos  
 Mazaces albo comitentur corpore Suevi:  
 Ut Galli Armenis juncti, Maurisque Sicambri  
 Spectentur pariter populis: longeque remotæ  
 Tot possint gentes , & quas commercia nunquam  
 Junxissent, Latiis junctæ nunc ire catenis,  
 Communemque simul victæ deflere ruinam.  
 Ut cunctos pariter fontes, captivæque Tibris  
 Flumina Cæsareis videat depicta tabellis.  
 Inde catenati lugens Germania Rheni  
 Fata sui sedeat: Nilus septemfluus illic  
 Cornua fracta gemens: frænato ut gurgite Gallis  
 Inde suis Rhodanus, Mauris hinc Bagraa ploret.  
 Nec majorem ullo sese urbs Romana triumpho  
 Fortunamque suam potuisset cernere, si non  
 Ipsa triumphatæ partis pars magna fuisset.  
 Tot clarus titulis, tot bellorumque superbus  
 Exuviis, Tyrio Cæsar spectabilis ostro  
 Mœnia sublimi intravit Romana triumpho,  
 Quadrijugis vectus niveis, quos pascua mittunt  
 Clitumni læta, & sacræ victoribus undæ.  
 Dicit Calliope, quot gentes quattuor illis

Quos Ponto, Ægypto, Libye, Gallisque subactis  
 Ducebat Cæsar, spectabat Roma triumphis.  
 Quam diversa fuit facies, quam corpore toto  
 Ornatus populis varius, quam dissona lingua,  
 Dum fluvios tabulis pictos, dum facta metallis  
 Oppida, bellorum series, diversaque pugna  
 Tot genera ostendit; varie & fabricata ministri  
 Arma, Ducum exuvias, argenti pondera & auri,  
 Captaque magnorum portant diademata Regum.  
 Sed si non tantæ dignaris singula pompæ  
 Dicere Calliope; saltem miserabile magni  
 Vercingetorigis fatum reticere putato  
 Esse nefas, quem bellantem tot viderat annos  
 Gallia, collatis toties cum Cæsare signis,  
 Et toties renovantem acies proavita tueri  
 Jura, jugumque suis Romanum avertere Gallis.  
 Hic, quem dura Ducis nimium sententia morti  
 Damnasset, residens indignabunda pheretro  
 Dejicit ora: tegit frontem diffusa minacem  
 Cæsaries; dñs iratus, vitamque perosus  
 Captivam, domini gladios optare videtur.

Ecce alia in Phario facies miseranda triumpho  
 Corda movet vulgi. Incessit Regina catenis  
 Arsinoe, passis per candida colla capillis,  
 Et teneras, modo quæ gessere Ægyptia sceptrâ,  
 Auratis palmas manicis religata tenebat.  
 Quamvis Arsinoen non hic sententia mortis

Dura manet, parcit clementia Cæsaris illi:  
 Aut donat victor, Cleopatraz captus amore.  
 Germanæ veniam, Phariamque remittit ad aulam.  
 Heu quantum, Cleopatra, tibi, si capta perisset,  
 Hic soror, abstulerat crimen Fortuna futurum!  
 Nam miseræ Arsinoe donatam a Cæsare vitam,  
 Crimine majori posthac soror impia tollet.  
 Maxima sed populi subiit miseratio mentes,  
 Cum videre Afro pueri captiva triumpho  
 Ora Jubæ; cujus Libycæ rex maximus Orbe  
 Nuper erat genitor, qui tot modo regna, tot urbes,  
 Tot populos lata tenuit ditione remotos.  
 Quis Latius, miserande puer, tam obtusa gerebat  
 Pectora, quem tua non ætas innoxia movit?  
 Aut quis te tanto dejectum culmine regni  
 Immerita hostili præbentem colla catenæ  
 Non mœrens animo vidit? sed cæca futuri  
 Mens hominum. Felix, quæ tam miseranda videtur,  
 Sors tua; Magne puer; vinclis felicior istis  
 Es Juba, quam magni maneant si regna parentis,  
 Et stet firma tuis tellus Maurusia sceptris.  
 Illa dies quæ te captivum fecerit, illa  
 Transtulit in melius (quis crederet?) illa futuræ,  
 (Tristis visa licet) posuit fundamenta famæ.  
 Moribus Ausoniis primis nutritus ab annis,  
 Barbarie exutusque, tuo felicia posthac  
 Tempora constituens orbi, moderamine justoque

Commissas olim regni tractabis habenas.

(Nam te post casus tantos ad culmina regni  
Evehet Augustus Cæsar, solioque locabit.)

Præterea excultus studiis, miranda relinques  
Ingenii monumenta tui, calamique perennis  
Docti fama tibi per sæcula cuncta manebit.

Sed non Pharnacis captiva Quiritibus ora  
Armeno potuit Cæsar monstrare triumpho.  
Ille fuga evasit. Vehitur fugientis imago;  
Et VENI, VIDI, VICI, tria verba superbo  
Portantur curru totum narrantia bellum.

Romanos animos, plus quam spectacula viva,  
Tristia fata Ducum tabulis depicta movebant.  
Illic mœsta videt civilia vulnera Roma,  
Et proprias luget clades; illic sua quisque  
Funera Romanus, cognataque damna recenset.  
Inter Barbaricas strages, & funera Regum  
Extera; magnates Libiæ, cæsosque per Alpes  
Gallorum proceres; proprio qua pingitur ense  
Rex: Juba transfixus convivio mœsta cruentans,  
Demersusque sui Nili Ptolemæus in undis,  
Monstrantur Latiae mortes, absumptaque bellis  
Maxima Cæsareis Romanæ nomina gentis.  
Hic cum Rege Juba: Petrejus, Afranius illic:  
Illic Torquatus moriens, hic Sylla jacebat.  
Nec procul hinc oculis agnoscunt flentibus ora  
Scipiadæ, puppi jam desilientis ab alta.

Te quoque, sancte Cato, fodientem viscera dextra,  
Et properanti animæ lacerantem vulnera cernunt.  
Verum inter procerum tot mortes una tacetur,  
Nec tabulæ mœstis monstrare Quiritibus audent  
Flebile Pompeji fatum, ne tanta triumphos  
Tristaret clades. Sed mors ea sola relicta.  
Quæ tum præcipue populo expectata fuisset,  
Altius infixæ est quærentibus, & bene cuncti  
Jam sine picturis Magni miserabile letum,  
Et seriem tantæ possunt memorare ruinæ.

Quis numerare queat variæ spectacula pompæ?  
Quot campis ludi? nova quot certamina circo  
Spectentur populis? quantoque madescit arena  
Sanguine nobilium dat quas Hyrcana ferarum  
Silva, aut monstriferis nutrit Getulia campis?  
Quin & nocturnæ præfulgent undique pompæ,  
Delectantque, parat cum post spectacula Cæsar  
Nocte redire domum toto famulante Senatu.  
Cum mediam cernunt elephantes ire per urbem,  
Et lucem gestare: forum via lactea visum est:  
Tot simul accensis elephantum terga micabant  
Ignibus, atque ibant cœlestibus æmula signis.

Nec tantas victoris opes spectacula vana  
Testantur solum; sed duratura per ævum  
Exurgunt opera, & sæclis miranda futuris.  
Nam templum Veneri, domus a qua Julia nata est,  
Aut pius, aut tanta sublatus origine Cæsar

Magnificum extruxit, spoliisque ornavit opimis.  
Ut formosa Venus tanto videatur honore  
Plus Jovis uxorem, & Tritonida vincere, quam cum  
Aurea poma illi nemorosæ in vallibus Idæ  
Judicium Paridis Priamo fatale dedisset.  
Plusque Dioneæ veneratur numina Mundus,  
Quam vel Junonem vel Pallada: dignius orbi  
Nomen Iulæ censetur stirpis origo  
Quam superûm Regina, aut vertice nata Tonantis.  
Interiora auro radiabant limina Templi  
Marmorei, auratæque trabes, cælataque multa  
Arte micant simulacra Deûm, & spirantia signa.  
Hic Troja antiqua, & Veneris Phrygiique videntur  
Anchisæ thalami, decantatumque poetis  
Frondescit nemus Idæum: quod debuit olim  
Vatibus, hic tantis debet pictoribus Ida.  
Hic torus exurgit mollis, quem mater Amorum  
Progeniem terris, tantosque datura nepotes  
Cum juvene Anchisa quondam Venus aurea pressit,  
Concubitusque hominis pulcherrima passa Dearum est.  
Æneas juxta soboles stat, corpore talis  
Formoso, qualis semper florente juvena  
Exultat Phœbus: frenata aut Tigride qualis  
Bacchus odoratis curru descendit ab Indis:  
Trojus Æneas, cui tantam Musa Maronis  
Donavit felix famam per sæcula, quantam  
Mœonius Grajo vates præstabat Achilli.

Illic eximiae visa est pietatis imago,  
Cum bonus Æneas, Troja pereunte, parentem  
Grandævum attollens humeris, per tela, per ignes  
Hostiles rapuit. Non illi Laomedontis  
Arsuræ curantur opes, non fulva supellex,  
Nec sparsæ passim per tanta incendia gazæ:  
Sed genitor, Phrygiique Lares, & sacra Deorum.  
Pone patrem sequitur fortem formosus Iulus,  
Unde genus nomenque suum gens Julia duxit.  
Condidit hic Albam longam, multosque per annos  
Imperio rexit. Longo dehinc ordine picti  
Post primum Albani Reges monstrantur Iulum,  
Donec Iulæam Tullus Rex diruit Albam,  
Transtulit & Romæ cives. Hinc ordine rursus  
Reges atque Duces Latii, Romanaque fata  
Usque ad Cæsarei monstrantur tempora regni,  
Quo vetus Alba iterum Romam vicisse videtur.

Robore sed quamvis munita potentia tanto  
Cæsaris, & populi plausu firmata videtur:  
Nutat adhuc, & plus terris quatietur Iberis  
Quam vel Thessalicis, vel Thapsi tristibus arvis.  
Maxima adhuc restant discrimina, maxima bella,  
Quæ juvenes facient Pompeji nomine tanto  
Non indigna. Truces vicinos Gadibus illi  
Herculeis armant populos. Hispania sedes  
Tertia bellorum, & Romani scena furoris.

Currit ad occasus, extremaque litora Mundi.

Jam



Jam civile nefas, qua sese Hispania pandit  
Ultima. Non ulli populo majora videntur  
(Cum vastus fessos exacta luce jugales  
Proluit Oceanus) rutilantis corpora Phœbi.  
Atque ideo propiora suæ putat incola terræ  
Deceptus, tanquam sese illic ætheris alti  
Convexum inclinet. Sed majus ab æquore tanto  
Surgentes reddunt nebulæ, densique vapores  
Objectum, radios oculi diffundere sueti.  
Hinc non ulla vident surgente crepuscula Phœbo,  
Nec fugiente. Dies oritur cum Sole, caditque.

Tota jacet corii specie diffusa bovini  
Terra Hispana, mari cincta undique, & insula pœne  
Facta, nisi gelida quod Pyrenæus ab Arcto  
Mons interpositus Gallis disternat agris.  
Facturum tantis montem divortia terris  
Excelsum posuit Natura, & vertice cælum  
Æquantem summo. Nudum est, & gramine nullo  
Vestitum, quod Gallorum præpinguibus arvis  
Objicitur Boreale latus: contraque cacumen  
Qua steriles terræ campos prospectat Iberæ,  
Frondosum silvas densas, & pascua læta  
Ostendit; tanquam Galli felicibus arvis  
Divitias mons iste suas concesserat, utque  
Vestiret sese, terras spoliaret Iberas.

Nubifero, famæ si credas, nomina monti  
Pyrene miserranda dedit. Regnabat in illo

Ee

Monte Bebryx genitor, parvaque excepit in aula  
Hospitio Alcidem formosa armenta petentem  
Geryonis. Visa est Alcidæ regia virgo  
Pyrene, placuitque nimis, deceptaque tandem  
Hospitis invicti placido succumbit amori.  
Conjugium Alcides miseræ, tædasque jugales  
Si modo Geryonis victor remearit ab arvis,  
Promittit: sed fata negant crudelia tædas.  
Nec prius Alcides vincit, quam funere tristi  
Pyrene formosa jacet. Timet illa parentem  
Iratum; nec jam vitati pondera ventris  
Ulterius celare valet. Queribunda pererrat  
Frondosas latebras, & vasti devia montis;  
Solaque furtivum silvis deplangit amorem.  
Amphitryoniadem falsum, tardumve vocabat;  
Donec plorantis frustra, magnique vocantis  
Herculis auxilium leto crudelior ipso  
Bellua formosæ laceravit virginis artus.

Amphitryoniades tristem Bebrycis ad aulam  
Jam victor rediens, amissa virgine demens  
Et formidandus luctu, per lustra ferarum,  
Per juga, perque alti frondosa cacumina montis  
Tendebat, sponsæ quærens vestigia caræ,  
Pyrenenque suam mœsto clamore vocabat.  
Pyrenen silvæ, Pyrenen antra ferarum,  
Et curvæ toto resonabant monte cavernæ.  
Ingemuit locus ipse; feræ tremuere, metuque

Montani latuere fures; nec quærere prædam  
Immanes audent ursi, torvive leones,  
Dum nemore atque jugis graditur Tyrinthius altis:  
Sed postquam laceros artus, atque ora puellæ  
Deformata suæ cognovit, fata Deosque  
Multum incusavit lacrymans. Tunc oscula caris  
Reliquiis repetita dedit; supremaque plangens  
Funera, Pyrenen tumulavit montibus illis.  
„Diruet hanc (inquit) molem non longa vetustas:  
„Famaque tum tua major erit; tumulique ruina  
„Augebit tumulum. Toto tunc monte jacebis,  
„Ut juga tuta tenet Bacchus Niseja sepultus.  
„Mons erit iste tuus.“ Consensit fama. Tenentque  
Pyrenes isti nomen per sæcula montes.

Pompeji juvenes instructo milite Gades  
Linguentes, bellum omne locant, qua pinguis Bætis  
Culta secans, sua felici dat nomina terræ.  
Oppida cepissent primo regionibus illis  
Ateguam, atque Ucubin, & nomen clade futura  
Funestum Ausoniæ Mundam, & te, grata Camœnis  
Corduba, doctorum cunis sæcunda virorum.

Undique Pompejis vires Hispania mittit.  
Hic præter Latias Aquilas, Romanaque signa,  
Quæ Varus, duxitque acer Labienus, Iberi  
Pugnaces coeunt. Hic trux stat Cantaber, armis  
Qui vitam impendit solis, gens nescia pacis  
Aut siccæ mortis, ferro prævertere sueta

Ecce 2

Imbelles annos: decus esse abrumpere vitam,  
Naturæque putant segnem donare senectam.  
Angurii sacri, divinarumque peritam  
Flammarum pubem dives Gallecia mittit.  
Callaici veniunt, qui, dempto Marte, laborem  
Non ullum novere viri. Nam semina sulcis  
Injicit, & duro glebas invertit aratro  
Fœmina, dum manibus peraguntur bella virorum.  
A Minii ripis patrii venit impiger Astur,  
Auriferique Tagi fulgentia signa ferebat  
Incola, deciduum consuetus cernere Solem.  
Et Vasco insuetus galeis, & Concanus audax,  
Qui se Massagetum dura de stirpe fatetur  
Cornipedis consuetus equi potare cruorem.  
Celtiberi, bello qui corpora cæsa suorum  
Igne cremant, creduntque nefas si forte jacentum  
Exanimis fera vel volucris depascitur artus.  
A ripis rapidi veniunt Sucronis & omnes  
Hispanæ gentes, quæcunque aut funera Magni  
Ulcisci, aut Latios cupiunt nutrire furores.





## LIBER SEXTUS.

---



---

 ARGUMENTUM.

*Pugna navalis cum tempestate describitur. Funestum  
Mundæ prælium. Cn. Pompejus, Varus,  
& Labienus interfecti sunt.*

**E**Xcipit Oceanus civilia bella, priusquam  
Hispanas tangant terras, & tristia Pontus  
Pompejanarum gestat præludia cladum.  
Qua Tartessiacas extremum litus ad oras  
Extendit Libye, Pompeji nomine Varus  
Æquora custodit: pro Cæsare Didius illuc  
Classibus advenit. Vicinæque litora utrinque  
Æquoris angusti belli videre furorem,  
Et terris timuere suis. Vix pugna coorta est,  
Cum variis subito tumuerunt æquora ventis.  
Fluctibus insurgit totum mare; plusque pericli  
Quam gladii hostiles tempestas atra minatur.  
Et Tingitanis primo ruit Auster ab oris,  
Corus ab Occiduo pelago, violentus Ibero  
Litore surgebat Boreas, & flatibus undas  
Reppulit adversis. Variis vexata procellis

*Æquora confusos tollunt ad sidera fluctus.*

Nil aliud dubio flatu voluisse videtur

Quam turbare mare, & sceleratum abrumpere bellum

Æolus, aut mediis undis utramque, priusquam

Sanguine civili madeant, immergere classem:

Sed rabiem Oceani vicit, ventique furorem

Bellandi vesanus amor; tantisque ruebat

Militis impietas ad prælia dira procellis,

Quantis mercator, quamvis avidissimus, undas

Æquoreas tentare neget; nec vellera Parmæ,

Indum ebur, aut rubro pretiosas æquore conchas

Auderet tali ratibus conquirere cœlo.

Jamque propinquabant classes, validisque lacertis

Sulcatas vertèrè undas, tonsisque secabant

Excussis: fluctu spumabant cærula cano.

Innumeræ pariter tolluntur ad æthera voces.

Nec jam remorum sonitus, clangorve tubarum

Audiri poterant; hominum clamore premuntur:

Sed remos, vocesque hominum, sonitumque tubarum

Bacchantes venti, tempestatesque sonoræ

Exuperant. Nimbis pariter jaculisque diurna

Lux periit, densis & inhorruit unda tenebris.

Tum rostra haud visis sonuerunt obvia rostris.

Occurrunt aliæ proprio conamine naves:

Hostibus objiciunt alias agitata procellis.

Æquora, & invitas forsân concurrere cogunt.

Navibus elidunt naves, hominumque furori.

Additur ira maris. Cunctos geminata pericla,  
Dissimilesque metus urgent caligine tanta.  
Dum pugnant alii, pelagi sarcire ruinas  
Contendunt alii, & propiorem avertere mortem.  
Nec jam pugnantes pro Cæsare Didius audax  
Hortari poterat, nec in ordine vertere classem:  
Non Pompejanis Varus mandata valebat  
Militibus dare: nec voces fragor æquoris ulla  
Jam sinit audiri: ventis, fatoque relinquunt  
Omnia, & attonitas classes Fortuna regebat  
Prælia committens. Rostro perfossa carina  
Subsidet, & fatum nescit cui debeat, hosti,  
An tempestati. Nec sola fragoribus auris  
Terretur: sed nox oculis obducitur atra.  
Nec tamen est tenebrosa satis: sed tristius illis  
Exoritur lumen tenebris, & fulgura ponto  
Crebra micant, lucisque reposcere regna videntur.  
Quam Sol non potuit depellunt fulgura noctem.  
Illic dum tumidis forte oppugnatur in undis  
Pompejana ratis, nec se defendere contra  
Hostiles valet incursus, & capta videtur,  
Vindicat iratum pelagus sibi: gurgite pinus  
Mergitur, & rapuit victoribus unda triumphum.  
Ast alias jam possessas victore carinas  
Obruit, & cito devictos ulciscitur æquor.  
Contra utramque diu classem Fortuna videtur  
Pugnare, atque odiis vexare hostilibus ambas.

Finivit tandem dubii certamina Martis,  
 Ostenditque quibus cœli pelagique labores  
 Ipsa excivisset tantos. Victoria clâssi  
 Cæsareæ jam plena fuit, quam Didius audax  
 Erubuit vento aut pelagi debere procellis.

Amissam Varus classem videt. Obruta pōnto  
 Pars jacuit: pars victores possessa vehebat.  
 Reliquias secum fugientibus inde carinis  
 Cartajæ ad portum vexit, ratibusque relictis  
 Emensus tellure vias, hinc castra petebat  
 Pompeji juvenis. Toto tunc milite frustra  
 Mœnia Pompejus munitæ obsederat Ullæ.

Interea cursu celeri (quo bella solebat  
 Conficere) Hispanas properabat Cæsar ad oras.  
 Quem Roma egressum dena bis luce Saguntus  
 Excipit, urbs fidei clarum per sæcula nomen,  
 Et crimen quondam Superûm: quod non nisi magno  
 Deleri excidio potuit Carthaginiis altæ.  
 Urbis ad occiduum nitidis it Duria lymphis  
 Culta rigans vicina, atque in mare tendit Iberum.  
 Sed Ducis haud tanti cursum vel Duria tardat,  
 Vel rapidæ Sucronis aquæ, montesve corusci,  
 Queis faciunt dites argentea nomina venæ.  
 Inde rapit cursum flavæ per litora Bætis,  
 Et procul egressus totis te, Corduba dives,  
 Obsidione premit turmis, non spē potiundæ,  
 (Præsidiis urbem validis nam Sextus habebat)



Sed trahat obsessæ ut Pompejum a mœnibus Ullæ :  
Quod juxta evenit : namque obsidione relicta  
Pompejus totis sectatur viribus hostem  
Jam pugnæ cupidus ; sed non certamen iniquo  
Cæsar inire loco statuit : verum agmine moto  
Progressus, Salsi non magnas transilit undas,  
Atequamque capit subita feliciter arte.

Ategua amissa, veritus Pompejus Iberas,  
Fortuna quassante fidem, ne perderet urbes  
Et reliquas ; uni properat committere pugnam  
Spes omnes, viresque suas, hostemque secutus  
Ocyus, ad Mundæ fatalia pervenit arva.  
Castra locat tumulo modico, qui desuper omnem  
Planitiem late despestat, Cæsaris unde  
Ante oculos positas potuit numerare cohortes.

Nulla hic auguria, aut tantæ prænuntia cladis  
Prodigia implerant campos aut aera ; nullæ  
Vel per inane faces, vel diræ arsere cometæ.  
Non signis examen apum, liquefactave pila  
Fulmine ; non volucres, non exta minacia terrent,  
Plus tamen hic mœrent omnes, metuitque silentes  
Turba Deos, tanquam clades inmanior omni  
Ostento his campis, & inenarrabile damnum  
Immineat Mundæ. Tacito portenta timore  
Quæ nulli fecere Deum, sibi quisque creabat.  
In Pompejanis per mœsta silentia castris  
Ancipites errant animi. Nunc improba vota

Concipiunt, & spes diras, umbrasque videntur;  
Horridaque ante oculos mortis simulacra futuræ  
Cernere: lymphata rursus formidine pallent.  
Nec quamvis sperare nimis fortuna vetabat  
Cæsaris, exoptant victas producere vitas.  
Danda tamen venia est illis, cum Cæsaris audax  
Bella timet miles, Latium qui sæpe cruorem  
Hauserat; & patriæ toties in viscera fortes  
Incipiunt trepidare manus. Exercitus Orbis  
Ille triumphati domitor, victorque Senatus  
Romani, qui tam præceps in bella ruisset  
Thessala, Thapsiacisque ausus prævertere campis  
Jussa Ducis, jam jussa timet, sonitumque tubarum;  
Nec sibi desuetum potis est celare timorem.

Sed minus ut vulgi pavidos mirere tumultus,  
Tristis ad hæc Cæsar funestæ prælia Mundæ  
Ipse venit. Consueta deest fiducia, nec frons  
Illa Duci est, ex qua toties felicia belli  
Ante tubas hilaris tulerat præsagia miles.  
Lubrica fortassis mœsto tunc pectore dona  
Fortunæ expendens, quantisque agitata procellis  
Sint humanarum metuenda cacumina rerum,  
Per tot Magnorum quas fecerat ipse ruinas,  
Formidare suam discit. Felicia Magni  
Tempora dinumerat; totque inviolata per annos  
Prosperitas, similisque suæ, Pharsalia donec  
Tam longas evertit opes, in mente recursat.

Et Magni casum, postquam fastigia Magni  
Attigerat, jam visa levis Fortuna minari.  
Hæc mœste reputat Cæsar, mentemque labantem  
Corripit, iratus tacite; tandemque cohortes  
Alloquitur vultu cæcum celante timorem.  
„Bellorum Comites; qui mille pericula, mille  
„Vicistis plusquam Herculeæ virtute labores,  
„En vobis toties truncata repullulat hydra,  
„Ultimus hic labor est; infirma atque ultima colla  
„Exerit; hic virtus eadem, quæ prima recidit,  
„Et robusta magis, resecet postrema, nec ultra  
„Crescere civilis permittat semina belli,  
„Quæ post tot clades imbellis Iberia nutrit.  
„Sanciet hæc nobis pacem victoria, totus  
„Exarmatus erit post hæc certamina Mundus.  
„Sed qui sunt, qui bella parant? qui Cæsaris enses  
„Et totidem bellis victricia signa lacesunt?  
„Destituet plebs ista Ducem non sponte secuta,  
„Sed casu. Num Pompeji pugnabit amore  
„Quem non novit adhuc? num vanam nominis umbram  
„Plusquam Cæsareas vires, quas nuper Ilerda  
„Vincentes vidit, populus formidat Iberus?  
„At vero si qua est Legio Romana sub armis  
„Pompeji, rudibus constat tyronibus, aut his  
„Qui vobis victi fugientia terga dederunt,  
„Et veterem adducunt secum ad nova castra timorem.  
„Quæ toties victus faciet jam prælia Varus?

„Hispanisve geret Labienus transfuga plusquam  
 „Aut prius Emathiis, Libycis aut gesserit arvis?  
 „Ite, mei comites, belloque imponite finem“  
 Dixerat; at nullo excipiunt clamore cohortes:  
 Verba Ducis, nec stridentes accendere possunt  
 Dejectos animos litui; conceptave cornu  
 Classica; nec quanquam ad pugnam de colle propinquo  
 Decurrunt Pompejani, procedere campo  
 Longius, aut rapido (ut mos est) occurrere cursu  
 (Tum primum trepidus) veteranus Cæsaris audet.  
 Quod simul ut vidit, magna inflammatus ab ira,  
 „Deseritisne Duce[m], & faciet nece Cæsaris (inquit)  
 „Vos timor emeritos hodie?“ Simul arripit hastam  
 Ductor, & adversos solus defertur in hostes.  
 Obstupere illi, quibus hæc miracula, miles  
 Cæsareus timidus, temerarius ipse, videntur.  
 Vix oculis primo credunt, mox in caput audax  
 Undique pila volant, donec, vincentem pudore,  
 Non virtute metum, cunctis exercitus armis  
 Ad Ducis auxilium procurrit, & impia tanta  
 Tunc rabie, quanto detrectavere timore,  
 Bella gerit, redimat Romano ut sanguine culpam,  
 Et dira faciat funesta piacula cæde.  
 At primo pugnae gentes utrinque furore  
 Diffugiunt, solis peragendaque bella relinquunt  
 Ensibus Ausoniis; aliis nec egebat Enyo,  
 Pallida nec plures Aleto optabat. In omne

Suffecere nefas hæc dextræ. Hic constitit atrox  
Pugna; pares urgent acies, animique, paresque  
Irarum stimuli. Magnis hortatibus ambo  
Inter spemque metumque Duces discurrere primo  
Cœperunt, frustra que suos impellere, donec  
Lassati excedunt pugna: collemque propinquum  
Ductor uterque capit. Diri hinc discrimina belli,  
Torque cruentatos enses, tot stragis acervos  
Dum tristes spectant, vix formidare vacabat,  
Vix sperare, Duces subiit miseratio sola,  
Feralisque timor, ne non victoria mæsto  
Ulla, sed ambobus lugenda tragœdia campo  
Restaret, Latiusque illic procumberet Orbis.  
Ultima Cæsarei restare pericula credunt:  
Et Pompejani post hæc sperare recusant  
Prælia: Pugnaces animos agit æmula virtus.  
Utque magis stupeas, cunctis incognita bellis  
In totis subito sunt orsa silentia campis  
Dum media fervent rabie; nulloque virorum  
Audito clamore, manus movere furentes.  
Ad Pompejanas tandem Victoria partes  
Se trahere est visa, & paulatim cedere retro  
Cæsarei cœpere; fuga vix Centuriones  
A turpi retinere queunt, cum fortia Cæsar  
Pectora denudans stricto sic ense profatur:  
„Non tibi jam, Fortuna levis, quæ condere summa  
„Exoptas potius quam condita summa tueri,

„Iraſcor; ſatis ampla mihi, quæ nulla tacebunt  
„Sæcula, feciſti, fateor. Transferre favorem  
„Jam te, Diva, decet, mundo ne ignota potestas  
„Sit tua, meque Deum deceptus crederet orbis“.  
Dixerat; & certa fodiſſet pectora dextra.

Sed Fortuna (velut prope ſumma pericula mater  
Stare ſinit puerum interdum, ut majora timenti  
Gratius auxilium veniat) ſubmittit alumno,  
Unde minus ſperatur, opem. Nam caſtra Bogudes  
Extra aciem poſitus, prædæ perductus amore  
Pompejana petit. Contra hunc ad caſtra tuenda  
Ex acie educit Labienus quinque cohortes.  
Perdidit infelix Pompejum hic caſus, & omne  
Mutavit belli fatum. Pro Cæſare falſus  
It timor, & cunctis Labienus terga dediſſe  
Creditur; illa ſuos debellat opinio, ſpemque  
Cæſareis creat. Errorem monſtrare, metumve  
Tantum inhibere ſtudet fruſtra Pompejus; acerbo  
Prodita diffugit caſu miſeranda juvenus.

Infelix Varus toties deviſtus ab armis  
Cæſareis, quem tot per clades fata tuliſſent,  
Jam male ſervatam cupiens abrumpere vitam  
Irruit in medios enſes, in vulnera lætus  
Mille ruit moriens; poſt tot certamina cladi  
Huic ſuperesse pudet, cumuloque deesse virorum.

At miſer ut totis rediens Labienus in arvis  
Pompejanorum vidit fugientia ſigna,

Erroremque simul fatalem audiverat, amens  
„Me miserum exclamat! Tantæ, Fortuna, ruinæ  
„Me facis auctorem? Per me crudelia fata  
„Ausoniam subigunt? Hac hac fuge, prodite miles,  
„Hoc aperi pectus, tristemque ulciscere cladem:  
„Aut pœnas sument pro vobis Cæsaris enses“.  
Tum vero, ut leo Getulis in saltibus ardens,  
Qui venatorum telis cingentibus, ultro  
Assilit in ferrum, sese ingerit ipse periclis,  
Et cupide letum gladio molitur ab omni.  
Tandem vita fugit Stygias irata sub umbras.

Jam stragis cumulos & ineluctabile damnum  
Viderat infelix tumulo Pompejus ab alto,  
Et quamvis lucem damnat, sperare juvenus  
Integra persuadet; nequidquam a tristibus arvis  
Aufugit, heu tellure statim moriturus in ista.  
Sed fratrem Hispanas abscondent fata per urbes,  
Cæsaris ut possit post mortem tristia rursus  
Bella, & Romanos olim renovare furores.  
Impia jam cædes oritur, passimque per agros  
Palantes cædunt insano ardore furentes  
Cæsarei, & tanto saturant crudelius iras  
Victores, quanto plus tristia bella timebant  
Ante tubas dudum. Nec jam fugientibus ullam  
Vicinæ latebræ, vel Pompejana salutem  
Castra dabant miseris, infirmave mœnia Mundæ.  
Nam cito diripiunt victores castra; citaque

Vi Mundam expugnant; dum (quod vix ulla tacebunt  
Sæcula, vel credent forsā) pro cespite fossas  
Corporibus complent, faciuntque cadavera muros.

Nec solum ante tubas, sed post hæc prælia tristis  
Cæsar erat; quanti victoria constitit illa,  
Et quam mœsta siet civili gloria bello

Sero animum subiit. Miseræ nunc vulnera Romæ,  
Nunc sua, victorisque nefas crudele recenset,  
Invidiamque simul; victricem pœne coactus.

Fortunam damnare suam; quæ clade triumphum  
Obruit, & tanto mersisset sanguine lauros.

Talia dum mœstoolvebat pectore Cæsar,  
Pompeji caput abscissum Cenonius affert.

Ingemit, & tantæ lacrymis agnoscit obortis  
Fata domûs; subiit magni genitoris imago,  
Atque Ægyptiaco miserandum in litore funus.

Quærenti fatum juvenis Cenonius infit:

„Cum modo Pompejus Mundæ funesta per arva

„Tot stragis cumulos, tot corpora cæsa suorum

„Infelix vidit, nec jam reparabile damnum,

„Vestus equo celeri Cartejæ ad litora fugit,

„Ut portum nactus notum, dare carbasa ventis

„Posset; at insidias veritus, nostrosque sequentes,

„Litora deseruit rursus, silvamque propinquam

„Consilii incertus petiit. Nos terga secuti

„Instamus, silvamque oculis scrutamur opacam;

„Quærentesque diu frustra, sub tegmine fagi

Um-



„ Umbrosæ tandem defessum, & vulnere claudum  
„ Pompejum aspicimus solum, (pro tristia sortis  
„ Humanæ specula, & pompæ documenta caducæ!)  
„ Pompejum illum(inquam)qui tecum,o maxime Cæsar,  
„ Tot modo stipatus legionibus, & comitatus  
„ Gentibus innumeris, tam longo tempore fatis  
„ Pugnavit dubiis, jam cinctum milite nullo  
„ Vidimus. Ut tradat se hortamur; at ille minaci  
„ Intrepidus vultu, “Nunquam me Cæsaris, inquit,  
„ Captivum, victum quamvis, Fortunâ videbit.  
„ Abcissum videat caput, & cervice revulsa  
„ Hæredem agnoscat Magni. Nec dedecus illud,  
„ Quod fatum genitoris erat, mihi Roma putabit.  
„ Non tam vile tamen caput hoc, certamine nullo  
„ Ut vobis tradatur, erit. Dum tela supersunt,  
„ Non gratis moriar,,. Tum pugnam ingressus iniquam,  
„ In mediosque ruens, sine spe, sine viribus, omnes  
„ Nos pariter sola adjutus virtute lacessit.  
„ Nec vitam, quam tanto animo projecerat ipse,  
„ Servandi nobis conceditur ulla potestas.  
„ Invasit ferrum, ceciditque in vulnera lætus,  
„ Et tandem invito mortem sibi vindicat hoste.“  
Tum Cæsar lacrymans: „Generosum quærite truncum,  
„ Turiferis collecta rogis componite membra  
„ Cum capite, & dignam tantis date manibus urnam“.

Digressus Munda Cæsar securus ab omni  
Bellorum strepitu victricia signa per arbes

Sustulit Hispanas. Jam Gades, Corduba dives,  
Hispalis, atque omnes, quascumque interluit undis  
Bætis Anasve suis, victori tradere sese  
Non dubitant urbes. Populi, gentesque remotæ  
Sub juga jam veniunt: abjectis Cantaber armis,  
Callaicusque ferox, & Celta, atque impiger Astur  
Exposcunt veniam, pacemque a Cæsare quærunt.  
Nil terris olim venerabile nomen Iberis  
Jam valuit Magni. Cunctos Fortuna clientes  
Transtulerat; solus jam possidet omnia Cæsar.  
Nec mirum obtineat terras si solus Iberas,  
Qui sine rivali Romanas obtinet arces.





## LIBER SEPTIMUS.

---

 ARGUMENTUM.

*Honores Cæsari a Senatu decreti. Bellum in Parthos  
parat. Conjunctio in Cæsarem. Prodigia.  
Cæsar in Senatu occiditur.*

**J**Am se post clades tantas, tot vulnera gentis  
Ausoniæ, & strages populorum, absumpserat ipsum  
Civilis furor, & terris pax alma refulsit.  
Defessis iterum rebus, sperare quietem  
Cœperunt populi, non tristia bella timebant,  
Omnia dum tenuit Cæsar, nec in orbe potestas  
Altera, nec fuerit communis Roma duobus.  
Hunc supra invidiam Fortuna evexerat; hujus  
Regnum amat, ut tutum, populus. Nam quem magis optet  
Custodem pacis, quam qui fortissimus armis  
Semper erat, nulloque unquam deviatus ab hoste?  
Plebs libertatem, sola contenta salute,  
Romula projecit; nec post tot prælia pacem,  
Quamvis cum domino veniat pax ista, recusat.  
Nec solum vulgus domino servire paratum  
Cæsaris imperium votis amplectitur: illud

Et Procerum pars magna cupit; tranquillaque Patres  
Tempora lassati exoptant; quos (fulgura summos  
Ut feriunt montes) feriunt discrimina sævi  
Præcipue belli, & gaudens feralis Enyo  
Sanguine nobilium semper. Nec nomen inane  
Jam libertatis (dudum ipsa eversa fuisset)  
Sanguine jam retinere student. Vix ipsa videtur  
Libertas tanti. Neque ficto Cæsaris augment  
Obsequio titulos. Sed vero pectore tantos,  
Ne sibi Regæ minor videatur Cæsar, honores  
Decernunt, quantos nequeat privatus habere.  
Perpetuum Dictatorem, patriæque Parentem  
Appellant Patres; denos ut Consul in annos  
Designaretur statuunt: altaque Curuli  
Ipse ut supremus Romana Censor in urbe  
Veste triumphali indutus, lauroque sederet  
Perpetua ornatus. Nec non de principe Numen  
Ut fieret victor, donant altaria, Sacra,  
Altaque templa, quibus pulcherrima juncta Dearum  
Illius astabat statuæ Clementia sacræ.  
Cæsareo faciunt Vestales nomine vota.  
Et quo quæque die victoria contigit illi  
(Civilis quanquam) celebrantur festa per urbem.  
Crederet hoc aliquis, cum sint feralia fastis  
Et Trebiæ, & Cannæ Romanis nomina; Mundæ,  
Thessaliæ, Thapsique dies jam læta vocentur  
Tempora! Pompejique necem, sanctique Catonis,

Scipiadæque albis designet Roma lapillis!

Nullus restat honor, quem non assumere possit

Jam sibi, victori tanta est concessa potestas.

Quid nunc imperio securam Cæsaris urbem,

Et tandem optata, pro libertate, quiete

Lætantem, possit civilia rursus in arma,

Rursus in horrendas populos impellere clades?

Quid tantas victoris opes, stabilitaque regna

Eruere? an non tam facile est suprema tueri

Quam dare Dīs Superis? an non mortalibus ulla

Firma datur, nullisque malis violanda potestas?

Nullane livorem poterit transcendere virtus?

Nec tantum meriti spatium est, quod non capit ulla

Invidiæ rabies. Oh summis lubrica semper

Et minitans statio! Non te tua plurima virtus

Securum, Cæsar, præstat, non robur in armis,

Non bonitas, tantasque æquans clementia vires.

Supplicibus frustra veniam, victisque salutem,

Exulibusque urbem permittis: Romula frustra

Imperia exornare studes, dum legibus orbem

Emendas prudens, aut oppida diruta condis

Magnificus. Tantis jamdudum extincta ruinis

Per te stat Carthago, novisque impleta colonis

Exurgit, nurbibus non jam metuenda Latinis.

Tu quoque restauras, Latiisque habitanda Corinthi

Mœnia das Bimaris; nec famam auctoribus ullam

Detrahis antiquis; sed adhuc retinere vetusta

Nomina permittis totum vulgata per orbem.

Non tamen hæc fatum avertunt, nec regna tueri  
Usurpata diu possunt. Non mentibus ulla  
Conciliare jugum generosis munera possunt;  
Nec libertatem clementia pensat adeptam.  
Invidiæ stimulos ergo ut lenire furentis,  
Et capite insidias, quas maturare quietem  
Non nescit, Cæsar factis avertere possit,  
Nec non externo maculas abstergere bello  
Civiles; cum jam Crassi vindicta perisset  
Debita jamdudum Latio; jussu ille Senatûs  
(Ne Patrum imminui videatur sacra potestas)  
Decretoque togæ, mandari Parthica bella  
Suppliciter petiit, felix ut more retento  
Romulei antiquo populi, legionibus iret  
Tessera. Sicque alacri compellat voce Senatum:  
„Si mihi, conscripti Patres, quæsitâ potestas  
„Esset, ut immani sævaque tyrannide solus  
„Regnarem; ut quodcumque jubet furor impius, aut mens  
„Ægra metu, aut suadet luxus, vel prava libido  
„Exequerer: tanto non tempore dissimulata  
„Consilia, & furia latuissent pectoris hujus;  
„Jamdudum gladios sensisset Roma nefandos.  
„Sed non nos vitiis famulantia gessimus arma,  
„Nec factura urbi, sed detractura tyrannos.  
„Libertatis erit custos victoria nostra,  
„Et legum. Nec, si non hæc perspecta fuissent

„Numinibus, nostræ favissent Numina causæ.  
„Cur gravis aut metuenda, Patres, sit nostra potestas,  
„Quæ vitam tot devictis dedit hostibus, & tot  
„Exulibus reditum? Quis jussu Cæsaris unquam  
„Dum siluere tubæ, jugulatus concidit hostis?  
„Scipiadæ chartas post Thapsi bella cremavi  
„Non lectas, ne quos victor deprendere possem,  
„Et punire hostes. Potius quam cæde tueri  
„Nobilium hanc vitam, nescire pericula nostra  
„Elegi. Nec non invitus (Numina testor)  
„Civilem sumpsî gladium, dum præmia justa  
„Bellorum bello conquirere, proque triumphis,  
„Quos tot trans Alpes annos, Pontumque Britannum,  
„Et Rhenum merui vincendo, vincere cogor  
„Rursus; & invidiam his armis, quibus ante feroces  
„Edomui Britonas, Suevos, Gallosque, domare.  
„His îdem forsan, vobis mandantibus, armis  
„(Si non in patriam paucorum injuria bellum  
„Vertisset) Latiis Babylon spoliata tropæis  
„Jamdudum nostros lenisset clade dolores,  
„Ultimaque Ausonias tremuissent Bactra secures.  
„Hæc jam bella mihi Numen peragenda reliquit.  
„Ad Parthos, Patres, si vos decernitis, ibo;  
„Et simul ac tauri de cornibus aureus exit  
„Phœbus, ad Eoas victricia signa pharetras  
„Convertam. Ausonias Aquilas, amissaque signa  
„Aut referam, aut moriar; dignis aut cladibus ultus

„Tunc erit, aut cæso comitatus Cæsare Crassus“.  
 Assensere Patres: placuit tam nobile bellum,  
 Et tantus Ductor. Cui Parthica bella Senatus  
 Nequidquam mandat. Cæptis ingentibus obstant  
 Fata, nec Ausoniæ decus hoc, nec Cæsaris armis  
 Concedunt. Iterum redeunt civilia bella,  
 Et populi abruptit tristis Fortuna quietem.  
 Sola quies jam Cæsar erat. Cum Cæsare rursus  
 Pax Romana perit. Cujus mors dira pianda est  
 Cladibus innumeris, laceroque cruentior orbi  
 Quam tot viventis feralia bella fuissent.

Fata Ducis mortem accelerant; pars magna Senatûs  
 Conjurat trepidi; nec qui de parte stetissent  
 Adversa solum, & noti jam Cæsaris hostes  
 Spurius, & Naso, Rubrius, Servilius audax,  
 Donatusque semel venia Ligarius, atque  
 Cæcilius: sed qui vulgo creduntur amici  
 Illius adjungunt sese; Trebonius inter  
 Hos fuit, & Casca, & Cimber; nec Cassius acer.  
 Defuit insidiis, qui libertatis ademptæ  
 (Quamvis Urbana Prætura a Cæsare nuper  
 Donatus) vindex nunquam non esse volebat.  
 Jungitur his Decimus notissimus inter amicos  
 Cæsaris, ingratus, cui trans-Alpina fuisset  
 Gallia Cæsareo nuper commissa favore.  
 Non illum conjuncta fides, non nomen amici  
 Deterrere potest. Nec adhuc sat firma videtur



Conjurata manus, quamvis pars tanta Senatûs  
Totque simul Proceres sanxissent fœdera dira:  
Te quoque, flos juvenum Latiorum, & nobile nomen,  
Brute, petunt cœpti socium, cædisque nefandæ  
Participem; ut tantæ pietatem obtendere culpæ,  
Et dare jus sceleri posset venerabile Bruti  
Nomen apud populos. Hic libertatis ademptæ  
Et patriæ vindex natalibus esse videtur  
A Superis designatus: tua, maxime Brute,  
Progenies, primus qui nomine Consulis annos  
Signavit Latios, pulsus ex urbe tyrannis.  
Urbis erat Prætor Brutus: cui Cassius arctis  
Junctus amicitiiis (ut eodem junctus honore)  
Et tunc immensis cupiebat jungier ausis.  
Hunc quoque, cum notas intravit Cassius ædes,  
Invenit mœstum, & tacite surgentia regna  
Damnantem. Tales versat dum pectore curas,  
Cassius aggreditur. „Non vanis, Brute, querelis  
„Tempus eget. Sat jam votis, tacitoque dolori  
„Concessum est, sat consiliis: nunc vindice dextra  
„Utendum. Ultorem sperat te Roma, tuamque  
„Libertas oppressa manum jam, Brute, requirit.  
„Hoc a te expectat populus, taciteque precatur,  
„Hæc sellis statuisque tuis inscripta legebas  
„Auctore ignoto. Non a te munera vana  
„Venatus ludosque petunt, aut talia: sola  
„Reddita libertas Bruto Prætore videtur

„Dignum munus eis. Forsan dum regna relinquat  
 „Cæsar, & imperium, quod per tot bella petebat,  
 „Deponat sponte expectas? Non sufficit illi  
 „Dictatoris honor, quia libera novit honorem  
 „Roma illum. Quodcumque potest donare Senatus  
 „Posse negare putat; nec jam suprema potestas  
 „Victori satis est, nisi sit quoque sola potestas:  
 „Vera ideo imperii quærens insignia, sceptrum  
 „Et diadema petit. Probat hoc (quod vidimus omnes)  
 „Sacra Tribunorum, dum detraxere coronam  
 „Cæsareæ nuper statuæ, violata potestas.  
 „An coram populo (quamvis tum respuit) illi  
 „Obtulit invito diadema Antonius audax?  
 „An non ut populum tentaret, ut ambitiosis  
 „Artibus hoc sciret, quo vultu regna, priusquam  
 „Se Regem faceret, pateretur Romula pubes?  
 „Maſtetur Dominus: libertatemque (paratæ  
 „Servitio quamvis) reddat mors Cæsaris urbi.  
 „Et festinanda est; si paulum, Brute, moramur  
 „Dum redeat læto post Parthica bella triumpho,  
 „Majore invidia cædes peragenda manebit.“  
 Ingemuit Brutus, tristique has pectore voces  
 Edidit: „Ob Cassi, frustra quod Numina nobis  
 „Imposuere jugum, jam detrectamus acerbum.  
 „An libertatem Superi, causamque Senatûs  
 „Tot damnaverunt bellis, tot cladibus, ut jam  
 „Insidiis possint, & proditione tueri?

„ Ah potius bello pereat, quo crevit, aperto  
„ Libertas populi Latii, quam cæde dolosa,  
„ Fraudibus, & gladio occulto videatur egere.  
„ Talibus insidiis hostes, civesque nefandos  
„ Vincere Romani duxere ignobile prisci.  
„ Incertæ potius patriam permittere belli  
„ Fortunæ voluit, quam sic te tollere, Pyrrhe,  
„ Fabritius. Nec non, quamvis Sertorius audax  
„ Hostis erat patriæ, turpis Perpenna vocatur  
„ Proditor a cunctis. Quis tanto sanguine Syllam  
„ Carnificem imbutum positurum regna putavit?  
„ Quis tamen occultis tantum maculare tyrannum  
„ Insidiis conatus erat? Quis Cæsaris audet  
„ Præferre imperio crudelia tempora Syllæ,  
„ Ni furias præferre Deis audebit? Ut illi  
„ Degeneres nimium Proceres, pavidique vocantur  
„ Qui tantum subiere jugum: sic Cæsaris ista  
„ Virtuti & meritis ingrata vocabitur ætas;  
„ Plusque senes illi damnabunt crimina nostra  
„ Tempora qui sævi meminere immania Syllæ.  
„ Sed me præcipue miserum qua cuncta notabit  
„ Posteritas fama, quem tanto Cæsar amore,  
„ Totque sibi meritis semper devinxit? Iniqua  
„ Est mea sors; liber nequeo gratusque manere.  
„ Oh utinam tunc, cum plebeja casside tectus  
„ Cæsaris intentus jugulo per tela ruebam,  
„ Thessalica Brutus cecidisset strage, priusquam

„Donasset vita victor; tunc liber ad umbras  
„Venissem Stygias; vel si pia Numina dextram  
„Hanc bene rexissent, uno feliciter idu  
„(Ni sibi Pompejus regnum quoque victor in illo  
„Quæsisset campo) libertas parta fuisset.  
„Expecta, o Cassi, quid tandem Numina nobis,  
„Quidve hostes facient Parthi.“ Cui talia contra  
Cassius: „Exoptes Parthis si, Brute, triumphum  
„De Latio, patriæ es factus, non Cæsaris hostis:  
„Quod procul avertant Superi. Rationibus erras,  
„Brute, tuis: ingrata vocas quæ justa vocabit  
„Posteritas: & dum vis non ingratus haberi,  
„Impius es. Nec, quæ patriæ sunt debita, donis  
„Privati debere potes. Corrupta vocatur  
„Hæc non justa fides. Quo plus te dona ligarunt  
„Illius, hoc magis es patriæ justusque piusque.  
„Heu quantam, tibi si non esset Cæsar amicus,  
„Detraheret famam facto Fortuna merenti!  
„Cum plus privatis affectibus indulgere  
„Quam patriæ servire tuæ te crederet Orbis.  
„Si tamen exemplis opus est, illum aspice priscum  
„Brutorum generis, libertatisque parentem,  
„Romanos primus qui nomine Consulis annos  
„Signavit. Proprios natos dum regna favebant,  
„Supplicio affectos spectavit fronte serena.  
„Exiit ille patrem Brutus, dum civis haberi  
„Vult pius. An tibi plus sunt munera Cæsaris, illi

„Quam Natura fuit? sed justior ultio nostra  
„Tempore jam facta est. Pro libertate vetusta  
„Tot confirmata magnæ per sæcula. Romæ  
„Quid nunc egisset Brutus, qui talia fecit,  
„Cum nova libertas, & Reges nuper abacti?“  
Hac postquam juvenem flexisset Cassius arte,  
Cum Decimo Proceres reliqui venere, dataque  
Acceptaque fide sanxerunt fœdera dira;  
Et libertatem amissam, quam sanguine tanto  
Tot bellis frustra quæsissem, quæque Deorum  
Decretis nunquam reditura reliquerat orbem,  
Cæsaris infanda decepti cæde requirunt.

Jam propinquabant Martis tibi, maxime Cæsar,  
Fatales Idus; nec tanta instantia possunt  
Funera Dî celare; dies nec Vatibus illa  
Auguribusque venire potest ignota; loquuntur  
Hoc solitæ volucres, hoc exta minacia fatum.  
Has Idus frustra monuit Spurrinna timendas,  
Sol quoque mœsta dedit tantæ præsentia mortis;  
Lugenti similem, madida nunc Iride cinctum,  
Nunc caput obscura tectum ferrugine Solem  
Attoniti videre homines; pecudesque locutæ.  
Destituere amnes cursum; terræque cavernas  
Spiritus erumpens detexerat. Imbre tumescens  
Eridanus subito vicinos meraserat agros:  
Et subito ad ripas rediens per prata reliquit  
Innumeros angues, & prodigiosa nigrorum

Corpora serpentum: totidem prope Tibridis ora  
Destituit pisces refluxum mare litore sicco.  
Cæsaream propiora necem sed signa notabant.  
Nam quos victor equos finito Marte sacrarat  
Cæsar, & emeritos bellis permiserat alto  
Depasci nemore, & per dulcia rura vagari,  
Ante necem Domini multis luxere diebus.  
Non illis amnes, non illis pascua curæ;  
Sed lacrymis prata humedant. Cædemque cruentam  
Præcedente die, cum lauri regia ramum  
Ore avis exiguum volitans gestaverat, illam  
E sylvis volucrum crudelis turba secuta est,  
Et Pompejana captam laceravit in aula.

Horrida prodigiis aderat nox ultima vitæ  
Cæsareæ; diris turbata Palatia monstis  
Excutiunt somnum cunctis, & flebile totis  
Ædibus auditur murmur. Patuere reclusæ  
Sponte fores; raucum dederant crepitantia Martis  
Arma sonum; mœstisque canes ululatibus implent  
Atria; ferales effundit sæpe querelas,  
Stryx nocturna suas, infausta que carmina bubo.  
Morpheus intravit media jam nocte cubile  
Quo Tyrio formosa cubans Calphurnia lecto  
Carpebat magno teneros cum conjuge somnos.  
In faciem occisi vertens se Cæsaris astat  
Ante torum miseræ, lacerata veste cruentus;  
Vulnera mille patent, qualem te crastina, Cæsar,

Lux populo ostendet. Diris exterrita visis  
Ingemuit, & lacrymans Calphurnia brachia somno  
Per lectum prensura virum movet; invenit illum  
Incolumem; sed vix (nam jam turbata soporem  
Excussit) putat incolumem; vix sensibus ipsa  
Credidit, attonitæ tam somnia fixa manebant.  
Oscula dat mœstæ Cæsar, causamque doloris  
Querenti, visum narrat Calphurnia triste.  
Quod dum narrat, adhuc trepidat, lacrymasque recentes  
Effundit; pectusque ulnis amplexa virile  
Sidereis, orat ne vana hæc somnia credat,  
Neve ostenta Deum contemnat; Martis ut Idus,  
Quæ male tunc aderant, & quid Spurianna moneret,  
Quidque alii vates, reputet; nec jam sua tantis  
Præmonitus signis nescire pericula vellet;  
Utque manere domi placeat; lucemque sequentem  
Hanc unam, si non propriæ donare saluti,  
Conjugis at saltem vellet donare timori.  
Hispanas iterum, dum tanta pericula restant,  
Dimissas nuper monuit revocare cohortes,  
Et stipatores fidos. Non esse pavoris  
Sed pietatis opus Divorum ostenta timere.  
Cui Cæsar contra: „Plus me, Calphurnia, luctus  
„Et lacrymæ movere tuæ, quam tristia Vatum  
„Responsa, infaustæ volucres, aut ulla dierum  
„Vana superstitio poterant. Ostenta timere  
„Si nunc inciperem, quæ non mihi tempora posthac

„Anxia transirent? quæ lux jucunda maneret?  
„Aut quæ libertas? frustra servire timori  
„(Dum nec luce frui, nec mortem arcere licebit)  
„Cogar, & huic capiti, quod Roma veretur, Aruspex  
„Jus dabit, & vanus semper dominabitur Augur.  
„Si mortem mihi Roma paret, dubiæne Saluti  
„Proderit una dies? aut cur differre laborem  
„Quaræ nequeo vitare, necem? semperne timere  
„Exoptem potius quam certa occumbere morte?  
„Cur tamen insidias timeam? cur Roma salutem  
„Non potius nostram exoptet? partaque quiete  
„Cæsaris imperio post tot civilia bella,  
„Post rabiem tantam lassatus gaudeat Orbis?  
„Pax mundi mea Sola Salus: nece Cæsaris enses  
„Stringentur rursus, rursus lacerabitur Orbis,  
„Mœstaque Romano tingetur sanguine tellus.  
„Sed si non homini satis esset cura diei,  
„Ni nocturna alias facerent insomnia curas,  
„Dic mihi, nam Morpheus nobis contraria misit  
„Somnia, queis potius credes? hac nocte volasse  
„Ad cœlum, dextramque Jovis tetigisse, serena  
„Et majestate indutus sedisse videbar.  
„Quid nisi fausta, & magna mihi hæc (si credere vellem  
„Talibus omnino) portendere somnia possunt?“  
„Jam jubar Auroræ pallentia vicerat astra.  
Prosiluit stratis Cæsar, mœstæque reliquit  
Conjugis amplexus; magnæque capacia turbæ,



Et tantos pariter mox exceptura clientes  
Magnifico splendent excelsa Palatia cultu.  
Festini Proceres, magnique ad limina Patres  
Luce salutatum prima venere, domumque  
Admissi implerunt. Animus non omnibus unus.  
Cæsareo quidam vere lætantur honore:  
Pars alia Invidiæ stimulis agitata nefandis  
Quem mactare parant, falso venerantur honore,  
Et funesta animis, linguis dum fausta precantur.  
Ante alios Decimus, cui fallere nomen amici  
Præcipue dederat, Duclorem, sæpe morantem  
Incitat: & spretis hortatur adire Senatum  
Prodigiis. Tandem patrum famulante caterva  
Progreditur Cæsar, quamvis ostendere cædem  
Venturam Superi non cessavere minaces.  
Progreditur tamen, atque (oh mira potentia fati!)  
Dum transit, chartam oblatam, quæ nomina tanta  
Conjuratorum, facinusque ex ordine totum  
Detegit, ante sinu, quam sit perlecta, recondit,  
Funestamque intrat fatis urgentibus ædem.  
Cæsaris intenti jugulo stant undique Patres  
Et conjurati Proceres; altamque Curulem  
Circumdant. Primo aspectu cecidere parumper  
Audaces animi, & fortes tremuere lacerti.  
Jam pæne inceptum damnant. Armare videtur  
Ingens fama Ducem, majestas laurea frontis,  
Terribilis decor, & gestarum gloria rerum.

Nunc fortuna viri nimium comperta, favorque  
Perpetuus Superùm terrent. Nec quantus in armis  
Cæsar, ut audaci stipatus milite turmas  
Fuderat hostiles toties, totiesque per omnes  
Terrarum tractus victricia signa tulisset,  
Mentibus occursat: sed quanta pericula solus  
Vicit, Fortuna tantum comitante Deisque,  
Qualiter Ægypti insidias, Pontique procellas  
Nocturnas, sævosque intra sua castra tumultus  
Militis irati evasit. Cur jam caput istud  
Numina destituant? versant dum talia, rursus  
Pectoribus vindicta redit, pellitque timorem  
Libertatis amor nimius. Primusque Curulem  
Tullius accedens tanquam pro fratre rogatum,  
Purpureum ex humeris subito divellit amictum.  
Mirantique Duci primum prope guttura vulnus  
Dat Casca. Haud impune quidem; nam brachia Cascæ  
Transfigit Cæsar primumque ulciscitur ictum.  
Prosiliens alio tardatur vulnere, donec  
Circumstare videt strictis pugionibus omnes.  
Sentit se Cæsar funesta indagine cingi.  
Et qui ferratas acies, densasque catervas  
Rupisset toties campo, tutamque per hostes  
Fecerat ense viam, nulla virtute togatas  
Insidias vitare potest. Obvolvitur amictu  
Tum caput, & vultum, dum martia pectora præbet,  
Tot manibus fodienda; tegit, reprimisque querelas

Ne tantam possit gemitu corrumpere famam,  
 Interea tacito secum hæc in pectore volvens:  
 „Hoc saltem, Fortuna, placet, quod nulla superbo  
 „Victori capitis nostri est concessa potestas,  
 „Nec Domini jussu pereo. Mactatus iniquis  
 „Insidiis, quas Roma mihi subjecta paravit,  
 „Occumbo Princeps Orbis, numerumque Deorum  
 „Aucturus posthac.“ Tandem per vulnera mille  
 Spiritus erumpit: sævis qui semper in armis  
 Inviolatus erat, violatæ victima pacis  
 Hic cadit: atque togæ, quas bello læserat, ædes  
 Ipse suo moriens perfundit sanguine Cæsar.

## F I N I S.

## ERRATA CORRIGE.

Pag. 322. lin. 12. gessisse      gessisse



## CATALOGUS

PRÆSTANTIORUM EDITIONUM

M. ANNÆI LUCANI.

1469. Romæ *curante Jo. Andrea Episcopo Alerien-*  
*si. fol.*
1475. Venetiis *cum Omniboni Leonicensi comm. fol.*
1477. ---- *per Guerinum. fol.*
1483. Parmæ. *fol.*
1486. Venetiis. *fol.*
- Brixia per Jo. Britannicum.
1491. Mediolani *cum Jo. Britannici comment.*
1493. Venetiis *cum Sulpicii & Omniboni comm. fol.*
1498. ---- *fol.*
- 1502 & 15. *edd. Aldinæ.*
- 1505 & 11. Venetiis. *fol.*
- 1506 & 14. Parisiis. *fol.*
1508. Mediolani *ex recognit. G. Vercellani.*
1512. Parisiis *cum adnotat. Petr. de Ponte. 8.*
1514. Basileæ. *fol.*
1525. Argentorati *ex recens. Hyacinthi.*
- Lipsiæ. *sine anni nota.*
- 1534 & 51. Lugduni *apud Gryphium. 8.*
1537. Venetiis *apud Jac. Juntam. 8.*

1537. *Coloniæ apud Jo. Gymnicum*. 8.  
 ----- *Parisiis apud Simonem Colineum*.  
 1545. --- --- *apud Robert. Stephanum*. 8.  
 1547. *Lugduni apud Gryphium min. forma*.  
 1550. *Basileæ apud H. Petri cum Sulpicii & Gla-*  
*reani notis*.  
 1554. *Parisiis apud R. Stephanum*. 8.  
 1564 & 77. *Antuerpiæ apud Plantin. ex Pulman-*  
*ni recens*.  
 1578. *Basileæ apud H. Petri cum comment. Horten-*  
*sii & Sulpicii*.  
 1584 & 89. *Lipsiæ cum Bersmanni scholiis*. 8.  
 1612. *ex officina Raphelengii cum notis Hug. Grotii*.  
 1614. *Antuerpiæ cum Pulmanni var. lect. & notis*  
*Grotii*. 8.  
 1626. *Lugduni Batav. cum notis Thom. Farnabii*. 8.  
 1651. *Amstelodami apud Elzevir. cum notis Grotii*.  
 1658 & 69. *Amstelodami a Cornelio Schrevelio*.  
 1658 & 69. *Lugduni Batav. C. Schrevelii*.  
 1726. *Lipsiæ Gottl. Cortii*. 8.  
 1728. *Lugduni Batav. cura Fr. Oudendorpii*. 4.  
 1740. *Lugduni Batav. P. Burmanni*. 4.  
 1767. *Parisiis Typis Barbou*. 12.



## NOI RIFORMATORI

Dello Studio di Padova.

**A** Vendo veduto per la Fede di Revisione, ed Approvazione del P. F. Gio: Tommaso Mascheroni Inquisitor Generale del Santo Offizio di Venezia nel Libro intitolato *Collectio Auctorum Classicorum &c. stampato*, non vi esser cosa alcuna contro la Santa Fede Cattolica, e parimente per Attestato del Segretario Nostro, niente contro Principi, e buoni Costumi, concediamo Licenza a Nicolò Bettinelli Stampator di Venezia, che possa essere stampato, osservando gli ordini in materia di Stampe, e presentando le solite Copie alle Pubbliche Librerie di Venezia, e di Padova.

Data li 5. Settembre 1781.

( ANDREA QUERINI Rif.

( ALVISE VALLARESSO Rif.

( GIROLAMO ASCANIO GIUSTINIAN K<sup>e</sup>. Rif.

Registrato in Libro a Carte 19. al Num. 186.

Davide Marchesini Seg.

Addì 24. Settembre 1782.

Registrato in Libro de' Privilegj dell' Università de' Librari e Stampatori.

Marc' Antonio Manfrè.







I N  
MARCI ANNÆI LUCANI  
P H A R S A L I A M  
N O T Æ.

I N  
MARCI ANNÆI LUCANI  
P H A R S A L I A M  
N O T Æ.

IN LIBRUM PRIMUM.

Pag. 12 *Cognatasque acies*. Hinc inde, socerum & generum; parentes, liberos; fratres, cognatos, &c. *Rupto fœdere*. Quo convenerat, ut Pompejus Hispanias & Italiam, Cæsar Gallias, Crassus Asiam obtineret. Quod fœdus dissiluit morte Crassi apud Parthos, & Juliæ Cæsaris filiæ.

*In commune nefas*. Canimus certatum fuisse non sine nefario utriusque partis scelere, in oppressionem libertatis, communis salutis, adeoque Reipublicæ interitum.

*Erraret*. Ex Platonicorum mysteriis, ut umbræ insepulorum circa Stygiam paludem errare credantur centum annos, quibus vitiorum sordes eluantur, ut aliquando Elysii felicitate fruantur.

*Nullos habitura* &c. Bello civili vincentibus nullus decernebatur triumphus.

*Seres . . . Araxes*. Scythiæ populos, & accolæ Araxis Armeniæ fluvii significat.

Pag. 13 *Quod si non aliam* &c. Assentatio, quam vix excusaverit Ironia.

*Ultima funesta* &c. Ad Mundam, Hispaniæ urbem, Pompeji liberi devicti sunt, Cn. cæsus, Sextus fuga elapsus: Pompejanorum cæsa 30 m. Cæsar, ut victos obsideret, e congestis cadaveribus aggerem struxit.

*Hic, Cæsar* &c. Avertit orationem ad Cæsarem Neronem. *Perusina famer*. Perusiam Thuscæ urbem, quo L. Antonius confugerat, Augustus per famem in deditionem com-

pulit. *Mutinaque labores* &c. Antonius D. Brutum in Mutina urbe Cisalpinæ Galliæ obsedit; in quo obsidione levando uterque Consul Hircius & Pansa cæsus est: quem tamen Augustus obsidione liberavit.

*Leucas* &c. Insula in sinu Ambracio, item Promontorium Epiri, inter quod & Aëgium Octavius Antonium & Cleopatram navali certamine vicit. *Servilia bella*. Navale bellum intelligit in Siculo mari, ad quod Sex. Pompejus concitaverat armaveratque ergastula contra Augustum, a quo Sextus victus in Asiam profugit.

*Seu sceptræ* &c. Seu Jovis, seu Phœbi munus locumque velis &c.

*Nihil mutato* &c. Non metuentem incendium mutato auge, ut quondam Phaetonte.

Pag. 14 *Belligeri* &c. Jani belli pacisque indicis, ex instituto Numæ, templum apertum significabat urbem in armis esse; clausum, erat pacis signum: quod contigit sub Numa, iterum post primum Punicum bellum, & sub Augusto ter.

*Cyrrha* &c. Cyrrha, oppidum Phocidis non procul a Delphis, ubi Apollinis Delphici celebre oraculum.

*Nec se Roma ferens*. Romanum Imperium ad summum pervenerat; ideoque magna ruina casurum erat.

Pag. 15 *Obliquum* . . . *orbem*. Zodiacum intelligit.

*Invidiam Fortuna suam*. Hoc est, Fortuna nulli exterarum Gentium permisit, evertere statum Imperii Romani. Sed fœdus trium Principum causa fuit exitii Rom.

*In turbam missi*. In plures Principes divisi.

*Orbemque tenere in medium?* Tenere Orbem dubium cujus imperio parere debeat.

*Dum terra* &c. Dum aquas terra inferior sublevabit, & ær quasi orbis περιφέρεια continebit, & undique coercebit terram quasi centrum, pondere libratam suo &c.

*Qualiter* &c. Non secus atque Istmos Achaicus, idest, angusta terra inter duo maria, obstat quominus confundantur, & commisceant se Jonium ab Occidente & Ægæum ab Oriente.

Pag. 16 *Impatiensque loci* &c. In transgressu oppiduli cujusdam in Alpibus Cæsar dixisse fertur: *Mallet hic primus esse, quam Roma secundus*.

Pag. 17 *Famaque* &c. Ex largitionibus & ludis captans populi favorem, & plausu theatri gaudens, quod ipse erexerat; nec amplius curans novas vires colligere, sed fortunæ prioris beneficio se jam in tuto positum existimans.

Pag. 18 *Quo gens &c.* Aurum, luxus, omniumque vitiorum materia.

Pag. 19 *Seſtorque &c.* Venditor suorum ſuffragiorum populus, quum pecunia corruptus suos Magistratus venderet. Seſtores item appellantur, qui lucelli vilis ſpem ſequuti, bona damnatorum in auſtionibus coemebant, revendebantque eadem pluris.

*Rubiconis ad undas.* Fluvii, qui Italiam a Gallia inferiore diſterminat. Ad Rubiconem erecta ſtabat columna marmorea, in qua inſculptum erat hoc Senatusconſultum: *Imperator, miles, tirove armato, quisquis es, hic ſiſtito, vexillum ſinito, arma deponito, nec citra hunc amnem Rubiconem ſigna, arma, exercitumve traducito. Si quis ergo adverſus præcepta ierit feceritve, adjudicatus erit obſtiſtis Pop. Rom. ac ſi contra patriam arma tulerit, &c.*

*Rapti ſecreta Quirini.* Sacra myſteria Romuli in cælum translata.

Pag. 20 *Securus vulneris.* Negligens vulnus per ipſam haſtam ruit in venatorem.

Pag. 21 *Balearis verberare funda.* Lapide miſſo e funda Balearica. Baleares inſulæ duæ ſunt in mari Mediterraneo, hodie *Majorca & Minorca*; quarum incolæ erant funditores peritiſſimi.

Pag. 22 *Errantesque domus.* Scytharum, vel etiam Numidarum, *Quorum plauſtra vagæ riſe trabas domos.*

*Senonum motus.* Hi ulturi injuriam Fabii legati, qui contra jus Gentium Gallorum ducem haſta trajecerat, exercitum a Cluſio movent ad Urbem. Romanos occurrentes ad Aliam fluvium proſtigant, Romam contendunt, quam diripiunt, diruunt, incendunt, Capitolium 7 menses obſident. Tandem Camilli interventu Roma liberata eſt A. U. C. CCCLXV. *Cimbrumque &c.* Cimbri e Germaniæ Chersonæ, & Teutones poſt multos Rom. Coſſ. & Procoſſ. cum exercitibus fuſos, a Mario viſi tandem cæſique ſunt A. U. C. DCLII.

*Martem &c.* Secundum bellum Punicum: quamvis non hac iter erat Hannibali, Haſdrubali forte.

*Ecce facer belli &c.* Q. Caſſius & M. Antonius tr. pl. a Marcello & Lentulo Coſſ. Senatu excedere juſſi, quod pro Cæſare intercederent, urbe egreſſi, noctu, conducto curru, ſervillique veſte amiſſi ad Cæſarem profugerunt, & cum iis Curio.

Pag. 23 *Maniplos.* Militum contubernia, ordines, centurias

legionis decimæternæ; hanc enim evocaverat, reliquæ nondum convenerant.

*Bellorum o socii* &c. Oratio generis Deliberativi, hortatoria, continens conquestionem de injuriis suis, iniquitate adversariorum, a quibus re bene gestata indignè excipiantur; insectationem Pompeji; confirmationem militum a felici successus spe.

Pag. 24 *Subito*. Evocato & tumultuarie conscripto. *Partesque in bella togata*. Senatus paci, quam militiæ aptior.

*Extremi*. Inter remotissimas nationes; namque Pompejo favebant Reges Orientis; vel infima de plebe homines intellige.

*Ille reges* &c. Illine permissum triumphare ante annum triumphi legitimum ætatis tricesimum? Triumpharat autem de Jarba Numidarum rege Pompejus annum 24 agens.

*Suppressa per orbem*. Ne quid aliunde frumenti adferretur, quo urbs fame laborans Pompejo præfecturam annonæ delegaret.

Pag. 25 *Doceat descendere Sulla*. Qui annos 60 natus se Dictatura abdicavit, & privatus Puteolis egit.

*Cilicæne vagor*. Piratas a Pompejo devictos. *Lassi Pontica* &c. Mithridates Rex Ponti bellum gessit cum Romanis per annos 40, & a Pompejo tandem victus est. In turri a Pharnace filio obsessus frustra sumpto veneno mortem sibi ferro conscivit.

*Non cum duce*. Accipiat miles præmia vel alio Imperatore. Cui convenit, quod sequitur, *sub quolibet*.

Pag. 26 *Summi tum* &c. Quum in legione essent præter velites & pilanos tria militum genera, *hastati, principes, triarii*; & singuli in decem partes dividerentur, quibus partibus præficerentur Centuriones; primæ quidem cohortis, seu ordinis Triariorum, Centurio appellabatur *Primipilus*.

*Emeritique gerens* &c. Gerens quernam coronam donatam in testimonium servati civis, hostisque in prælio cæsi.

*Si licet, exclamat* &c. Hortatoria Oratio est Lælii ad Cæsarem, ut eo pergat, quo ire constituerit. Reprehendit verecunde, quod non suo jure militum opera utatur. Commemorat sua præclara facinora, & virtutem militum pro Imperatore suo navatam: promittit insuper suam operam, & ultro sacramento se obligat ad obeunda jussa Imperatoris, etiam impia, si sit opus.

*Oceani* &c. Quum Britanniam aggressus est.

*Per signa* &c. Victicia omnibus in locis; quibus jam per

decem annos castra metatus es; quia quotannis in statis castris hybernabant.

Pag. 27 *Moneta*. Ignis e castris nostris incendet statuam Junonis dictæ *Monetæ*.

*Metator*. Sunt in re militari *metatores*, qui præcedentes locum castris eligunt.

*Lemano*. Allobrogum lacu, Genevam & Lausannam urbes alluente.

*Vogesi*. Montis Lotharingiæ, ex quo Mosa fluit, apud Lingonas, Celtarum populos.

*Fame* &c. Nam Rhodano mixtus amittit suum nomen.

*Rutbeni*. Narbonensis Galliæ populi, flavi crinibus.

*Atax*. Fluvius ex Pyrenæo ortus. *Non ferre* &c. Non navigari a militibus Romanis.

*Varus*. Alpinus fluvius Italiam a Narbonensi Gallia disteminans.

*Quaque* &c. In ora Liguriæ arx est, & portus Herculis *Monæti*, quod pulsus hostibus ibi habitavit; vel quod nullus ibi cum eo coleretur: ὡς μόνος οἰκῶν.

Pag. 28 *Circius*. Sic dictus, quod omnia turbet & circumvertat, quominus portus naves in statione adversus Circium tueatur.

*Quaque* &c. Evocavit cohortes e Belgarum oris, quas fluxus ac refluxus maris faciunt, ut nunc maria sint, nunc terræ.

*Quos agitat* &c. Hoc est, o Philosophi, qui naturam mundi studio & labore investigatis.

*Menetis*. Metropolis & capitis Arvernorum in Aquitania.

*Aturi*. Fl. Tarbellorum in eadem Aquitania.

*Santonus*. Santoni Aquitanicæ Galliæ populi.

*Biturix*. Ejusdem Galliæ Aquitanicæ urbs. *Longisque* &c. Hastis pugnaces, vel longo bello subacti.

*Optimus* &c. Galliæ Belgicæ populi jaculandi peritissimi.

*Sequana*. Hujus nempe fluminis accolæ.

*Covini*. Covinus, vehiculum falcatum est, cujus multus usus fuit apud Gallos & Britannos in prælio.

*Nerviur* &c. Apud ferocissimum hunc populum Tetricus Sabinus & Arunculus Cotta cum quinque cohortibus in hybernis cæsi sunt fraude Ambiorigis; & apud Carnutes C. Fusius Cotta rei frumentariæ præfectus.

Pag. 29 *Gebennar*. Montes, qui Arvernos ab Helyiis discludunt, nivales.

*Immunis*. Amotis Romanorum prædiis.

*Genabos* &c. Oppidum istud ad Ligerim situm Cæsareis turmis haud amplius premitur.

*Tonse Ligur* &c. Gallia olim omnis fuit Comata. Ligures in Cisalpina primum capillos posuerunt.

*Teutates . . . Herus*. Teutatis nomine Mercurius, Hesi vero Mars appellabatur a Gallis, quibus diis humanas hostias sacrificabant, ut etiam Tanari, nempe Jovi.

*Ara Diane*. Diana templum habuit in Taurica Chersonesso, ubi humana advenarum victima ei sacrificabatur. V. Ovid. 4 Trist. El. 4.

*Bardi*. Apud Gallos *Bardi* dicti sunt, qui poeticæ studiosi erant. Est autem appellatio non gentis aut loci, sed ætæ slve ordinis.

*Et vos* &c. Post Cæsaris abitum restituistis diræ immanitatis religionem, & Sacra plusquam Scythica, humanis hostiis aræ admotis, & a tergo cæsis.

*Solis nosse deos*. Propter paradoxa & diversas a cæteris Sapientibus opiniones de Deo, anima, mundo &c.

Pag. 30 *Mors media est*. Idest, media morte pervenitur ad æternam illam vitam.

*Ignavum* &c. Quia turpe existimant mortem effugere.

*Orbem apertum*. Orbem nempe Germanicum intelligit; constat enim, Germaniam a Cæsare patefactam sequentibus Imperatoribus.

Pag. 31 *Invisaque belli* &c. Senatus mandat Consulibus, *Videant ne quid detrimenti Resp. capiat, Cæsarem persequantur, delectum habeant, exercitum conscribant*. Hi urbe continuo excedunt, Capuamque ad Pomp. profecti, summam Imperii ei deferunt.

Pag. 32 *Nec limine* &c. Nec quisquam in discessu subinde respexit, sed tamquam videndi cupiditate expletus, neque amplius videre cupiens, abiit.

Pag. 33 *Latiale caput*. Capitolium, vel Romam caput Latii, vel ædem Jovis Latialis in monte Albano.

*Cornuque coacto* &c. Quum nempe Luna conjunctis in unum cornibus repræsentaret Solem integra rotunditate.

*Fugiente per ortus* &c. In ortum retrocedente Sole, ne videret impiam cœnam Atrei Thyesti fratri proprios filios comedendos apponentis.

*Flebile sævi* &c. Scylla, saxum in freto Siculo, quam canibus marinis succinctam inguina fingunt, propter undas cavernis scopuli allisas, & latrare visas, jam flebile quiddam sonuit.

*Latinas.* Férias videlicet, quibus sacrificia fiebant Jovi Latiali in Monte Albano, eaque Populi Latini nomine.

*Scinditur in partes &c.* In duas partes divisa ascendit, divisionem & discordiam portendens.

*Thebanos imitata rogos.* Rogi, in quem eundem Eteocles & Polynices filii Œdipi apud Thebas mutuis concisi vulneribus fuerant coniecti, flamma in duas se partes divisit, æterni odii testis.

*Tethys majoribus &c.* Altius inundavit Oceanus occidentalis inter Calpen Hispaniæ terminum, & Abylam extremum Mauritaniam montem, pro quo videtur poeta posuisse Atlantam minorem prope Herculis Columnas.

*Indigetes . . . deos.* Qui ex hominibus inter deos relati sunt.

Pag. 34 *Quos seclis Bellona lacertis.* Corybantes & Galli numine Bellonæ & Cybeles afflati, seclis sibi humeris & lacertis, rotatoque capite saltantes vaticinabantur tristia.

*Galli.* Sic fuerunt hi Sacerdotes appellati, a Gallo fluvio Phrygiæ, ad quem sua Orgia exercebant; sive quod ex eo bibentes furerent.

*Ingens urbem cingebat &c.* Furia per urbem visa purpureos concutere crines, & flagrantem obviis intendere facem: qualis Agaven stimulavit in cædem filii sui Penthei, aut Lycurgum regem Thraciæ; qui, dum Bacchi odio vites excinderet, sua sibi crura præcidit: aut Herculem, qui ab Inferis reversus, immissa a Junone furia correptus, uxorem suam & liberos interfecit.

Pag. 35 *Luna.* Primi Etruriæ oppidi, cum portu, a cujus sinu, Lunæ curvaturam referente, nomen habere videtur.

*Nullo qua &c.* Dubito an *nullo semine* quasi sponte nata dicat, an rectius *mixto semine*: ita enim melius cohæret *discors natura*.

*Pomaria.* Spatium est post, pone, vel proxime murum; quod neque habitari, neque arari fas erat.

*Turba minor.* Minores Sacerdotes. *Ritu . . . Sabino.* Toga sic in tergum rejecta, ut ejus lacinia revocata hominem cingeret: a Gabiis Volscorum opp. mos ortus, cujus ci-ves ad subitaneum bellum ita cincti profecti, redierunt victores.

*Trojanam . . . Minervam.* Palladium ab Ænea e Troja in Italiam advectum.

*Qui fata dedim &c.* Quindecim viri, quibus Sibyllinos libros custodiendi inspiciendique potestas.



*Lotam &c.* Qui ut Galli Cybeles sacerdotes matrem Deūm Pessinuntiam in Almone fl. quotannis lavabant.

*Titiique sodales.* Apollinis sacerdotes, sic a titiis avibus, quas observare soliti sunt: dicti aliis a Tito Tatio. Vid. Tacit. lib. I Annal.

*Salii.* Salii duodecim Martis sacerdotes, ancilia, hoc est scuta (e quibus unum e cœlo cecidisse ferunt regnante Numa, imperio fatale) gestantes saltantesque.

*Flamen.* Flamines præcipue tres, Dialis, Martialis, Quirinalis: ita dicti a flammeo, croceo quodam velamine, quo tegebantur vice pilei, & in quo erat brevis virga, desuper habens lanæ aliquid.

*Dispersor fulminis &c.* Dispersos ignes & fulgurita in unum redigit, tacita cum prece terræ condit, & locum appellat Bidental.

Pag. 36 *Molas inducere cultro.* Salsas fruges, hordeum sale mixtum, quo frons victimæ, focus, & cultri aspergebantur.

*Impatiensque diu.* Si hostia aris admota refugeret, reluctaretur, mugitum ista daret, aut non placide caderet; ingratum censebatur sacrificium.

*Hostili de parte.* Aruspices imaginatione dividebant jecur in duas partes, *familiarem*, & *hostilem*; deinde ex utriusque partis habitu, plenitudine, colore &c. conjiciebant quid nobis, quid hosti esset eventurum.

*Parvusque . . . limes.* Præcordia indicat. Membrana illa, quæ cor & pulmones a jecore & liene dirimit, Græcis diaphragma appellatur.

Pag. 37 *Figulus.* Nigidius Figulus Pythagoricus, Astrologus summus, & Ægyptiis Astrologis præferendus.

*Nemeæum . . . Leonem.* Leonem ab Hercule in Nemeæ silva interfectum, & in stellas relatum.

Pag. 38 *Cælum Mars solus habet.* Mars solus dominus anni, in decima regione summum cælum tenens in Scorpione, cæteris planetis destitutis propria sua sede & hebetibus prævalebit, producetque suos effectus, bella nefaria.

*Edonis &c.* Baccha seu Mænas, ira dicta ab Edone Thraciæ monte, plena vino ex insula Ogygia proveniente.

*Hoste.* Externo. Hostis apud Majores nostros dicebatur, quem nunc *peregrinum* dicimus.

*Primor . . . ortus.* Ægyptum innuit, quo fugientem post Pharsalicam pugnam Pompejum Cæsar sequenturus erat.

Pag. 39 *Libyen.* Africam, quo se recipiant, qui pugnam Pharsalicam superfuert.

*Alpis.* Expeditionem Cæsaris per montes Pyrenæos in Hispaniam designat, expugnaturi Petrejum & Afranium, mox Pompeji filios ad Mundam.

*Consurgunt partes iterum.* Octavius & Antonius ulturi Cæsaris percussores Brutum, Cassium &c.

*Nova da mihi cernere.* Concede, ut videam pugnas navales alibi, quam ubi conspexi. Intelligimus autem, ipsam vidisse ea, quæ in mari Hadriatico, & ad Massiliam Cæsaris tempore gesta sunt, & nunc videre alias apud Siciliam, quæ ab Augusto contra Sextum Pompejum gerentur; & in Antonium & Cleopatram in mari Adriaco.

## IN LIBRUM SECUNDUM.

Pag. 41 *Sive parens* &c. Sive (ex sententia Stoicorum) omnia regantur fatali necessitate & legibus, quas ab orbe condito posuit Deus, quas semel jussit, quibus semper paret; sive (ut volunt Epicurei) temere omnia & casibus eveniant.

*Ergo ubi concipiunt* &c. Postquam igitur ex ostentis & vaticiniis innouit quantas clades allatura esset prodigiorum certitudo; indicta est juris dicundi statio seu intermissio, quod non nisi in publica calamitate, luctu, aut necessitate fiebat.

*Latuit plebejo.* Magistratus omnes sumpserunt plebejos habitus; neque a vulgo discernebantur veste. Ipsi Consules exuebant purpuram.

*Conclamata.* Ubi enim quis animam exhalaverat, conclamabant, & nomine ter vocatum jubebant æternum valere.

Pag. 42 *Invidiam* &c. Ne scilicet deos inter excitaret invidiam.

*Flavor . . . Suevos.* Bavaros, Polonos, Pomeranos, quibus cæsaries flava.

Pag. 43 *Nulla vacet . . . manus.* Omnes gentes Romam undique hostili animo petant.

*Dum nondum meruere.* Antequam civili polluantur sanguine.

*Vix tanti . . . ut neuter.* Civile bellum non erat movendum, ut neuter imperaret, idest, pro ipsa etiam libertate tuenda.

*Exsul limosa* &c. Marius a Sulla prælio victus, fuga ela-

bitur, ac in Minturnensium paludibus, calamis & palustribus herbis tectus, delitescit. Sed a militibus Geminiani prehensus, Minturnas in custodiam, ut publice necetur, abripitur.

*Depositum.* Reservatum ad septimum Consulatum.

*Pœnas ante dabat scelerum.* Tulit jam pœnas eorum scelerum, quæ perpetraturus erat postmodo Romam reversus. Pag. 44 *Hunc, Cimbrî, servate senem.* Marium scilicet sæviturum in Romanos, & inferias ex illis relaturum civibus vestris Cimbrico bello interfecdis.

*Hostilem in terram.* Mario infestam, qui eam subegerat, devicto Jugurtha.

*Et Pœnos pressit cineres.* Nam inter ruinas Carthaginis aliquandiu delituit. *Solatia &c.* Carthagini solatio erat Marius huc miseriarum adactus, Mario tantæ urbis excidium & ruina.

*Ut primum fortuna redit.* Quum C. Cinna Cos. ad populum referret de revocandis quos Senatus, ita volente Sulla, hostes judicaverat, & de adscribendo novorum civium X tribus veteribus XXXV, a dissidentibus Coss. in media urbe disceptatum est. Cinna, urbe pulsus a Cn. Octavio collega, sollicitat urbes Italicas, vires undique contrahit, servis etiam ad libertatem vocatis, reversum Marium sibi jungit, quadruplici agmine urbem intrant Cinna, Marius, Carbo, Sertorius, in adversarios desæviunt. Pag. 45 *In numerum pars magna perit.* Promiscue tam innocentes quam nocentes, ignoti pariter ac noti cadunt augendo dumtaxat numero.

*Spes una salutis &c.* Dederat quippe hoc suis signum, ut interficerent quoscunque ille non resalutasset, quibus salutantibus nihil responderet, aut quibus manum osculandam non porrexisset.

*Degener o populus.* O degeneres! Vix decorum esset tam turpi osculi obsequio meruisse ætatem vel longissimam: multo ergo vobis turpius nunc ignominiam subire viræ brevis gratia, quos reversus a bello in Mithridatem Ponti regem Sulla, utpote Marii munere vivos, interficiet.

*Vix te &c.* Vix mihi vacat flere te disceptum, o Bæbi, inter manus turbæ lacerantis membra discessisse, h. e. in varias partes sectum fuisse.

*Antoni &c.* M. Antonii clarissimi Oratoris caput abscissum Annius Trib. ad Marium cœnantem detulit.

*Truncos &c.* Fimbria, effusus Marii miles, Crassos patrem

& filium in mutuo alterum alterius aspectu laceravit.

*Tribunicio* &c. Locus ille in carcere, unde malefici præcipitabantur, maduit sanguine Licinii Tribuni magistratus sacrosancti.

*Violata* &c. Et quia cædes in ejus templo patrata fuit, & quia Pont. Max. erat Scævola.

*Illo fuit* &c. Intra dies quam inierat septimum Consulatum tredecim, morbo laterali & insania obiit annos natus 70.  
 Pag. 46 *Jam quot* &c. Transit jam ad horrendas clades inter Sullam ex Asia reducem, & Marium juniorem, vicesimo ætatis suæ anno Consulem factum. Hunc ad Sacripontum haud procul a Præneste Sulla fudit. Quum autem Præneste fugisset, & ibi a Lucr. Ofella Sullæ legato obsessus non posset evadere, mortem sibi conscivit. Sulla Lamponium & Felesinum Samnitium duces, qui ad Cos. obsidione liberandum advenerant, ad decimum a Porta Collina stadium consecutus magna strage fudit.

*Tunc quum pane* &c. Promiserat Marius Samnitibus, qui a suis partibus steterant, se translaturum caput Imperii a Romanis ad Samnites.

*Caudinas* &c. Caudinæ Furcæ, duo saltus sunt silvestres jugorum inter se perpetuitate juncti: ubi Romani a Samnitibus sub jugum missi.

*Periere nocentes* &c. Marianæ partis fautores: soli superfuere Sullani & ipsi nocentes.

*Busta* &c. Latebras quærebant in sepulcris, & lustris ferarum.

Pag. 47 *Scelerum non Thracia* &c. Non tot cædibus infames fuerunt, non tot capita postibus suis affixere, Diomedes Rex Thraciæ, qui equos humanis carnibus pavit; Antæus Libyæ gigas, qui hospites ad palæstram provocatos victosque occidit; Ænomaus, qui filię suæ procos curru consecutus interfecit.

*Quum jam tabe* &c. Postquam corrupta erant corpora, parentes eadem, si forte cognoscere poterant, furtim subtrahabant, ut sepelirent.

*Omnia Sullana* &c. H. e. Explorasse oculis omnia cadavera, Sullana pace jam incipiente, cædium nempe fine peracto.

*Quid sanguine* &c. Q. Lutatius Catulus, qui collega fuerat Marii, & cum eo de Cymbris triumpharat, ubi se a Mario morti destinatum audivit, in cubiculo suo recens calce illito, necdum persiccato, carbonibus accensis sponte suf-

focatus est. In cuius ultionem Catulus frater a Sulla jam petiit sibi concedi Marium Imperatoris fratrem, quem apud Luſt. Catuli sepulcrum, tamquam manes fratris placaturus, brachiis, cruribus, naso, auribus mutilatis, exsecta lingua, oculis demum effossis, servavit aliquandiu, ut per singulorum membrorum carnificinam moreretur.

*Inexpleto . . . busto.* H. e. cui nondum exequiæ factæ fuerant.

*Parcere morti.* H. e. protrahere mortem, ut acrior esset, & acerbior doloris sensus.

Pag. 48 *Fruſtrum.* Oculorum pabulum, & usuram voluptatis, quam percepturus erat Sulla agnoscendo Marium.

*Vidit Fortuna &c.* Fortuna Prænestino templo & cultu celebris passa est videre cives suos omnes simul, ensibus in corpora admissis, interfici tam celeriter, ut intra spatium, quo periret unus, perierint ipsi, populus integer.

*Latii jam sola &c.* Samnites nempe, strenui milites, qui soli ex Italis Mario & Cinnæ adhæserant.

*Ovilia.* Ovilia erant in Campo Martio loca septa, & cancellis conclusa, in quæ per pontes, qui erant angustæ viæ, ibant Centuriæ suffragia dicturæ.

*Numquam pana fuit.* Sensus est: sæpe aliis vicissitudinibus, numquam pœna tot juvenes periere.

*Victores &c.* Cædentibus vix erat spatium ferri rotandi, cæsis vix spatium cadendi.

*Peraguntque, &c.* H. e. Mortui suo pondere vivos necabant.

*Miseri tot millia &c.* Centum civium M. In his Senatores XC, Consulares XV, Equestris ordinis M. M. D. C.

Pag. 49 *Hærentes.* H. e. cadaverum tumulis detentas.

*His meruit tumulum &c.* Dictatura abdicata Puteolos secessit: ibi interiit: & magno honore in funus elatus, in Campo Martio crematus est, & sepultus.

Pag. 50 *Et in tanta &c.* Et, ut alias, *pronæ* ponitur. Sensus autem est: Brutus pars ipse populi, in tanta ejusdem populi consternatione, nihil pavebat.

*Helice quum verteret &c.* H. e. *Quum* Ursa Major sua plaustra, polumve circumvolveret. Finit autem Helice seu Calisto filia Lycaonis regis Arcadiæ, in qua Parrhasium oppidum.

*Omnibus expulsa &c.* Oratio Brutij deliberativa est; cujus scopus est & propositio, Cæsaremne an Pompejum debeat sequi; an continere se in otio, & pacem tueri. De ejus consilio alterum se secuturum.

*Virtutis* &c. H. e. O solum perfectæ virtutis exemplar.

*Absolvere*. H. e. Probare.

*Hos polluta domus*. Stupris & adulteriis cooperta, propter quæ in eos animadverterent leges, quas in bello elidunt ac evadunt.

*Permiscenda fides*. De obæratīs loquitur, qui privatam fidei suæ ruinam permiscere publicæ cupiebant.

Pag. 51 *Ingeret omnis* &c. Omnis belli eventus submittet se tibi, & in bellum conficies.

*Quis molet in isto Ense mori?* Omnis videlicet, quamvis ab alio necetur, cædis suæ causam in te transferet, & sceleri tibi vertet.

*Sicut cælestia* &c. Ut cælestia corpora constanti lege moventur, licet inferiora, ut tellus, aer telluri propior, & alia variis vicibus subjiçantur; ita, o Cato, in mediis civilis belli motibus pacem melius tueberis inconcussus ipse & constans.

*Quam late* &c. Quamgratum erit Cæsari, quantum placebit ipse sibi, si bellum civile tibi, Cato, placuerit, teque Pompejo subjeceris. Tunc se solum pronuntiabit liberum, quum neminem in suis castris superiorem habebit, non Senatores, non Consules, non procures alios, qui summam imperii Pompejo, privato Duci, detulerunt.

Pag. 52 *Post bellum* &c. Uter ipsorum victor tandem molitus fuerit aliquid contra leges, & libertatem Reip., adversus hunc me acerrimum profiteor hostem.

*Summum* &c. Catonis oratio gravis & plane Catoniana, hoc est Stoicæ rigiditatis plena, tota in hoc parata est, ut Brutum refutet, & ejus argumenta de abstinendo ab armis civilibus diluat. Bruti argumentis opponit, honestum, necessarium, & pium, patriæ libertatem defendere, quum illud non facere sit impium. Largitur quidem civile bellum nefarium; sed transfert in fatalem necessitatem.

*Sic eat*. Sic ita, ut dii velint sibi litari universo Rom. sanguine. Cur meum morer? O utinam ad patriam expiandam, libertatemque imperii tuendam, diis superis, inferisque sufficeret caput hoc meum omnibus diris devotum, ut Pub. Decii quondam pro salute exercituum in prælio contra Samnites!

Pag. 53 *Post me regnare* &c. Neque enim me extincto invenietur, qui libertatem armis tueatur.

*Quin publica* &c. Epilogus, quo hortatur Brutum, ut consociatis animis & armis, auspiciâ Senatus, & Pompeji se-

quantur. Ea *publica* quasi populi Rom. vocat, quum Cæsaris hostilia sint.

*Pulsata sonuere fores.* Pulsat Catonis fores Marcia, & ingreditur. Catonis uxor fuerat, quam ille, tribus jam susceptis ex ea liberis, amico Hortensio postulanti gravidam cesserat. Hortensius autem moritur sub initium civilis belli; cui vix persolutis exequiis Marcia Catonem adit, & illum, ut se iterum ducat uxorem, effusis lacrimis & precibus exorat.

Pag. 54 *Cinerosque* &c. Aspersa cineribus Hortensii mariti.

*Illibata.* Casta nempe, utpote quæ non concubitus causa petantur.

*Cornelia bello?* L. Scipionis filia, quam post mortem Julii duxit Pompejus, jamque sub initium belli Mytilenensem ablegavit; victus autem, fugiensque in Ægyptum, eam receptam fugæ comitem habuit.

*Infulaque.* Conjunct. copulat. *que* pro *nec* sæpe adhibet Poeta.

*Gradibusque* &c. Neque lectus in honorem Genii sternitur in aula, stragulo acupiscito auroque intertexto lectus.

*Turritaque premens* &c. Neque Cybele turrita, quæ eadem est cum Vesta, vetuit hanc nuptam contingere limen pedibus. Varro enim opinatus est, ideo sponsas limen non tetigisse, ne a sacrilegio inchoarent, si deposituræ virginitatem, calcarent rem Vestæ, idest Numini sanctissimo consecratam. Aliis legendum placet *vitat*; & *matrona* accipiendum, non de pronuba, sed de ipsa nova nupta; mos enim erat apud Romanos, ut domo egrediens nova sponsa, limen transiliret.

Pag. 55 *Suppara.* Supparum subuculæ, seu tunicæ genus peçtora complexum. Cur autem dicatur *nudatos lacertos*, ea fortasse caussa est, quod Marcia recens a funere Hortensii, nudis ad planctum peçtore & lacertis veniebat.

*Non soliti* &c. Non occinebantur, pro more nuptiarum a Sabinis tracto, jocosæ sales, & convicia.

*Studiisque* &c. Partium studiis minime occupato.

*More Quiritis.* H. e. More veterum Romanorum.

Pag. 56 *Mania Dardanii* &c. Capuam, a Capy Trojano, ut quidam volunt, conditam.

*Hinc summa moventi.* Lege, moventis.

*Umbrosis mediam* &c. In regione plana, qua Apennini latus modice assurgit.

*Collesque coercent* &c. Apennini montis colles signat  
coer-

coercesque a dextra in imo sinu Tyrrheni Maris Urbs Pisarum; a sinistra vero Ancona Piceni urbs in Adriatico Mari.

*Hunc fabula primum* &c. Fabula est Phaetontis sorores ad ripas Eridani in populos fuisse versas; & hunc fluvium, exhaustis cæteris & desiccatis, parem fuisse extinguendis Phæbeis Ignibus Phaetontis casu & imprudentia exsuscitatis.

Pag. 57 *Et Scythicas* &c. Sexaginta amnes receptos in Mare Ponticum deferret.

*Nocturna* &c. H. e. opacas & tetras exhalans nebulas.

*Marica*. Paludis Minturnensium, quæ nomen habuit a Nympha Marica, uxore Fauni, Latini matre.

*Vestinis* &c. In Lirim se exonerant flumina Vestinorum.

*Macra moratus* &c. Macra innavigabilis, quia vadosus, juxta Lunam, Etruriæ portum, in mare prolabitur.

*In templa Lacinia*. Juno Lacinia in Calabria colebatur in templo ditissimo atque sanctissimo, quod ei constituit Hercules, Lacinio latrone illic occiso.

*Terrasque impelleret aquor*. Italia, & Sicilia conjunctæ aliquando fuerunt; sed

. . . venit medius vi pontus, & undis

*Hesperium Siculo latus abscidit.*

Virg. *Æneid.* 3.

*Cæsar in arma furens* &c. Cæsar cædis cupidus gaudet in Hesperiae finibus & agris resistentes hostes invenire, & usque configere.

Pag. 58 *Saxorumque orbes*. Saxorum acervos, vel saxa rotunda tormentis emittenda.

*Pugnatque minaci* &c. Gentes Pompejo fidæ cum Cæsare minis terrorem incutiente pugnant. In comparatione autem sub Austri nomine Pompejum, Euri Cæsarem, Maris populum intellige.

*Trepidi . . . Libonis* &c. Refert qui duces Pompejani terrore compulsi fugæ se dederint; e quibus Libo tum forte Præfectus Etruriæ, ac Thermus Umbriæ; qui, adventu Curionis Cæsariani Legati cognito, cum cohortibus perfugisse dicitur l. 1. de Civili Bello.

Pag. 59 *Neglecto . . . tergo*. Hostibus in fuga exposito.

*Et nullas . . . cohortes*. Nam Cæsari jam victori se dederant.

*Quamquam firmissima pubes* &c. Duas fortissimas legiones intelligit jam pridem Cæsari subtractas, quum Bibulus post Crassi eadem mittendus esset in Parthos. Ex istis alteram dederat Pompejus Cæsari ante Civile Bellum, ut sup-

*Lucanus.*

b



pleret *Gallica damna*, h. e. a Gallis illata, Titurio Cotta-  
que Cæsaris Prætoribus in Ambiorigis conspectu cæsis. Utra-  
que igitur legio, quæ ad Parthicum bellum mittenda jam  
fuerat, Cn. Pompejo traditur; & ab ipso, donec evocaret  
ab Bellum Civile, Scipioni socero usus utriusque conceditur.

*Tua classica servat*. H. e. sub te militant cohortes,  
quibus Pompejus forum sepserat, M. Tullio defendente Mi-  
lonem in cæde Clodii.

Pag. 60 *Amne soluto*. Ponto interrupto; nam *ligatus* dicitur  
amnis, qui pontem supra se habet.

*Ganges*. Indiæ fluvius, qui Cyro & Alexandro moram  
injecit.

*Et ad tutas &c.* Intra Corfinium.

*Nefas belli*. Scelus nempe maximum in bello Ducem a  
suis hosti tradi.

*Heu quanto melius &c.* Quanto majori honori fuisset  
morte affici, quam vita donari! dedecus summum, immo  
supplicium maximum erat civi Romano ignosci, quod pa-  
tria & publica arma hostilibus & privatis prætulerit.

Pag. 61 *Dis melius &c.* Dis gratia, quibus placuit, a Cæ-  
sare potius, quam a nobis, initium capessere nefaria hæc  
bella.

*Exsertique &c.* Notat Sulpitius exsertum eum dici, qui  
habet humerum, & brachium dextrum nudatum. Cethegus  
autem exemplo Majorum suorum tunicam non gerebat, sed  
pro tunica cinctum, quod solas partes infra pectus velabat.

Pag. 62 *Quamquam &c.* Quamquam doleo vilem te cum istis  
miscere, & me tibi furenti Romam opposuisse. Utinam vi-  
veret Crassus, ut ejus manu ob similem causam caderes, non  
secus ac in Bello Servili dux latronum Spartacus!

*Hinc Consul uterque*. L. Lentulus, & C. Marcellus.

*Non tam cæco &c.* Non tam cæca es, Fortuna, nec im-  
puderis, ut id patiaris.

*Multisne &c.* Invidiose. Duobus, neque exactis lis.

*Rheni gelidis &c.* Per invidiam Pompejus fugientem in-  
ducit a Rheno Cæsarem; nam devictis Germanis in Galliam  
se contulit: eumque pontem, quem in Rheno struxerat,  
non quod Germanos fugeret, sed ne eisdem deinceps usui  
foret, rescissum voluit. Per invidiam item Cæsar, incerti  
in Oceano Britannico æstus causam interserens, Britannis  
ipsis ultro lacessitis terga dedisse dicitur.

Pag. 63 *Qui quum signa &c.* Qui intra spatium duorum men-  
sium piratas Cilicas maria latrocinii infestantes coercui, &

procul a mari in Solos, angustam urbem Ciliciæ, sese recipere coegi.

*Indomitum Regem.* Mithridatem, qui cum Romanis 40 annos bella gessit. Hunc Sulla cognomine Felix attriverat; Pompejus ad mortem adegit.

*Umbras nunquam flecente Syene.* Oppidum est Thebaidos in confinibus Ægypti atque Æthiopiæ: directæ & perpendiculari linea Tropico subjicitur, ac proinde Sole Cancrum ingresso, in neutram partem medio Solstitii die umbras flecit.

*Tethynque fugacem.* Fluens ac refluens fretum Gaditanum intelligit.

*Notique &c.* Aurei velleris ab Iasone erepti notissima historia est.

*Mollisque Sophe.* Luxu soluta Asiæ regio.

Pag. 64 *Nec matura &c.* H. e. Nec petunt signa profectiois in bellum dari; videbatur enim ipsis præ timore minus maturum, sive opportunum tempus.

*Urbis est Diçlæis &c.* Brundisium urbs habitata a colonis Diçlæis, h. e. Cretensibus, a Diçle, Cretæ oppido.

*Mentitis Thesæa velis.* Nigris, præ festinatione & nautarum oblivione, iisdem quibus solverant Athenis, contra mandatum patris Ægæi, qui præceperat, ut, si victor occiso Minotauro rediret filius, alba suspenderent carbasa.

*Nec tamen &c.* Neque tamen satis fidus foret hic portus, nisi objecta insula fluctus ventosque exceptos frangeret.

Pag. 65 *Cerannia.* Epiri montes.

*Sason.* Insula contra Calabriam, inter Epirum & Brundisium.

*Ergo ubi nulla &c.* H. e. Nulla spes Italiæ tenendæ, quæ Brundisium fugientibus erat a tergo.

*Cui firmior ætas.* Cn Pompejum filium natu majorem missurus ad devictas a se gentes auxilia petitum.

*Meum.* Beneficio meo in pristinum fortunæ habitum restitutum. *Pharnacis.* Filii Mithridatis, cui a patre deficienti Pompejus confecto bello Bosphorum concesserat.

*Qui Latior &c.* Consules, quorum nomina in Fastis præfigebantur suis annis.

Pag. 66 *Sed molibus undas &c.* Cæsar, ut Pompejum interciperet, exitus Brundisini portus præcludere conabatur.

*Persien.* Antonomasia Xerxem denotans, Persiæ regem. Ille olim, in Hellesponti freto ponte ex navibus ducto, ab Abydo urbe Asiæ in Seston Urbem Europæ pedibus trajecit exercitum. Quæ duo oppida nunc *i Dardanelli* vocantur.

Pag. 67 *Quum vela &c.* Quum Xerxes Athon Macedoniae montem abscondi jussum circumnavigaret.

*Buccina.* Quæ vigiliarum distinctiones indicare solet.

*Ultima virgo.* Hic signis cælestibus ordo est: Virgo, Libra, Scorpium &c. Chelæ pertinent ad Scorpionem, utpote ejusdem brachia. At sciendum Veteres locum cæli inter Virginem, & Scorpionem non semper Libræ, sed plerumque Chelis assignasse, quod Libra iisdem veluti concludatur. Hiuc Virgilius post Libram ponit Chelas Georg. lib. 1, v. 33. Sensus itaque Auctoris est, totum signum Virginis ortum fuisse ante Solem, qui cum Chelis, seu Libra surgebat. Ac proinde Pompejum Brundisio discessisse summo mane circa medium Septembrem colligimus.

Pag. 68 *Ora petunt.* Ostia, portus. *Pelagusque &c.* Dolent Pompeji classem jam evasisse.

*Artior Euboica &c.* H. e. Angustior Euripo, ubi juxta Chalcida interluit Euboicam insulam, & Bæotiam.

*Hic basere rates &c.* Hic uncis ferreis retentæ fuere geminæ Pompejanæ rates; & earum militibus ad litus pertractis tumultarium per noctem prælium conseritur.

*Ut Pagasæ &c.* Ut Argo olim, qua Jason cum Minyis e Pagasæ, Thessaliæ oppido, solventes petebant Colchos Phaside fluvio celebres, transmissa per Cyaneas seu Symplegadas insulas, quæ concurrere inter se finguntur, e collisione insularum deminuta est parte puppis extrema.

*Subducta est &c.* Liberata a concussu montium.

*Jam Phæbum &c.* Jam Orientis color e pullò in croceum, mox roseum mutatus, prænunciabat Solis ortum appetere.

Pag. 69 *Prædonem.* Per Synecdochen, Cilicas.

*Cum conjuge &c.* Cornelia, ac filiis Cnejo ac Sexto.

*Pharia busto &c.* Ægyptiaca arena destinatur sceleratæ cædi, & tristi sepulcro Pompeji.

## IN LIBRUM TERTIUM.

Pag. 71 *Toris: semperque potentes &c.* Cum conjuge: namque Cornelia fatalis est & ominosa maritis. P. Crasso prius, qui perit apud Parthos, tibi jam futura æque pernicio.

*En! nupsit &c.* Improbatur Pompejum, quod festinanter

nuptias novas contraxerit cum Cornelia, quam invidiose pellicem vocat.

Pag. 72 *Nunquam tibi* &c. Mei manes monebunt usque esse te Cæsaris generum: & frustra tentabis abscindere bello jas affinitatis.

*Te facit* &c. His verbis ei mortem denuntiat.

*Hospita*. Dyrrhachina.

*Nec vincere* &c. Nec tanti æstimabat unam victoriam, ut vellet bellum protrahere.

Pag. 73 *Gnarus & irarum* &c. Sciens plebis animos vel abalienari fame & penuria, vel conciliari copia annonæ & largitione.

*Metus*. Obedientia.

*Timere*. Studium, fidem, obsequium præstare.

*Ne rupti* &c. Vide pag. 57.

*Bellaque Sardoas* &c. Valerius missus est frumentatum in Sardiniam.

*Ubere vix* &c. Vix ipsa Africa has insulas fertilitate superat, quum Austris cessantibus, & Borea Zonam torridam versus nubes agente, largo rore perfusa annum uberem efficit.

*Vincula Rheno*. Vel propter pontem in Rheno constructum, & mare Britannicum tum primum a Romanis navigatum; vel propter utriusque accolas devotos.

Pag. 74 *Vadantem*. Lege *vadentem*.

*Et qua Pomtinas* &c. Via Appia dividit paludem Pomtinam in Volscis.

*Sublime nemus* &c. Nemus Aricinum, in quo colebatur simulacrum Scythicæ Dianæ, huc ab Oreste translatum a Taurica regione, cæso rege Thoante.

*Quaque iter est* &c. Qua ad Albam longam eunt Cossacrificatum in Latinis feriis, ut supra pag. 33.

*Di! melius* &c. Diimelius prospexerunt, quod a cive potius, quam ab externo hoste inferatur bellum hoc Urbi, a timido Duce Pompejo desertæ.

*Phæbea palatia*. Ædem Palatinam Apollinis.

Pag. 75 *Curules*. Sedes majorum magistratuum, Consulum, Prætorum, Censorum, Ædilium curulium.

*Censere*. H. e. Decernere quidquid Cæsari collibuisset.

*Tamen exit in iram* &c. H. e. Irascitur Libertas, & dat animos Metello Trib. plebis, ut Cæsari resistat ærarium effracturo.

*Sanguine sacro*. Nempe Tribunicio; Tribunicia enim potestas sacrosancta erat.

*Crassumque* &c. Execrationibus Atteji Trib. pleb. impetitus Crassus misere in Parthis periit.

Pag. 76 *Sunt quot* &c. *Lege quor.* Converte bellum in hostes.

*Pacis ad exhausta* &c. Non publica egestas, sed iniquum bellum te cogit thesaurus longa pace congestos diripere.

*Libertas, inquit* &c. Libertas populi oppressa, obnoxia est libertati illius, qui oppressit.

*Ocius avertat* &c. Quin ocius auferat thesaurum hunc, cujus fortasse causa bellum hoc dirum a Cæsare motum est.

*Damna movent* &c. H. e. *Ærarium* exhaustum detrimento est populo libero, suisque legibus tuto; sed populi servientis egestas Domino (Cæsari) perniciosa est, non ipsi populo.

Pag. 77 *Quo te Fabricius* &c. Aurum a Pyrrho oblatum, ut patriam desereret proderetque, recusavit Fabricius ad regem legatus.

*Præata est* &c. Præda novissima, quæ ante currum Pompeji triumphantis præata fuerat, devictis Mithridate Ponti, Tigiane Armeniæ, Aristobulo Judææ regibus.

*Fatidica Cephisos aqua.* Oritur Cephisos amnis a montibus Phocidis oraculo Delphico claris. *Cadmeaque Dirce.* Dirce fons vicinus Thebis a Cadmo positus.

*Piræaque manus* &c. E Pisis opp. Elidis, juxta Alpheum fluvium, quid dicitur subter mare ferri ad Aretusam fontem Siciliæ.

*Trachinius.* A Trachine, quam Hercules condidit sub Æta monte Thessaliæ.

Pag. 78 *Quercusque silentes.* Dodoneas quercus non amplius responsa dantes, fugatis columbis fatidicis.

*Exhaustæ totas* &c. Athenæ, utcunque delectu prius exhaustæ, e navalibus tamen suis Phæbo dicatis mittunt tres Salaminias naviculas; quæ testentur Salamina esse veri juris Atheniensium, non Megarensium, uti olim controversum erat.

*Nec Eois* &c. Non cedens Parthis arte mittendi sagittas.

*Dardaniam* &c. Heleno & Andromache Dardanis regnatam maritimam illam Epiri urbem.

*Enchelia versi* &c. Illyrii populi, quorum urbs Cadmi & Harmonies in serpentes conversorum est monumentum. Ἐνχελὺς autem anguilla est *longa cognata colubra*, ut ait Juvenalis Sat. 3.

*Aporytis* &c. Insula cum fluvio cognomine. Dicitur autem Colchis, idest, Colchica, quia Medea & frater ejus Ap-

syrus ab eadem ibi laceratus, ex Colchis erant.

*Temerato litore.* Occupato & violato; nam multas gentes in ipso cursu navigationis violarunt Argonautæ, & miscuerunt ignotas gentes temerandis hospitibus.

*Pholoe mentita* &c. Mons Arcadiæ, Pholo habitatus aliisque Centauris, qui, quum primi ab equis dimicarent, procul visi erant bifformes.

*Bistonias* &c. Grues ita dictæ a Bistone Thraciæ stagno. Pag. 79 *Celenæ.* Urbs Phrygiæ, quæ luget fatum Satyri sui Marsiæ; qui inventis, quas Pallas abjecerat, tibiis fretus, Apollinem in certamen Musices provocavit, & ab eo victus excoriatus est. Versus autem in fluvium sui nominis cadit in Mæandrum fluvium sinuosum, & per plana variis flexibus in fontem recurrentem.

*Instabilis.* Quondam insula LXX passus a terra dissita, sed aggere Alexandri post juncta Continenti.

*Phanices primi* &c. Cadmus cum Phœnicibus suis litterarum figuras vel invenisse, vel in Græciam intulisse fertur.

*Biblor.* Nilus biblum gignit, sive papyrus, unde paginæ candidæ fiebant.

Pag. 80 *Pellæus* . . . *Duxtor.* Alexander sic dictus a Pella, urbe Macedoniæ.

*Quique bibunt* &c. Indicam intelligit arundinem, ex qua hodie fit saccharum.

*Et qui tingentes* &c. Cathæi Indiæ populi pulchritudinem omni modo adstruunt: regem ob formam eligunt, capillitia tingunt &c.

*Carbasæ.* H. e. lineas vestes gemmis distinctas zonis pariter gemmatis adstringunt.

*Quique suas* &c. Brachmanes, Indiæ Philosophi.

*Amani.* Montis Ciliciæ ob duritiem sterilis.

*Ignotum* &c. Scilicet in orbem positum in zona temperata, ubi umbræ meridianæ Occidentem spectantibus semper dextræ. Porro incolæ Arabiæ Felicis vates spectat, quibus umbræ aliquando sinistrae, Sole in Cancri Tropico existente.

*Carmanosque ducet* &c. Asiæ populos inter Persidem, & Indiam; quibus sub Tropico Cancræ, vel ulterius positæ Ursa major non tota occidit, & Bootes, utpote Horizonti propior, exigua noctis parte lucet.

*Æthiopumque solum* &c. Regio Æthiopiæ sub Æquatore Australem Tropicum versus ita posita, ut pars nulla Zodiaci oblique excurrentis eidem recte immineat, exceptis pedibus Tauri, qui extra Zodiacum protensi Æthiopico solo

respondent. Porro Taurus procidentis instar inter signa pingitur.

Pag. 81 *Et incertum* &c. Euphrates infra Seleuciam aquas suas cum Tigride miscet, & nomen etiam.

*Pbaria . . . unda*. H. e. Nili.

*Contenti* &c. Cæde nimirum Crassi.

*Quo Cræso fatalis* &c. Halys est fluvius Lydos a Medis dirimens, juxta quem Cræsus a Cyro victus & captus est, deceptus ambiguo Oraculi responso:

*Cræsus Halyn penetrans magnam pervertet opum vim*.

*Quaque fretu* &c. Qua per Bosphorum Cimmerium emissas undas Mæotidis paludis excipit Pontus Euxinus, quas inde Bosphorus Thracius in Propontidem egerit, & Helle-spontus in Ægæum. Poeta ergo significat, maria omnia inferiora a Ponto Euxino originem ducere, atque ita Herculeis columnis gloriam aufert, per quas immittitur Oceanus Occidentalis.

Pag. 82 *Longaque Sarmatici* &c. Scythiæ populi, qui sitim famemque levant epoto equorum sanguine.

*Non, cum Memnoniis* &c. Nec Cyrus, nec Xerxes, nec Agamemnon tot regum Duces fuere, quot fuit Pompejus ipse.

*Effusis numerato* &c. Singulis singulas mittere jussis sagittas, exercitum numeravit.

*Non corniger Hammon* &c. Neque Africa cessavit auxilia mittere, in cujus regione Cyrenaica deserta & arenosa Jovi Hammoni sub specie Arietis culto templum consecravit Liber pater.

*Phocæis* &c. Massilienses; Phocæenses enim, origine Græci, ab Harpago Cyri præfecto puls, in Galliam Narbonensem transmigravere, ubi Massiliam condiderunt.

*Semper in externis* &c. Legi fide sua modeste & constanter exposita, dissuadent bellum civile; sibi ut liceat extra partes esse petunt: non esse sui judicii discernere utra causa sit justior; sed quidvis potius pati se esse paratos, quam armatum Cæsarem admittere.

Pag. 83 *Secretumque damus*. Secessum, quo confugiant cives, qui volunt esse ab illis immunes. *Traherentur* &c. Absit, ut manus nostræ imbuantur sanguine eorum, quibus cum sacra nobis intercedunt jura.

*Si Cælicolis* &c. Neque nobis causas vestras expendere, aut ad partes ire magis fas est, quam hominibus hoc idem facere liceret, si dii inter se dissentirent, aut iis arma, ut olim, gigantes Terræ filii inferrent.

*Sortesque. Legendum sortisque.*

*Sit mens ista &c.* Utinam sociæ gentes omnes bello civili se immiscere recusent! Belli hujus statim finis aderit, nisi armaveritis externos, qui putant sibi fas esse bellum civile gerere.

Pag. 84 *Sit locus &c.* Sit locus exemptus civili bello, & quo in colloquium ac fœdera, si Superi consulant Romæ, tuto conveniatis.

*Non pondera &c.* Nullius ponderis, aut momenti sumus ad summam victoriæ, quibus numquam felix successus in bello fuit.

*Obiectum Pano &c.* Qdum Saguntini vim Punicam ulterius nequirent arcere, aurum, argentum, pretiosa quæque, liberos conjugesque a se cæsos, se denique in ignem in foro extructum præcipitavere.

Pag. 85 *Sed si solus &c.* Vellent me solum urbem ingredi sine exercitu, & exceptum dolo prodere.

*At enim &c.* At vero nolunt bello civili pollui.

*Committere.* H. e. Conjungere.

Pag. 86 *Raptisque &c.* Cæteris urbibus summa rapiditate capitis, una hæc diuturna obsidione vincitur; ac proinde summæ laudi vertendum eidem est, quod successus fatales Cæsaris retardarit.

*Artet humum.* Cohibeat terram, ne sideat ac defluat.

*Lucus erat &c.* Celeberrima hæc luci descriptio, inter hujus Auctoris locos omnium pulcherrima, præcipuo studio ab eodem adornata est. Ac profecto non longe abest a veteris poeseos sanitate & gravitate. Hanc Torquatus noster æmulatus est elegantissime.

Pag. 87 *Præbentibus.* Legit H. Grotius *ferientibus*. Sensus est: Arbores horrent ipsæ per se, quin aura agitentur terrorem sibilis incutiente.

*Putrique &c.* Robora nimirum putrefacta, & exesa pallore ipsa suo augent formidinem.

*Non vulgaris &c.* Non ita milites metuunt numina, quorum figuras in fanis novere, ut ignotos sibi luci deos.

Pag. 88 *Silvaque Dodonis.* Scilicet ingentes quercus Jovi Dodonæo sacræ.

*Plebejos &c.* Quod nempe cupressus, utpote rara arbor, divitum tantummodo feretris intexeretur.

*Et tantum miseris &c.* Loquitur ex Stoicorum sententia, ne ipsos quidem deos posse quidpiam in improbos, si fato



prospero nati fuerint; posse autem in miseros, quod fato miseri sint.

*Annum &c.* Agricolaë scilicet raptis sibi plaustris & juvenicis, quibus cæsæ arbores veherentur, flevunt annum soli vacantis ab aratro, h. e. annum sterilem.

*Stellatis axibus &c.* H. e. Tignis, stipitibus, seu truncis arborum cancellatim in stellæ modum dispositis, directis, transversisque, quibus aggerum latera colligabantur, & muniebantur.

*Causa reperi latentis.* Ita enim promovebantur, ut sua sponte procedere viderentur, utpote quæ funibus nervisque latentibus agebantur.

Pag. 89 *Ballistæ.* Machinæ bellicæ jaciendis longe saxis, & sagittis eminus intorquendis aptissimæ.

*Testudine.* Testudo proprie est machina lignea subjectis rotis, quæ tegumentis suis testudinis tergum referebat, tegebatque milites, ut tutiores essent. Hic autem significat seriem scutorum dispositam supra capita in morem squammarum, qua protecti milites sagittas, saxa, telaque alia declinabant.

*Vinea.* Machina tabulatis, cratibusque constrata, cujus pluteis, h. e. tabulis, & asseribus protecti milites murorum fundamenta subruabant.

Pag. 90 *Aries.* Trabs ingens, adunco præmunita ferro, & arietis formam referens.

*Stabilis . . . area.* Compingitur in modum areae ac stabilis basis, ut in ea naumachia edi posset & pugna stataria.

Pag. 91 *Stæcados arva tenens.* Stationem ad insulam Stæcada habens.

*Et emeritas &c.* Sic naves vocat per vetustatem inutiles, quas reficiunt, ducta metaphora a militibus, qui emeritis stipendiis ab armis tandem conquiescunt.

*Et plures &c.* H. e. & quæ pluribus remis aguntur, quinqueremes.

*Ordine contentæ &c.* Biremes Liburnæ celeres, a Liburnis pop. Dalmatiæ, quibus in usu erant, dictæ. *Crevisse.* Attollere sese.

Pag. 92 *In transtra cadunt.* Remis insurgunt, deinde in transtra cadunt diductis ad pectora remis.

*In puppim &c.* Congressus impete repulsæ dissiluisse in puppim.

*Laxata classe.* H. e. Latius extensa.

*Quoties astu* &c. Remis hinc inde impelluntur maris fluctus in diversas partes, non secus atque venti, ubi in contrarium ab æstu maris aguntur, undas rapiunt.

*Percussa* &c. Naves in robustam & firmam Bruti prætoriam adæ rostris infixis illi adhæsere velut captæ.

Pag. 93 *Nullique perempti* &c. De puppe ita prominentes pugnabant, ut, qui caderent, non in navem suam, sed in hostilem caderent, vel in mare.

*Irrita tela* &c. Frustra jacta in eos, qui pugnant e navibus.

*Aplustre*. Ornamentum navis, quod summo malo imponitur.

*Telis*. Duobus ex oppositis partibus eodem tempore coniectis.

*Telonis*. Massiliensis navis gubernatoris.

Pag. 94 *Gemini*. Idest gemelli.

*Mixtis obliquo* &c. Implicitis perinatim remis duarum navium, Romanæ & Massiliensis.

Pag. 95 *Jam clipeo* &c. Destitutus jam sinistra, quæ clipeum, dextra, quæ tela gestaret.

*Foror*. Fori in navibus sunt tabulata, per quæ nautæ discurrunt.

*Anime*. H. e. Sanguinis, in quo vita.

Pag. 96 *Vix omnia* &c. Vix abstulerunt, tradideruntque morti.

*Diversa*. Ex oppositis partibus inter se concurrentes.

*Æra*. H. e. Ærata rostra. *Eliso*. H. e. Contuso.

*Postquam inhibent* &c. Inhibere remis puppes perinde est, ac navem ad puppim convertere.

*A manibus* &c. Avulsi a manibus suis rati inhærentibus.

Pag. 97 *Sidentia pectus*. Subsidentia, vel sub pedibus jacentia.

*Nulla tamen* &c. Nulla tamen lues edidit majorem cladem, quam pelago diversa lues; h. e. ignis aquæ contrarius.

*Utuntur pelago*. Mergunt hostem in mari.

Pag. 98 *Et nimis adfixor* &c. Et anchoram sub aquis solvere, si fune refigi non posset.

*Non perdere letum*. Ne morerentur inulti.

*Et rostris abstulit ictus*. Vulneratorum corporum objectu.

*Glande petens* &c. Plumbo glandis instar e funda Balearica excusso. Vide pag. 21.

Pag. 100 *Animam morti* &c. Non commisit animam morti uni, h. e. non una morte contentus fuit, ut nati letum præcedere festinaret.

## IN LIBRUM QUARTUM.

Pag. 102 *Afranius* &c. Afranius, ac Petrejus legati Pompeji in Hispania bellum gerebant.

*Gallorum Celtæ*. Celtæ, qui in Iberiam migrarunt, Celtiberi sunt appellati. Celtæ enim nostra lingua Galli dicuntur, ut Cæsar inquit.

*Nam gurgite mixto* &c. Sub Ilerda influit Iberum, qui fluvius adimit nomen Cingæ, dat Iberiæ.

Pag. 103 *Dum primæ* &c. Prima & secunda acies ante stabant, & in armis erant; acies interim tertia opus in occulto faciebat, quod omne prius est perfectum, quam ab Afranio intelligeretur castra muniri.

*Et raptò* &c. Celeri cursu Afranii cohortes quædam tumultum priores occupant.

*His virtus* &c. *Miles ruper* &c. Cæsariani.

*Irritus*. Re infecta. *Victor subduçto* &c. Dirempto prælio, utrique se superiores discessisse existimaverunt.

Pag. 104 *Atque omnis* &c. Atque omnis tellus Hesperia, Occidenti, quo mergi videntur stellæ, subjecta, aruerat constricta hyberno gelu & frigore.

*Sed postquam* &c. Postquam vero Sol ingressus est signum Arietis, quo veçus Phryxus pontum transfretasse fingitur, delapsa sorore Helle, quæ ponto nomen reliquit, &c.

*Tunc Sole relicto* &c. Luna scilicet recedens a conjunctione cum Sole, & exiguïs cornibus, ac proinde dubiis, apparens, &c.

*Flammasque* &c. Calorem ac ruborem venti, pluviaeque præstigia.

*Primus*. Oriens, seu matutinus.

*Quidquid defenderat Indos*. Quæcumque nubes Solis æstum Indis arcuerat.

*Oriente remota*. Euri impetu aethæ ex Oriente.

*Calpen*. Hispaniam, ubi Calpe promontorium Bætica, una e columnis Herculis.

*Congestumque* &c. H. e. congeriem nubium.

Pag. 105 *Diffusum* &c. Aquas e cælo lapsas cælo reddidit.

*Non deest* &c. Sunt qui famem patiantur ipsi, ut panem suum pretio vendant.

Pag. 106 *Sic mundi* &c. Sic utraque zona frigida tenebris, & perpetuis imbris obnoxia est; at suo frigore zonæ mediæ æstum temperat, ut interjectæ sint habitabiles.

*Sic, o summe* &c. Apostrophe ad Jovem, & Neptunum, cum voto ut bellum civile diluvio mergant. *Sorte secunda* &c. Cui in divisione regni Saturni contigit imperium pelagi sorte secunda.

*Et par Phæbus aquis* &c. H. e. Dispergendis nubibus, atque in raritatem & candorem vellerum attenuandis.

Pag. 107 *Primum cana* &c. Imperat Cæsar rates ex salicibus viminibusque contextis fieri, easque coriis bubulis circumdari.

*Memphitis*. H. e. Ægyptiaca; Memphis enim Ægypti regia fuit.

*Succisum curvare nemus*. H. e. Materiam ponti faciendæ necessariam succidere.

*In ultima mundi*. In ulteriorem Hispaniam.

Pag. 108 *Jamque agminis summa* &c. Equitatus Cæsaris novissimum hostium agmen convecutus, premere eos, morari, atque iter impedire cœpit.

*Nec liceat* &c. Ne pereant ignavi & fugientes acceptis in tergo vulneribus, convertite; excipiantque adverso pectore tela.

*Nec Romanus* &c. Quotquot erant in utrisque castris Romani, se invicem agnoscebant.

Pag. 109 *Classica dent bello*. H. e. Imperator classicum canere jubeat.

*Venturi discrimen* &c. Hactenus quæ facta sunt excusari aliquo modo possunt. In posterum vero magnum imminet periculum: nam nisi abstinetur a bello, omnes manifeste scelere contaminari necesse est. *Periere latebræ*. Jam se impietatis excusare non possunt, quia viderunt se contra necessarios arma ferre.

*Nam postquam* &c. Namque legatos ad Cæsarem de pace miserant, fidem ab eo de sua, de Petreji & Afranii vitæ petierant, se statim signa transluros promiserant.

Pag. 110 *Non potes* &c. Quod si causæ Senatus defensor non potes efficere, ut victo Cæsare libertatis patriæ victor redeas; saltem hoc potes, ut fide servata pugnes, dum vincaris.

*Nulla discrimine*. Pompejanos inter, & Cæsarianos.

*Non hoc civilia bella* &c. Civilia bella suscipimus, non ut vivamus, sed ut libertatem tueamus, vel pugnando moriamur.

*Hostes nempe meos* &c. Hostes fidem scelestæ & injustæ

causæ præstant; vos æquæ debitam proditis. Pro dedecus;  
 Pag. 111 *Forsan quum* &c. Quum fortasse credas salutem a  
 fide nostra pendere.

*Fecit monstra fides.* Petreiani, dum fidem jurejurando  
 renovatam ducibus probare volunt, perpetrarunt monstrosas  
 civium suorum cædes, quales Fortuna victoriæ insolens non  
 exercuisset in hostes, deorum ira victos in ipsa confusione  
 tumultuosi belli.

*Ac velus occultum* &c. Ac veluti sceleris periret laus, &  
 gratia, si celaretur, &c.

*Agnoscis superos* &c. Deostibi faventes agnoscis, quicau-  
 sam tuam meliorem, & feliciorem efficiunt, quod clementer  
 egeris in adversariorum milites, qui in tua castra venerant,  
 eosque dimiseris.

Pag. 112 *Campos eques obvius* &c. Equitatus Cæsaris pabula-  
 tione & aquatione prohibuit hostes; nec Cæsar passus est  
 castrorum brachia ad amnium aut fontium ripas perducere.

*Vincitur laud gratis* &c. Frustra vincuntur, & cum da-  
 mno victoris, qui desperati & sibi viles ruunt in arma.

*Incumbet gladiis* &c. Non incumbet gladiis, non gaude-  
 bit sanguine fuso, repetita particula *non*.

Pag. 113 *Si conscius* &c. Quod si victor sentiens se vulnus  
 hosti infixisse detrectet prælium, defervescunt mox saucio  
 sanguis, robur, animus.

*Puteusque cavati* &c. Puteus in monte foditur, ut ad  
 profunda campi descendat, quæ *fastigia* hic nominat.

*Quoque minus* &c. El gelidis fodinis subducti calorem ac-  
 ris minus jam ferre poterant, & magis sitiebant.

*Auxilium fecere famem.* Esurie enim ipsa minus sitire  
 sibi videbantur.

Pag. 114 *O Fortunati* &c. His feliciores poeta eos pronunciat,  
 qui venenatis ab hoste fontibus extincti fuere; quod fece-  
 runt in Romanos barbari hostes, Jugurtha rex Numidiæ,  
 Mithridates Ponti rex, Juba Mauritaniam.

*Recisoque* &c. Exulcerato nempe palato respirandi difficul-  
 tate laborant.

*Meroen.* Nili insulam.

Pag. 115 *Securumque* &c. Permittimus te securum esse omnium  
 periculorum, quæ a tergo ab Hispanis & Italis possent im-  
 minere.

*Hoc hostibus unum* &c. Quod incruentam tibi cedamus  
 victoriam: quo facilius in nos debes esse, quod tuo obsecu-

ti sumus consilio, qui omnem iniisti rationem vincendi sine sanguine.

Pag. 116 *Nobilis ignoto* &c. Consulum nomina inscripta cadis, atque testis vini annos indicabant; ac proinde quo magis erant ignota propter vetustatem nomina, eo nobilior vini qualitas habebatur.

Pag. 117 *Abest favor*. Studium scilicet partium; utrumque enim vicerit, ferent facile, alteri parti ob sacramentum vetus, alteri ob recens beneficium benevolentes.

*Iadar*. Flumen Dalmatiæ juxta Salonas mare Adriaticum influens, Occidentem versus.

Pag. 118 *Ut primum* &c. Ubi Antonius in Illyricæ terræ litore vidit socios sub Dolabellæ signis, & Basilum classis præfectum; conatus est novo fugæ genere evadere.

*Neque enim de* &c. Non in longitudinem extendunt carinam, aut puppim in latitudinem attollunt.

*Sed firma* &c. Sed contexunt scaphas navium magnarum circiter sexaginta duplici ordine collocatas, quas trabibus & catenis a fronte vinctas cratibus pluteisque muniunt: atque hæc ratis cuppis, idest scaphis, sustentata a remigibus, qui non videbantur, intra geminos scapharum utrinque ordines propellebatur.

*Hoc ferit*. Quod est intra scaphas.

Pag. 119 *Pace maris*. Quamdiu pax mari esset, hoc est, hostes abessent.

*Odorata ... pinna*. Ut cervos in veras plagas truderent, quoddam retis genus plumis versicoloribus atque ustulatis intertextum, ad eosdem terrendos, suspendebant.

*Varis*. Perticis, sive furculis, quibus eriguntur retia.

*Loro*. H. e. cauda.

*Insula*. Curiæ.

*Raptus*. Res raptas, corpora scilicet & naves, quæ pertracta ad has cavernas, deinde iterum evomuntur.

Pag. 120 *Puppæ*. Pompejanæ.

*Vita brevis* &c. H. e. Satis vixit, qui fatum imminens præoccupans sibi mortem consciscere potest.

*Non cogitur* &c. Mori cogimur: velle mori, non ita; neque enim cogitur voluntas. Verum quod urget necessitas, velimus; & in virtutem cedit necessitas. Quicquid necesse est, sapiens vult.

Pag. 121 *Cum senibus* &c. Parentibus & natis, quos Saguntinorum æquantres fidem trucidaturi essemus potius, quam in potestatem hostium venirent.

Pag. 122 *Agnoscere solis* &c. Iis solum licet agnoscere felicem esse mortem, quibus jam imminet fatum; victuros autem, quo diutius velint vivere, nequaquam dii sinunt illud idem agnoscere.

*Flexoque Ursæ* &c. Ursæ majoris plaustrum in Orientem conversum signum est præcipitantis noctis.

*Sol Ledaæ* &c. Periphrasis est Geminorum, in quorum ultima parte Sol erat, Cancrum jam jam ingressurus.

*Nox sum Thessalicas* &c. In Occidentem urgebat signum Sagittarii, quem Chironem Thessalicum fuisse volunt.

Pag. 123 *Concurrunt alii* &c. Concurrunt cæteri ejusdem partis milites, mutuisque concidunt vulneribus non aliter, quam fratres illi Terrigenæ nati ex Draconis dentibus a Cadmo satis. Ovid. Metam. 3, Sen. ædip. 720.

*Dirum Thebanis* &c. Eteocli & Polynici, qui simili fato mutuis vulneribus se confecturi erant.

*Phasidos* & *campis* &c. In Colchis, quorum Phasis fluv. clarissimus, periере per mutua vulnera fratres Terrigenæ nati e dentibus vigilis Draconis interfecti, satis ab Iasone, in se invicem irruentes conjecto ab Iasone in medium silice, & carminibus magicis Medæ auxiliaribus. Ovid. Metam. 7.

*Haud trepidante* &c. Neque minori vi & ferientes adigebant tela, id pietatis loco ducentes, uno iū conficere.

Pag. 124 *Bustisque remittunt* &c. Comburenda ac sepelienda Opiterginorum cadavera curaverunt hostes, mirati tantæ apud suos auctoritatis esse Cæsarem, tantam militum in ducem fidem. *Virtus* & *in boste probatur*.

*Libertas uritur*. Opprimitur ab armatis.

*Non segnior illo* &c. Neque bello minus atroci atque adverso a Cæsarianis in Africa pugnatum est, quam fuerat in Hadriatico. In Africa quoque (inquit Florus) par & virtus & calamitas Curionis fuit, qui ad recipiendam provinciam missus, pulso fugatoque Varo jam superbus, subitum Jubæ regis adventum equitatumque Maurorum sustinere non potuit. Patebat viâ fuga, sed pudor suasit, ut amissum sua temeritate exercitum, morte sequeretur.

*Nec forti* &c. Levi & secundo vento.

Pag. 125 *Partes*. Legendum *patres*.

*Caloque pepercit* &c. Male cessisset diis, si & hunc socium habuissent Gigantes, ubi in Thessalicas campis bellum cælo inferebant.

*Cleonei*. Nemæi sc. a se inter Cleonas & Phliuntem cæsi.

Pag. 126 *Exhaustisque virum*. Defatigavit Antæum.

Ra-

*Rapit avida* &c. Coercet, sistit sudorem Antæi: renovantur vires: artus restituuntur in solidos jam & duros.

*Quamvis rudis*. Adhuc inexercitatus, quod is labor inter primos numeretur.

*Noverca*. Junoni Herculis interitum anquirenti.

*Siccam quum* &c. Non ita sudoribus exhaustam, quum Atlanti succurrens sustineret humeris cælum.

Pag. 127 *Pænum* . . . *hostem*. Hannibalem 16 jam annos in Italia bellantem vincentemque revocavit in Africam ad sua tutanda.

Pag. 128 *Regis tamen* &c. A Juba tamen rege Mauritaniae, socio & amico Pompeji, auxilia petiit, atque accepit primum DC equites Numidas & pedites CCCC, mox regem ipsum cum magnis copiis.

*Qua sunt longissima* &c. In longitudinem extenduntur ab ultimo litore occiduo, qua Atlante terminatur Africa long. gr. 6, usque ad Hammoniacam regionem long. gr. 55.

*At qua lata* &c. Secundum latitudinem dicit Juba regnum extendi ad zonam torridam & ulterius.

*Distinet*. Hinc inde tenet & exporrigitur sub torrida zona.

*Numidaque vagi*. Nomades, domos plaustris circumferentes.

*Ferrique simul* &c. Leonum summa vis in oculo creditur. Ubi ergo amisit Afer fiduciam ferri, contra impetum ingruentis leonis sagum objicit.

*Dum regnum* &c. Dum unius ( Cæsaris scilicet ) dominationi Romam subicere parat.

Pag. 129 *Et quod Cæsareis* &c. Trepidat etiam Curio, quod parum confideret militibus suis, qui nec umquam satis fidi fuerant castris Cæsareis, nec sub eo in Gallia & Germania militaverant; sed tyrones erant: & capri in arce Corfinii, Domitio duce suo Cæsari tradito, ut fas sibi putaverant fidem prius Pompejo juratam deserere, sic etiam poterant infidi Cæsari & Curioni, novis ducibus, ad prioris ducis signa reverti.

*Quum dira* &c. Quando statuunt testis gladiis ad hostes meos deficere.

*Veluti fatalis* &c. Sic in muneribus gladiatoriiis, non odium aut simulas committit gladiatores in lethale arenæ certamen, sed ipsa parium compositio & æmula virtus.

*Hoc solum* &c. Improvisus hætenus hoc solum timebat, ne a Curione timeretur, atque ita prælii & rei gerendæ non daretur occasio.

*Lucanus.*

C



Pag. 130 *Ipsæ cava* &c. Rex cum omnibus copiis insequetur, & sex millia passuum intervallo a Sabura consederat.

*Aspidem ut Pharias* &c. Neque aliter Curionem delusit Juba, quam solet Aspidem Ægyptiam Ichneumon; quam hebetes habentem oculos, eosque non in fronte sed in temporibus, Ichneumon caudæ suæ umbra provocat; attollentem autem istus irritos in vanas auras, obliquo capite speculatus, invadit, ejusdemque guttura tuto morsu comprehendit.

*Frustraque rogatus*. A Cn. Domitio præfeco equitum.

*Bellumque traherebat* &c. Namque ipse Curio primus belli civilis Auctor fuerat.

Pag. 131 *Non timidi petiere fugam*. Lassatis sc. ex itinere & prælio nocturno equis. *Non prælia fortes*. Consumptis nempe labore viribus.

*Non sonipes* &c. Nec quatit equus pulsus saxa, impatiens freni, nec spargit jubar, nec subrigit aures, nec pugnat ne loco stet.

Pag. 132 *Sed tempora* &c. Tempus, quod pugnando conterendum fuisset, occidendo consumptum est.

*Suos inter convertitur enses*. *Densaturque globus*. Suorum, globo condensatorum; dum ii, qui ab exteriori parte globi erant, referrent pedem cederentque introrsum ad declinandos hostium ictus.

*Libyca tellure*. Glareanus exponit, quod Poeta velit, tum Pompejum, tum Senatum tam pium ac magnanimum videri, ut malit Afros vincere Romanos sibi, quam Pompejo ac Senatui.

Pag. 133 *Quid prodita jura* &c. Curio tr. pl. Cæsari prius inimicissimus tuebatur jura Senatus; mox ab eodem Cæsare liberatus ære grandi alieno, auroque corruptus, Senatus causam turpissime deseruit, & pro Cæsare acerrime stetit.

*Bellum civile*. H. e. Belli civilis exitum.

*Quando non proderit* &c. Nil enim proderit, me Curionis virtutes & merita silentio premere, quæ certe ipsa per se effugient omnium oblivionem temporum.

Pag. 134 *Jus licet* &c. Sulla quidem, Marius, Cinna &c. vi oppresserunt libertatem, invaserunt Rempublicam; neque id tamen sine summa impensa largitionum & stipendiorum: illi emerunt, hic vendidit.

---



---

 IN LIBRUM QUINTUM.

Pag. 136 *Gelidoque cadens Atlantis* &c. Cave illud *Atlantis* secundo casu accipias; est enim Patronym. Fœm., & perinde est ac Maja, vel alia e filiabus Atlantis. Occidunt autem Atlantides, seu Pleiades circiter III Id. Novemb.

*Dies, qui dat* &c. Cal. Januarii, quo die creabantur novi Consules, eorumque nomina præfigebantur sui anni Fastis.

*Dum tamen* &c. Nondum plane peractō potestatis suæ Consularis tempore.

*Non Magni* &c. Non convenisse omnes in partes Pompeji, sed & ipsum Pompejum fuisse partem Senatus.

*Nec iniquos* &c. Æquinoctialis circulus non patitur noctes ac dies inæquales esse.

Pag. 137 *Curia solos* &c. Illa, quam Cæsar habet, curia non videt alios Senatores, quam eos, quos in exilium olim missos, & ambitus, majestatis læsæ, alteriusve noxæ damnatos, Cæsar urbi restitutos revocavit.

*Hesperien.* Italiam, & Hispanias amissas.

*Hostem.* Cæsarem, quum primum invaderet urbem Romæ.

*Pelagique potens* &c. Classe potens, ac templo Phœbi clara.

*Massiliæque suæ* &c. Phocis regio in Bœotia, a qua Massilienses sunt oriundi, donata est libertate.

*Gelide . . . ora.* Macedoniæ, quam, ob Thraciam vicinam, *Frigidam* nominat.

Pag. 138 *Et tibi . . . permissum* &c. Invehitur in Ptolemæum Auletæ filium, qui adhuc puer Pompeji rogatu confirmatus Ægypti rex a Romanis, coronatusque diademate Alexandri Magni in Pella Macedoniæ oppido nati, & Alexandriæ in Ægypto conditoris; quum fidus causæ Senatus esse debuisset, Lagi (avi sui) regiam h. e. Ægypti regnum Cæsari donavit, & Pompejum ad se confugientem scelerate trucidavit.

*Sorori.* Cleopatræ, quæ regni cum fratre hæres a patre relicta fuerat.

*Soceroque nefas.* Pompeji cædes subtrac̃ta Cæsari.

*Cui numine mixto* &c. Communi cultu Thebanæ Mænades, Bacchi ministræ, tertio quoque anno Delphis celebrant sacra in memoriam victoriæ Indicæ a Libero patre trienni expeditione partæ: hinc dicta fuere *Triæterica*.

*Ultor ibi* &c. Hic Apollo juvenis, ulturus Pythona, qui Junonis jussu Latonam gravidam e Jove, & partui vicinam persecutus fuerat, interemit.

Pag. 139 *Hominis* Phœbadis, virginis Pythiæ.

*Forsan terris* &c. Densior fortasse aliqua & potentior pars inest, expiratque ex hoc antro Delphico, cœlestis illius mentis & animæ mundi, quæ infusa in omnes mundi partes eum librat, regit, fovet, vegetatque; & cum superiore illo aere coit, & menti diviniore consonat.

*Inarimes*. Insulæ in litore Campano. Virg. Æn. lib. 9.

*Inarime Jovis imperiis imposta Typhæo*.

*Ab humani* &c. Non admittit vota impia.

*Ut Tyriis*. Cadmo videlicet, vel Didoni.

Pag. 140 *Dedit ille* &c. Idem Apollo docuit Athenienses, Persici belli minas qua ratione repellerent: qui ligneis mœnibus, idest navibus, se tueri jussi devicere Xerxem navali pugna ad Salamina.

*Sustulit iras* &c. Sic Ægypti sterilitas & siccitate 9 annorum sublata, *monstrato fine*, idest modo piandi, Thræsea nempe a Busiride cæso.

*Resolvit* &c. Pestis remedium denuntiat; uti Thebanis, in exilium misso eo, qui Laium interfecerat, Senec. Œdip. Romanis vero, Æsculapio accersito ex Epidaur. Liv. 10.

*Justitio*. Silentio: *transl.* a juris dicundi intermissione.

*Vel pretium*. Prout vel ab irato, vel a benigno Numine inflabantur Phœbades, mors erat illis vel pœna, vel præmium.

*Deis immittere* &c. Idest denm immittere in Phœbadem.

*Phemonoen*. Phœbadem aliquam. Phemonoe autem prima erat, quæ ex Oraculo Delphico vaticinata est.

Pag. 141 *Seu barbarica* &c. Delphi a Brenno incensi. Locus autem ipse Πυθιά a Græcis dicitur.

*Tenuere*. Obstruxere.

Pag. 142 *Aliena*. Non jam sui juris, sed Numinis instinctu agitata.

*Qualis in Euboico* &c. Uti Sibylla &c. e fatum cumulo Romana tantum novem libris complexa est, quos Tarquinio Superbo obtulit; ita &c.

Pag. 143 *Vindicti an* &c. An taces, quo melius fortuna exigat a Cæsare pœnas belli civilis, & Rempublicam in libertatem vindicet, interfecto a D. & M. Brutis Cæsare; ut vindicavit olim exactis a Junio Bruto Tarquiniis?

Pag. 144 *Levant* &c. Idest sedant vatis animum.

*Letben.* Oblivionem scilicet.

*Vixque refeſſa cadit.* Numine prius agitata, illo abeunte, viribus deficit.

*Subſidere regnum.* Tibi ſubſicere.

*Rhamnus.* Atticæ pagus, ubi colitur Nemesis ſuperbiæ & insolentiæ vindex, quæ & hinc dicitur *Rhamnusia*.

*Aulin.* Portum Bæotiæ, Græcorum contra Trojam conjuratione, & mora classi Græcæ nobilem.

Pag. 145 *Venditat.* Alii legunt *vindicat*. Idest, aſſerere vult, miſſionem petit.

*Quam non ex ſtabili* &c. Idest, quam lubrica eſſet ejus potentia, & quam inconstans, & infirma.

*Seque putat* &c. Putat ſc. ſe unum moleſte ferre iniquum tyrannidis onus, quod tamen citra certum pænæ periculum haud poſſit excutere.

Pag. 146 *En! improba vota.* Ironice: quantulum eſt hoc votum?

*Non duro* &c. Licet tandem molliter requieſcere, & mori, non jam in pugna ſerientes anima fugiente terram, ſed inter propinquos, mæſtasque conjuges.

*Urque adeo* &c. An putas nescire nos, in civili bello ducem vel ſceleſte interficientibus maximam fore mercedem? His autem verbis eadem minitantur Cæſari.

Pag. 147 *Fortuna vocatur.* Idest felicitati ſuæ tribuit.

*Quando pietasque* &c. Ubi in ducibus deficit pietas, & fides in patriam ac cives ſuos, ſperemus a perfidia & rebellionem militum finem civilis belli.

*Venit.* Ex Maſſilia ſumma celeritate Placentiam venit, ubi jam coorta fuerat militum ſeditio.

*Sana timetur.* Pacem appetens, deteſtata bellum ſceleſtum.

*Lassare* &c. Afficiaris tandem belli tædio, & diſcas armis abſtinere.

Pag. 148 *Veluti, ſi* &c. Sensus eſt: Ut nil imminueretur mare, fluminibus cunctis ſuas aquas eidem ſubducentibus; ita nihil ego detrimenti caperem, viribus veſtris mihi ſubductis.

*Numquam ſic* &c. Cura deum numquam ad tam vilia deſcendet, ut plebem reſpiciat: principes tantum viros eadem intuetur: humanum vero genus in paucorum utilitatem vult vivere, paucis ſervire.

Pag. 150 *Ad ſcelus hoc.* Ad interficiendos eos, qui primi miſſionem & pacem optaverant.

*Jugulos* &c. Nonæ legionis, quæ ſeditionis cauſſam in primis præſtitit, decumatione conſtituta, gemitu ab omni-

bus edito, Prætores genibus affusi veniam suppliciter ab ipso deposcebant. Cæsar tandem vix ira posita hoc concessit, ut C dumtaxat & XX seditionis principes ab omnibus eligerentur, & XII ex his a cæteris selecti supplicio afficerentur. Appian. 1 de bello civ.

*Decimis . . . castris.* Decem dierum itineribus.

*Montibus.* Gargani, qui mons est Apuliæ, hinc Austro e Calabria, inde Boreæ e Dalmatia flanti expositus; cui subiacens promontorium in mare Hadriaticum extenditur.

*Togæ.* Pacis auctori Cæsari jam rogato.

*Summo Dictator &c.* Neque Senatu, aut Consule illum diligente, seipsum Dictatorem nominavit Cæsar: undecima deinde die Dictaturæ se abdicavit, postquam se & P. Servilium Coss. creasset.

*Gladiis &c.* Imperatorum insignibus insignia Consulum.

*Fingit &c.* Imaginaria quædam Comitiorum in Campo habetur species: citantur a præcone tribus, neque tamen conveniunt, aut admittuntur ad distincta suffragia; quæ Cæsar omnino sustulit.

Pag. 151 *Haud meritum &c.* Indignum sacris, quia Latii libertatem non defenderat.

*Minoia.* A Cretensibus, quibus Minos imperavit, condita.

Pag. 152 *Flexo . . . cornu.* Obliquato in longitudinem navis velo.

*Lævo pede.* Pedes proprie sunt funes ad angulos velorum.

*Non valet &c.* Adeo posuerant venti, ut aura, quæ primum puppes impulerat, iisdem lentior evaserit.

*Non horrore tremis &c.* Sed jacet immota unda, ut ne Solis quidem imaginem huc illuc agitatam ac tremulam in aquarum superficie vibret. *Solis imaginem* hoc loco Lunam intelligit, quæ lucem suam a Sole accipit: navigabat enim nocte, ut modo dictum est.

Pag. 153 *Classes.* Pompejanæ remigiis & celeritate præstantiores.

*Naufragii &c.* Præ sæva illa tranquillitate maris vel ipsius naufragii periculum libenter subiissent.

*Movitque &c.* Moveri videbantur, quum naves ventis agitarentur.

*Prima dutes &c.* Cæsar ad fluv. Apsum castra posuit, Pompejus trans flumen.

*Causa &c.* Palus, quæ leniter se in Apsum exonerat, navigabilem illum efficit.

Pag. 154 *Relicta.* Brundusii, cum Antonio.

*Leucada.* Actiacam pugnam, quam inter Leucada & Actium gessit postea cum Octavio, a quo superatus ipse, & Cleopatra.

*Non ire, jubet.* Venitur ad amicos, itur ad hostes, aut in vacua.

Pag. 156 *Nam sol* &c. Sol enim occidens nec rubescentibus circumdatus nubibus, nec *concordes ferens radios*, sinistra tempestatis indicium est.

*Non gracili* &c. Non tenui, sed obtuso & crasso cornu, nubeculisque in orbe medio obfuscata surrexit.

Pag. 157 *Nec ratis* &c. Non jam ratis, sed ne naufragi quidem nos ipsi tangemus Hesperiam.

Pag. 159 *Mansisse loco.* Intra sua litora & metas coercitum fuisse. *Nam parva* &c. Non raro enim diversa maria ventis rapta miscentur aliis; uti Tyrrhenum Ægæo, Ionio Adriaticum.

*Alloque* &c. Sed ab alia orbis parte & Oceano, qui terram ambiens plenos belluis horrendis fluctus immisit.

Pag. 160 *Non cæli* &c. Nox illa non tam cæli conversioni tribuenda, quam densissimis tenebris a tempestate coortis.

*Fluctusque* &c. Quominus fluctus quis evertat navem, obstant fluctus alii. Sed Grotius pro *fluctus* vult *fluctum*.

Pag. 161 *Jussa plebe.* Coacta plebe ferre suffragia.

*Nulla meis* &c. Tot tuli & tam insignes honores, ut nemo putet me mori privatum, nisi tu, Fortuna, quæ sola me regiæ potestatis cupidissimum nosti.

Pag. 162 *Nullusne* &c. Nemo erat e tuis tam bene de te meritis, ut eum nolles tibi fluctibus oppresso esse superstitem?

*Sors ultima* &c. Extremâ necessitas & vitæ desperatio solet homines in extremâ pericula præcipitare. Te vero jam mundi dominum quæ necessitas impulit, ut vitam fluctibus committeres?

Pag. 163 *Hesperii.* Qui erant Brundusii, Antonius, Gabinus, & alii.

*Littera.* T. Δ. A. vel alia figura, quam prius referebant.

*Prætereunt* &c. Hæc aliter referuntur lib. 3 Comment. de civ. Bello.

*Succedens* &c. Immo succedens Austro Africanus Nymphæum fecerat portum, idest tutum a ventorum injuria. Errat igitur Noster, juxta Grotium.

Pag. 164 *Sola fuit.* Fuit in caussa, quod prælium distuleris.

*Positamque* &c. Si mihi in prælio sit occumbendum, le-

vior ad te semotam, quam præsentem venturus est dolor.

Pag. 165 *Nil mihi* &c. Non est, cur incusem deos, aut fata; sed te, qui me vulgari admodum sorte, hoc est, quasi divortio dimittis.

*Secura* &c. Quomodo sors mea secura, quum mori cupias? Deinde utut infelicitè superesse tibi, superero saltem, dum tuæ cædis nuntius adveniat.

Pag. 167 *Sed non* &c. Sed tristius quippiam parabant fata; recepit quippe illum citius quam expectabat, victum scilicet, profugum, & brevi coram interficiendum.

## IN LIBRUM SEXTUM.

Pag. 168 *Postquam castra* &c. Cæsar & Pompejus e castris ad Apsum fluv. pag. 153, suas copias eduxerant: alter, ut Antonium ex Brundusio venientem interciperet; alter, ut se cum eodem conjungeret. Sed Antonius Pompejum elusit; isque, ne duobus exercitibus, Cæsaris scilicet & Antonii, circumcluderetur, ad Asparagium Dyrrhachinorum direxit iter, atque ibi castra posuit: eodem & Cæsar profectus cum exercitu castrametatus est. Hic Socer pugnae copia nequicquam Genero facta, signa movet, & Dyrrhachium versus proficiscitur, in quo Pompejus omnem apparatus belli, tela, arma, tormenta collocaverat. Cæsaris consilio per exploratores cognito, eundem Magnus expeditore juxta litus via antevertere nititur. Verum ubi propositum tenere non potuit, edito colle, qui appellatur Petra, castra communit; & ex eodem urbem Dyrrachii vel solis turribus, & loci natura tutam defendit.

*Parque suum* &c. Par interdum pro duobus neutro genere sumitur. Sensus igitur hic est: Postquam viderunt dii par dignum sui, vel dignum quod intueantur ipsi, Pompejum scilicet & Cæsarem &c.

Pag. 169 *Ephyreaque mania*. Dyrrhachium, a Phalio quodam conditore, qui Corinthius: Choroanthus autem *Ephyra* dicta erat ab Ephyra nympa, Oceani & Tethyos filia.

*Nam clausa* &c. Nam in rupibus sitam & mari undique cinctam exiguus collis, quo Continenti jungitur, eam facit peninsulam.

Pag. 170 *Metallis*. Fodinis, seu venis lapidum.

*Magnoque recessu* &c. Quot millium passuum circuitu Cæsar Pompejum clausurit, non constat: ingentem certe fuisse credas; nam Pompejus interiore spatio castellis XXIV effectis, XV millia passuum circuitu amplectebatur, quo libere posset pabulari.

*Nunc vetus* &c. Troja, juxta Fabulas ab Apolline & Neptuno condita, XL millia passuum habebat in circuitu, & Babylon e latere cocto constructa stadia CCCL. Ait igitur hyperbolice tantum spatii Cæsarem aggere suo raptim clausisse, quantum Troja, Babylon, Antiochia, & Ninos.

*Refugi.* Idest, simulata fuga præliari soliti.

*Tanti perire labores.* Incassum tot ac tanta opera mox peritura construxere Cæsariani milites: qui pari conatu potuissent maritima Hellesponti oppida, Seston & Abydon, conjungere; Hellespontum ipsum, quem Phryxus transfretavit, injectis terræ molibus obstruere; Peloponneso Ephyræ, idest, Corinthum abrumpere, Isthmo perfosso; eundemque pervium navibus reddentes efficere, ne amplius opus esset longa & flexuosa navigatione circuire Maleam, Laconiæ promontorium.

Pag. 171 *Aut vaga* &c. Maris æstum sævientis adversus litus Rutupinum in Cantio vix audiunt Britanni Caledoniæ, regionis in media fere Scotia positæ.

*Tendat.* Extenuet.

*Quoque modo* &c. Quanto scilicet spatio Roma abest ab ostio Tiberidis, si directum limitem metiamur, non obliquum.

*Major cura* &c. Pompejum lues, Cæsarem fames.

Pag. 172 *Adveſtor* &c. Sensus forte est, culmorum aridorum satis fuisse in præsepibus, sed ab equis desiderari herbas novas, sive virides.

*Antraque* &c. Speluncæ Inarimes insulæ impostæ Typhæo, qui sulfureos atque pestiferos vapores emittere dicitur.

*Cæloque* &c. Aqua, quæ facilius aere corrumpitur, contracto lethali cæno obstruxit & infecit viscera.

*Sacro . . . morbo.* Sacro igne, sive exsecrando.

Pag. 173 *Saturum* &c. Commeatu abundantes Pompeji copias Cæsariæ penuriâ laborantes acriter obsident. *Audiebantur* ( inquit Cæsar lib. 3 de Bello Civ. ) *crebræ militum voces, prius se cortice ex arboribus victuros, quam Pompejum e manibus dimissuros.*

*Qua Minuci* &c. Qua nempe parte Minuci castella militum præsidio carent. Hunc porro Minucium & Cæsar, & Florus, & Noster Scævam appellant.



Pag. 174 *Ferrent*. Acciperent.

*Vomit*. Legendum *gemit*.

*Castrorum* &c. Sensus est, fuisse hunc e plebe, sive gregarium militem ante bellum Gallicum, & in eo egregiis suis meritis ad Centurionis dignitatem evectum: cujus dignitatis insigne vitis erat, quam Centuriones ad castigandos milites gestare solebant.

*Absque cruore*. Legunt alii, sublata parenthesi, *absque cruore Terga datis morti*? Quæ lectio magis aridet.

Pag. 175 *Scituri juvenes* &c. Experimentum facturi scilicet, utrum virtus numero hostium obruta, & iniquo loco deprenta posset aliquid anplius dare quam mortem, strenuæ nempe vindictæ gloriam, seu fortasse victoriam ipsam.

*Ut primum* &c. Ubi cæsorum tantus fuit acervus, ea celeritate insiluit super cadaverum struem, qua pardus solet per summa venabula transilire.

Pag. 176 *Nec quidquam* &c. Nihil prohibet, quominus ferriatur in iis locis, a quibus vita pendet, præter hostium tela summis ossibus fixa, quæ thoracis instar inerme pectus quodammodo tuentur.

*Pbalarica*. Genus teli ad modum hastæ, valido ferro præfixum: stuppa, oleo, pice, sulfureaque materia circumlittum in hostes ex turribus editisve locis medium accensum conjiciebatur, quumque conceptum ipso motu majorem ignem ferret, arma omitti cogebar, nudumque militem ad insequentes ictus præbebat. Proprium erat Saguntinorum telum, de quo ita Silius lib. 1, v. 350, & seq.

*Levæque vacasse*. Ne videatur clipeo lævam sui partem tueri, eundem abjicit.

*Par pelagi* &c. Hæc pelagi monstra sunt cete, quæ pondere & mole sua naves deprimunt.

Pag. 177 *Diſſſea* &c. Cretensi: Diſſe mons est, Gortyna urbs Cretæ, quæ claruit olim sagittarum & jaculorum mittendorum studio.

*Pannonis* &c. Non secus ursa e regione Pannoniæ se rotans conatur evellere hærentem lateri sagittam, quam venator peritus, quales habet Libye, in ipsam contorsit amentoso seu ligula, qua circumducuntur instar fundæ jacula, & intorquentur.

Pag. 178 *Subducto* &c. Qui receptui signo a Pompejanis dato, non habens in quos calidum & ministeria obeuntem sanguinem exerceas, deficiis.

*Exornantque* &c. Deorum templa, & nudam quoad pectus Martis imaginem Scævæ armis exornant.

Pag. 179 *Adest*. Sensim corrodit.

*Incursum gemini Martis*. Idest, terra marique.

Pag. 180 *Segnius* &c. Non segnius, quam nauta solers tempestatem ad Circæum in mari Tyrrhæno ingruentem prævidens vela contrahit, Torquatus revocavit agmina in interiorum aggerem.

*Ante aciem*. Ante pugnam cum hoste consertam.

*Totus* &c. Hic debellatum fuisset, confectumque civile bellum magna Cæsarianorum cæde, nisi Pompejus suas copias a persequendis hostibus repressisset: adeo ut suis amicis ipse Cæsar dixerit: *Penes hostes hodie fuisset victoria, si duces vincere scientem habuissent*.

*Pbario* &c. Ptolemæo rege Ægyptio, cujus permissu jusque proditus, & interfectus est Pompejus.

*Pænorumque* &c. Neque Scipio Pompeji socer, penes quem in Africa reliquiarum Pharsaliæ & imperii summa erat, ferro suo trajectus & in mare præcipitatus retulisset inferias umbris Pænorum in secundo & tertio bello Punico gentis suæ auspiciis interfectorum.

Pag. 181 *Exire e mediis* &c. Idest, si oblata sibi fortuna Magnus scivisset uti, nec Pharsalica pugna, elusis quodammodo fati ipsis, deinceps accidisset; nec ingentes illæ clades, de quibus supra, patratæ fuissent.

*Candavia*. Mons Epiri, Illyricum a Macedonia dirimens.

*Thessaliam* &c. Quinque montes, Ossa, Pelion, Othrys, Pindus, & Olympus Thessaliam intercipiunt: ab Ortum brumali Ossa, Pelion ab æstivo, Othrys a Meridie, ab Occasu Pindus, a Septentrione Boreas.

Pag. 182 *Japygia*. Ventum ex Apulia flantem.

*Nec metuens* &c. Qui ad Olympi radices habitant, ab Aquilonis sævitia tuti ob montis altitudinem, Cynosuram & Helicem videre nequeunt.

*Æquorei*. Utpote qui marinæ Theridis filius.

*Prima Rhæteia* &c. Eminuit ex undis etiam Phylace urbs Phthioticæ regnata Protesilao, qui in bello Trojano primus Græcorum emicuit in litus Rhætei, Troados promontorii.

*Dotion* &c. Oppidum, juxta quod Thamyras a Musis in carminis certamen provocatis victus atque excæcatus.

*Pretioque* &c. Melibæa, Philoctetæ patria, quem Hercules, incensæ ab eo in æta pyræ pretio, donavit sagittis; sine quibus Troja capi non poterat.

*Echionias*. Ab Echione, qui unus erat e Terrigenis, cujus opera usus Cadmus Thebas condidit. *Ubi quondam* &c.

Agave filium Pentheum per furorem, rata vitulum, lacera-  
vit: post id factum mentis compos Thebas fuga petiit, ubi  
exsequiis filio persolutis, cujus caput solummodo secum tu-  
lerat, querebatur se reliqua ejusdem membra non collegisse.

Pag. 183 *Aveſta* &c. Inachus, pater Ius ab Jove in vaccam  
mutatæ, mox in priorem formam restitutæ, & in Ægyptum  
aveſtæ. *Et tuus, Œneu* &c. Archelous, cui desponsata fue-  
rat Dejanira Œnei filia, sed Herculi in luſta victori nupta.

*Et Meleagream* &c. Evenos fluvius (juxta quem Nessus  
Centaurus ab Hercule, quod Dejaniræ vim inferre conatus  
esset, cæsus fuit) per Calydoniam Meleagro olim regnatam  
labitur.

*Famulantis* &c. Ad Amphrysum enim Admeti armenta  
pavit.

*Solus* &c. Describit Titaresum in Peneum quidem incide-  
re, neque velle tamen se illius undis immisceri, sed innata-  
re superne; utpote qui ex Styge scaturiens, suæque originis  
memor dedignetur pati contagi vilis præ se fluminis, & ve-  
lit perinde, ac Styx, jurisjurandi religionem sibi servare:  
Stygia namque palus juxta Virg. *Æn.* l. 6, v. 323, ea est,

*Dii cujus jurare timent & fallere numen.*

*Ixionidas* &c. Hos ex nube sibi pro Junone supposita,  
Ixion genuisse fingitur in antro Pelethronii, Thessaliæ mon-  
tis. Semiferi dicuntur, quia fuisse eos forma superne hu-  
mana, equina inferne fabulantur. Ex illis nonnullos nume-  
rat, nempe Monychum, Rhætum, Pholum, Nessum, Chi-  
ronem.

Pag. 184 *Hosper* &c. Qui Herculi hospitium dedit in Nemeæum  
leonem proficiscenti.

*Improbe* &c. Nesse, qui quum transveſtæ a te per Eve-  
num fluv. Dejaniræ vim inferres, ab Hercule sagittis Hydræ  
Lernææ felle imbutis trajiciendus eras.

*Gelido* &c. Qui nomine *Sagittarii* in hiemali circulo col-  
locatus, arcu Thessalico videris petere Scorpion duorum si-  
gnorum spatium occupantem.

*Primus* &c. Hic percussa tridente petra Neptunus produ-  
xit bellatorem equum, cui nomen Scyphius.

*Unde* &c. In memoriam Pythonis ab Apolline cæsi insti-  
tuta fuere Pythia certamina, quorum præmium laurus.

*Impius* &c. Alæus Otum & Ephialten, gemellos fratres,  
auxilium Gigantibus in Superos asferre jussit.

Pag. 185 *Primis quid* &c. Quid nempe portendat oraculum Jo-  
vis, a columba seu muliere redditum e quercu in sylva Do-

dona; quæ ante inventas fruges primis hominibus glandes suppeditabat.

*Aut si quid* &c. Aut si qua foret alia divinandi species occulta quidem, sed licita.

*Hæmonidum* &c. Thessalarum mulierum, quarum artes incredibilia efficiunt, superantque fidem.

Pag. 186 *Colchis*. Medea e Colchis huc ab Æasone advecta.

*Aut quam* &c. Turgidam quandam carunculam intellige in fronte pulli equini, caricæ magnitudine, colore nigro, quam statim edito partu mater dentibus avellit & devorat; quam si quis præripuerit, seu prius abstulerit, pullum ad ubera non admittit: unde igitur jure pignus amoris appellatur. Hanc vero carunculam veneficæ mulieres præripere solebant ad medicamenta componenda, quibus homines cogerentur amore furere. Sic Virgilius lib. 4, Æneid. v. 515:

*Quaritur & nascentis equi de fronte revulsus,  
Et matri præreptus amor.*

*Traxerunt* &c. In amorem traxere scilicet ope rhombi, muliebri instrumenti, cui involvebant Sagæ licia sive fila incantata, & eorum nominibus nexa, quos cogere volebant. Sic Ovidius lib. 1 Amor. el. 8, v. 7:

*Scit bene quid græmen, quid torto concita rhombo  
Licia, quid valeat virus amantis equæ.*

Pag. 187 *Nubes* &c. Olympus, mons Macedoniæ, nubes cacumine superans, depressus arte magica easdem altiores se vidit.

*Terra quoque* &c. Terræ motu intremuit axis; terrarum vero orbis subsidens & medio loco dimotus permisit unius loci incolis totius circumlabentis cœli prospectum.

*Et pavet* &c. Et magicis artibus incantatur serpentum genus omne, & ad lethales artes instruendas adhibetur.

Pag. 188 *Phœbeque* &c. Luna vi magicorum carminum non aliter obscuratur, atque ubi telluris objectu Eclipsin patitur.

*Damnaret* &c. Tamquam nimium in se pietatis haberent. Hæc autem primi nominis maga est.

Pag. 189 *Perversa* &c. A sepulcris, præpostero pompæ ritu, refert cadavera defunctorum, & ad vitam revocat.

*At ubi* &c. Ubi bustis conduntur non cremata corpora, ex quibus sensim humor intimus elicitur &c.

Pag. 190 *Insertum* &c. Clavos, quibus fixi, qui in cruce pendebant.

*Morsusque* &c. Ut major esset in veneficiis efficacia.

Pag. 191 *Ministri*. Sexti nempe Pompeji.

*Philippor.* Civitatem ad radicem Æmi montis Thraciæ, ubi videtur Noster innuere, pugnatum esse inter Pompejum & Cæsarem: ut etiam Virgilius 1 Georg.

*Romanas acies iterum videre Philippi.*

Et Ovidius 15 Met.

. . . . . *Pharsalia sentiet illum,*

*Æmæthique iterum madefient cede Philippi.*

At male confunduntur Philippi, & Pharsalia, quæ loca longe inter se dissita. Apud Pharsalum quidem in Thessalia victus est Pompejus a Cæsare: apud Philippos in Thracia devicti postea Brutus & Cassius ab Antonio & Octavio.

Pag. 192 *Si fata &c.* Si unus cujuslibet aut singulorum fata vel proferri, vel mutari posceres, *Pronum &c.*

Pag. 193 *Trajecto gutture.* Cujus guttur ipsa trajecerat.

Pag. 194 *Dubium est &c.* Num evocarit huc umbram, an ipsa ad imos Manes descenderit; quod sequens versus declarat.

*Quis timor &c.* Si ego ostenderem vobis omnia, quæ magis horrenda apud Inferos sunt, non tamen timendum vobis esset: quippe Manes me præsentem metuunt.

*Virus . . . lunare.* Spumam, seu salivam lunarem magnè in magicis efficaciam.

*Nodus.* Spina.

Pag. 195 *Et cervi &c.* Cervi spiritu serpentes e latebris extrahunt, cornu elidunt & vorant; atque hinc juvenescere creduntur.

*Quaque sonant &c.* Ærites, in aquilæ nido repertus lapillus, quasi prægnans, quassus quippe sonat. Plin. lib. 19, cap. 3. Feruntur autem aquilæ sine eo ova parere non posse.

*Serpens.* Jaculus, ex arborum ramis se vibrans.

*Rector terra.* Plutonem significat, cui infera terra contigit, & cui vita tædio est.

*Matremque &c.* Cererem nimirum, quam repetita ab Inferis minime sequi curavit ad superos, degustatis septem mali punici granis. Virg. 1 Georg.

*Nec repetita sequi curet Proserpina matrem.*

Pag. 196 *Nostraque &c.* Hecate, quæ in Cælo Luna, in Terris Diana, in Inferis es Proserpina.

*Janitor.* Cerbere, Inferni janitor, umbrarum terror.

*Repetitaque &c.* Parcæ, in vitam revocaturæ cadaver istud.

*Portitor.* Charon, Stygis & Pyriphlegetontis portitor.

*Pectora plena.* Prægnantis mulieris.

*Prosecta cerebro.* Extra quæ diis prosectur.

Pag. 197 *Vocisque* &c. Meæ nempe voci nondum obsecuta.

*Jam vos ego* &c. Non vos, ut prius, Eumenidas appella-  
bo, sed Stygias canes; & excitatas in superna luce detine-  
bo, neque ad Inferos reverti patiar.

*Eloquar* &c. Referam, quam vili cibo vescaris apud Infe-  
ros, Proserpina. Hennæam hanc vocat Poeta ab Henna, Si-  
ciliæ oppido, ubi rapta a Plutone fuit.

*An ille* &c. Demogorgon scilicet deorum Manium prin-  
ceps, cujus nomen arcanum & ineffabile inter cætera deo-  
rum nomina citare nefas, nisi summa urgente necessitate.

*Qui Gorgona* &c. Qui clipeum, in quo Medusæ caput est  
homines convertens in lapides, sine periculo cernit.

Pag. 198 *Ne parce, precor*. Precor, ne verearis vera proloqui.

Pag. 199 *Diversi*. Ex diversis emigrantes locis.

*Lustraler* &c. Nam se Decius uterque dovoverunt pro  
exercituum salute in bellis contra Samnites.

*Sullam* &c. De Fortunæ iniquitate queritur ob partes pa-  
tricias a Cæsare oppressas, in quibus & filius ejus Faustus  
cum suis interceptus perijt, orta inter exercitus dissensione.

*Scipio*. Scipio Æmilianus deplorat L. Scipionem Pompeji  
socerum perituum in Africa, quam ipse debellaverat.

*Solum* &c. L. Junius Brutus, regum exactor, ea spedu-  
sus exultat, quod Cæsar a nepotibus suis M. & D. Bru-  
tis interficiendus esset.

*Nudique Cethegi*. Vide pag. 61.

*Drusus*. Livius Drusus Trib. pl. populi & Sociorum fa-  
vorem emeriturus legem Agrariam & Frumentariam perferre  
conatus est, & Socios ad spem civitatis erexit: domi suæ  
postea occisus.

*Gracchos*. Tib. & C. Gracchi fratres, Tribuni plebis, re-  
ditionibus vexarant Rempublicam, promulgatis legibus Agra-  
ria, Frumentaria, Judiciaria.

*Campisque* &c. Damnatorum Manes poscunt sibi Elysium,  
ut novis & bello civili advenis locus sit apud Inferos.

Pag. 200 *Quæ misceat* &c. Qua inter se digladiabuntur acer-  
rime Pompejani & Cæsariani.

*Magnaque* &c. Utrumque magni funeris pompa carentes,  
forti tamen animo subite mortem; vos enim patriæ liberta-  
tis propugnatores calcabitis oppressores ejusdem, Jul. nem-  
pe Cæsarem aliosque Imperatores, qui superstitiose in  
deorum etiam numerum referentur.

*Distribuet* &c. Pater cadet circa Libyen in Alexandrino  
litore; ex filiis alter, Cnejus nomine, peribit ad Mundam

in Hispania victus a Cæsare; Sextus vero in Asia, interceptus ab Antonianis militibus, interibit.

## IN LIBRUM SEPTIMUM.

Pag. 201 *Numquam magis* &c. *Numquam magis aspera contra*, sive diurnam cæli conversionem & poli, ab Ortum in Occasum fieri solitam, Sol ipse suos egit equos, ab Occasu in Ortum annuo motu se rotans: ex quo factum, ut segnior Oceano surgeret.

Pag. 202 *Non pabula* &c. Non jam nubes attraxit, ut præberet suis flammis alimenta, sed ne puris conspicuus radiis pugnae Thessalicæ interesset.

*Pompejani*. A se nimirum extracti.

*Et quæcumque* &c. Ex urbe & Italia proscriptus fugiens in Hispaniam Sertorius bellum ingens excitavit; quem 24 annos natus vincens Pompejus occiduas regiones illas pacavit.

*Pura* &c. Non minus conspicuus clarusve toga candida & pura, qua etiam dum novus pene tyro & primas juventutis metas ingressus induebatur, quam picta & palmata, qua triumphant Consules. Nemini vero antea contigerat, ut ante legitimam ætatem permissu totius Senatus triumpharet.

*Seu fino* &c. Sen quod mens de futuris malis sollicita lætorum temporum recordatione quodammodo erigitur: seu quod somnia, ut fieri solet, res visis contrarias portendentia funestum omen exhibuere Pompejo: seu quod ille Patriam haud amplius visurus esset; sic Fortuna Romam eidem, sub imagine somni saltem, conspiciendam exhibuit.

*Unde paret* &c. O utinam populo Romano similis somnus & nox tam beata contingeret, qua te vicissim conspiceret ille, qualis tibi visus es per insomnium!

Pag. 203 *Funere Bruti*. Hunc, Regum exaffectorem, luxere per annum matronæ Romanæ, ut parentem & violatæ pudicitiae vindicem.

*Quorum gemitus* &c. O miseri, quibus dolorem suppressere, seu tantum occulto gemitu testari necesse est; non vero licet pleno theatro, seu publico luctu & planctu conceptum tui nece dolorem profiteri!

*Et orbis* &c. Arguebatur etiam declinare bellum affectatio-

tione dominatus, quo diutius cum imperio esset apud exercitum ex tot gentibus tamque diversis conflatum.

Pag. 204 *Merito* &c. Gentes olim a te summa celeritate & quasi in transcurso devictæ, eademque sub te jam militantes queruntur, neque id injuria, tibi hanc tamdiu in manibus hædere victoriam.

*Si duce te* &c. Si te Senatus publicæ causæ & belli ducem creavit, permitte illi hoc juris, ut suo arbitrio, ubi res, tempus, locus postulant, bellum conserat.

Pag. 205 *Accepisse diem*. Sensus est, non jam Pompejum præstituisse sibi hunc dimicandi diem, sed ab aliis eidem fuisse præstitutum.

*Belli pars magna* &c. Magnam belli partem confectam censeo, quum vel ipse tiro pugnam postulat: nontamen virtute semper & ira milites, sed venturi mali timore, in summa discrimina se conjiciunt. At illum vere fortem judico, qui inter imminentia mala sui compos, & moræ patiens, nihil raptim & imprudenter agit.

Pag. 206 *Quid esset*. Mansura ne libera, an sub unius imperium redigenda?

Pag. 207 *Martius* &c. Sicula fornace recoxit Cyclops Martis frameam, Neptuni tridentem, Apollinis sagittas in Pythone conficiendo hebetatas, anguineos crines in capite Medusæ quos Pallas gestabat in Ægide, fulmina quibus mox Jupiter usurus erat contra Gigantes apud Pallenem, oppidum Macedoniæ, quam & Phlegram olim dictam Stephanus ex Eudoxio tradit, & Eustathius in catalogo.

Pag. 208 *Rorantia fletu* &c. Maduere quasi fletu aut sudore. Dicit autem illa signa fuisse publica populi Romani usque ad pugnam Pharsalicam: devicto enim Pompejo privata esse cœperunt in Cæsare.

Pag. 209 *Quid mirum* &c. Quid vero mirum furore quodam correptos, quibus mox erat configendum, futuram cladem portendisse; quum & Romani passim in extremis orbis partibus degentes eo die mœsti fuerint, & mœroris tamen causas ignorarent?

*Tyriis qui Gadibus*. Insula extemæ Hispaniæ, in qua civitas, colonia Tyriorum.

*Augur*. C. Cornelius, divinandi scientia nobilis, quum Favavi auguria caperet, primo tempus ipsum pugnæ notavit, idque iis qui aderant significavit; deinde ad observanda signa iterum conversus, divino quodam furore afflatus exsiluit, vociferatus, *Vincis, o Cæsar* &c. Plut. in Cæs.

Lucanus.

d



*Timavi.* Timavus septem, aliis novem ostiis in mare exire creditus, cuius hodie vestigia vix reperias. Hunc prope Troja profugus Antenor Patavium condidit.

Pag. 210 *Adverso, Domiti* &c. Namque hic victus, cæsusque fuit.

*Eripe* &c. Collectas huc omnes undique gentes obijce Cæsari, o Pompei, internecione delendas, ne supersint, quibus imperet, de quibus triumphet.

Pag. 211 *Gladiosque* &c. Testabitur enim victoria culpam hostium esse, non vestri, & gladios vos juste strinxisse.

*Nulla* &c. Significat nullum bellum juste suscipi, si adversariorum iudicio standum esset; quisquis enim eam partem appellat injustam, quam haud ipse sequitur.

Pag. 212 *Grajis* &c. Delicati ac molles Græci, lingua & ludis, quam manu & armis promprios.

*Pugna* &c. Pugnae labor præcipuus in terrarum orbe exteris gentibus liberando versabitur, & in Romani nominis hostibus profigandis.

*Unius* &c. Non dignas esse, de quibus unus agatur triumphus.

Pag. 213 *Trepido.* Gestio, exsulto.

*Septorumque.* Loca in campo Martio, quo fiebant comitia, instar ovilium tabulatis inclusa, *septa* vocabantur. Pone igitur ob oculos militibus suis Cæsar, quæ se victum suosque pœnæ maneant & cruciatus, quæque scelera patrandæ forent in comitiis a victoribus.

*Cum duce Sullano.* Cum Pompejo scilicet crudelitatem Sullæ, cuius magister equitum fuerat, referente.

Pag. 214 *Ignoti* &c. Sensus est juxta Grotium: Cædem ego ignoti cujusvis perinde acceptam habeo, ac si parricidium esset. Vel sic intellige: Si quis ignotum hominem interfecerit, quum propinquum potuisset, tamquam scelestus habeatur.

*Sternite* &c. Cæsar apud Appianum. Ad pugnam exeuntes diruite mœnia, fossas opplete . . . Videant nos hostes ipsi destitutos castris, sciantque nobis ex necessitate injunctum esse, eorum castris potiri, aut in prælio cadere.

Pag. 215 *Sacraque* &c. Veteranus nempe miles generis claritate conspicuus, & Majorum suorum imagines præ se ferens.

*Reducesque Camillos.* Redux ab exsilio, Dictatorque iustus Urbem a Gallis captam, & Capitolium obsessum insigni virtute liberavit, Gallosque pepulit.

*Decioresque* &c. Vid. pag. 199.

*Quidquid* &c. Ex omni populo subiecto Zodiaco, ab extremo Noto ad ultimum Boream degentes, habemus auxilia.  
 Pag. 216 *Et populos* &c. Et auferet venturæ ætatis prolem, sublati iis, qui sobolem propagassent.

Pag. 217 *Rur vacuum* &c. Omnes has urbes desolatas & vastas factas ostendent ruinæ, & loca inculta, nisi quod novi Coss. in monte Albano celebrent Ferias Latinas ex instituto Numæ. *Nocte coacta*. Vel qua scilicet Senator ipse cogebatur Latinis Feriis interesse, vel qua cogebantur in Albano monte, sive congregabantur Lat. urbes 47, ut ejus sacri participes fierent; ex præscripto enim vetusti fœderis inter Romanos & Latinos percussi, Coss. Sp. Cassio & Posthumo Cominio, in hisce Feriis carnes Latinis populis dividebantur.

*Vincto* &c. Agros colunt servitia, exstinctis dominis bello civili.

*In nullos* &c. Utpote quæ incolis destituta sit.

*Et damnata* &c. XVII Kal. Sextiles, Alliensis in fastos relatus inter atros dies, quod eo die Tribuni militum legiones ad Alliam fluvium educentes a Gallis victi sint, & Urbem aniserint.

*Dum munera* &c. Dum uno quasi prospectu ponit ob oculos tot illustres multorum annorum victorias atque triumphos, & momento temporis eripit omnia.

Pag. 218 *Haud multum* &c. Parthi tantum & Indi subigendi supererant, ut universus terrarum orbis Romanis subiceretur.

*Nec votitor* &c. Nec Consul Dahas, Scythiæ populos, vagos esse prohibens in mania ducat, neque Sarmatis succinctus urbis loca designet; quod fiebat aratro, subjunctis vacca & tauro, sulcum ducente ubi mœnia ponerentur.

*Quod semper* &c. Amissæ Pharsalico prælio Libertatis causas has esse dicit, quod nempe Romani Crassos a Parthis interfectos ultri non fuerint, & quod fugientes quodammodo civile nefas ex Italia decesserint duce Pompejo. Ex quo factum est, ut deinceps Libertas, toties mortis discrimine quaesita, ultra Tigrin, ( malunt aliqui Tanain legere propter Scythicum quod sequitur ) Rhenumque recesserit, eademque Germanorum & Scytharum bonum evaserit, nec Italiam amplius respexerit.

*Infami*. Ob Asylum quibuscunque nefariis hominibus apertum.

*De Brutis* &c. De Junio nempe Bruto, ejusque sociis, qui Libertatem intulerunt, ejecto Tarquinio.

Pag. 219 *Astra* &c. Juppiter detestatus scelus Atrei, qui Thyestæ fratri duos ipsius filios epulandos, eorumque sanguinem vino admixtum bibendum dedit, Solem in Ortum repulit, & subitam noctem induxit.

*Cladis* &c. Quæ sequuntur, ut in cæteris Imperatores, ita in Julium præcipue Cæsarem ironice dicta; qui post bella civilia parem Superis honorem habuit, *Divus* videlicet appellatus; cujusque mortui Manes sive animam in cælum receptam Roma credidit & propter fulmina, quæ cecidere, & propter crinitam stellam, quæ per septem ab ejus nece dies continuo fulsit.

Pag. 220 *Crastine*. Emeritus hic Cæsaris miles, qui in gratiam ejusdem iterum sponte militabat: magno fuit animo, & insigni virtute, ut vel Cæsarem ipsum primus ipse certamen iniens quodammodo erigeret: *Faciam*, inquit enim, *hodie Imperator, ut aut vivo mihi, aut mortuo gratias agas*, &c. Com. 3 Cæs.

*Extremique* &c. Concurrentium fragor petvenit ad verticem Olympi, Thessaliæ montis, qui secundam aeris regionem, in qua nubes & tonitrua, cacumine superat.

Pag. 221 *Extremum est*. Intima pars.

*Nec Fortuna* &c. Nec Fortuna belli erat diu anceps: statim præcipiti fato ad Cæsarem inclinavit.

*Spatioque* &c. Motu accensas colliquescere plumbeas sagittarum glandes, præter Aristor. De cælo & Meteor., Ovidius quoque auctor est Met. lib. 2:

*Non secus exarsit, quam quum Balearicaplumbum  
Funda jacit: volat illud, & incandescit eundo,  
Et, quos non habuit, sub nubibus invenit ignes.*

*Stetit* &c. Nefas cumlatum admisere civium utrinque pila.

\*Pag. 222 *Inmemores* &c. Pompejani equites ex diversis nationibus collecti terga vertentes ostenderunt, *civilia bella* &c. *Errore vago*. Certamine multiplici.

Pag. 223 *Quis præstet* &c. Quis jussu potius, quam voluntate pugnet.

*Ægide*. Scuto Palladis, in quo Medusæ caput homines in saxa convertens: videtur autem respicere Poeta ad Palladis apparatus contra Martem, Venerem, & Troas. Homer. Iliad. 4.

Pag. 224 *Quod ferrum* &c. Illud videlicet, quo postmodo in Senatu Cæsarem interficeret, libertatemque Romæ restitueret.

*Fataler*. Quia in altero civili bello apud Philippos Brutus vincendus erat ab Antonio & Octavio.

*Juris* &c. Nondum scilicet se Regem constituit.

Pag. 225 *Successor*. Quia successurum se Cæsari in bellum Gallicum speraverat.

Pag. 226 *Cunctor* &c. Romanus sanguis torrentis instar hærentem barbarorum sanguinem impulit, vetuitque consistere.

*Quod peris*. Nempe Libertas.

*Alieni* &c. Timoris scilicet posterorum pœnam damus.

Pag. 227 *Orbe remoto*? Si mundus nobiscum non perierit?

*Seque negat tanti*. Negat se tanti esse pretii, ut pro se in mortem præcipitent, seque Cæsarianis, jam rebus perditis, trucidandos objiciant.

Pag. 228 *Quamque* &c. Sensus est: Fortuna ut fuit infida Pompejo in secundis rebus; ita in adversis fuit illo minor, quod eum de uientis suæ constantia dejicere non valuerit.

*Jam pondere* &c. Levatus onere imperii, quod tibi fatum commiserat.

*Tibi . . . mori* &c. Significat non Pompeji gratia, sed publicæ Libertatis causa interire majorem nihilum partem in pugna Pharsalica, illo jam inde digresso; perinde ac deinceps publicæ tantum Libertatis gratia Uticæ in Africa, Munda in Hispania, & in Ægypto clades consecutæ fuerunt.

*Non jam* &c. Non propter Pompeji celebritatem, pugnantique libidinem arma tenemus, sed Libertatis tuendæ gratia.

Pag. 229 *Teque minor* &c. Alii te perinde ac victorem venerantur adhuc, tu solus animo quodammodo deficiis.

*Nunc tibi* &c. Nunc vere cognoscis populorum erga te studium, & amorem; quem quidem in prosperis rebus non tam facile licet agnoscere, quum plures fortunam quam amicitiam colant.

Pag. 231 *Et Stygia* &c. Tenebras nocturnas nostri hemisphærii plenas fuisse territamentis, & malorum Dæmonum ac futurum occursibus.

*Scythica* &c. Priusquam oraculo monitus Tauricam Dianam in Scythia peteret, ubi a sorore Iphigenia Deæ sacerdote agnitus expiatusque est: placatæque furæ, quibus ob necem matris agitabatur, *Enmenides* appellatæ.

Pag. 232 *Pentheus*. Quod impie furens Bacchum, ejusque sacra contemneret, ab Agave matre in furem acta cum cæteris Bacchantibus membratim disceptus est.

*Ultrix* &c. Qua in Senatu a Conjuratis confossus 23 vulneribus casurus erat.

*Pompejo* &c. Qui si mortuus esset, majoribus furiis exagitaretur Cæsar.

*Non cernere* &c. Utpote quæ testâ cadaveribus.

*Invidet* &c. In rogis cremari prohibet, & inficit Æmæthiam aere pestifero ex cadaverum corruptione.

*Non illum* &c. Ne crudelissimi quidem Romanorum hostis Hannibalis exemplum movet, qui P. Æmilii ad Cannas interfecti cadaver conquisitum honorifice sepeliit, quique iussit accendi rogam ad hostium interfectorum corpora comburenda.

Pag. 233 *Libera* &c. Alii *Fortuna*, hoc est, Mortui ab injuria Fortunæ liberi sunt.

Pag. 234 *Vos, quæ* &c. Nempe græves, quæ hiemis frigora fugientes, a Strymone Thraciæ flumine tepentem Nilum proficiscuntur.

*Sic quoque* &c. Haud nudant ossa cadaverum, nec rimantur feræ viscera; in tanta namque copia sufficit degustasse pleraque fastidiose & dente superbo.

*Quod sufficit* &c. Quænam ævi diuturnitas poterit eluere & abolere memoriam tam ingentis exitii?

Pag. 235 *Ante nova* &c. Secundum nefarium bellum intelligit, quod iisdem hisce campis Antonius & Octavius gessere cum Bruto & Cassio juxta Poetæ nostri sententiam. Quod tamen prope Philippos urbem Macedoniæ commissum est, ut monuimus alias.

*Nullus* &c. Te nemo incoletet, o Thessalia, sed omnes fugerent tamquam execrandam terram, gentium & populû Romanî bustum, vel tamquam regionem inhabitabilem, sub Zona Torrida inter utrumque Tropicum, sive sub alterutra Frigidarum positam; si modo tu ut prima, ita sola nefarii belli arena fuisses.

*Quid totum* &c. Cur damnatis, & mox in participationem sceleris admissas absolvis crimine totius orbis partes?

*Hesperia* &c. Vid. pag. 13. *Pachyni*. Promontorii Sici-liæ, ubi navali prælio victus est Sex. Pompejus ab Agrippa, auspiciis Augusti.

*Puros* &c. Hæ memoratæ clades tam ingentes fuere, ut innocentes quasi immunesque scelere Philippos effecerint.

## IN LIBRUM OCTAVUM.

Pag. 236 *Herculeas fauces*. Dissidia inter Oſsam & Olympum, in confinibus Thessaliæ & Macedoniæ: Thermopylæ dicuntur a thermis Herculi sacris.

*Dispendia* &c. Circuitus nempe, erroresque quærens cum itineris dispendio, idque de industria faciens, ne ab insequentibus hostibus deprehendi posset.

Pag. 237 *Fatisque* &c. Prosperisque *fatis contraria fata* rependit.

*Æſtaque* &c. Triumphum de Hiarba & gestis in Africa, quem egit adhuc eques 24 annos natus, Sulla graviter ferente, triumphum illi decerni; utpote qui hæc gessisset sub alienis auspiciis, & ante maturam ætatem.

*Classes* &c. A se ductas contra Cilicas piratas, & triumphum de Mithridate rege Ponti.

Pag. 238 *Cujus adhuc* &c. Pompejus, cujus præfecti longe lateque classibus tenebant Corcyram, sinum Ambracium prope Leucadem, & oram Liburniæ in mari Hadriatico, olim Cilicum domitor, in exigua cymba vehitur.

Pag. 239 *Non ultra* &c. Idest, ejulatu & lamentis abstinuerunt, Pompejum reveritæ & tacito tantummodo gemitu fatum deplorantes, ne magis videlicet Corneliæ dolorem accenderent.

*Habes aditum* &c. Si calamitatem mei fortè animo feres, immortalem laudem consequeris; unica enim materia laudis esse potest fœminæ conjux miser, quem desertum ab aliis fida sequatur.

*Deformis* &c. Extremus dolor, & cui nihil addi possit, uxori non convenit, *adhuc vivente marito*. In ejus tantummodo mortem differatur luctus, velut ultimum fidei conjugalium officium.

Pag. 240 *Quod defles* &c. Conjugem arguit Pompejus, quod aversam fortunam lugendo, eam videatur, quam se, habuisse chariorem.

*Devotaque* &c. Crassorum Manibus odiosa & infesta transuli sinistram cædis omen e Parthia in hæc bella civilia.

*Mallet* &c. Utinam me prius devovissem, ante hanc cladem, pro tua victoria! Id quia non contigit, nunc denique expia clades tuas mea cæde.

Pag. 241 *Hæc jam &c.* Quod Corneliæ, tibi que hospitio fuerint.  
*Mundi nomine.* Quod tam profligato sæculo fides aliqua  
 superesset.

Pag. 242 *Materiem.* Me ipsum scilicet, veluti materiam a  
 Cæsare impetrandæ veniæ ob exceptam hospitio Corneliæ.  
*Quod &c.* Quod adhuc stante Fortuna vixit non minore  
 cum modestia, quam si conjux profligatus esset.

Pag. 243 *Jacenter.* Grotius legit *jacentis.*  
*Quotus in plaustro &c.* Quota stella Ursæ majoris obser-  
 vetur navigantibus in Africam.

*Signifero &c.* Non observamus stellas in Zodiaco duodecim  
 signa cœlestia continente, & in illa cœli parte, quæ revo-  
 luta nobis occidit; sed sidera vicina polo Arctico, qui no-  
 bis semper sublimis certos signat cursus, juxta quem ma-  
 xime fulgent duo sidera Helice & Cynosura.

*Numquam &c.* Ubi nulla cœli pars stabilis stellas præfert,  
 ad quas cursus dirigatur.

*Summis . . . ceruchis.* Summis nempe cornibus antenna-  
 rum, ex κίρας cornu, & ἔχω habeo.

*Borporon &c.* Sensus est: Navigantibus Septemtrionem ver-  
 sus stella polaris, sive polus Arcticus elevatur: ad meridiem  
 vero navigantibus stellæ polares Bootes & Ursa minor de-  
 scendunt a summitate mali, ceu puncto verticali, Horizon-  
 tem versus, hoc est, polus deprimitur.

*Inde Canopus &c.* Quum Syriæ portus tetigeris, incipit  
 elevari Australis stella, Canopus nomine, quæ metuit, ne  
 Borea nubes impellente obscuretur.

*Illa quoque &c.* Si in sinistram teneas a Canopo trans  
 Pharon, illidetur navis Syrtibus.

Pag. 244 *Hoc &c.* Alterum veli angulum protendit, reducto  
 altero.

*Non sic &c.* Non secus atque auriga in curuli certamine  
 contendit interiore rota quam proxime stringere metam, quo  
 brevior gyro circumbeat.

*Dexteriore rota.* Immobili fere sinistra, dum dextra ver-  
 titur.

Pag. 245 *Totum &c.* Subire aliud cœli clima, ubi propter lo-  
 ci distantiam & mundi inclinationem variatur diei ratio.

*Arsacide.* Regi Parthorum.

*Si vos, o Parthi &c.* Sensus totius loci paucissimis ver-  
 bis hic est: Si passus ego sum, vos pace & otio frui, quum  
 peterem Caspia claustra, sive montium Caspiorum intrer Me-  
 dos ac Parthos fauces, & perpetuis bellis assuetos Alanos in-

sequeretur; si gentium omnium victor vobis peperci, nec in triumphum duxi; si non semel tantum incolumitatem & pacem mihi debetis: arma sumite in Cæsarem, & Pompejo vincite Partbi.

*Achæmeniis*. Persicis, ab Achæmene primo Persarum Rege.

*Nysæus*. Nysam, urbem Indiæ, a Baccho conditam præterfluens.

*Phabi* &c. Propior eram orienti Soli, quam ipsi Persæ.

*Ex aquo*. Par, liber, non triumphatus.

*Claustis vestitam* &c. Terminis constitutis intra Euphratem, quem Phraates, quum Tigranem generum suum a Pompejo exposceret, imperii metam & terminum pactus est.

*Zeugmaque Pellaum*. Syriæ ad Euphratem oppidum, ab Alexandro Macedone conditum.

Pag. 246 *Dimisso* &c. Misso ad Parthos Dejotaro.

*Rhodon*. Insulam Phœbi templo celebrem.

*Compensat* &c. Facit compendium magnorum sinuum ad Telmessum, Cariæ oppidum, recta per medium pelagus navigatione.

*Syedris*. Ciliciæ oppido maritimo, prope Selinum fluvium.

Pag. 247 *An Libya* &c. Marium post carcerem Minturnensem, & latebras in ruinis Carthaginis, ad septimum Consulatum Fortuna provexit.

*Vos pendite* &c. Expedite, deliberate ad quem tamquam fidelem & viribus præstantem confugiamus, ad Iubamne Numidarum regem in Africa, an Phraaten Parthiæ, an ad Ptolemæum, puerum adhuc, Ægypti regem.

*Obliquo* &c. Qui regni Libyæ jus ad se ex laterali descensu pertinere vult. Alii nothum fuisse intelligunt.

*Jam* &c. Insolens factus est, quod Aulus Varus subsidium ab illo petiisset; & quod Curione cum exercitu deleto res Romanas vidisset suis inferiores.

Pag. 248 *Dividit* &c. Vide pag. 245.

*Et polus* &c. Quum nulla sit pars Assyriæ, quæ polum Antarcticum videat, Parthia atque India Assyriæ nomine debet intelligi.

*Et abruptum* &c. Oceanus Indicus alius est a nostro, cuius pars Mare rubrum, diversi a nostro coloris, ut volunt.

*Primi* &c. Retulerunt hastas Macedonicas, & impetum Alexandri.

*Scythicas*. Parthicas; sunt enim Parthi a Scythis orinndi.

*O utinam!* &c. Atque utinam mihi non instaret necessi-



tas opem implorandi a Parthis, gente sæva, nostri æmula invidaque, nec habente minus favoris divini!

Pag. 249 *Quantus* &c. Quas victorias retuli & triumphos & Mithridate, Tigraue &c. ultra Mæotida paludem & Tanain!

*Una dies* &c. Una igitur infelicitè gesta in Thessalia pugna ita afflixit omnia, ut de totius mundi fato actum jam conclamatumque sit? Ut lis sit omnino dirempta pro victoribus in Æmathia? Ut victis nullum adhuc supersit auxilium?

*Parthorum* &c. Ad quorum pedes tu supplex accidas opem imploraturus?

Pag. 250 *Clades ut Parthia* &c. Ut cladem Pharsalico prælio acceptam prius Parthi vindicent, quam nos cladem ab his acceptam ad Carras?

*Transire*. Euphratem scilicet, imperii sui limitem?

*Qui solus* &c. Phraates videlicet.

*Quidquid* &c. Latius ostendit Parthis minime fidendum; molles enim esse, ita ferente cœli clementia: campis planis superabiles nullis quidem hostibus esse ob alacritatem fugæ, cæteris vero locis facile vinci: violentis amnium vorticibus superandis impares esse: longa pugna deficere, nec posse æstivum Solem & pulverem sustinere: carere belli machinis &c.

Pag. 251 *Nulla* &c. Nulla vis in ictibus inferendis.

*Credis* &c. Strenuos ne milites esse putas, quibus fere inutilia tela forent, nisi ea venenis inficerent?

Pag. 252 *Damnat* &c. Male audiunt Thebæ in Bœotia nomine Œdipodis, qui matrem Jocastam duxit; quamvis ille hoc per ignorantiam admiseric, quod hi scienter & sponte.

*Quamquam* &c. In nullam tamen fœminarum regia libido magis sæviet; idque propter Crassum & Pompejum.

*Portenta*. Monstruosæ libidinis incitamenta.

Pag. 253 *Hæreat*. Crassorum clades in mentem tibi veniat.

*Vel Arêloum* &c. Et vel bellum Gallicum, atque Germanicum omisisse, subductis inde præsidiis.

*Quin respicis* &c. Quin respicis potius amicos & socios Populi Romani, & hos petimus, Ægyptum nempe, & regem Ptolemæum Lagi filium?

Pag. 254 *Aut Jovis*. Idest, pluvie.

*Unda diva* &c. Memor Cyprii maris, in quo nata Venus.

*Inde maris* &c. Ex Cypro profectus, obluente maris æstu & ventis, Pharon nocturna face iter navigantibus dirigentem prætergreditur; & ad infima Ægypti litora pervenit, qua Nilus septimo eoque ultimo & amplissimo ostio juxta Pelusium in mare exit.

Pag. 255 *Monstra*. Sceleratissimi homines Ptolemæo regi a consiliis; Photinus Eunuchus, Theodorus Chius rhetor, & Achilles Ægyptius.

*Hunc genuit* &c. Patria erat illi Memphis, ad Nilum sita, vanæ superstitionis plenissima, ubi quondam totius Ægypti regia fuerat.

*Illo* &c. Grandem senectutem ejus Sacerdotis indicat. Ex quo enim Sacerdos erat, plures boves ex illis, quos colit Ægyptus sub Apis nomine, jam perierant, lunaribus lustris illis exactis, ultra quæ vitam protrahere non sinebantur.

*Sua*. Bicornis enim Lunæ imaginem bos Apis in dextro latere referebat, macula candicante.

*Meritumque* &c. Commemoravitque officia Ptolemæo Regis pueri patri jam defuncto a Pompejo quondam præstita.

Pag. 256 *Neu te* &c. Potius quam regnum tuum invadat hospes, trade sorori Cleonattæ a te ejectæ.

*Rapitur*. Exagitur.

Pag. 257 *Tene mihi* &c. Legunt alii, *Tene mihi dubitas quum sis violare necesse, An liceat?* Perinde ac sensus esset, licere sibi Pompejum interficere, quum id faciat necessitate coactus, ad odium & iram Cæsaris avertendam.

*Perfida* &c. Ad pedem Casii montis, qua vada & brevia referunt Syrtis vicinas, inter Leptim scilicet & Alexandriam, Achilles assumpto Septimio tribuno quondam militum sub Pompejo, & Salvio Centurione sub eodem, atque tribus aut quattuor famulis præterea, ad navim Pompeji advectus est.

Pag. 258 *Jam jure* &c. Utpote qui destitueris auctoritate tutoris, qui tibi Ægypti regnum confirmabat.

*Bimaremque vadis* &c. Hinc Libyco, inde Ægyptio mari inter se collidentibus, propter æstum ostiorum Nili interjecti.

Pag. 260 *Numquam* &c. Non sine deorum inclementiæ nota vulgandum facinus.

*Qui Brutum* &c. Qui Brutum, Cæsaris tyranni percussorem, appellant *Parricidam*, factumque ipsum *nefas*?

Pag. 261 *Mutantur* &c. Simul cum Fortuna mea deficit & vita; neque ultra res prosperas vivo, morte miseras præveniente; nemo enim *fit morte miser*.

*Tantum*. Legendum *Tanto*: sensus enim est, se velle summa animi constantia mortem oppetere, ut eo magis illum admirentur & natus, & conjux; ac admiratione sua eadem veri amoris signum exhibeant.

*Quam perferre*. Si necem ipsa subitura fuisset.

*Nescis &c.* Id est, nescis me chariorem esse Pompejo, quam ipse sibi sit: eum petis, qua parte cupit: majores luet pœnas, si me interfici viderit, quam quod ipse juguletur.

Pag. 262 *Moriar &c.* Mortem inveniam, utut Ptolentæi beneficio illam non impetrarim.

*Pompejo &c.* Qui Pompejo beneficium hoc præstiterit, vacabit culpa, quæ in Cæsaris conferetur crudelitatem.

*Vivis adhuc.* Quamvis adhuc vivas, libertatem amisi.

*Nondum &c.* Nondum norant artifices caput uno ictu, rotato ense, amputare.

Pag. 263 *Quo numquam &c.* Caput, pacis semper amans, in Foro, Comitibus, Senatu potens.

*Perituraque proles &c.* Perit paullo post in pugna contra Cæsarem: navigio namque depresso a fugientibus, flumine immersus ipse creditur.

*Incestæ.* Cleopatræ, cujus nuptias a patre consecutus fuerat, moriens regnum reliquit.

*Mausolea.* Sepulcra & monimenta illius æmula, quod Mausolo regi Carizæ ab uxore Artemisia extructum erat.

Pag. 264 *Ne jacent &c.* Ne scilicet sepulcro careat ejusdem truncus, aut ne conquisitus in mari honorifice sepeliatur ab ipsis hostibus.

*Cinyræ.* A rege Cinyra sic appellatæ.

Pag. 265 *Cantu.* Epicediis & naniis deplorantium ad tibiam.

*Totus &c.* Ut militari more exercitus demissis hastis ter rogum circumeat. Vide Virg. *Æn.* 11, v. 188.

*Siccor.* In quos nulla conjiciuntur aromata.

*Nobile corpus &c.* Hypallage: Nobile corpus non premit robora, ut versu sequenti: extrui enim pyra e roboreis fissilibus solebat, & in medio collocari cadaver.

Pag. 266 *Si tibi &c.* Nisi forte fluctibus jactari, aut funere carere malles, quam habere tam vile; ignosce tenuitati hujus officii mei, & exilitati funeris, quam excuset fati prementis injuria.

*Pramissa.* Legunt alii *Promissa.* Potior nobis est nostra lectio, quam perinde interpretamur, ac si dies ob Auroræ radios solito citius effulsisset.

Pag. 267 *Inustis.* Non penitus absumptis.

*Temeraria dextra &c.* Verba Poetæ increpantis Cordum de sepulcro & inscriptione sollicitum; quasi Pompejo angustum sit monumentum, cui totus a se triumphatus orbis esset tumulus.

*Obrue saxa* &c. Terra obrue, o Corde, saxum hoc tuum, diis potius inclementiæ, quam Pompejo sepulcri notam futurum; cui, si signum hoc amoveas, tota Ægyptus loco tumuli erit, petinde ac Mons Cæta Herculli, aut Nysa Baccho.

Pag. 268 *Revocato Consule*. Metello, qui impar adversus Sertorium videbatur.

*Dic semper* &c. Adde etiam rediisse semper in ordinem, reddidisse se civilibus officiis, neque affectasse tyrannidem.

*Haud equidem* &c. Exitum illud Romanis impendere e carne Sibyllino interpretati sunt XV viri, si Prolemæus Auletes a Gabinio, qui tum Syriæ præfuit, ex auctoritate Pompeji & S. C. reduceretur: de qua re Cic. multa in lib. 1 Epist. fam. Poeta refert ad rem Pompeji præsentem.

*Isin*. Eandem cum Io, quam Ægyptii colebant sub specie vaccæ; cujus Sacra Romam translata fuere, eique in Campo Martio templum constitutum cum 9 dierum sacrorum ceremoniis. Erant & plures Isidis aedes.

Pag. 269 *Canes*. Anubin, deum canino capite pictum. *Sistra* &c. Crepitacula ex ære aut argento, adhibita in sacris Isidis, modum luctus indicentia.

*Et quem* &c. Cujus obitum plangendo, hominem, non deum, testaris fuisse Osirin, regem Ægypti a Typhone fratre cæsum, ab Iside uxore diu quæsitum.

*Scelus*. Quod aliis videretur esse scelus, honori maximo nobis futurum esset, si Pompeji Manes Italiam transferre contingeret.

*Imbrifera* &c. Thebas Ægyptiacas, in exusta regione siccas, quum subjectæ sint Tauro signo Zodiaci; in cujus humero septem stellæ dictæ Plejades.

Pag. 270 *Et Casio* &c. Teque potius visere, quam Jovem, qui colitur in monte Casio.

*Inclusum* &c. Sensus est: Non mirum, si Pompejus tam vili tumulo conditus honoratur; nam & multi, qui diis Capitolinis sua tura sæpe negant, venerantur molem terream, cui ab Aruspice inclusum est aliquid, quod erat fulminatum. Sup. lib. 1:

. . . *Aruns dispersos fulminis ignes.*

*Colligit, & terræ mæsto cum murmure condit.*

*Hominem fulmine exanimatum cremari fas non est: conditi terra religio tradidit.* Ita Plinius.

*Atque eris* &c. Non majorem fidem habebunt posteri Ægypto de tumulo Pompeji glorianti, quam Cretæ de Jovis; qui, quum sit immortalis, tumulo condi non poterat.

## IN LIBRUM NONUM.

Pag. 271 *Convexa Tonantis*. Elysios nempe campos, sitos juxta Nostrum in regione proxime Lunam, ad quos evolvant soluti corpore innocuorum hominum Manes; namque  
*Ignescit illis vigor, & celestis origo.*

Pag. 272 *Nen illuc &c.* Non illuc semper ascendunt Cæsares aureis conditi loculis, eburneis auratisque elati lectis &c.

*Nec servire timens*. Utpote qui perfectus Stoicus, & potius mori paratus, quam libertatem amittere.

Pag. 273 *Malea*. Malea promontorium est Laconiae, quam incolere Dores. *Apertam*. Per quam scilicet aditus erat ad Inferos.

*Ausum classi &c.* Phycunta oppidum cum promontorio Cyrenaicae regionis, quia portum Catoni praelusit, expugnavit & militibus suis diripiendum concessit.

*Palinure, tuum*. Promontorium Cyrenaicae regionis in Africa, a Palinuro Aeneas navis magistro denominatum, ut & illud Praetani sinus in Italia.

*Quum procul &c.* Conspectis navibus, in quibus erat Cornelia & privignus ejus Sextus Pompejus cum suis, Cato dubitare coepit, utrum Cæsaris essent, an Pompeji.

Pag. 274 *Hac mihi &c.* Non ulla tellus Pompejo triumphata gratior jam mihi est, quam hæc; quæ utcunque nocens illius ossa habet.

Pag. 275 *Inveniet &c.* Quodcumque mare sulcaverit e filiis alteruter, sive quis alius Pompeji nomine, classes inveniet; & ad arma quascumque gentes excitabit.

*Insidia &c.* Quod, me in navi relicta, solus in cymbam Ægyptiacam descenderis: nec inutile fuit me vixisse deceptam; ita enim mandatis tuis mihi commissis liberos non defraudavi.

*Quam longo &c.* Sensus est: Ignoro mortis meae tempus: quamdiu vero vixero, vivacem animam cruciatu & dolore torquebo, ab ipsa, hoc est ideo poenas de anima vivace sumens, quod vivax diu sit, nec cornens . . . tua vulnera, Magne, illico mortem subierit.

Pag. 276 *Composita &c.* Naufragium & mortem exoptans.

*Nocentes*. Quasi læsa pietate visu.

Pag. 277 *Non ego* &c. Quattuor hi versus cum interrogatione legendi.

Pag. 278 *Mortem* &c. Ut populi deferrent mortem viri potentis. *Ter conspecta Jovi.* Capitolino in tribus triumphis.

Pag. 279 *Mulum majoribus* &c. Qui defecit quidem ab ingenua illa veterum Romanorum moderatione, *sed in hoc tamen utilis awo*, quo jus ac fas contemnunt omnes ac negligunt.

*Cui non nulla* &c. Legendum potius *Cui non ulla*, ut illud *Cui* non jam Pompejo, sed ævo respondeat.

*Intulit.* In Ærarium publicum.

*Receptis.* In Urbem vicissim reversis ad internecionem adversariorum partium.

Pag. 280 *Tarcondimotus.* Cilicum Princeps, qui signum secessionis dedit. Alii aliter legunt, quin tamen allatæ interpretationi quidpiam officiant.

*Parterque* &c. In illius gratiam partes has secuti sumus.

*Paci* &c. Cujus arma sequi vel ipsi paci *pretulit orbis.*

*Non barbara* &c. Neque enim servitutem sub Parthis aut Scythis durum metuo, sed sub Romano levem; quam sub eo libens potius, quam bella ulterius sequar.

Pag. 281 *Clausæ* &c. Bello victis negatur fides, & victoris in supplices clementia.

*Indigna servitii.* In servitutem prona.

*Quod non* &c. Quod nempe non militas spe summæ dominationis acquirendæ Pompejo, quum ille jam obierit, quod nulli domino es obnoxia, quod tibi vincere potes; discedis ab armis, tibi que liberæ servitutem quæris.

Pag. 282 *Quis vestras* &c. Quis credat vos strenue pugnando manus vestras cæde hostium cruentasse?

*Proterque Metelli.* Cornelia, Scipionis Metelli filia.

*Cervicis pretio* &c. Meæ scilicet cervicis pretio, quod a Cæsare dabitur, *Sciet ista juventus utiliter se mea signa secutam.*

*Haud aliter* &c. Cilicas secedere volentes ad officium & in castra revocat, non secus atque apum examina in alveos tinnitu æris reducuntur.

Pag. 283 *Jamque actu* &c. Ne per otium ad seditiones relaberentur, militaribus laboribus eos exercere constituit.

*Syrtes* &c. Syrtium originem tribuendam esse docet vel ipsi Naturæ; quæ, quum rudi Chao eximeret omnia, indigestas hasce moles medio mari reliquit & indiscretas: vel rapidis Solis vicini radiis, qui juxta Stoicorum opinionem

maris fluctibus & exhalationibus ali creditus, sensim, ut infra, *Æquora subduxit zona vicina perusta*.

*Et nunc* &c. Obstat adhuc, quominus in terram solidam totus abeat: quod temporis progressionem futurum dicit.

Pag. 284 *Illato* &c. Potior est lectio *in lato*, ut sensus sit, Austrum non jam in vadis, sed in lato litore fregisse fluctus.

*Spatium* &c. Quum rudentibus nautæ frustra tentarent submittere vela, sinus velorum propellebantur ultra proram.

*Quacumque* &c. Quæ leviores factæ succisis malis ventum effudere, æstus obviis sui juris, ut contra quem non obnitebantur vela, has eripuit ventis.

Pag. 285 *Tritonos*. Fluvii juxta Tritonida paludem.

*Deus*. Triton, Neptuni tubicen.

*Atque insopiti* &c. Draconem hunc interfecit Hercules, & aurea poma Hesperidum hortis eripuit, ut infra.

Pag. 286 *Tyranno*. Eurystheo Argivorum regi, qui jussu Junonis fuit Herculi ἐργασίας, eumque variis periculis exposuit.

*Terra cingere Syrtin*. Terrestri itinere invadere.

*Inde polo* &c. Inde ab æstu Austrino, hinc a frigore Boreali.

*Si quibus* &c. Idest, qui nulla vota faciunt evadendi.

Pag. 287 *Et sacrum* &c. Et Cato securus fati, quod eum hic manebat, invasit Libyam parvum sibi tumultum daturam.

*Tertia pars* &c. Si vulgarem admittas orbis divisionem, Africa est tertia orbis pars: ita & Sallustius in bello Jug. *In divisione*, inquit, *orbis terra plerique in parte tertia Africam posuere: pauci, tantummodo Asiam & Europam esse, sed Africam in Europa* &c.

*Sed major* &c. Asia tamen est major orbis terrarum pars, quam Africa Europæ conjuncta. Quum enim Africa & Europa in Orientem effundant Zephyrum, illa a Noto, hæc a Boreali parte; Asia sola se extendens utrinque ad Austrum a dextra, ad Boream a sinistra, totum Eurum sibi vendicat.

Pag. 288 *Glebarum crimine*. Terræ crimen divitiæ sunt. Ovidius:

*Effodiuntur opes irritamenta malorum.*

*Nasamon*. Nasamones Africæ populi, in solo arenoso, vicini Syrtibus, naufragiis victitantes; obsident enim litora, & æstu destituta navigia notis sibi vadis occupant.

*Habent*. Ob rapinas, quas in naufragos exercent.

*Nam litore* &c. In plana enim & exposita regione juxta Syrtis violentius furit Auster, quam in pelago; majores hic are-

arenæ, quam ibi aquarum fluctus concitans: neque enim exorians ventus hic adversis montibus frangitur, scopulisque repulsus dissipatur.

Pag. 289 *Æoliam*. Ex Æoli namque regis antro ruunt venti, suamque rabiem exercent.

*Et nunquam* &c. Neque umquam in aere suspenditur, more nubis imbriferæ resoluta.

Pag. 290 *Sic illa* &c. Vide pag. 35.

*Nisi* &c. Stellæ velut navigantibus observatæ. Inter Syrtes, quamvis terra pergentibus, iter sideribus destinatur, nec aliter cursus patescit. Nam putris soli faciem aura mutat &c Solinus cap. 40.

*Finitur circulus*. Horizon ille ab  $\delta\pi\iota\chi\omega$ ; terminat enim & dividit superius hemisphærium ab inferiori.

Pag. 291 *Maligna*. Lutea scilicet, vel tenui vena.

*Suffecitque* &c. Nemine desiderante illud, quo abstinuisset dux.

*Tortis* &c. Juppiter arietina forma, vel umbilico tenus (ut habet Q. Curtius lib. 4) arieti similis, cultus; quod hic Libero exercitum ducenti, siti fatigato, & Jovis patris imploranti auxilium, statim viso ariete, fons exsiluit arenis. Vide Dio. Sic. lib. 17, & Herod. Euterp.

Pag. 292 *Nam quidquid* &c. Reliqua omnis regio inter Leptin Minorem, quæ Libyphœnicum Africæ urbs est, & Pentapolitanam regionem arbores non habet. Berenicida vocat a Berenice una e quinque illis urbibus, quæ nomen sortita est a Berenice Ptolemæi uxore, quum prius Hesperis dicta fuerit.

*Deprensus* &c. Vult Auctor designare locum in Sphæra, cui Jovis Hammonis nemus in tellure responderet. Ait autem nemus illud esse sub Tropico Cancræ, quem vocat circulum *alti Solstitii*, quod Sol summam habeat altitudinem in eo loco, si ad Zonam temperatam Borealem referatur. Latini porro Scriptores Capricorni Tropicum non *Solstitii*, sed *Brumæ* circulum appellabant. Ovid. 3 Trist. El. 10, v. 7:

*Nec mihi Solstitium quidquam de noctibus aufert,  
Efficit angustos nec mihi Bruma dies.*

*Medium* &c. Errat hic Auctor; putat enim degentibus sub Tropico Cancræ omnia sidera & signa recto, non obliquo, itinere oriri & occidere. Quod verum est sub ipsa tantum Æquatoris linea, quæ medium secat Zodiacum, Quum itaque putaret Auctor Tropicum Cancræ signorum orbem medium percutere, seu dividere, nihil mirum illum signis omnibus

Lucanus.

c



eandem, ut loquuntur Astronomi, *Ascensionem rectam* tribuisse.

*Carcinos* . . . *Ægoceros*. Cancer, & Capricornus.

Pag. 293 *An sit vita nihil*. Legunt alii: *An sit vitanibilis*, sed longam differat *avis*.

*Et nunquam* &c. Sensus est, quod honestum est, sive successu gaudeat, sive careat, æque esse laudabile.

Pag. 294 *Servataque* &c. Non diminuta aut derogata Jovis ubi culti fide discedit, relinquens Orientalibus illis populis, quos supra commemoravit, Oraculum suum, quin illud ipse exploraverit.

*Tantum* &c. Quantum Cato continentia & tolerantia.

Pag. 295 *Quam* &c. Ultra quam, nullam posuere dii habitabilem.

*Aspides* &c. Adeo diversa species Aspis & Dipsas, ut hæc æquabilis sit, illa terrestris.

*Cur Libycus* &c. Cur Libya serpentibus abundet, non ita in promptu causa est, nisi forte adhibenda sit fides fabulæ referenti, quod, quum Perseus referens Medusæ caput

. . . . *stridentibus alis*,

*Ipse super Libycas victor penderet arenas,*

*Gorgonei capitis gutta cecidere cruenta:*

*Quas humus exceptas varios animavit in angues.*

*Unde frequens illa est, infestaque terra colubris.*

Ovid. Met. 4. Sed Nicander Titanum sanguini id tribuit.

Pag. 296 *Vultu*. Quo quidquid aspiciebat, vertebatur in saxum.

*Hoc primum* &c. In Medusa; namque Minerva crines ejus in angues convertit, quod in suo templo fuerat a Neptuno stuprata.

*Hoc habet* &c. Hæc una pars impune spectari potest.

*Quis timuit?* &c. Tanta celeritate homines in saxa Medusa convertebat, ut in ipsis metum præverteret, nec sensu mortis eos affici pateretur.

Pag. 297 *Illa* &c. Illius caput gestans Perseus Atlantem, Regem Mauritaniam, de gente Titanum, ( fuit enim Japeti filius ) ad Occidentem prope Herculis columnas, Calpen & Abylam, in saxum vertit. Ovid. Met. 4.

*Caloque* &c. Pallas Gigantes bellum Superis inferentes convertit in montes Medusæ capite, quod insculptum gerebat in ægide.

*Quo postquam* &c. Ad Gorgodas scilicet insulas Maris Atlantici, Gorgonum domos, postquam detulere Perseum, Danaes ex Jove in pluviam auream converso filium, talaria

Mercurii, qui ex Parrhasio Arcadiæ oppido, quique Arcados citharæ, unctæque palæstræ fuit auctor; & postquam Perseus subiro volucer *tustulit Harpen*, idest Mercurii Cylleæ, Arcadiæ monte, in lucem editi falcatum ensem, quo prius Mercurius ipse Argum, Ius in juvencam a Junone conversæ custodem, obtruncaverat: Pallas Perseo, fratri suo, Medusam aggressuro auxilium tulit, ea tamen conditione, ut ejus monstri caput ad ipsam perferret; eidemque dedicantem clipeum, cujus ope, aversam licet a Medusa faciem & volatum teneret, ejus tamen imaginem cernens tutus a periculo ipsam interficeret.

Pag. 298 *Nec terra* &c. Africam sub Æquatore positam cætera tellure altiore esse indicat Auctor, ideoque noctem sive umbram terræ longiorem Lunæ obstare, idest Eclipsin inducere, quum Luna sub Æquatore graditur, nec ad Austrum, aut Boream declinat.

Pag. 299 *Natus* &c. Amphibium serpentis genus.

*Fumante*. Graveolente, a tractu serpentis.

*Et semper* &c. Non in spiras sinuosus.

*Opbites*. Marmor serpentum instar maculis distinctum.

*Etiā nunc sola*. Serpentes enim aliæ verno tempore, hæc hiemali ponit exuvias.

*Jaculique* &c. Scandunt arbôres, e quibus se vibrant:

*Ante* &c. Solo habitu, & aspectu enecans.

*Dracones*. Alati serpentes, alibi innoxii.

Pag. 301 *Sinu laxo*. Orificio vulneris dilato, nuda ossa sine carne cernuntur.

*Natura*. Interior corporis pars.

Pag. 302 *Diversa*. Illa enim absumpserat, hæc tumefacit.

*Nondum* &c. Post mortem etiā intumescens.

*Utque solet* &c. Ut solet crocus Corycii in Cilicia montis, vino aut aqua dilutus, in theatralibus ludis per siphones tubosque latentes e statuīs emitti; *sic* &c.

Pag. 303 *Niliaca*. Aspide, quæ somno quasi solutos exstinguit.

*Non tam* &c. Non tam præsentem inferunt mortem venena, quæ fatilegi Sabæi decerpunt ex arbore referente betullam; e qua Romani Magistratus, Sabinis auctoribus, virgas gestabant.

Pag. 304 *Terre* &c. Scorpionis enim sidus in cælo fulget, suis viribus in Orione quondam interficiendo patetfactis.

*Ire* &c. Quin eamus potius ad loca torridiora, ut cæli inrempetiei mortem debeamus potius, quam serpentibus.

Pag. 305 *In loca* &c. Nostra est culpa, qui in hæc loca venimus: exige pœnas temeritatis nostræ, *Tu quisquis Superbum* hominum commercia abominatus, regionem hanc a lethiferis tantum serpentibus habitari voluisti, ne quis unquam secreti recessus tui conscius esset.

*Coeunt* &c. Opinati poetæ sunt occidentem Solem in æquorē stridere more ferri candentis in aqua. Juven. sat. 14:

. . . *Sed longe Calpe relicta*

*Audiet Herculeo stridentem gurgite Solem.*

*Et premitur* &c. Arcticus polus depressior hic est. Et quo longiores recessus Africæ perimus, magis deprimitur.

*Cyranis* &c. Modo quam Cyrenis essemus, e quibus digressi sumus, hiems erat: unde nobis tam subito æstus? tam brevi interstitio mutavimus legem anni?

Pag. 306 *Marmarida* &c. Psylli, Marmaricæ regionis incolæ, præter quam quod ipsi a serpentum morsibus immunes sunt, quin opus habeant incantamenti, hospites quoque suos rituum quorundam & carminum ope tutos efficiunt; vel a serpentibus morsos ipsi sanant ore venenum exsurgentes.

*Jovis volucer.* Halæetus, de quo Plin. lib. 10, cap. 3.

Pag. 307 *Galbana*. Galbanum succus est, seu lacrima ex arbore ferulaceo cognomine destillans resinæ modo, in Amano Syriæ monte.

*Thessala centaurea*. A Chirone Thessalo inventa.

*Longe* &c. Nascentis scilicet procul ab ea regione Psyllorum. Singulare remedium abigendis serpentibus odor adusto cervino cornu. Plin. lib. 8, c. 32.

*Nec dat* &c. Nec vulnus, & mors imminens incantatorem respirare sinit, aut carmen intermittere.

*Et cujus* &c. Idest, cujus serpentis morsu quis fuerit ictus, ex gustu veneni Psylli cognoscunt.

Pag. 308 *Tbreiciasque* &c. Bosporum Thracium, Propontidem, & angustias Hellesponti. *Amore notatum*. Leandri & Erus, quem cecinit Musæus, dein Ovidius in epist. intertranandum mersum: quod ubi comperisset Ero, se quoque turri præcipitavit.

*Qua pelago* &c. Helle, filia Nephæles & Athamantis, cum Phryxo fratre novercæ insidias fugiens ariete, quo vehebatur, delapsa & undis submersa, Euxino ponto nomen abstulit, effectumque, ut diceretur in posterum Hellespontus.

*Sigeasque* &c. Litus Trojanum, a Sigeo Promontorio, Achillis tumulo nobile.

*Rhazion*. Promontorium, Ajacis Telamonii sepulcro nobile.

Pag. 309 *Adspicit* &c. Scopulum, cui Hesione filia Laomedontis alligata fuerat a Neptuno, & ceto exposita; quam tamen Hercules liberavit.

*Quo iudex* &c. Paridem indicat, & Ganymedem, filium Trois, ab Jovis aquila raptum.

*Luseris*. Cum Paride in Idæ montibus.

*Smyrnai...vatis*. Homeri, quem Smyrna sibi vendicat.

Pag. 310. *Dæ cinerum* &c. Manes invocat, & Deos Lares, in quorum aris lucet Vestalis ignis, & asservatur Palladium, tamquam imperii pignus; quod viris conspici nefas.

*Phariis* &c. In Pharo insula & turri, quæ claudit portum Alexandriæ, extruebantur faces, quæ nocturno tempore appellentibus navibus prælucent.

Pag. 311 *Nec vile* &c. Ostendit officium hoc, quamvis facile præstitum fuerit, magni tamen esse faciendum a Cæsare; quum Dionysius iste in gratiam Cæsaris minime veritus fuerit interficere Pompejum, qui & avi ejus, Ptolemæi Lathyri, fuerat hospes; & patrem, Ptolemæum Auletem, in regnum restituerat; & ipsi quondam tutor a Senatu fuerat constitutus.

Pag. 312 *Quam debere*. Quam ostendere, se gratias debere Regi pro nece Pompeji.

Pag. 313 *Frustra* &c. Frustra cum Pompejo pugnavi, *totis concursi viribus orbis*, si etiamdum æmulum habeam.

*Majore* &c. Nunc video me majore, quam credideram, periculo bella gessisse; nam, si victus in Dionysii manus cecidissem, eadem me, quæ Pompejum, necis forma mansisset.

Pag. 314 *Fecissem* &c. Ego, ut victus divi ignosceres; tu, ut propter te servatum Roma mihi parceret, quod bellum civile gessissem.

(*O bona libertas*). Ironice, quasi non audeant mentem & affectus vultu testari, simulatum Cæsaris fletum timentes.

## IN LIBRUM DECIMUM.

Pag. 315 *Pompeji colla secutus*. Theodotum, qui Pompeji caput a Rege missum Cæsari obtulerat.

Pag. 316 *Profuit*. Cæsari, ne in easdem insidias incideret.

*Paratoniam... urbem*. Alexandriam; a Parætonio por-

tu, & oppido Ægypti non longe ab ipsa Alexandria.

*Terrarum* &c. Raptus morte, quæ sola potuit vindicare terras ab Alexandro subactas.

*Nam tibi* &c. Si enim libertas umquam restituenda fuisset Orbi, nihil aliud futura erat Alexandri memoria, quam ludibrium, & pessimum ambitionis, superbiam, ac regnandi cupiditatis exemplum.

Pag. 317 *Nilonque* &c. Strabo refert Alexandrum cum Sesostre, rege Ægypti, statuisse lustrare Æthiopiam, ut fontes Nili quæreret.

*Qui secum* &c. Qui eadem invidia, qua vivus non tulit imperii æmulum, illud moriens nemini reliquit, quasi alteri vel mortuus tantam magnitudinem invideret. Regni autem inter Alexandri duces divisionem vide apud Curtium lib. 10.

*Babylone sua*. In suam potestatem redacta.

*Terrasque* &c. Ultra Zonam torridam jacentes, quarum incolis Notus sive Auster a Zona torrida spirans perinde terga ferit, ac Boreas citra eandem habitantibus.

Pag. 318 *Laxare* &c. Ut laxaret sibi carcerem, quo custodiebatur, inquit Bersmanus. Ego de catenis portum Alexandrinum obstruentibus dici opinor. Scribit enim Plutarchus, Cæsarem ad se ex agro accivisse Cleopatram regno ejectam. Quia cum Apollodoro Siculo lembum ingressa, nocte ingruente ad regiam pervenit; quumque latere aliter non posset, stragulo se illigatam ab Apollodoro ad Cæsarem per fores apportari passa est &c.

*Emathis* . . . *telis*. Alexandrinis, ab Alexandro Macedone conditis; vel Cæsaris victoris in Emathia.

*Sistro*. Erat sistrum crepitaculum æneum, quo Ægyptii sacerdotes in Isidis sacris uti solebant. Vicem quoque tubæ apud Ægyptios exhibebat. Virg. Æn. lib. 8:

*Regina in mediis patrio vocat agmina sistro;*

*Cæsare* &c. & v. seq. *Leucadioque* &c. Adriaticam pugnam in Antonium & Cleopatram ab Augusto gestam denotat.

*Partus*. Cæsariionem ex Cleopatra susceptum indicat.

Pag. 319 *Donare*. Cleopatram, quam fratre cæso præfecit Ægypto.

*Satellitibus*. Achillæ, præfecti regii.

Pag. 320 *Pax ubi parta*. Compositis inter se rebus, & reconciliata fratri Cleopatra, exstruitur convivium. *Duci*. Ptolemæo. *Donisque ingentibus emptæ est*. Debuerat pater ejus, qui tum rex erat, Cæsari septingentes HS. inde qua-

dringentes petebat ad alendum exercitum. Plut. in Cæs.

*Nec summis* &c. Non jam crustis secti marmoris testæ parietum superficies: sed stabat sibi, idest, per se solidus, non incrustatus & alteri insertus, Achates lapis, de quo Plin. lib. 37, cap. 10, & Porphyrites, de quo idem lib. 36, cap. 7.

*Tyrio* &c. Purpureo, a Tyro; ubi optimus purpurarum si-  
ve muricum piscatus.

*Virus* &c. Idest, non semel tantum medicato liquore tin-  
cta fuit.

*Plumata*. Intertexta auro atque varii coloris liciis: licia  
potro sunt fila, quibus textrices in telis conficiendis impli-  
cant stamina; & nonnumquam pro staminibus ipsis acci-  
piuntur.

Pag. 321 *Torta caput. Tortis crinibus Æthiopes*, inquit  
Martialis lib. Spect. ep. 3. *Refugosque gerens* &c. Rejectedos  
in cervicem, & Solis vapore adustos.

*Solvit* &c. Ut rariora essent fila, discrevit.

*Dentibus hic* &c. Pedibus eburneis rotundas mensas citreas  
imposuere.

*Non sit ille* &c. Sensus est: tam opima præda non Cæ-  
sarem modo, nefandum hominem; sed vel continentissimos  
illos *pauperis avi* duces alliceret.

*Sordidus* &c. Quint. Cincinnatus, qui agrum trans Tybe-  
rim fodiens a legatis Dictator salutatus est. Alii Serranum  
intelligunt, juxta illud Virg. Æn. lib. 6:

*Te sulcos, Serrane, terentem.*

Pag. 322 *Nobile sed* &c. Sed vinum Merocæum, quod paucis  
annis nobilitatem saporis odorisque consecutum est, decocta  
cruditate: Meroe autem insula est Nili maxima. Phalerum  
proprie e Campania; at hic pro nobili & generoso quolibet  
vino sumitur, quod *indomitum*, idest in doliis ita fervet,  
ut coerceri nequeat.

*Cecropium*. Atheniensem, a Cecrope rege. *Platona* &c.  
Plato in Ægyptum ad prophetas & sacerdotes profectus arca-  
na & disciplinas eorum edidicit. Laertius lib. 3.

*Capacior*. Idest, qui noscendis mundi caussis sit magis  
idoneus.

Pag. 323 *Eudoxi* &c. Eudoxius iste fuit Cnidius, auditor Pla-  
tonis, qui cum Crysippo medico in Ægyptum profectus, an-  
ni rationem reversus Græcis tradidit, & Ephemeridas scri-  
psit. Laert. lib. 8. Hujus autem Fastis, idest rationi anni,  
Cæsar dicit suam anni correctionem non cessuram, qua ob-

minat. Appellat porro Zodiacum circulum anni mutatorem, quod Sol hujusmodi circulum percurrens varias anni temperates efficiat.

*Ignē superjecto.* Quum scilicet Mercurius aquarum dominus aperit ora Nili, & Sirii ardor ejusdem aquas tumefacit.

*Auctusque &c.* Ait non ante flumen hoc auctus suos coartare, quam accesserit Autumni Æquinoctium.

Pag. 315 *Zephyros &c.* Optime animadvertit Scaliger Auctorem confudisse cum Zephyris ventos Etesias stato tempore spirantes, idque per multos dies. Hi porro venti non ab Occidente, ut Zephyri, sed a Septentrione spirant; qui pelles nubila & vapores in magnos Æthiopie montes incrementum Nili promovent; vel qui obsistentes Nilo fluenti Septentrionem versus ab Austro, & mare Mediterraneum in Nilum trudentes, efficiunt, ut undæ fluminis cursu coercito fundantur in campos. Hæc omnia quum Auctor adscribat Zephyris flantibus ab Occidente, causas quidem indicat, erat tamen in definiendo situ & plaga.

*Nec non &c.* Vetustissima opinio fuit, ut ipse lusit Anacreon, Solem & Sidera Oceani aquis pasci, scilicet aquam in aerem & deinde in ignem converti. Hinc ait Auctor Solem, quum accesserit ad Tropicum Cancræ, tantam aquarum vim in aerem tollere, ut ab ipso aere nequeat attenuari, & altius evehi; proptereaque noctis tempore superstitem aquarum partem in terram delabi, & Nilo flumini incremento esse.

Pag. 316 *Quasdam &c.* Explicat demum Sacerdos ille Ægyptius sententiam suam, affirmans quædam flumina diu post Orbem conditum fortuita aquarum collectione e terræ sinu erupisse, ac propterea esse vaga & inconstantia; quædam vero ab ipsa mundi origine certo alveo & statis legibus decurrentia Creatoris jussu exstitisse.

*Sesostric.* Assyriorum Rex, ab aliis devictis Regibus curru junctis vehi, atque ita triumphare solitus.

*Longi populos &c.* Ad Æthiopas nempe Μαροβίς.

*Cade &c.* Decimo quoque milite sorte ducto.

Pag. 317 *Splittitiis.* Æstivo tantum; nam hibernum *Bruma* nomine appellant Latini Scriptores, ut monuimus alias.

*Hiemes.* Hiemis vocabulo aquarum abundantiam indicat, quæ apud nos hiberno tempore decidunt, & ex quibus sui juris quasi factis incrementum Nilus accipit.

*Plaças Phabi.* Zonam torridam.

Pag. 318 *Pbila.* Oppidum ab Arabia Ægyptum dividens.

*Abaton &c.* Ægypti Petra in palude Memphitica, sic dicta, quia inaccessa. Ibi Osiris Rex sepultus fuerat.

Pag. 329 *Dignatur &c.* Pothinus scilicet Cæsaris quoque sanguine viles suas manus, seque famulum cohonestare nititur.

*It scelus &c.* Pœna de Cæsare tyranno sumenda a Romanis Ægyptiorum pene scelus evaserat, interficiendique tyranni gloria atque exemplum fere perierat.

*Cessas &c.* Perinde ac solus esses, neque tali exercitu instructus, cessas accurrere ad has Cleopatraz cum fratre nuptias impediendas & opprimendas?

*Senem.* Cæsarem scilicet formæ illecebris & lenociniis.

Pag. 330 *Si fuerit &c.* Si fratri placere cœperit.

*Perdidimusque &c.* Nisi patris tot sceleribus novum hoc quoque scelus adjungamus.

*Ad scelus &c.* Magnum est fatum nostrum & potens ad scelera, quin sit necesse nobis, ut Pompejo & Cæsari, opes populorum, ac regna movere.

Pag. 331 *Non sibi dant.* Idest, non ut se vindicent in libertatem, Cæsarem interficere parati sunt; sed ut vel exiguam mercedem aliquam consequantur.

*Quid te &c.* Quid hostilius efficere possent in Cæsarem Ægyptii, si in eundem dimicaret, Pompejum exceptum hospitio defensuri?

Pag. 332 *Aderant &c.* Pothinus intra, Achilles extra Urbem. Plutarchus refert, tonsorem Cæsaris, hominem timidissimum, dum omnia curiose exploraret, percepisse insidias Cæsari strui ab Achilla & Pothino, indiciumque rei detulisse; Cæsarem cœnaculum præsidio cinxisse, & Pothinum interfici jussisse; Achillam vero fuga in castra elapsum intulisse ei difficillimum bellum &c. Aliter Cæs. lib. 3 de Bello Civ.

*Non rapuere.* Non temere & raptim aggressi sunt.

*Justos.* Pleno & ordinato exercitu paratos ad pugnam. Liv. lib. 39, cap. 2: *Eos primo levibus præliis fatigavit; postremo coactos in aciem descendere justo prælio devicit.*

Pag. 333 *Causa &c.* Iniqua, nec felicem exitum promittente.

*Fixo . . . in hospite.* Tamquam proposito signo, quo sagittas dirigat.

*Tyriis.* Ob Tyrionum coloniam.

*Sic barbara c.* Instar Medæ, quæ Apsyrtæ fratre discerpto insequentem patrem, aurei velleris ab Iasone rapti vindicem, retardavit.

Pag. 334 *Æstimat.* Quum verbum hoc optimis Interpretibus.



nullius esse significationis hoc in loco videatur, conjectantur legendum esse *Res minima*. Si huic conjecturæ subscripseris, omnia clara.

*Non Pontus* &c. Non bellum Ponticum a Pharnace Mithridatis filio motum, quem patrium regnum in potestatem suam redigere conatum vicit, ac Ponto detrusit.

*Et gelido* &c. Non Hispanica bella, quorum alterum in Petrejum & Afranium, in Pompeji filios alterum.

*Qua se* &c. Regiæ enim pars, in quam Cæsar habitandi causa initio erat inductus, habebat aditum ad portum & ad reliqua navalia. Cæs. Comm. 3.

Pag. 335 *Ceruchi*. Antennarum cornua, ab ἑλκῶ & κίρας.

*Sed quæ vicina* &c. Præter alias ædes, celeberrimam quoque Ptolemæi Philadelphi Bibliothecam ignis absumpsit.

*Clastrum pelagi*. Alexandriae namque ponte conjungitur.

*Proteor*. Ægypti regis, tempore belli Trojani.

Pag. 336 *Nec non subrepta* &c. Interim Arsinoe, filia minor Ptolemæi regis, vacuum possessionem regni sperans ad Achillam se ex regia trajecit, unaque bellum administrare cœpit. Sed orta celeriter inter eos de principatu controversia, quum alter alteri insidiaretur, & summam imperii ipse obtinere vellet; præoccupat Arsinoe per Ganymedem Eunuchum, nutricium suum, atque Achillam interficit. Cæs. Comm. Civ. bell. 3, & Hirtius 4.

*Potuit discrimine* &c. Vel unum illud Cæsaris summo cum discrimine factum meretur in omne ævum propagari.

*Molis in exigua* &c. In aggere circa pontis oppugnationem.

Pag. 337 *Respexit* &c. Subiit illius animum memoria & imago Scævæ, qui unus in mediis hostibus fortiter Dyrrhachii sustinuit Pompeji copias, victoriamque ejus moratus est.



*Errata in Notis Juvenalis & Persii sic Corrige.*

Pag.	4	lin.	14	<i>quis</i>	<i>quid</i>
			36	<i>Tyaris</i> , Tyarus	<i>Gyaris</i> , Gyarus
	6		11	<i>Cleantbus</i>	Cleanthas
	8		5	cedunt	cedant
	12		9	qum	qui
	13		17	in fluentem	influentem
			21	Catechesis	Catachresis
	25		21	Vubsiniensi	Vulsiniensi
	27		33	Trypheram	Trypherum
	32		24	templo	in templo
	34		1	AULII	AULI



▲▲▲▲▲▲▲▲  
 2562886A  
 ▼▼▼▼▼▼▼▼



886

B.N.C. - FIRENZE

B.7.4.313



L F 2 5 6 2 8 R F

